

RRUGA E PARTISË

ORGAN
TEORIK DHE POLITIK
I KOMITETIT QËNDROR
TË PARTISË SË PUNËS
& TË SHQIPËRISË

Adresa:
«RRUGA E PARTISË»
pranë KQ të PPSH - Tiranë

Pajtimet:
për 6 muaj 15 lekë, 1 vit 30 lekë
Jashtë shtetit:
për 6 muaj 18 lekë, 1 vit 36 lekë

Nëntor 1981
Viti XXVIII i botimit

Përmbajtja:

RAMIZ ALIA - FJALA E HAPJES SË KONGRESIT TË 8-TË TË PARTISË SË PUNËS TË SHQIPËRISË

7

ENVER HOXHA - RAPORT MBI VEPRIMTARINË E KOMITETIT QENDROR TË PARTISË SË PUNËS TË SHQIPËRISË, MBAJTUR NË KONGRESIN E 8-TË TË PPSH

11

Në Kongresin e 8-të të PPSH



SHOKU ENVER HOXHA

duke mbajtur raportin «Mbi veprimtarinë e Komitetit Qendror të PPSH»

- | | |
|----------------------|----------------------|
| 21) IZET DASHI | 44) QIRJAKO MIHALI |
| 22) JORGO SULJOTI | 45) RAHMAN KUMBARO |
| 23) KADRI HAZBIU | 46) RAMIZ ALIA |
| 24) KRISTAQ RAMA | 47) RAQI IFTICA |
| 25) LENKA ÇUKO | 48) RITA MARKO |
| 26) LUMTURI REXHA | 49) RESMI SHAMETI |
| 27) LLAMBI GEGPRIFTI | 50) SALIE KUKLI |
| 28) MANUSH MYFTIU | 51) SIMON BALLABANI |
| 29) MEHMET SHEHU | 52) SIMON STEFANI |
| 30) MIHALLAQ QIRJAKO | 53) SKËNDER GOZHITA |
| 31) MINE GURI | 54) SOFOKLI LAZRI |
| 32) MUHO ASLLANI | 55) SPIRO KOLEKA |
| 33) MYSLIM PEZA | 56) SULEJMAN BUSHATI |
| 34) NAUNKA BOZO | 57) SHEME MARA |
| 35) NEXHMIJE HOXHA | 58) SHUAIP ROSHAJ |
| 36) OSMAN KRAJA | 59) TIMO MUÇI |
| 37) PALI MISKA | 60) THOMA DINE |
| 38) PETRIT GAÇE | 61) VASIL ANAGNOSTI |
| 39) PETRIT RADOVICKA | 62) VITO KAPO |
| 40) PETRO DODE | 63) XHANFISE KEKO |
| 41) PILO PERISTERI | 64) XHEMAL DAUTI |
| 42) PRENDA DODA | 65) XHEVAIR LILA |
| 43) PROKOP MURRA | 66) XHEVDET KUÇI |

(Me vota të njëzëshme miratohet përbërja e presidiumit të kongresit. Pasi shokët e presidiumit zënë vend, kalohet në zgjedhjen e sekretarisë së kongresit).

Propozohet që sekretaria e kongresit të përbëhet nga 15 shokë, dhe konkretisht të jenë:

- | | |
|------------------|------------------------|
| 1) SIMON STEFANI | 9) HATIKA HAJNAJ |
| 2) BEHAR SHTYLLA | 10) MIHALLAQ GJINIKASI |
| 3) DED GJERGJI | 11) MITI NITO |
| 4) DRINI NUSHI | 12) PELIVAN MANGA, |
| 5) FOTO ÇAMI | 13) PIPI MITROJORGJI |
| 6) GAFUR ÇUÇI | 14) QEMAL BREGASI |
| 7) HAXHIRE SHEHU | 15) XHELIL GJONI |
| 8) HASAN BANJA | |

(Miratohet njëzëri përbërja e sekretarisë së kongresit.

Gjithashtu, njëzëri u miratua edhe rendi i ditës dhe rregullorja e punimeve të kongresit).

Tani fillojmë nga pika e parë e rendit të ditës:

Për të mbajtur raportin «Mbi veprimtarinë e Komitetit Qendror të Partisë së Punës të Shqipërisë» fjalën e ka Sekretari i Parë i Komitetit Qendror shoku Enver Hoxha.

RAPORT MBI VEPRIMTARINË E KOMITETIT QENDROR TË PARTISË SË PUNËS TË SHQIPËRISË

MBAJTUR NGA SEKRETARI I PARË
I KQ TË PPSH, SHOKU ENVER HOXHA,
NË KONGRESIN E 8-TË TË PARTISË

Të dashur shokë e shoqe,

Partia dhe mbarë populli ynë vijnë në këtë Kongres me suksese të mëdha e fitore të shënuara. Shqipëria socialiste u ngjiti një shkallë më lart në zhvillimin e saj ekonomik e kulturor, bëri një hap të ri përpara në rritjen e mirëqenies së masave dhe në forcimin e mbrojtjes së Atdheut.

Pesë vjetët që kanë kaluar nga koha kur u mbajt Kongresi i 7-të, janë një periudhë lufte heroike e masave tona punonjëse në të gjitha frontet për të çuar edhe më përpara ndërtimin socialist, për ta begatuar e lulëzuar edhe më shumë jetën tonë të re. Nën udhëheqjen e Partisë dhe me besim të patundur në vijën e saj të drejtë, klasa punëtore, fshatarësia kooperativiste, rinia dhe inteligjencia i shkrinë pa kursim forcat e tyre fizike e mendore për të përballuar e kapërcyer me sukses vështirësitë e rritjes socialiste, si dhe ato që na krijuan armiqtë e jashtëm.

Ashtu si në kongreset e mëparshme, edhe në të tanishmin Partia jonë vjen ballëllart e faqebardhë, pse detyrat e mëdha që mori për-sipër i plotësoi me sukses, pse besimin e patundur që ka populli tek ajo e justifikoi plotësisht. Populli ynë mund të jetë i kënaqur nga puna dhe mundi i tij. Kjo ka qenë një punë krijuese dhe e frytshme, që i solli atij gëzime e përparime të reja, që e bëri atë më optimist e më të lumtur.

Industrializimi i vendit edhe gjatë planit të gjashtë pesëvjeçar eci përpara pa u ndalur. Vlerësimi i pasurive tona minerare dhe i lëndëve të tjera të para të vendit arriti një shkallë më të lartë. Me ngritjen e objekteve të reja, siç qenë kombinati metalurgjik «Çeliku i

Partisë», Uzina e Ferrokromit, ajo e Pirometalurgjisë, Uzina e Përpunimit të Thellë të Naftës etj., një pjesë e konsiderueshme e tyre tani transformohet dhe përpunohet në vend, duke krijuar kështu një bazë të shëndoshë e të sigurt për zhvillimin e tërë ekonomisë. Ky është një sukses i vijës së drejtë të Partisë, siç është edhe sigurimi i bazës së fuqishme energjetike, që u zgjerua akoma më shumë me vënien e plotë në funksionim të turbinave të hidrocentralit «Drita e Partisë».

Bujqësia jonë bëri hapa të rinj e të mëdhenj në të gjitha drejtimet. Orientimi i Partisë për ta shndërruar atë në një bujqësi socialiste të prodhimit të madh modern, mbi një bazë gjithnjë e më të fuqishme teknike e duke u mbështetur në dijet më të reja agroteknike, u provua në praktikë se ishte një orientim i drejtë e plotësisht i realizueshëm. Shtimi nga viti në vit i produkteve bujqësore e blegtorale, plotësimi gjithnjë e më mirë i nevojave të popullsisë e të industrisë me këto produkte e vërtetojnë plotësisht këtë gjë.

Përparime të dukshme janë bërë në fushën e kulturës e të arsimit. Kultura jonë e zhvilloi dhe e thelloi më tej përmbajtjen socialiste, fizionominë e saj kombëtare dhe frymën popullore. Kultura dhe të gjitha vlerat e saj po hyjnë më shumë në masat. Është meritë e kulturës sonë të re që ajo ka përballuar presionet e ndikimet e ndryshme të kulturës borgjeze e revizioniste duke ruajtur origjinalitetin dhe tiparet e saj socialiste. Arsimi popullor eci përpara duke plotësuar e zbatuar porositë e Partisë për të siguruar shkollimin e gjerë të brezit të ri dhe për t'i dhënë vendit specialistë në nivelin që kërkon zhvillimi ynë në etapën e tanishme dhe në të ardhmen.

Në këtë periudhë të rëndë krizash që kanë përfshirë botën kapitaliste e revizioniste, ku ka tronditje të shumta politike, stanjacion e rënie të prodhimit, ulje të nivelit të jetesës dhe dekadencë të vlerave morale, te ne ka stabilitet të plotë ekonomik e politik, shoqëria është e shëndoshë, njerëzit janë të sigurt për të sotmen e për të ardhmen. Gjatë pesëvjeçarit që kaloi, një kontingjent i madh njerëzish, të edukuar dhe të arsimuar nga Partia e pushteti ynë popullor, janë futur për herë të parë në punë, duke e shtuar e fuqizuar edhe më shumë armatën e madhe të punonjësve të qytetit e të fshatit. Rëndësia e këtij fakti bëhet edhe më e madhe po të kemi parasysh se sot në botë jo vetëm që nuk i sigurohet punë brezit të ri, por mbeten pa punë edhe nga brezi i vjetër.

Pushteti ynë popullor është forcuar e demokratizuar më tej. Pjesëmarrja e masave në qeverisjen e vendit është bërë më aktive dhe është ngritur në një nivel më të lartë. Është zgjeruar më tej demokracia jonë socialiste dhe janë krijuar kushte më të mira që njerëzit t'i gëzojnë sa më të plotë drejtat e garantuara dhe të realizojnë më mirë detyrat e tyre ndaj shoqërisë.

Situata e brendshme s'ka qenë kurrë më e fortë se sot. Kompaktësia e uniteti i popullit, aleanca e klasës punëtore me fshatarësinë kooperativiste, bashkëpunimi dhe solidariteti midis shtresave të ndryshme të shoqërisë sonë janë forcuar e konsoliduar më tej. Lidhjet e Partisë me popullin janë çelikosur, besimi reciprok është kalitur akoma më shumë.

Shprehje e shkëlqyer e këtij uniteti të madh është ajo vendosmëri, ai hov dhe ai heroizëm me të cilin populli ynë lufton për realizimin e detyrave që shtrun Partia, për kapërcimin e vështirësive të ndryshme që kanë dalë në rrugën tonë, për përballimin me sukses të bllokadës dhe të rrethimit imperialisto-revizionist.

Shqipëria socialiste, në sajë të vijës së drejtë dhe të kujdesit të veçantë të Partisë, ka sot një mbrojtje të sigurt e të pathyeshme. Populli dhe ushtria jonë e mbajnë kurdoherë lart vigjilencën, qëndrojnë syptrembur e të gatshëm për mbrojtjen e lirisë e të pavarësisë së Atdheut, të fitoreve të socializmit.

Vendin tonë e nderojnë dhe e respektojnë popujt dhe shtetet përparimtare e paqedashëse, kudo në botë. Pozita e tij ndërkombëtare është e fortë. Miqtë e dashamirët e tij shtohen e shumohen nga dita në ditë. Lufta e vendosur parimore kundër imperializmit e revizionizmit modern e ka rritur simpatinë e dashurinë e marksistë-leninistëve, të revolucionarëve, të njerëzve të ndershëm e demokratë për Partinë e Punës dhe Republikën Popullore Socialiste të Shqipërisë.

Partia dhe populli ynë i bënë ballë me sukses provës së rëndë në të cilën e vuri vendin tonë prerja e menjëhershme dhe brutale e marrëdhënieve ekonomike nga ana e Kinës. Revizionistët kinezë menduan se me veprimin e tyre armiqësor do të çoroditnin ekonominë tonë dhe do të ndalonin për një kohë të gjatë zhvillimin e saj, do ta detyronin Shqipërinë të bënte lëshime politike e ideologjike, t'u ndërte dorën të huajve dhe të kërkonte përkrahje e ndikim nga jashtë. Por ata, e pas tyre edhe reaksioni ndërkombëtar, që shpreso i se Shqipëria do të detyrohej të ndërronte rrugë, dështuan plotësisht. Vështirësitë e krijuara populli ynë i kapërceu me një pjekuri të madhe politike e me frymë të lartë patriotike, me një mobilizim të ri të forcave dhe me bindje të thellë në fitoren e luftës së tij.

Në Kongresin e saj të 8-të Partia jonë vjen e kalitur në beteja të reja dhe me një përvojë më të pasur. Ajo vjen si një armatë e madhe dhe e edukuar me ideologjinë proletare, marksiste-leniniste, me një unitet të fortë të brendshëm dhe e lidhur ngushtë me popullin, me aftësi të rritura organizuese, mobilizuese e drejtuese, e gatshme të marrë përsipër, si gjithnjë, detyra të reja e më të mëdha dhe t'i realizojë ato, si gjithmonë, me sukses.

Mbajtja e këtij Kongresi koincidon me një përvjetor të lavdishëm, me përvjetorin e themelimit të Partisë sonë heroike të Punës. Dyzet vjet më parë populli ynë u besoi komunistëve shqiptarë fatet e tij, jetën dhe të ardhmen e Atdheut. Partia jonë e justifikoi këtë besim me veprën e saj të lavdishme, me fitoren e revolucionit dhe me krijimin e Shqipërisë së re socialiste. E frymëzuar nga besimi i popullit dhe e ndërgjegjshme për përgjegjësinë historike e për misionin e lartë që mori përsipër, ajo e udhëhoqi popullin shqiptar me mendje të mprenhtë e dorë të sigurt nga njëra betejë në tjetrën, nga njëra fitore në tjetrën.

Realizimet madhështore të arritura në vitet e jetës sonë të lirë, nën udhëheqjen e Partisë, treguan se socializmin në Shqipëri, lirinë e pavarësinë e Atdheut tonë, perspektivën tonë të ndritur s'ka forcë që

t'i tronditë e t'i errësorë. Ndjekja me konsekuencë e parimit marksist-leninist të mbështetjes në forcat e veta, politika e krijimit të një industrie moderne të mbështetur në lëndët e para të vendit dhe të një bujqësie që garanton ushqimin e popullit me produktet e veta, përgatitja e kuadrove të mjaftueshëm, teknikë e shkencorë, të aftë për të punuar e për të drejtuar në çdo sektor, kanë qënë shpëtimtare në të gjitha drejtimet. Është kjo politikë e urtë e largpamëse e Partisë që ka krijuar atë bazë të sigurt mbi të cilën mbështetet zhvillimi ynë i pandalshëm ekonomik e kulturor, garantohet rruga jonë socialiste.

Arritja e pavarësisë ekonomike krahas asaj politike, sigurimi i mbrojtjes së vendit nga vetë populli ynë, edukimi dhe armatosja e masave punonjëse me ideologjinë marksiste-leniniste janë ato shtylla të forta e të palëkundshme mbi të cilat qëndron kalaja jonë socialiste, janë tiparet themelore që karakterizojnë një shtet me të vërtetë socialist. Këto realizime, të marra në tërësi, përbëjnë edhe përvojën historike të socializmit në Shqipëri. Përvoja e Shqipërisë tregon se edhe një vend i vogël e me një bazë materialo-teknike të prapambetur mund të arrijë një zhvillim ekonomik e kulturor shumë të shpejtë e të gjithanshëm, mund të sigurojë pavarësinë e tij e të përballojë sulmet e kapitalizmit e të imperializmit botëror, kur udhëhiqet nga një parti e vërtetë marksiste-leniniste, kur është i vendosur të luftojë deri në fund për idealet e tij dhe kur ka besim se mund t'i realizojë ato.

Në rrugën e ndritur nëpër të cilën ka ecur gjatë dyzet vjetëve të jetës së saj, Partia e Punës e Shqipërisë do të ecë me vendosmëri e pa u lëkundur edhe në të ardhmen. E lidhur si mishi me kockën me popullin, në krye të tij dhe bashkë me të, ajo do të luftojë me devotshmëri e pa marrë parasysh asnjë sakrificë, për t'u siguruar njerëzve tanë, Atdeut tonë socialist përparime e fitore të reja.

ZHVILLIMI I EKONOMISË DHE DETYRAT E PARTISË

Ekonomia jonë socialiste hyn në pesëvjeçarin e ri të zhvillimit të saj e stabilizuar, plot dinamizëm dhe me mundësi të mëdha për të zhvilluar e zgjeruar më tej prodhimin shoqëror, për të rritur efektivitetin e saj në të gjitha drejtimet.

Detyrat kryesore të planit të gjashtë pesëvjeçar u plotësuan në përgjithësi me sukses. Kjo e ka fuqizuar edhe më shumë bazën materialo-teknike të vendit, ka shtuar më tej burimet e lëndëve të para e të energjisë, ka siguruar kushte më të mira për një zhvillim të harmonishëm, të vrullshëm e të pandalshëm të ekonomisë. Gjatë pesëvjeçarit të kaluar vazhdoi zhvillimi me ritme të shpejta i forcave prodhuese, u thellua më tej zhvillimi intensiv i ekonomisë dhe revolucioni tekniko-shkencor njohu përparime të reja të rëndësishme. Industria, bujqësia dhe degët e tjera të ekonomisë ecën më përpara. Në vitin 1980, kundrejt vitit 1975, prodhimi shoqëror u rrit afro 25 për qind dhe pro-

dhimi industrial mbi 34 për qind, me një ritëm 2 deri 3 herë më të shpejtë se ritmi i shtimit të popullsisë.

Duke zbatuar me konsekuencë politikën ekonomike të Partisë u bënë përmirësime të ndjeshme në strukturën e prodhimit industrial dhe u rrit pesha specifike e mjeteve të prodhimit. Industria plotësoi më mirë nevojat e popullit, u rrit roli i saj për zhvillimin e gjithanshëm të ekonomisë dhe për mbrojtjen e vendit.

Në krahasim me pesëvjeçarin e pestë, prodhimi bujqësor u rrit mbi 21 për qind. Bujqësia plotësoi nevojat e vendit për drithëra buke, për produkte ushqimore e për lëndët e para më të domosdoshme dhe rriti vëllimin e eksportit të produkteve bujqësore.

Për plotësimin e detyrave të planit të gjashtë pesëvjeçar Partia dhe shteti ynë shfrytëzuan në një shkallë më të lartë burimet dhe mundësitë e brendshme të vendit. U sigurua financimi i pandërprerë i zhvillimit të ekonomisë e të kulturës, u ndërtuan dhe u vunë në shfrytëzim rreth 300 vepra të rëndësishme dhe eksporti i mallrave u rrit mbi 51 për qind.

Fuqia ekonomike në rritje dhe zbatimi i një vargu masash me karakter ekonomik-shoqëror garantuan mirëqenien e arritur të popullit dhe çuan në ngritjen e mëtejshme të saj. Të ardhurat reale për frymë të popullsisë u rritën si në qytet edhe në fshat. Qarkullimi i mallrave me pakicë u shtua afro 20 për qind. U përmirësuan më tej kushtet e strehimit të popullit dhe u morën masa për zgjerimin e shërbimeve sociale. Shkollat e larta i mbaruan afro 20 mijë veta dhe ato të mesmet mbi 113 mijë ose 57 për qind më shumë se në pesëvjeçarin e pestë.

Këto arritje në zhvillimin e përgjithshëm ekonomik-shoqëror të vendit marrin një kuptim të veçantë po të kemi parasysh atë që po ndodh në botën kapitalisto-revizioniste, ku kriza ekonomike, me pasojat e saj të rënda për masat punonjëse dhe për tërë jetën e vendit, ka shkaktuar stanjacione e rënie të prodhimit. Këto arritje shënojnë një fitore të madhe për Partinë dhe popullin tonë.

Nga tribuna e këtij Kongresi, në emër të Partisë e të popullit, përshëndes dhe përgëzoj punëtorët, specialistët dhe kuadrot e ndërtimit e të industrisë, të cilët, edhe në rrethanat e vështira që na krijuan revizionistët kinezë, duke iu përgjigjur thirrjes së Partisë, i dolën zot punës dhe ditën të ndërtojnë e të vënë në shfrytëzim veprat e mëdha të pesëvjeçarit të gjashtë, të cilat e fuqizuan më tej atdehun tonë socialist.

Me gjithë sukseset e arritura, ne jemi të ndërgjegjshëm edhe për mosplotësimin e disa detyrave të planit pesëvjeçar, si në investimet e në ndërtimet, në prodhimin bujqësor, në disa produkte industriale dhe në rendimentin e punës. Partia, organet e shtetit dhe kolektivat punonjës i kanë analizuar me vëmendje këto mosrealizime dhe kanë nxjerrë mësim për të mënjnuar dobësitë e të metat e punës organizuese e drejtuese në ekonomi.

Realizimet e mëdha me rëndësi historike që janë arritur deri sot në të gjitha fushat, si dhe përvoja e pasur e fituar në punën dhe në luftën e Partisë e të popullit për ndërtimin dhe mbrojtjen e socializmit,

përbëjnë një mbështetje të fuqishme politike, ekonomike e shoqërore për të ecur me siguri dhe me guxim përpara.

Komiteti Qendror, në bazë të vijës së përgjithshme dhe të politikës ekonomike të Partisë për ndërtimin e socializmit, pas një pune dhe studimi të gjithanshëm, pas një konsultimi të gjerë popullor, përgatiti Projektdirektivat për planin e shtatë pesëvjeçar të zhvillimit të ekonomisë e të kulturës për periudhën 1981-1985, të cilat ia paraqet për shqyrtim e miratim Kongresit. Detyra themelore e këtij pesëvjeçari është: «Zhvillimi i përgjithshëm i ekonomisë, duke u mbështetur tërësisht në forcat tona, mbi bazën e thellimit të industrializimit socialist të vendit, të fuqizimit e të intensifikimit të bujqësisë, të rritjes së efektivitetit të ekonomisë, të zhvillimit të revolucionit tekniko-shkencor dhe të përsosjes së marrëdhënieve socialiste në prodhim, me qëllim që të garantohen dhe të ngrihen gradualisht mirëqenia materiale dhe niveli kulturor i masave punonjëse, të forcohet më tej rendi socialist dhe fuqia mbrojtëse e atdheut».

Në këtë detyrë sintetizohen drejtimet dhe objektivat kryesorë të zhvillimit të ekonomisë e të kulturës gjatë pesëvjeçarit të shtatë, i cili dallohet nga një varg karakteristikash të veçanta.

Ky është i pari plan pesëvjeçar që do të realizohet duke u mbështetur plotësisht në forcat e në mundësitë tona. Shqipëria është sot i vetmi vend në botë që zhvillohet dhe ecën përpara në rrugën e socializmit pa asnjë lloj ndihme e kredie nga jashtë. Kjo është një provë e madhe, por e lavdishme për popullin e Partinë tonë dhe fitorja është e sigurt, sepse, duke ecur në bazë të marksizëm-leninizmit, jemi përgatitur me kohë për këtë hap vendimtar.

Plani i ri pesëvjeçar përmban objektiva e detyra më të mëdha se çdo plan tjetër, të cilat janë të bazuara shkencërisht dhe plotësisht të realizueshme. Për të pesë vjetët, 1981-1985, vëllimi i prodhimit shoqëror dhe i investimeve do të jetë më i madh se vëllimi i realizuar gjatë katër pesëvjeçarëve të parë të marrë së bashku, ndërsa vëllimi i eksportit do të jetë akoma më i madh. Në vitin 1985 kundrejt vitit 1980, prodhimi shoqëror parashikohet të rritet 34 deri 36 për qind, me një ritëm mesatar vjetor prej 6,4 për qind. Fondet për investime dhe ndërtime do të përdoren për ngritjen e afro 750 veprave të rëndësishme të zhvillimit të ekonomisë e të kulturës.

Me mundësitë që krijohen nga rritja e prodhimit dhe e të ardhurave kombëtare, në vitin 1985 kundrejt vitit 1980, fondi i konsumit të popullit parashikohet të rritet 21 për qind dhe qarkullimi i mallrave me pakicë 22 deri 24 për qind. Detyra të rëndësishme parashikohen për zhvillimin e arsimit e të kulturës, për shëndetësinë, strehimin dhe shërbimet e tjera jetësore.

Në caktimin e këtyre detyrave e ritmeve janë pasur parasysh si mundësitë që ka dhe që do të krijojë ekonomia, ashtu edhe nevojat për zhvillimin e ekonomisë, për zënieën me punë të forcave të reja aktive, për fuqizimin e mbrojtjes së vendit, për shtimin e rezervave, për zhvillimin e sektorëve social-kulturorë, si dhe për plotësimin gjithnjë e më mirë të kërkesave në rritje të popullsisë. Mjaft nga detyrat e këtij pesëvjeçari, sidomos ato që kanë të bëjnë me shfrytëzimin e

rezervave të naftës e të mineraleve, me caktimin e investimeve etj., janë parë në lidhje të ngushtë edhe me zhvillimin e ekonomisë në pesëvjeçarët e ardhshëm, kur do të ballafaqohemi me nevoja e kërkesa akoma më të mëdha.

Gjatë pesëvjeçarit të shtatë do të bëhen disa përmirësime të rëndësishme strukturore në fushën e prodhimit, të qarkullimit të mallrave e të konsumit të popullit. Këto përmirësime do të përfshijnë burimet energjetike, metalurgjinë e zezë, industrinë mekanike, bujqësinë, transportet, financat dhe mallrat e konsumit të gjerë etj. Përmirësimet e parashikuara do të çojnë përpara intensifikimin e ekonomisë, do të rritin efektivitetin e saj, do ta bëjnë atë më të aftë për të plotësuar nevojat e vendit dhe për t'i bërë ballë më mirë rrethimit e bllokadës, si dhe presionit të krizës ekonomike të botës kapitaliste e revizioniste.

Zhvillimi dhe fuqizimi i bazës materialo-teknike të vendit, si kurdoherë, do të bëhet në lidhje të ngushtë me përsosjen e anëve të ndryshme të marrëdhënieve ekonomike në qytet e sidomos në fshat. Masa të rëndësishme janë zbatuar e po zbatohen për zhvillimin e mëtejshëm të sistemit kooperativist dhe për ngushtimin e oborrit, për zgjerimin e specializimit e të kooperimit, për forcimin e organizimit e të drejtimit të prodhimit, për një lidhje më të mirë të shpërbllimit të punës me sasinë, cilësinë, kursimin dhe me plotësimin e detyrave të planit. Këto masa do të çohen akoma më përpara, me synim që të forcohet pareshtur rendi ynë socialist.

Për detyrat e planit të shtatë pesëvjeçar do të flitet më hollësisht në raportin e Komitetit Qendror për Projektdirektivat e zhvillimit të ekonomisë e të kulturës për periudhën 1981-1985, që do ta mbajë shoku Mehmet Shehu. Prandaj në këtë raport do të parashitohet vetëm disa probleme themelore të politikës së Partisë, që kanë të bëjnë me zhvillimin e sotëm dhe të ardhshëm ekonomik e shoqëror të vendit.

1. Fuqizimi i mëtejshëm i industrisë - faktor vendimtar për përparimin e përgjithshëm të vendit

Në politikën ekonomike të Partisë vendin kryesor e ka zënë dhe e zë industrializimi socialist i vendit, i cili, nga njëri pesëvjeçar në tjetrin është zhvilluar si një proces i madh dhe i pandalshëm. Ai ka qenë dhe është një faktor vendimtar për përparimin e përgjithshëm të vendit në rrugën e socializmit. Krijimi dhe fuqizimi i industrisë sonë shumëdegëshe, të rëndë e të lehtë, të mbështetur fuqimisht në burimet e në pasuritë tona dhe me perspektiva të qarta zhvillimi, është vepër monumentale e Partisë dhe e popullit tonë, e arritur me shumë punë, sakrificë dhe me një heroizëm të pashoq, është vepër me rëndësi historike për brezat e sotëm dhe të ardhshëm.

Në pesëvjeçarin e shtatë industria jonë do të ecë akoma më përpara dhe do të zhvillohet në front të gjerë. Për këtë degë do të përdoren afro 46 për qind e të gjitha investimeve të pesëvjeçarit. Politika e

Partisë për zhvillimin e industrisë synon: të konsolidohet struktura shumëdegëshe e industrisë, duke i dhënë si gjithnjë përparësi industrisë së rëndë; të ruhet dhe të përmirësohet më tej bilanci pozitiv i burimeve energjetike, duke i kushtuar rëndësi të veçantë industrisë së naftës; të zhvillohet më tej industria nxjerrëse minerare dhe ajo përpunuese, duke u futur edhe në shfrytëzimin e mineraleve të reja; të bëhen përmirësime të ndjeshme në strukturën e mjeteve të prodhimit e të mallrave të konsumit; industria të vihet akoma më shumë në shërbim të intensifikimit të bujqësisë; të rriten aftësitë prodhuese ekzistuese nëpërmjet rikonstruksionit dhe modernizimit të tyre.

Duke ecur me vendosmëri në këtë rrugë, prodhimi industrial do të vazhdojë të rritet me ritme të shpejta. Në vitin 1985 kundrejt vitit 1980 ai do të rritet 36 deri 38 për qind. Ky zhvillim material, i lidhur ngushtë edhe me një varg faktorësh të tjerë ekonomikë e shoqërorë, do të bëjë të mundur që vendi ynë të ecë përpara si një vend me industri dhe bujqësi të përparuar.

Një vëmendje të posaçme Partia u kushton industrisë energjetike, nxjerrjes së naftës, të gazit e të qymyrgurit, prodhimit të energjisë elektrike. Ne kemi krijuar një sistem të fuqishëm e të pavarur energjetik, që plotëson nevojat në rritje të vendit për energji dhe siguron nga eksporti i saj të ardhura të rëndësishme valutore. Kjo është një fitore e madhe e politikës së drejtë të Partisë, është një mbështetje e sigurt për zhvillimin e tërë ekonomisë kombëtare.

Kjo fitore duhet konsoliduar dhe çuar më tej, në radhë të parë duke bërë investime e duke shtuar prodhimin, por edhe duke përdorur me kursim maksimal, me kontroll të rreptë e me nikoqirllëk të gjitha burimet tona energjetike. Zgjidhja e këtyre problemeve kërkon një punë të organizuar mirë, të disiplinuar, sistematike, me baza të shëndosha shkencore e metodike. Zhvillimi i kësaj dege nevralgjike me rëndësi kapitale e strategjike shtrohet si një detyrë imperative, sidomos në kushtet e krizës energjetike botërore.

Nxjerrja dhe përpunimi i naftës e i gazit do të zënë vendin kryesor në burimet tona energjetike. Në vitin 1985 kundrejt vitit 1980 nxjerrja e naftës do të rritet 58 deri 60 për qind. Kjo është një detyrë e madhe dhe plotësisht e realizueshme, sepse mbështetet në vendburimet ekzistuese dhe në rezervat e njohura e të përvetësuara.

Realizimi i detyrave për nxjerrjen e naftës dhe të gazit, si dhe rritja e efektivitetit të shpenzimeve të mëdha që bëhen në këtë degë të industrisë, kërkojnë që naftëtarët, specialistët e kuadrot t'i kushtojnë vëmendje të posaçme përsosjes së metodave të kërkimit dhe të nxjerrjes së tyre, duke u mbështetur plotësisht në arritjet e shkencës, në zbatimin e një discipline të fortë teknike dhe të punës.

Shpenzimet për nxjerrjen e naftës e të gazit të bëhen mbi bazën e studimeve të thelluara e me përgjegjësi. Të merren masa të plota teknike, organizative dhe materiale për të shtuar nxjerrjen e naftës jo vetëm nga vendburimet e reja, por edhe nga ato të vjetrat, duke përdorur shumë më mirë se deri tani metodat intensifikuese e të dyta. Në këtë sektor jetik të ecim me ekonomi, me rezerva të sigurt e të njohura dhe të shfrytëzojmë naftën e gazin me nikoqirllëk, duke men-

duar për sot e për nesër. Forcat shkencore e teknike të angazhohen më shumë për të shpejtuar vënien në shfrytëzim dhe me efektivitet të lartë të rërave bituminoze, të kësaj pasurie të madhe të vendit që duhet futur sa më parë në qarkullim ekonomik.

Një vend të rëndësishëm në burimet energjetike të vendit zë qymyrguri, që është një lëndë djegëse masive dhe me leverdi të madhe ekonomike. Në vitin 1985 nxjerrja e qymyrgurit do të rritet 48 për qind më shumë se në vitin 1980. Kjo është një detyrë e madhe për realizimin e së cilës kërkohet një punë këmbëngulëse nga punonjësit e këtij sektori.

Vëmendja të përqendrohet jo vetëm në shfrytëzimin racional të minierave qymyrgurore ekzistuese, por edhe në hapjen me rentabilitet të minierave të reja. Të zgjerohen kërkimet për qymyre me fuqi kalorifike më të lartë dhe të koksifikueshme. Të punohet kudo për zëvendësimin e karburanteve të lëngëta me qymyr dhe për kursimin e tij. Gjithashtu është e nevojshme të merren masa edhe për pasurimin e briketit dhe të qymyreve, për të rritur leverdinë e përdorimit të tyre.

Prodhimi i energjisë elektrike në vitin 1985 kundrejt vitit 1980, do të rritet 16 për qind. Për t'u dalë përpara nevojave në rritje për energji elektrike, si dhe për të shfrytëzuar intensivisht burimet hidrike me të cilat vendi ynë është i pasur, gjatë këtij pesëvjeçari do të zhvillohen në përmasa të mëdha punimet për përfundimin e hidrocentralit të Komanit, që do të jetë më i fuqishëm nga çdo hidrocentral i ndërtuar deri tani, dhe do të bëhen përgatitjet për ndërtimin e hidrocentraleve të tjera, të mëdha e të vogla, për të përballuar jo vetëm nevojat për sot e në perspektivë, por edhe për të rritur eksportimin e energjisë elektrike.

Prodhimi dhe përdorimi i energjisë elektrike duhet të shikohen në unitet. Partia, organet shtetërore dhe ekonomike të punojnë që të ndryshojnë konceptet e njerëzve, me qëllim që energjia elektrike të vlerësohet si një pasuri e madhe kombëtare, të përdoret me kursim e me kontroll të rreptë në çdo fushë, veçanërisht në atë të prodhimit material, ku duhet të vendosen normativa të studiuara shkencërisht për çdo kilovat të harxhuar.

Perspektiva të gjera i hap pesëvjeçari i shtatë industrisë nxjerrëse dhe përpunuese të mineraleve të dobishme. Nxjerrja e mineraleve të njohura të kromit, të bakrit, të hekur-nikelit do të vazhdojë të rritet në përmasa të mëdha, nga 30 për qind deri mbi 2 herë më shumë. Tani janë krijuar kushtet që të rritet edhe nxjerrja e mineraleve të tjera të dobishme, siç janë fosforitet, kuarcitet, kripa e gurit, dolomitet, olivinitet, boksitet etj.

Nevojat e sotme dhe të perspektivës shtrojnë detyrën e zgjerimit të nxjerrjes e të pasurimit të mineraleve të varfra dhe të rritjes së shkallës së përfitimit të elementeve të dobishme, për të ngritur vlerën e pasurive tona minerale, për të shfrytëzuar edhe ato vendburime, të vjetra ose të reja, që janë të varfra nga cilësia, por të pasura nga rezervat.

Gjeologëve dhe gjithë kërkuesve të tjerë të mineraleve u vihet detyra që, mbi bazën e përgjithësimeve e të ligjësive shkencore, duke

përdorur me guxim metoda të reja e komplekse, si dhe duke përsosur organizimin e punës, të rritin efektivitetin e shpimeve dhe rezervat e këtyre mineraleve, sidomos në minierat ekzistuese, të zbulojnë minerale e vendburime të reja në masivet me perspektivë e të pashkelura.

Punëtorët dhe specialistët e minierave t'u kushtojnë rëndësi të veçantë përsosjes së teknikës dhe të teknologjisë së nxjerrjes, rritjes së shkallës së mekanizimit dhe të kualifikimit në punë, për të arritur një kthesë të dukshme në cilësinë e prodhimit, për të ulur shpenzimet dhe për të pakësuar varfërimet e humbjet e mineralit.

Metalurgjisë në përgjithësi dhe siderurgjisë në veçanti do t'u kushtohet vëmendje e posaçme jo vetëm për të thelluar përpunimin me cikël të plotë të mineraleve tona kryesore, por edhe për të forcuar pavarësinë e ekonomisë sonë nga importi. Prandaj metalurgët tanë të mobilizojnë të gjitha forcat dhe aftësitë e tyre për të njohur e përvetësuar me disiplinë të rreptë e në baza shkencore teknologjinë e shkrirjes së mineraleve dhe të përpunimit të shumëllojshëm të metaleve, për të shfrytëzuar në kompleks gjithë përmbajtjen e dobishme kryesore e shoqëruese që ato kanë, për të ulur shpenzimet materiale dhe të energjisë, të cilat ende janë të larta. Studime të thelluara dhe punë intensive kërkojnë zgjerimet e mëdha që do të vazhdojnë të bëhen në kombinatin metalurgjik «Çeliku i Partisë» për ngritjen e uzinave të tubave të llojeve të ndryshme, të llamarinës së petëzuar dhe të prodhimeve karbonike.

Tani që kemi çelikin tonë dhe kemi ngritur një industri të fuqishme mekanike, janë krijuar kushte që para kësaj dege të vihen detyra më të mëdha. Prodhimi i industrisë mekanike në vitin 1985 do të jetë 43 deri 45 për qind më i madh se në vitin 1980.

Industria mekanike e realizoi mirë detyrën që i caktoi Kongresi i 7-të i Partisë për prodhimin e pjesëve të ndërrimit, duke plotësuar 95 për qind të nevojave që ka ekonomia për to. Në këtë pesëvjeçar do të duhet të konsolidohet kjo arritje, duke përmirësuar rrënjësisht cilësinë dhe duke rritur shumë ripërtëritjen e pjesëve të ndërrimit.

Në vitet e këtij pesëvjeçari industria mekanike do të futet në një shkallë më të gjerë në prodhimin e pajisjeve dhe të makinerive për ndërtimin e linjave e të fabrikave të reja, për rikonstruksione e zgjerime të ndryshme të aftësive prodhuese. Realizimi i një detyre të tillë kërkon që të përmirësohet organizimi e drejtimi i kësaj dege të industrisë, të vihen mbi baza sa më shkencore teknologjia e përpunimit, planifikimi, kooperimi dhe standardizimi i prodhimit.

Masa urgjente e të plota të merren sidomos për përgatitjen e projekteve teknologjike e konstruktive të pajisjeve e të makinerive për objektet e reja e për rikonstruksionet që do të kryhen gjatë pesëvjeçarit. Shumë nga këto pajisje e makineri do të prodhohen gjatë pesëvjeçarit. Projektimi dhe prodhimi në kohë e me cilësi i tyre është një ndër detyrat më të vështira që duhet të përballojë industria jonë mekanike.

Futja e industrisë mekanike në rrugën e gjerë të prodhimit të makinerive shtron me forcë nevojën e kualifikimit të njerëzve e të zhvillimit të mendimit të tyre krijues, nevojën e përgatitjes së kuadrove të lartë e të mesëm edhe për profile të ngushta e specialitete të veçanta,

duke bërë për këtë qëllim ndryshimet përkatëse në programet e shkollave profesionale e të Universitetit.

Zhvillim e zgjerim të madh do të marrë në këtë pesëvjeçar industria kimike. Prodhimi i saj në vitin 1985 kundrejt vitit 1980 do të rritet 63 deri 65 për qind. Rëndësi e veçantë do t'i kushtohet shtimit të prodhimit të plehrave fosfatike dhe kimikateve për mbrojtjen e bimëve. Duke pasur tani mjaft prodhime bazë dhe një varg mbetjesh industriale e komponimesh shoqëruese të mineraleve, kimistët dhe specialistët e tjerë duhet të studiojnë e të realizojnë një gamë shumë më të gjerë prodhimesh e reagentësh kimikë, për të ulur sa më parë importin e tyre. Fillimet e sintezës kimike gjithashtu duhen çuar përpara, duke u mbështetur kryesisht në lëndët e para të vendit dhe të synohet që në një të ardhme jo të largët prodhimet e saj të bëhen një burim i mirë edhe për eksport.

Partia kurdoherë ka mbajtur parasysh që në zhvillimin e industrisë në tërësi në përputhje me nevojat e popullit, të rritet edhe prodhimi i mallrave të konsumit të gjerë, duke siguruar një stabilitet e një përmirësim të vazhdueshëm të nivelit material e kulturor të masave punonjëse. Për këtë qëllim prodhimi i industrisë së lehtë e ushqimore gjatë pesëvjeçarit do të shtohet me ritme mbi 2 herë më të larta se ritmi i shtimit të popullsisë.

Në prodhimet e industrisë së lehtë e ushqimore është e nevojshme të bëhet një kthesë e vërtetë, të arrihet një përmirësim rrënjësor në strukturën e mallrave, në asortimentet, në cilësinë, në ambalazhimin e në uljen e kostos së tyre. Kjo kthesë mund të bëhet vetëm me masa të plota dhe efektive në fushën e organizimit e të drejtimit, të planifikimit e të teknologjisë së prodhimit. Mbi të gjitha duhet të ndryshohen plotësisht konceptet artizanale, të zhvillohet fantazia dhe mendimi krijues, të veprohet me shkathhtësi e shpejtësi për të bërë ndryshimet pozitive, për t'i hapur kudo rrugë të gjerë së resë.

Për ngritjen dhe zhvillimin e industrisë janë bërë investime të mëdha dhe është përgatitur një armatë e tërë punonjësish të kualifikuar e të devotshëm, të cilët janë një mbështetje e fuqishme për zhvillimin e këtij sektori jetik të ekonomisë.

Realizimi i detyrave të mëdha që shtron Partia, kërkon që punonjësit e industrisë të rritin efektivitetin e prodhimit dhe rendimentin e punës, të ngrënë në një shkallë më të lartë krijimtarinë e tyre. Ata duhet të shfrytëzojnë gjerësisht aftësitë e shumta prodhuese që kanë në duar dhe të përvetësojnë sa më mirë objektet dhe linjat e reja që do të përfundojnë e do të vihen në shfrytëzim, si edhe ato që do të rikonstruktohen në vitet e pesëvjeçarit. Me guxim e vendosmëri dhe duke u mbështetur në të dhënat studimore e shkencore, të çojnë përpara e të modernizojnë teknologjinë e prodhimit, të përmirësojnë treguesit cilësorë e ata financiarë të tij.

Populli dhe Partia kanë besim të plotë se punonjësit e të gjitha degëve të industrisë, të ndërgjegjshëm për situatat që kalojnë, do të shumëfishojnë përpjekjet dhe luftën e tyre për arritjen e objektivave dhe realizimin e detyrave të mëdha që po cakton ky Kongres për zhvillimin dhe fuqizimin e industrisë sonë socialiste.

2. Të intensifikohet më tej prodhimi bujqësor dhe të përsoset marrëdhëniet socialiste në fshat

Partia jonë ka përpunuar dhe ka zbatuar një politikë agrare marksiste-leniniste, duke mbajtur parasysh kushtet historike dhe rrethanat konkrete në të cilat fitoi revolucioni ynë popullor dhe vendi hyri në rrugën e socializmit. Në kushtet e një vendi agrar mjaft të prapambetur, Partia duhej të zgjidhte njëkohësisht dy detyra: edhe transformimin socialist të fshatit, edhe zhvillimin e gjithanshëm të bujqësisë. Bujqësia duhej të krijonte mundësinë që të ushqente popullsinë e fshatit dhe të jepte kontributin e saj të madh për industrializimin e vendit dhe zhvillimin e ekonomisë kombëtare. Realizimi i këtyre detyrave themelore kërkonte jo çfarëdolloj zhvillimi të bujqësisë, por vetëm zhvillimin socialist të saj, mbi bazën e prodhimit të madh e modern, të lidhur ngushtë me të gjitha degët dhe me sektorët e tjerë të ekonomisë.

Shndërrimet revolucionare dhe përparimet që janë arritur në bujqësi, përfaqësojnë një nga fitoret më të mëdha të vijës e të politikës së Partisë për ndërtimin e socializmit. Për drejtësinë e kësaj politike flet fakti që gjatë afro katër dekadave të pushtetit popullor prodhimi bujqësor në vendin tonë është shtuar dhe shtohet përgjithësisht rreth 2 herë më shpejt se popullsia, që të ardhurat reale për frymë të fshatarësisë nga njëri pesëvjeçar në tjetrin janë rritur 10 deri 20 për qind, që prodhimi bujqësor për njësi të sipërfaqes së punueshme, kundrejt vitit 1960, është shtuar 1,7 herë dhe për një punonjës të bujqësisë 1.6 herë. Edhe në pesëvjeçarin e gjashtë, megjithëse detyrat nuk u realizuan plotësisht sipas planit, prodhimi mesatar vjetor, në krahasim me pesëvjeçarin e pestë, ishte 21,4 për qind më i madh.

Në pesëvjeçarin e shtatë, duke ndjekur me konsekuencë politikën e vet agrare, Partia ka caktuar objektiva të rinj e më të rëndësishëm për zhvillimin e bujqësisë dhe përparimin e fshatit tonë socialist. Në planin e ri pesëvjeçar detyrat që ka caktuar Komiteti Qendror i Partisë për sektorin e bujqësisë, synojnë: rritjen e prodhimit për të siguruar gjithnjë e më mirë tërë ushqimin e popullit dhe përmirësimin e strukturës së tij; shtimin në një masë më të madhe të lëndëve të para për industrinë e lehtë dhe ushqimore; heqjen gradualisht nga importi edhe të asaj pjese të produkteve ushqimore e të lëndëve të para bujqësore që akoma e sjellim nga jashtë; rritjen e vëllimit të eksportit të produkteve bujqësore të përpunuara e të papërpunuara; shtimin dhe fuqizimin e rezervave të nevojshme. Mbi bazën e këtyre objektivave, si dhe të masave të tjera ekonomike e shoqërore, do të ngrihet mirëqenia e fshatarësisë dhe do të ngushtohen më tej dallimet ndërmjet fshatit e qytetit.

Këto probleme të mëdha për zhvillimin e bujqësisë kanë të bëjnë me të sotmen dhe të ardhmen e vendit. Për të gjitha këto arsye bujqësia në këtë pesëvjeçar do të zërë një vend të posaçëm dhe më të rëndësishëm se deri më sot. Prodhimi i përgjithshëm bujqësor në pesëvjeçarin

e shtatë kundrejt pesëvjeçarit të gjashtë parashikohet të rritet 30 deri 32 për qind. Afro 29 për qind e gjithë investimeve të pesëvjeçarit do të përdoren në bujqësi. Në këtë degë do të drejtohen rreth 60 për qind e forcave të reja aktive të punës dhe asaj do t'i vihet në dispozicion një bazë më e gjerë materialo-teknike. Prandaj punonjësit e bujqësisë dhe të të gjithë sektorëve që lidhen me bujqësinë, janë para detyrash të mëdha e luftarake.

Detyrë e parë e bujqësisë, si kurdoherë, mbetet prodhimi i drithërave. Ne çdo vit duhet të përballojmë nevojat për bukë për një popullsi në rritje të pandërprerë, të plotësojmë kërkesat më të mëdha me koncentre e ushqime të industrializuara për blegtorinë, si dhe nevoja të tjera të domosdoshme për drithëra. Këto probleme nuk mund të zgjidhen duke shtuar vazhdimisht sipërfaqet e mbjella me drithëra. Përkundrazi, theksi duhet vënë gjithnjë e më shumë në rritjen e rendimenteve dhe në përmirësimin e strukturës së drithërave. Kjo bëhet më e domosdoshme në kushtet kur popullsia vazhdon të shtohet me ritme të larta e, si rrjedhim, edhe sipërfaqja e tokës së punueshme për frymë të popullsisë ka prirje të ulët. Prandaj e gjithë shtesa e prodhimit të drithërave prej rreth 20 për qind, në pesëvjeçarin e shtatë kundrejt pesëvjeçarit të gjashtë, duhet të sigurohet tërësisht nga rritja e rendimenteve. Detyrat në këtë fushë janë shumë serioze dhe kërkojnë një kujdes të jashtëzakonshëm nga organet e Partisë, të pushtetit, të ekonomisë dhe nga të gjithë punonjësit e bujqësisë.

Krahas shtimit të prodhimit të drithërave duhet të forcohen edhe masat në të gjitha hallkat e grumbullimit, të përpunimit, të ruajtjes e të përdorimit të drithërave për të mënjanuar çdo humbje e dëmtim të tyre. Gjithashtu ne duhet të ecim drejt pakësimit të konsumit të bukës për frymë të popullsisë si në qytet, ashtu dhe në fshat. Në këtë rrugë të ecim me program të menduar shkencërisht për të përmirësuar strukturën e ushqimit të popullit, duke shtuar prodhimin dhe përdorimin e perimeve, të patateve, të frutave, të produkteve blegtorale etj. Çështja është që, pa ulur nivelin e jetesës, bile duke e ngritur atë, t'i jepet popullit më shumë qumësht, mish, perime etj. dhe të pakësohet kështu konsumi i bukës.

Prandaj, krahas shtimit të prodhimit të perimeve, të patates e të fasules për frymë të popullsisë dhe uljes së shpenzimeve të tij, një punë më e organizuar duhet bërë për studimin e kërkesave e të shijes së njerëzve dhe për të ndryshuar mentalitetin e sotëm gati artizanal lidhur me prodhimin, transportimin, industrializimin dhe shitjen e këtyre produkteve. Detyrat e ngjeshura që parashikon ky pesëvjeçar për perimet, patatet dhe fasulet, kërkojnë zbatimin e masave të gjithanshme agroteknike, si dhe përqendrimin e specializimin e prodhimit, sidomos rreth qyteteve të mëdha, me synim që të plotësohen planet në sasi, në lloje dhe në kohë gjatë gjithë vitit.

Investime të rëndësishme kanë bërë shteti dhe kooperativat për zhvillimin e frutikuturës. Por investimet e derisotme, sidomos në kooperativa, kanë pasur efektivitet të ulët dhe pesha e këtij sektori në prodhimin bujqësor është akoma relativisht e ulët. Prandaj, për realizimin e detyrave në rritje për zhvillimin e frutikuturës, del e nevojshme, në

radhë të parë, që kjo degë të vlerësohet më drejt, të luftohen konceptet nënvleftësuese dhe shfaqjet e mosinteresimit për këtë pasuri të mëkryhen plotësisht shërbimet në pemët e në ullinj të dhe të krijohen kushtet e përshtatshme për një ujitje në shkallë të gjerë.

Investimet e reja të përqendrohen kryesisht në plotësimin e blloqeve ekzistuese dhe të bëhet rikonstruksioni i vreshtave që janë ngrihur. Për frutikulturën të ndërmerren studime dhe të bëhet një punë e madhe për shtimin dhe përmirësimin e varieteteve të reja, të ecet drejt ngritjes së kurorave me pemë të ndryshme rreth qyteteve, dhe brenda mundësisë, të praktikohen edhe investimet e përbashkëta shtet-kooperative.

Nevojat e popullit dhe zhvillimi i një bujqësie shumëdegëshe kërkojnë që të përmirësohet struktura e mbjelljeve të bimëve industriale, të bëhen përqendrime e specializime në rrethet e në ekonomitë që kanë pasur rezultate më të mira, të sigurohen farëra me prodhimtari e rreze të lartë, si edhe të zbatohet teknologjia e përparuar në prodhim. Për bimët industriale t'i përmbahemi orientimit që me prodhimin e vendit të plotësojmë gjithnjë e më mirë nevojat e popullit e të ekonomisë.

Për sa i përket ekonomisë pyjore, krahas masave për të ecur më shpejt drejt balancimit të prerjeve të drurëve pyjorë, me rritjen natyrore vjetore të tyre, të synohet që pyjet të kthehen në ekonomi komplekse, ku, përveç nxjerrjes të lëndës drusore, të kultivohen e të merren edhe prodhime të dyta të pyllit, bimë etero-vajore e mjekësore si dhe të zhvillohet më shumë zookultura.

Objektivat që shtron pesëvjeçari i ri për blegtorinë kërkojnë të rritet shumë më tepër kujdesi i organeve të Partisë, të shtetit e të ekonomisë dhe i të gjithë punonjësve të bujqësisë për këtë degë të rëndësishme. Me gjithë përparimet që janë arritur, shkalla e prodhimit dhe e modernizimit të sektorit të blegtorisë nuk u përgjigjet investimeve të mëdha që janë bërë dhe nevojave në rritje për produkte blegtoriale. Projektdirektivat parashikojnë që prodhimi, në vitin 1985 kundrejt vitit 1980, të rritet: për qumështin 30 deri 32 për qind, për mishin 53 deri 55 për qind, për vezët 50 deri 52 për qind etj. Këta objektiva mbështeten në një rritje të mëtejshme të numrit të krerëve, por në mënyrë të veçantë ata mbështeten në rritjen e prodhimtarisë së të gjitha llojeve të kafshëve. Shtrohet detyra që nga lopët e racës dhe nga kafshët e tjera të përmirësuara të merren prodhime dy deri tri herë më të larta se mesataret e rendimenteve të derisotme në shkallë vendi. Për këtë është e nevojshme të ndryshojnë rrënjësisht konceptet dhe qëndrimet ndaj nevojave e kërkesave që paraqet zhvillimi i një blegtorie me përmasa të mëdha, me shumëllojshmëri të kafshëve dhe të ndërtuar mbi baza shkencore.

Problemi numër një në fushën e blegtorisë është zbatimi i një sistemi të plotë dhe të përshtatshëm masash për të dy e trefishuar rendimentet e kulturave foragjere dhe aftësinë prodhuese të kullotave natyrore, për të grumbulluar e shfrytëzuar të gjitha rezervat dhe nënparuar në përpunimin e ushqimeve të koncentruara e të produkteve të tjera bujqësore e industriale për bagëtinë.

Ne kemi bërë dhe do të vazhdojmë të bëjmë investime e të marrim masa për ngritjen e komplekseve moderne për fuqizimin e blegtorisë, për prodhimin e mishit e të vezëve, për përpunimin industrial dhe silazhimin e ushqimeve për bagëtinë. Por duhet të tregohet kujdes që këto investime të kryhen me kohë dhe të japin efektin e duhur. Nga ana tjetër, duhet mbajtur mirë parasysh se pjesa dërrmuese e blegtorisë, e kësaj pasurie të madhe kombëtare, është në kooperativat bujqësore dhe në tufa të krijuara me bagëtitë e anëtarëve të këtyre kooperativave. Prandaj kujdes shumë i madh të tregohet për mbarështimin e rregullt të këtyre bagëtive, për shtimin e prodhimit dhe për uljen e kostos së produkteve blegtoriale në të gjitha zonat e vendit.

Realizimi i detyrave për bujqësinë që parashikon plani i shtatë pesëvjeçar, do të arrihet si asnjëherë tjetër nëpërmjet rrugës intensive. Nga rritja e rendimenteve të bimëve dhe e prodhimtarisë së blegtorisë parashikohet të sigurohet 90 për qind e shtesës së prodhimit të përgjithshëm bujqësor, kundrejt 45 deri 70 për qind që ka qenë shtesa nga rritja e rendimenteve në pesëvjeçarët e kaluar. Detyra shtrohet që toka dhe e gjithë baza materialo-teknike relativisht e fuqishme dhe e shumëllojtë që është krijuar, të shfrytëzohet me efektivitet sa më të lartë, me qëllim që të merren sa më shumë prodhime bujqësore e blegtoriale me shpenzime sa më të pakta.

Duke caktuar detyra të mëdha për shpejtimin e intensifikimit të bujqësisë, edhe në të ardhmen duhet të vazhdojnë me këmbëngulje përpjekjet për zgjerimin e sipërfaqeve të tokës së punueshme, sepse vendi ynë ka akoma toka për të hapur në zonën kodrinore e malore, si edhe për të përfitur sipërfaqe të reja toke nga shkripëzimet etj.

Një problem i madh që ka të bëjë me intensifikimin e bujqësisë, është harmonizimi më i mirë e me kritere shkencore i tërësisë së faktorëve njerëzorë, materialë, agroteknikë e natyrorë, që kushtëzojnë prodhimin bujqësor. Kjo është një çështje e përgjithshme, që i takon çdo ekonomie, rrethi e zone. Specialistët, kuadrot dhe punonjësit e pararojës në bazë, organet ekonomike e të planifikimit, por edhe institucionet kërkimore-shkencore kanë këtu një fushë të gjerë studimi e veprimi krijues e novator.

Investimet dhe kujdesi për tokën duhet të përbëjnë edhe në të ardhmen drejtimin kryesor të punës për intensifikimin dhe shtimin e prodhimit bujqësor. Kjo kërkon zbatimin e masave të gjithanshme për rritjen e pjellorisë së tokës dhe mbrojtjen nga erozioni, pasurimin dhe përmirësimin e tokave nëpërmjet plehërimit të kombinuar dhe të plotë, kërkon prodhimin dhe përdorimin e farërave me aftësi të lartë prodhuese, të qëndrueshme ndaj sëmundjeve, dëmtuesve dhe ndaj faktorëve të disfavourshëm natyrorë.

Problemet e shumta që kanë të bëjnë me intensifikimin e bujqësisë, mund të zgjidhen me sukses vetëm duke e vënë tërë prodhimin bujqësor mbi baza rreptësisht shkencore. Plenumi i 8-të i KQ të Partisë dha orientime e direktiva me shumë rëndësi për të gjitha organizmat shkencore në bujqësi, nga baza deri në qendër. Është detyrë e dorës së parë e organizatave të Partisë, e organeve shtetërore dhe ekonomike

që ky program të vihet me këmbëngulje në jetë. Për këtë është e domosdoshme të formohet një kuptim i drejtë për rëndësinë dhe rolin e madh të kërkimeve e të eksperimentimeve shkencore në bujqësi dhe të merren të gjitha masat organizative që përfundimet e këtyre studimeve të gjejnë sa më shpejt zbatim në prodhimin e gjerë.

Në kuadrin e punës që do të bëhet në bujqësi gjatë këtij pesëvjeçari, Komiteti Qendror i Partisë i propozon Kongresit që të zbatohen një varg masash të rëndësishme për intensifikimin me përparësi të prodhimit në fushat më pjellore të vendit brenda një periudhe 10-vjeçare. Etapa e parë e këtij programi, që parashikohet të zbatohet në pesëvjeçarin e shtatë të shtrihet në më shumë se 100 mijë hektarë tokë të zonës fushore bregdetare. Qëllimi i këtij aksioni është që të shtohen prodhimet bujqësore e blegtorale në zonat ku puna dhe investimet japin më shpejt e më shumë efekt. Kjo do të krijojë kushte të favorshme edhe për një zhvillim më të shpejtë të kooperativave dhe për kalimin gradual të pronës së grupit në pronë të të gjithë popullit. Duke ndërmarrë këtë aksion, nuk do të preken investimet dhe burimet materiale të domosdoshme për zhvillimin e bujqësisë në zonat e tjera të vendit, përkundrazi, do të vazhdojë puna për zhvillimin dhe forcimin e mëtejshëm të të gjitha kooperativave bujqësore.

Realizimi me sukses i kësaj detyre të madhe kërkon punë të kujdesshme, të programuar e të organizuar mirë nga Ministria e Bujqësisë, Komisioni i Planit të Shtetit, Ministria e Financave dhe institucionet e tjera qendrore dhe nga organet e Partisë e të pushtetit të rretheve që përfshihen në zonën ku do të zbatohet intensifikimi më i lartë i bujqësisë.

Niveli i arritur në zhvillimin e forcave prodhuese dhe hapat e rinj që do të bëhen në pesëvjeçarin e shtatë e në të ardhmen, do të shoqërohen dhe do të mbështeten me përsosjen e mëtejshme të marrëdhënieve socialiste në fshat. Komiteti Qendror i Partisë ka studiuar me kujdes dhe ka miratuar iniciativat revolucionare të fshatarësisë për kufizimin e mëtejshëm të oborrit kooperativist dhe tufëzimin e bagëtive të anëtarëve dhe ka marrë e po merr masa të gjithanshme për ta mbështetur si duhet këtë proces progresiv në fshat. Partia çmon lart frymën revolucionare dhe patriotizmin e flaktë të fshatarësisë kooperativiste për këtë hap me rëndësi të veçantë për forcimin e sistemit kooperativist në vendin tonë.

Ajo ka besim të plotë se kufizimi i oborrit dhe tufëzimi i bagëtive do të çojnë me siguri në shtimin e prodhimit bujqësor e blegtoral, në garantimin dhe në ngritjen e mëtejshme të mirëqenies së fshatarësisë, në forcimin e mëtejshëm të ndjenjës së kolektivizimit socialist. Kështu, mbi bazën e shtimit të prodhimit dhe të ngritjes së mirëqenies së përgjithshme të fshatarësisë, oborri, si një ekonomi ndihmëse e përkohshme, ecën hap pas hapi drejt venitjes, drejt shuarjes së tij.

Edhe zbatimi i programit për shpejtimin e intensifikimit të prodhimit bujqësor në zonën fushore të vendit do të sjellë, në këtë zonë, ndryshime të rëndësishme në marrëdhëniet socialiste në prodhim. Me investimet e mëdha që shteti do të bëjë në kooperativat e kësaj zone,

do të rritet pesha e mjeteve të prodhimit pronë shtetërore. Kjo do të sjellë ngushtimin, dora-dorës, të sferës së marrëdhënieve të pronës kooperativiste, derisa kjo e fundit në një periudhë të mëvonshme të kthehet në pronë të të gjithë popullit. Derisa të arrihet në këtë fazë, kooperativistët në zonën ku do të shpejtohet intensifikimi i bujqësisë, do të vazhdojnë të shpërblehen me format e sotme, me norma e ditë-pune. Ndërkohë do të punohet që niveli i shpërblimit të tyre të arrijë gradualisht deri në nivelin e pagës së punëtorëve të ndërmarrjeve bujqësore.

Krahas kësaj do të vazhdojë puna për forcimin e kooperativave të tipit të lartë, disa prej të cilave do të shndërrohen në ndërmarrje bujqësore. Kjo do të shërbejë edhe si përvojë për të ardhmen. Në zonën fushore do të ngrihen kooperativa të tjera të tipit të lartë. Të tilla mund të bëhen edhe disa kooperativa të zonës kodrinore e malore, në varësi nga zhvillimi i tyre dhe nga mundësitë e shtetit.

Duke programuar këta hapa të rinj, Partia do t'i kushtojë edhe në të ardhmen vëmendje të madhe zhvillimit dhe fuqizimit të kooperativave të zonës kodrinore e malore. Këtu jeton një pjesë e madhe e popullsisë së vendit dhe ndodhet një sipërfaqe e konsiderueshme e tokës së punueshme. Shpejtimi i intensifikimit të bujqësisë në fushë do të krijojë mundësi më të mëdha materiale e financiare në duart e shtetit për të bërë investime dhe për ta ndihmuar më shumë edhe këtë zonë.

Vëmendje e kujdes i posaçëm duhet të tregohet për zhvillimin dhe fuqizimin e të gjitha ndërmarrjeve bujqësore, duke luftuar të metat e dobësitë që ekzistojnë sot në një pjesë të tyre. Detyra që ka shtruar prej kohësh Partia, që ndërmarrjet bujqësore të jenë në pararojë, duhet zbatuar me këmbëngulje.

Objektivat madhështore të planit të ri pesëvjeçar çelin perspektiva të gjithanshme zhvillimi e përparimi për bujqësinë dhe fshatin tonë socialist. Arritja e tyre kërkon mobilizimin dhe punën këmbëngulëse të të gjithë punonjësve të bujqësisë, përsosjen e planifikimit, të organizimit e të drejtimit në prodhimin bujqësor dhe në të gjitha hallkat që e pasojnë atë, në organet e grumbullimit, të industrisë së lehtë e ushqimore, të tregtisë së brendshme e të jashtme. Veçanërisht detyra të rëndësishme dalin para Ministrisë së Bujqësisë, organeve dhe institucioneve të saj vartëse, që ato të ngrihen në lartësinë e problemeve të mëdha që po shtron ky Kongres për zhvillimin e bujqësisë.

Realizimi me sukses i detyrave në fushën e bujqësisë do të jetë një fitore e madhe e politikës agrare të Partisë, që është diametralisht e kundërt me politikën që ndiqet në vendet revizioniste, ku bujqësia është futur në rrugë pa krye. Në këto vende, siç dihet, është braktisur prej kohësh rruga leniniste e kolektivizimit. Forma e kapitalizmit kolektiv që ekziston në Bashkimin Sovjetik e gjetkë, po shoqërohet tani në një shkallë të madhe edhe me forma direkte të pronës private. Ekonomitë individuale private shihen nga revizionistët si një burim kryesor për prodhimin e mishit, të qumështit dhe të produkteve të tjera bujqësore, bile atyre po u jepen për t'i ushqyer e rritur edhe bagëtitë e kolkozeve e të sovkozeve, duke likuiduar kështu çdo gjurmë të sistemit socialist në fshat. Kjo është rruga që e ka futur në një krizë të the-

llë bujqësinë e shumë prej këtyre vendeve, ku mungesa e ushqimeve dhe e lëndëve të para bujqësore është bërë sot një nga problemet më serioze për jetën e masave punonjëse.

3. Investimet e ndërtimet - bazë e rëndësishme për fuqizimin e pandërprerë të ekonomisë

Gjatë pesëvjeçarit të kaluar janë bërë përpjekje të mëdha për realizimin e investimeve e të ndërtimeve themelore që caktoi Kongresi i 7-të i Partisë. Në këtë fushë veprimtaria armiqësore e revizionistëve kinezë na dëmtoi rëndë dhe pengoi më shumë se në çdo fushë tjetër arritjen e objektivave të caktuar. Megjithatë, në sajë të masave të gjithanshme që morën Partia dhe shteti, në pesëvjeçarin e gjashtë u realizua një vëllim investimesh 15 për qind më i madh se në pesëvjeçarin e pestë.

Potenciali prodhues që kemi krijuar dhe burimet në rritje të akumulimeve tona të brendshme, bëjnë të mundur që në pesëvjeçarin e ri të ndërmerret një program investimesh e ndërtimesh si asnjëherë tjetër, me një vëllim të përgjithshëm prej mbi 25 miliardë lekësh, ose 22 deri 24 për qind më shumë se në pesëvjeçarin e kaluar. Kjo është një shprehje kuptimplote e epërsive dhe e vitalitetit të rendit tonë ekonomik-shoqëror, e aftësive krijuese dhe e energjive të pashtershme të masave të gjera punonjëse, e drejtësisë së parimit të mbështetjes në forcat e veta.

Në caktimin e investimeve, të strukturës së tyre dhe të veprave konkrete është mbajtur parasysh perspektiva e zhvillimit të degëve të ndryshme të ekonomisë e të kulturës, forcimi i pavarësisë dhe i mbrojtjes së atdheut, garantimi dhe ngritja graduale e mirëqenies së popullit.

Si kurdoherë, në politikën e investimeve përparësia i jepet prodhimit material. Nga 77 për qind që zinin investimet e sferës prodhuese në pesëvjeçarin e kaluar, në pesëvjeçarin e ri ato do të zënë 83 për qind. Një shpërndarje e tillë e investimeve bëhet sepse prodhimi është baza e mirëqenies së popullit dhe e fuqisë së atdheut.

Investimet më të mëdha edhe në këtë pesëvjeçar do të drejtohen për zhvillimin e industrisë e të bujqësisë, ku do të përdoren mbi 74 për qind e të gjitha investimeve, me një rritje prej afro 37 për qind kundrejt pesëvjeçarit të kaluar. Investime të rëndësishme do të bëhen edhe për transportin, për sektorët social-kulturorë, për ndërtimin e banesave. Gjatë pesëvjeçarit do të punohet për ndërtimin e më shumë se 350 veprave të rëndësishme vetëm të sferës prodhuese.

Për realizimin e objektivave të mësipërm është e nevojshme të merren masa praktike për rritjen e efektivitetit në përdorimin e mjeteve financiare, valutore, teknike e materiale që do të investohen. Për këtë, puna nis qysh në planifikim. Prandaj është e nevojshme që ai të vihet mbi baza shkencore që nga ndërmarrjet deri në qendër. Vëmendje më

e madhe u duhet kushtuar studimeve të plota për domosdoshmërinë, leverdinë dhe për fondet e çdo veprë. Gjithashtu të përcaktohen sa më parë kriteret shkencore dhe treguesit ekonomikë e teknikë të llogaritjes së efektivitetit, si dhe të ushtrohet kontroll që ata të zbatohen në mënyrë të detyrueshme si në ndërtimin, ashtu edhe në shfrytëzimin e veprave. Rëndësi të veçantë ka kryerja e studimeve prognozë për zhvillimin e degëve të ndryshme të ekonomisë, por edhe për ndërmarrjet e kooperativat. Këto studime të shërbejnë si pikënisje për hartimin e planeve pesëvjeçare dhe për përdorimin racional e me kursim të investimeve themelore.

Në pesëvjeçarin e shtatë do të përmirësohet më tej struktura e investimeve, duke rritur peshën që zënë makineritë e pajisjet dhe duke zvogëluar atë të ndërtim-montimeve. Këtu do të ndikojë mjaft fakti që rreth 40 për qind e investimeve në industri dhe në degët e tjera do të përdoren për zgjerime, rikonstruksione dhe modernizime të ndërmarrjeve ekzistuese. Kjo është një rrugë e leverdishme që kursen fonde të mëdha për ndërtimet dhe shpejton zgjerimin e aftësive prodhuese mbi një bazë teknike e teknologjike më të lartë. Përpara organeve të planifikimit, të ndërtimit, të financës shtrohet detyra që të punojnë me kujdes dhe të luftojnë me këmbëngulje për arritjen e këtij objektiv.

Si në çdo fushë tjetër, aq më tepër në investimet e në ndërtimet, kursimi i kohës është një ndër faktorët vendimtarë për të pakësuar investimet e ndërtimet e papërfunduara, për të siguruar plotësimin e detyrave të planit të prodhimit, të të ardhurave kombëtare, të akumulimit, për forcimin e stabilitetit të tregut dhe të qarkullimit monetar etj. Caktimi i afateve normative për kohëzgjatjen e ndërtimit të veprave të ndryshme dhe i kufijve normativë për gjendjen e investimeve e të ndërtimeve të papërfunduara duhet të shërbejnë si një mjet efikas për forcimin e kontrollit në planifikimin dhe në zbatimin e investimeve.

Një kujdes më i madh duhet të tregohet për investimet që kryejnë kooperativat bujqësore me mjetet e tyre, të cilat, gjatë këtij pesëvjeçari, janë parashikuar të arrijnë 2 miliardë e 750 milionë lekë. Këto investime të përfshihen më mirë në planin e zhvillimit ekonomik dhe realizimi i tyre të ndiqet me kujdes nga vetë kooperativat, nga organet shtetërore e ato ekonomike dhe në të ardhmen të mos lejohet më që të mbeten fonde të rëndësishme të papërdorura.

Një problem i madh për ndërtimin mbetet ulja e mëtejshme e kostos, sepse kjo, me gjithë përparimet e bëra, është akoma e lartë. Këtë del nevoja që projektuesit, teknologët e zbatuesit, si edhe prodhuesit e materialeve të ndërtimit, duke bashkëpunuar ngushtë me ekonomistët, të hartojnë e të zbatojnë projekte të përshtatshme, të përdorin konstruksione standarde e të lehta, të prodhojnë një gamë të gjerë materialesh ndërtimi me cilësi e rezistencë të lartë, duke zbatuar përvojën e përparuar të vendit dhe atë botërore.

Ministria e Ndërtimit, dikasteret e tjera dhe ndërmarrjet e tyre, që kanë një park të madh të makinerive, duhet të kujdesen e të luftojnë për shfrytëzimin racional e të plotë të kësaj baze të fuqishme. Me ritmet që kanë marrë e po marrin ndërtimet, nuk mund të ecet pa bërë kthesë

nin e ri pesëvjeçar arsimit, kulturës e shkencës do t'u jepet një zhvillim i mëtejshëm.

Numri i nxënësve në shkollat e mesme do të rritet në mënyrë të ndjeshme. Përveç fëmijëve të qyteteve, arsimit i mesëm do të përfshijë gjithnjë e më shumë edhe fëmijët e fshatit. Për t'iu përgjigjur më mirë zhvillimit të vullshëm të ekonomisë, krijimit të degëve dhe futjes së teknologjive të reja në prodhim, do të zgjerohen e do të profilizohen shkollat e mesme profesionale. Në të gjitha kategoritë e shkollave të mesme gjatë pesë vjetëve të ardhshëm do të marrin dëftesën e pjekurisë rreth 160 mijë veta nga 113 mijë që i mbaruan këto shkolla në pesëvjeçarin e kaluar.

Një kujdes i veçantë do t'i kushtohet zhvillimit të arsimit të lartë, ku do të hyjnë 45 për qind studentë më shumë se në pesëvjeçarin e gjashtë. Do të krijohen profile të reja dhe do të zgjerohet kualifikimi dhe specializimi pasuniversitar.

Krahas arsimit, hapa të rinj përpara do të bëhen edhe në sektorët e ndryshëm të kulturës, me qëllim që puna e tyre të shtrihet thellë në masat dhe t'i shërbejë më mirë edukimit të tyre. Do të zgjerohet botimi i librave politikë, shkencorë, teknikë e artistikë. Tirazhi i tyre i përgjithshëm do të jetë 1 milion copë më shumë se në pesëvjeçarin e kaluar. Zhvillim të mëtejshëm do të marrë kinematografia. Do të zgjerohet rrjeti radio-televiziv nëpërmjet ngritjes së stacioneve të ritransmetimit e të përsëritësve, me qëllim që të mbulohen të gjitha zonat e vendit. Gjatë pesëvjeçarit të shtatë do të fillojë transmetimi i emisioneve televizive me ngjyra. Për edukimin revolucionar e patriotik të punonjësve do të ngrihen muze të rinj në qytete e fshatra dhe do të pasurohen më tej ata ekzistuesit. Vepra me rëndësi në këtë fushë janë: Muzeu Historik Kombëtar në Tiranë, Muzeu i Skënderbeut në Krujë, Muzeu i Kulturës Materiale Popullore në Shkodër etj.

Më tepër fonde në këtë pesëvjeçar janë caktuar edhe për zhvillimin e kulturës fizike e të sporteve. Do të zgjerohen terrenet sportive, do të ngrihen pallate sporti e stadione të reja. Këto do t'i shërbejnë kalitjes fizike dhe argëtimit të rinisë, përgatitjes së saj më të mirë për punë e mbrojtje. Këtij kujdesi të Partisë sportistët e fizikulturistët duhet t'i përgjigjen me arritjen e rezultateve sa më të larta.

Në mbrojtjen e shëndetit të popullit gjatë viteve të pushtetit popullor është bërë një revolucion i vërtetë. Është zgjeruar shumë rrjeti i institucioneve të ndryshme shëndetësore, është përmirësuar vazhdimisht shërbimi mjekësor dhe janë zgjeruar gjithë masat e tjera për mbrojtjen e forcimin e shëndetit të njerëzve. Në këtë rrugë të suksesshme do të ecet edhe në planin e shtatë pesëvjeçar. Një zgjerim e përmirësim cilësor do të marrin masat e gjithanshme profilaktike si në qytet e veçanërisht në fshat. Vëmendje e veçantë do t'i kushtohet përmirësimit të shërbimit shëndetësor për të rritur cilësinë e mjekimit e të ndihmës mjekësore dhe për të forcuar masat për mbrojtjen e shëndetit të nënës e të fëmijës, me qëllim që të ulet më tej vdekshmëria në fëmijët nën një vjeç. Për këtë qëllim do të ndihmojë edhe vendimi për zgjatjen e lejes së lindjes në afro gjashtë muaj.

Vendi ynë ka një shtim dinamik të popullsisë, një strukturë me mbizotërim të moshave të reja dhe një popullsi gjithmonë aktive e të freskët. Partia ka punuar e punon që proceset demografike të studiohen e të drejtohen në baza më shkencore, që popullsia të vazhdojë të shtohet me ritme të përshtatshme.

Vendi ynë jo vetëm nuk ka papunësi dhe emigracion ekonomik, por zhvillimi dinamik i forcave prodhuese dhe i veprimtarive shoqërore e kulturore kërkojnë gjithnjë forca të reja pune. Të gjitha forcat e reja që do të dalin gjatë pesëvjeçarit dhe që arrijnë në afro 210 mijë veta, do të futen në punë, në radhë të parë, në prodhim. Zënia me punë e forcave të reja kërkon studime të thelluara nga Komisioni i Planit të Shtetit, nga Komiteti Shtetëror i Punës e i Pagave, nga dikasteret e tjera, nga komitetet ekzekutive të këshillave popullore të rretheve dhe nga vetë ndërmarrjet e kooperativat bujqësore.

Natyrisht, Partia dhe shteti do të përpiqen që të hapin fronte pune atje ku janë njerëzit, por kjo varet shumë edhe nga shpërndarja e burimeve dhe e pasurive natyrore. Prandaj një pjesë e forcave të reja të punës do të duhet të punojë atje ku ka nevojë vendi dhe atje ku hapen më shumë fronte pune. Ky proces duhet të mbështetet më mirë me zhvillimin e qendrave urbanistike, me zhvillimin e transportit, me përmirësimin e kushteve të punës, me rregullime në sistemin e pagave për të nxitur zënieën me punë edhe në zonat e largëta ose në kushte të vështira pune.

6. Të përsosim drejtimin e ekonomisë dhe të rritim efektivitetin e saj

Drejtimi dhe organizimi janë një hallkë nga më të rëndësishmet pas së cilës duhet të kapemi fort për t'i çuar përpara punët kudo, në ekonomi, në arsim, në shkencë, në kulturë, në të gjitha fushat e veprimtarisë shoqërore.

Në kushtet aktuale, kur ekonomia jonë është bërë një ekonomi e madhe e komplekse, ajo nuk mund të drejtohet e të ecë përpara me koncepte e praktika të cilave u ka kaluar koha. Sot nuk mund të punohet me empirizëm e praktikizëm të ngushtë. Drejtimi dhe organizimi duhet të mbështeten në njohuri e dije të thella, në parime dhe kritere të shëndosha shkencore, që burojnë nga ligjet e zhvillimit ekonomik e shoqëror.

Drejtimi i ekonomisë në bazë të këtyre ligjeve kërkon që problemet e zhvillimit të forcave prodhuese të shikohen kurdoherë të lidhura ngushtë me anët shoqërore të tyre, me të gjithë komponentët që përbëjnë jetën tonë socialiste. Kjo ka të bëjë me zbatimin në jetë, në mënyrë të planifikuar e të drejtuar mirë, të atij bashkëveprimi reciprok midis forcave prodhuese dhe marrëdhënieve ekonomike e të superstrukturës, që e pohojmë, por që në praktikë disa herë e harrojmë ose e kalojmë shkarazi. Këto shfaqje të dëmshme duhet të mënjanohen e të

luftohen, sepse bartin rrezikun e një drejtimi nga pozitat e ekonomizimit e të teknokratizmit.

Ekonomia popullore, si një ekonomi unike socialiste, drejtohet në bazë të parimit të centralizimit demokratik dhe të planit të përgjithshëm shtetëror. Në qoftë se cenohet sadopak ky parim, duke u nisur nga interesa të veçanta e të ngushta, kjo tregon se nuk kuptohen thellë e nuk zbatohen drejt direktivat e Partisë, ligjet e ekonomisë dhe rregullat e shtetit tonë socialist. Prandaj të luftohen shfaqjet e dikasterializmit e të punës së mbyllur brenda rretheve ose institucioneve. Të forcohet bashkëpunimi dhe bashkërendimi i punës për problemet e ndryshme mbi bazën e vijës e të politikës së Partisë, për t'u dhënë rrugëzgjdhje të shpejtë problemeve në bazë të kompetencave që i janë dhënë secilit.

Kryesorja është që secili, duke u udhëhequr nga vija, nga politika dhe ideologjia e Partisë, të realizojë detyrat e ngarkuara, t'i dalë zot punës, të tregojë iniciativë e këmbëngulje dhe të mbajë përgjegjësi të plotë për punën që kryen dhe sektorin ku drejton e punon. Kërkimi dhe dhënia llogari për kompetencat dhe funksionet e caktuara, për realizimin e detyrave të planit, është një normë që buron nga rendi ynë shoqëror, nga parimi i centralizimit demokratik. Kjo normë duhet zbatuar pa asnjë lëshim në të gjitha instancat, pa lejuar kurrfarë liberalizmi e sentimentalizmi mikroborgjez.

Partia ka theksuar vazhdimisht se socializmi është vepër e masave të gjera punonjëse të udhëhequra prej saj. Këtë rrjedh domosdoshmëria objektive që masat punonjëse të marrin pjesë gjallërisht në drejtimin e jetës së vendit, të përvetësojnë artin e të drejtuarit të ekonomisë. Kjo çështje parimore duhet të ngulitet thellë në mendjen dhe në ndërgjegjen e të gjithëve. Të arrihet kudo që të gjithë punonjësit ta thonë fjalën e tyre ashtu siç mendojnë e gjykojnë vetë, të kritikojnë të metat dhe të gjithë ata që shkelin rregullat dhe disiplinën shtetërore, me qëllim që punët të ecin përpara.

Për organizimin dhe drejtimin shkencor të ekonomisë një rëndësi të veçantë ka hartimi i planeve reale dhe mobilizuese, të mbështetura në studime të gjithanshme për problemet aktuale e të perspektivës, në përgjithësi dhe analiza të thelluara. Një punë më e kujdesshme duhet bërë edhe gjatë zbatimit të planit, duke zgjidhur drejt e shpejt problemet që dalin. Plani vërtet është ligj dhe zbatimi i tij është detyrë shtetërore, por kjo nuk duhet të pengojë marrjen e masave për të bërë ndryshime eventuale për përmirësimin e treguesve të tij sa herë që kjo është e domosdoshme dhe kur është e mundur.

Më shumë vëmendje t'i kushtohet kontrollit për zbatimin e planit. Ai duhet të jetë një kontroll i gjallë, veprues dhe i përditshëm, që jo vetëm të konstatojë të metat ose dobësitë, por t'u japë rrugëzgjdhje problemeve në vend. Sidomos duhet të forcohet kontrolli i brendshëm ekonomik, financiar dhe teknik në ndërmarrjet ekonomike dhe në kooperativat bujqësore. Organet e financës e të bankës duhet ta vënë kontrollin me anë të lekut në vendin që i takon dhe të rritin më shumë rolin aktiv të tyre në prodhim, në qarkullim e në shërbime, duke përdorur

rur më me efikasitet e në rrugë të drejtë edhe levat e tjera të mekanizmit tonë ekonomik.

Forcimi i drejtimit dhe i organizimit kërkon që të bëhen edhe përmirësimet e duhura në strukturat ekzistuese të organeve shtetërore dhe në organizma të ndryshëm të ekonomisë sa herë që kjo është e domosdoshme. Ashtu siç luftojmë që të shtojmë prodhimin dhe të përsosim teknologjinë e tij, po ashtu duhet të veprojmë për të ndryshuar format e metodat e vjetruara të drejtimit, duke vënë në zbatim struktura e forma të reja më efikase, më të gjalla dhe më pak të kushtueshme.

Puna drejtuese e organizuese duhet të shprehet në shtimin e prodhimit dhe në rritjen e efektivitetit të shpenzimeve në të gjitha fushat e veprimtarisë ekonomike. Gjatë pesëvjeçarit të shtatë të ardhurat kombëtare do të rriten më shpejt se prodhimi shoqëror; shtesa e tyre do të sigurohet në masën mbi 46 për qind nga rritja e rendimentit të punës; në industri e në ndërtim rendimenti i punës do të rritet 2 deri 3 herë më shpejt se në pesëvjeçarin e kaluar; rritja e së ardhurës neto në ndërmarrje do të realizohet në pjesën më të madhe nga ulja e kostos në prodhim, në ndërtim, në shërbime.

Nga plotësimi i këtyre objektivave varet në një shkallë të madhe zhvillimi i drejtë përpjesëtimor i gjithë ekonomisë, realizimi i ritmeve të parashikuara dhe i të gjitha detyrave të planit me forcat tona. Rrugët për arritjen e tyre duhen kërkuar në prodhim, në thellimin e revolucionit tekniko-shkencor, në zgjerimin e mekanizimit, në forcimin e disiplinës dhe në shfrytëzimin e kohës së punës, në uljen e kostos, në përdorimin racional të bazës materiale e teknike, pra, në zbulimin e shfrytëzimin e të gjitha rezervave të brendshme të ekonomisë, duke u mbështetur fuqimisht në përvojën e përparuar dhe në arritjet e shkencës e të teknikës.

Puna e njerëzve, me cilësi e me rendiment të lartë, është faktori vendimtar për të siguruar rritjen e efektivitetit të prodhimit e për të çuar përpara tërë ekonominë. Kjo kërkon të ngrihet kualifikimi i punonjësve, të zhvillohet iniciativa dhe krijimtaria e tyre, të bëhen ata të ndërgjegjshëm për rëndësinë dhe mundësinë e realizimit të detyrave të planit.

Një problem tjetër i madh që lidhet drejtpërdrejt me drejtimin, me organizimin e ekonomisë dhe me rritjen e efektivitetit të saj është zgjerimi dhe forcimi i kooperimit në të gjitha fushat e veprimtarisë ekonomike e shoqërore. Kjo diktohet nga thellimi i ndarjes shoqërore të punës dhe i lidhjeve ekonomike. Prodhimi është pasuruar me degë e aktivitete të shumta, forcat prodhuese janë shtrirë në të gjithë vendin. Është thelluar specializimi i veprimtarive prodhuese dhe kanë ecur përpara shkenca e teknika. Në këto kushte mungesa e kooperimit dhe e bashkëpunimit për zgjidhjen e problemeve të ndryshme jo vetëm nuk lejon të shfrytëzohen epërsitë e ekonomisë socialiste si një ekonomi unike, por pengon edhe zhvillimin e saj me ritme të shpejta.

Në këtë kuadër kërkohet një kuptim dhe zbatim më i thellë dhe më i plotë i parimit të mbështetjes në forcat e veta në fushën e ekonomisë dhe në çdo fushë tjetër. Në raport me botën e jashtme vendi ynë e zbaton këtë parim si një trup i vetëm, domethënë të gjithë së bashku, të gjitha

degët dhe sektorët e ekonomisë sigurojnë dhe duhet të sigurojnë me çdo kusht pavarësinë dhe zhvillimin e pandalshëm të vendit. Mbështetja në forcat e veta në planin e brendshëm, të degëve ekonomike, të rretheve, të ndërmarrjeve, të kooperativave, duhet kuptuar si një luftë krah për krah, në solidaritet të fortë socialist, në kooperim dhe në bashkëpunim të ngushtë e të gjithanshëm me njëri-tjetrin për plotësimin e detyrave të planit unik e të përgjithshëm shtetëror.

Rruga nëpër të cilën ka ecur dhe ecën ekonomia jonë është një rrugë e drejtë marksiste-leniniste. Dëshmi e qartë dhe konkrete për këtë janë qëndrueshmëria, vitaliteti dhe dinamizmi i saj. Këto tipare themelore të ekonomisë sonë socialiste do të konsolidohen e do të cohen akoma më përpara me luftën dhe përpjekjet e klasës punëtore, të fshatarësisë kooperativiste dhe të inteligjencies popullore, nën udhëheqjen e Partisë, për të vënë në jetë objektivat e planit të shtatë pesëvjeçar, që po miratojmë në këtë Kongres.

II

TË FORCOJMË PARESHTUR PARTINË, TË RRRITIM MË TEJ EFEKTIVITETIN E PUNËS SË SAJ

Partia jonë e Punës, besnike e patundur ndaj parimeve të marksizëm-leninizmit, luftëtare e vendosur kundër armiqve të jashtëm e të brendshëm, me rrënjë të thella në popullin që e lindi dhe e rriti, në çdo etapë të revolucionit e të ndërtimit socialist të vendit e ka udhëhequr me urtësi e largpamësi popullin shqiptar nga fitorja në fitore.

Edhe detyrat e mëdha, të vështira e komplekse që caktoi Kongresi i 7-të i saj, Partia i ka kryer me nder. Lufta dhe puna për zbatimin e këtyre detyrave e ka forcuar dhe çelikusur më tej vetë Partinë, ka rritur rolin udhëheqës dhe frymën luftarake të saj, ka revolucionarizuar jetën dhe veprimtarinë e organizatave-bazë, të forumeve e të komunistëve, ka kalitur unitetin e çeliktë të radhëve të Partisë dhe lidhjet e ngushta me masat e gjera të popullit.

Shprehje e qartë e këtij uniteti monolit të Partisë dhe të popullit rreth saj është mobilizimi i përgjithshëm i komunistëve dhe i mbarë popullit për zbatimin e detyrave që ka shtruar e shtron Partia, janë aksionet e lëvizjet e mëdha revolucionare, si dhe solidariteti i mrekullueshëm popullor i njerëzve tanë. Ky unitet ka qenë dhe mbetet faktori vendimtar, kyçi i të gjitha fitoreve tona në ndërtimin socialist dhe në mbrojtjen e atdheut.

Forcimit të Partisë dhe të rolit të saj udhëheqës i ka shërbyer lufta e vazhdueshme që ajo ka bërë e bën për revolucionarizimin e radhëve të saj nëpërmjet punës për ngritjen e nivelit ideologjik, politik e kulturor të komunistëve, rritjes së veprimtarisë së tyre si militantë politikë e shoqërorë, si dhe forcimit të përbërjes proletare të saj. Në ra-

dhët e Partisë militon një armatë e tërë komunistësh, që kanë treguar besnikëri të patundur ndaj vijës së drejtë të Partisë në të gjitha situatat që kemi kaluar. Komunistët shqiptarë, si gjithnjë, kanë luftuar e kanë punuar me guxim dhe optimizëm revolucionar, ata janë treguar organizatorë, edukues e drejtues të aftë të masave.

Thellimi i luftës kundër shfaqjeve të liberalizmit e të burokratizmit në jetën e organeve dhe të organizatave-bazë të Partisë, zhdukja e pasojave të punës armiqësore në disa sektorë të ekonomisë, në art, në kulturë dhe në ushtri, që synonte spostimin e rolit udhëheqës të Partisë, respektimi dhe zbatimimi kudo i parimeve e i normave të Partisë, kanë rritur më tej frymën luftarake të saj, e kanë bërë Partinë më të pjekur, më të aftë dhe më të vendosur për të zbatuar detyrat e reja e të mëdha që na dalin në rrugën e ndërtimit socialist të vendit.

I. Të rritim e të përsosim më tej rolin udhëheqës të Partisë

Përvoja 40-vjeçare e Partisë sonë vërteton se vetëm një parti që bazohet fort në shkencën marksiste-leniniste mund të bëhet udhëheqësja e vërtetë e klasës punëtore, të realizojë hegjemoninë e saj dhe të sigurojë fitoren e revolucionit dhe ndërtimin e shoqërisë socialiste. Partia jonë ka qëndruar dhe qëndron kurdoherë në ballë të luftës e të punës së masave, ajo udhëheq kudo: në politikë e ideologji, në pushtet dhe në ekonomi, në arsim, kulturë e shkencë, në ushtri e në të gjithë sektorët e tjerë të vendit. Asnjë problem, i thjeshtë ose i ndërlikuar, aktual ose spektiv nuk mund të gjejë zgjidhje pa udhëheqjen e Partisë. Ky ka qenë dhe mbetet për ne ligj. Tek udhëheqja e vetme dhe e pandarë e Partisë qëndron burimi i të gjitha fitoreve në ndërtimin socialist dhe garancia më e sigurt për të ardhmen e ndritur që po ndërtojmë.

Partia nuk vihet e as mund të qëndrojë rastësisht në udhëheqje. Rolin e vet udhëheqës ajo e siguron me vijën e saj të drejtë dhe me luftën e punën këmbëngulëse për zbatimin e kësaj vije në jetë. Duke u mbështetur në teorinë e klasës më të përparuar të shoqërisë, të proletariatit, në doktrinën marksiste-leniniste, në ligjet e zhvillimit materialist të shoqërisë, Partia ka një vizion të gjerë, një mendim të përpunuar e shkencor. Ajo sheh qartë në çdo situatë, kupton të tashmen, parashikon të ardhmen dhe di t'u dalë përpara punëve, duke përcaktuar e zbatuar kurdoherë një strategji e një taktikë revolucionare, që u përgjigjen interesave të klasës punëtore e të masave punonjëse.

Rolin udhëheqës Partia e realizon kudo e për çdo gjë nëpërmjet organizatave-bazë dhe komunistëve. Sa më mirë të përvetësohen e të zbatohen ideologjia dhe vija politike e Partisë në përgjithësi, çdo vendim e direktivë e saj në veçanti nga çdo organizatë e komunist, aq më shumë forcohet Partia dhe lidhjet e saj me masat, aq më lart ngrihet roli udhëheqës i Partisë në çdo hallkë të ndërtimit socialist. Kjo përbën një kusht vendimtar për plotësimin e detyrave të mëdha që shtrohen në stadin e sotëm të zhvillimit të vendit dhe në situatat konkrete në të cilat ne

ndërtojmë socializmin. Me Partinë në ballë, të fortë si çeliku, vigjilentë e sypatrembur, çështja e revolucionit dhe e socializmit është e pathyeshme.

Rëndësi të veçantë ka formimi i një koncepti më të qartë e më të plotë për realizimin e rolit udhëheqës të Partisë në të gjitha hallkat dhe në çdo fushë. Në praktikë disa komitete, byro dhe organizata-bazë partie e kuptojnë ngushtë këtë çështje. Disa mendojnë gabim se «Partia janë tëm aparatet dhe organet udhëheqëse» dhe jo masa e madhe dhe e organizuar e tërë komunistëve. Disa të tjerë nuk e kuptojnë dhe nuk e realizojnë plotësisht rolin udhëheqës të Partisë në sistemin e diktaturës së proletariatit dhe, nën parullën «Partia udhëheq çdo gjë», i angazhojnë organizatat, komitetet e Partisë dhe drejtuesit e tyre me zgjidhjen konkrete të çështjeve të vogla të prodhimit, të administrimit, të teknikës etj. Me sa duket, nuk kuptohet e nuk realizohet mirë e nga të gjithë se Partia drejton në bllok, në mënyrë të organizuar dhe të centralizuar me të gjitha levat e saj, organet shtetërore dhe ekonomike, organizatat e masave.

Është kjo arsyeja që disa organe dhe organizata partie në trajtimin dhe zgjidhjen e problemeve të ndryshme u kushtojnë më shumë vëmendje anëve teknike e administrative dhe lënë pas dore aspektin politik e ideologjik, problemet e politikës ekonomike, kulturore ose ushtarake të Partisë, punën me njerëzit, që është edhe detyra e tyre kryesore. Gjykime dhe veprime të tilla çojnë në monopozimin e punëve, ndryshin iniciativën e kuadrove e të masave, dublojnë e spostojnë levat e Partisë dhe dobësojnë e vyshkin vetë rolin udhëheqës të Partisë.

Partia jonë e ka konceptuar dhe e ka kryer gjithnjë drejt rolin e saj në sistemin e diktaturës së proletariatit. Prandaj ka rëndësi të madhe të kuptohet e të zbatohet gjithnjë e më mirë në jetë se puna e Partisë nuk është punë vetëm e organeve dhe e organizatave-bazë, aq më pak e aparateve të tyre. Punë partie bëjnë edhe organet shtetërore, ekonomike, komandat e shtabet në ushtri, organizatat e masave, gjithë kuadrot e punonjësit, qofshin ose jo komunistë, sepse të gjithë udhëhiqen nga ideologjia dhe nga vija e Partisë, zbatojnë ligjet dhe rregullat e shtetit, planet e tij, në të cilat mishërohet kjo vijë.

Kjo nuk e ul aspak, nuk e dobëson përgjegjësinë e plotë të organizatave të Partisë, rolin e tyre udhëheqës për të gjitha problemet. Por ato nuk mund t'i kryejnë vetë të gjitha punët. Prandaj organizatat e Partisë u ngarkojnë detyra levave, i mobilizojnë, u çelin perspektiva, i udhëheqin në punën e tyre, i kontrollojnë dhe u kërkojnë llogari për zbatimin me përpikëri të detyrave. Forumet dhe organizatat-bazë të Partisë, nëpërmjet komunistëve që veprojnë në to, punojnë që t'i bëjnë të ndërgjegjshme e t'i vënë në lëvizje këto leva, me qëllim që funksionet, detyrat dhe përgjegjësitë e ngarkuara t'i zbatojnë në mënyrë revolucionare dhe me iniciativë.

Këto çështje duhen kuptuar mirë jo vetëm nga organizatat e Partisë, por edhe nga levat e saj e nga çdo kuadër. Partia secilit i ka caktuar detyrat, kompetencat e përgjegjësitë. Ajo të gjithë i orienton e i kontrollon, të gjithëve u kërkon llogari. Por secili duhet t'i dalë zot punës

së vet, të veprojnë me iniciativë e këmbëngulje dhe, sipas kompetencave që i janë dhënë, brenda vijës së Partisë, të mbajë përgjegjësi të plotë për detyrat e ngarkuara në sektorin që drejton. Nga kjo pikëpamje nuk janë të drejta ato prirje që vihen re në praktikë kur disa organe shtetërore dhe ekonomike, në emër gjoja të sigurimit të rolit udhëheqës të Partisë, për çdo gjë pyesin dhe kërkojnë lejen e organizatave dhe të forumeve të Partisë, përpigjen të ligjësojnë veprimet e tyre, duke bërë kështu ortakllëk me to. Ky nuk është sigurim i rolit udhëheqës të Partisë, por prirje për të ndarë përgjegjësinë me organizatën e Partisë.

Organet shtetërore dhe ekonomike, organizatat e masave dhe kuadrot e tyre nuk janë apolitike, që merren vetëm me çështje teknike, agroteknike, ushtarake etj. Edhe këta punojnë e luftojnë duke u mbështetur në vijën e Partisë e për zbatimin e saj. Natyrisht organizata e Partisë ka përgjegjësinë e vet kur i lejon disa drejtues e administratorë të mos kryejnë detyrën e ngarkuar. Ajo duhet t'i ndihmojë, t'i orientojë, t'i edukojë, t'i korrigjojë, t'i vërë ata edhe para përgjegjësisë, e, kur është rasti, t'u tregojë vendin të gjithë atyre që kërkojnë të veprojnë sipas mendjes së vet, qoftë nën hijen e organizatës-bazë ose nën emrin e komunistit. Kështu zvogëlohen rreziqet për të bërë gabime, rritet kuadri dhe përgjegjësia e tij për punën.

Organizatat e Partisë merren e do të merren me të gjitha çështjet: me problemet e ekonomisë, të kulturës, të mbrojtjes, të të gjithë jetës së vendit. Ndryshe ato nuk mund të qëndrojnë në krye e të udhëheqin. Aftësia e tyre qëndron në atë që në momentin e dhënë të dinë të kapin çështjet më kryesore, t'u japin atyre zgjidhje të drejta, të justifikuar e të argumentuara, të shohin si kuptohen e si zbatohen vija dhe direktivat e Partisë nga komunistët, nga kuadrot, nga organet ekonomike e shtetërore, nga organizatat e masave dhe t'u kërkojnë llogari kur këto nuk e kryejnë detyrën e tyre. Për këtë mban përgjegjësi të drejtpërdrejtë organizata e Partisë, që duhet ta përqendrojë vëmendjen kryesore në këto çështje dhe të mos merret ajo me zgjidhjen e problemeve të vogla e konkrete, për të cilat Partia ka krijuar organe e organizma të veçantë.

Puna e Partisë është në radhë të parë punë me njerëzit, punë për edukimin, sqarimin, mobilizimin e organizimin e tyre. Kjo nuk duhet harruar kurrë, ndryshe Partia largohet nga detyra dhe nga funksioni i saj kryesor udhëheqës, shndërrohet në një organizëm operativ dhe merr përsipër funksione shtetërore. Ky është një rrezik i madh për një parti që është në fuqi. Këtë rrezik e kemi bërë të njohur me kohë, që të mos e lejojmë kurrë të shfaqet.

Forca e pathyeshme e revolucionit tonë, e rendit shoqëror socialist qëndron në masat e popullit, në ndërgjegjen e tyre të lartë politike, në gatishmërinë dhe vendosmërinë e tyre për ndërtimin dhe mbrojtjen e socializmit. Kjo është vepër e lavdishme e Partisë dhe këtë vepër Partia duhet ta konsolidojë e ta çojë vazhdimisht përpara me punën e saj ideologjike, politike e organizative.

Për këtë është e nevojshme që organizatat e Partisë, gjithë komunistët të shkrihen me masat e të punojnë pa u lodhur në gjirin e tyre, të njohin mirë gjendjen moralo-politike, të jenë kurdoherë në dijeni të problemeve që shqetësojnë masat, t'i sqarojnë ato për situatat, t'i

bindin për rëndësinë e detyrave që shtrohen, t'u bëjnë të qarta direktivat e Partisë dhe ligjet e shtetit. Nga ata kërkohet t'i edukojnë masat me botëkuptimin e moralin komunist, të luftojnë çdo mbeturinë e shfaqjet të huaj, të kujdesen për jetën e tyre, të nxitin e të mbështetin krijimtarinë dhe iniciativat e masave, t'i mobilizojnë e t'i hedhin ato në aksione, për të forcuar ekonominë, kulturën dhe mbrojtjen e atdheut.

2. Të rritet efektiviteti i punës së Partisë dhe ndjenja e përgjegjësisë së organeve dhe organizatave të Partisë

Stadi aktual i zhvillimit të vullshëm e të gjithanshëm, detyrat e mëdha e të guximshme që na shtrohen për të zgjidhur, kërkojnë të ngrihet në një shkallë më të lartë niveli dhe efektiviteti i punës së Partisë në të gjitha hallkat e drejtimet. Puna e Partisë është e gjerë dhe e gjithanshme: politike, ideologjike, organizative, administrative, ekonomike, psikologjike; ajo është punë e harmonizuar dhe e sintetizuar, që duhet zbatuar si e tillë. Efektiviteti i saj matet me rezultatet konkrete në realizimin e detyrave në çdo sektor të veprimtarisë shoqërore.

Në praktikë ka raste që puna e Partisë konceptohet ngushtë. Disa organe e organizata-bazë partie harrojnë perspektivën, mbeten në sipërfaqe të problemeve, mbështeten vetëm në njohuritë praktike, pa u ballafaquar me përvojën dhe mendimin e përparuar, me ndryshimet që kanë ndodhur në jetën e vendit e të njerëzve. Të tilla shfaqje në shumicën e rasteve janë shkaku i mosplotësimit të planeve ekonomike ose i dobësive që vihen re në punën e disa ndërmarrjeve e të kooperativave bujqësore, si dhe në ndonjë rreth.

Tani kërkohet të punohet me kulturë, me dije, me kompetencë e njohuri shkencore. Shpesh përsëritim se jemi të detyruar të ecim nëpër rrugë të pashkelura, se jemi të detyruar të kërkojmë e të krijojmë. Por kjo nuk mund të arrihet pa njohuri të thella të teorisë marksiste-leniniste dhe pa studim e përgjithësim shkencor të praktikës revolucionare të komunistëve e të masave punonjëse. Sot problemet e prodhimit, të organizimit të punës, të arsimit e të kulturës, të shkencës dhe të mbrojtjes nuk mund të zgjidhen drejt e me sukses pa studime serioze. Të tilla studime janë të nevojshme të bëhen edhe për vetë punën drejtuese, organizuese dhe edukuese të Partisë. Studimet e përgjithësimet u zgjerojnë horizontin, u hapin perspektiva të qarta organizatave të Partisë, komunistëve e punonjësve, ndihmojnë për të luftuar shfaqjet e rutinës, të formalizmit e të cektësisë, për të krijuar bindje të shëndosha e për të përcaktuar drejt masat dhe rrugët për kryerjen e detyrave aktuale e të perspektivës.

Më mirë duhet të përdorin organet dhe organizatat e Partisë mendimin e kualifikuar të specialistëve, të aktivistëve e të njerëzve të tjerë kompetentë, që Partia ka përgatitur në çdo sektor. Nga ata kërkohet

që të mbështetin e të frymëzojnë mendimin e përparuar shkencor dhe ta vënë këtë në shërbim të zgjidhjes së detyrave. Ata duhet të luftojnë shfaqjet e sektarizmit e të nënvleftësimit të përvojës e të mendimit të përparuar. Shembullin në këtë drejtim duhet ta japin, në radhë të parë, vetë komunistët. Komunist i mirë është ai që thellohet në dijet shkencore, që mëson vazhdimisht vetë e nga të tjerët, ndjek zhvillimin e shoqërisë, përkrah të renë përparimtare, mendon për perspektivën.

Puna e Partisë nuk është një punë vetëm agjitative propagandistike për sqarimin dhe bindjen e njerëzve, por është edhe një punë organizuese e mobilizuese për të zbatuar vijën dhe direktivat e Partisë. Puna e Partisë udhëheq, edukon e mobilizon komunistët dhe masat për veprime revolucionare, që ata të mendojnë, të punojnë e të luftojnë si revolucionarë.

Partia ka luftuar shfaqjet e njëanshmërisë në punën e disa organeve dhe të organizatave-bazë, që u japin më shumë përparësi mbledhjeve, raporteve e diskutimeve të shumta e të gjata sesa përcaktimit të qartë të detyrave dhe të masave konkrete për zbatimin e tyre. Me këtë shpjegohen rastet kur, me gjithë mbledhjet e shumta që bëhen për të analizuar gjendjen e punëve në këtë ose në atë sektor, prapë problemet nuk zgjidhen e gjendja nuk ndryshon.

Përvoja ka treguar se problemet zgjidhen dhe detyrat realizohen jo vetëm duke i bërë thirrje ndërgjegjes së komunistëve e të punonjësve, por edhe duke e shoqëruar zbatimin e detyrave dhe punën për bindjen e njerëzve me masa të gjithanshme, me organizim e drejtim konkret, me kontroll e kërkesë llogarie. Masat ideopolitike dhe tekniko-organizative përbëjnë një unitet dialektik; ato i edukojnë, i mobilizojnë dhe i hedhin njerëzit në veprime revolucionare.

Përsosja e rolit pararojë të komunistëve ka qenë dhe mbetet edhe në të ardhmen detyrë kryesore e organeve dhe e organizatave-bazë të Partisë. Veçanërisht në kushtet aktuale komunistët kanë për detyrë të rritin kërkesat ndaj vetes për ta mbajtur lart këtë emër, të luftojnë çdo shfaqje të huaj te vetja e tyre e te të tjerët, të jenë njerëz të përparuar në çdo drejtim. Komunistët duhet të dallohen për vendosmërinë revolucionare dhe pjesëmarrjen aktive në luftën e përditshme për ndërtimin e socializmit dhe mbrojtjen e atdheut, të jenë kurdoherë në frontin më të vështirë e më të rëndësishëm të punës e të luftës, organizatorë e drejtues të talentuar që veprojnë me përgjegjësi për zbatimin e vijës së Partisë.

Masat i zbatojnë vendimet e organizatës së Partisë, i ndjekin komunistët, kur këta nuk i ndajnë fjalët nga veprat, kur mendojnë, punojnë e sakrifikojnë për interesat e punonjësve, të socializmit e të atdheut. Të jesh komunist e revolucionar do të thotë të marrësh përsipër dhe të realizosh detyra të mëdha, të mos mbetesh në vend, të mos kënaqesh me ritmet e zakonshme, të luftosh për zhvillime të shpejta në të gjitha frontet, të marrësh kurdoherë anën e së resë dhe ta mbrosh atë.

Puna e Partisë jep rezultate kur organizatat e Partisë, gjithë komunistët, zhvillojnë gjerësisht vetëveprimin, shpirtin krijues e novator.

Në këtë drejtim ka shembuj të shumtë e përvojë pozitive kudo. Megjithatë është e nevojshme që në disa organizata partie, te disa kadro e komunistë në ndërmarrje, në kooperativa bujqësore, në dikastere e institucione qendrore të luftohen shfaqjet e pritsshmërisë, zvarritjet e ngurrimit, mungesa e iniciativës për t'u dhënë rrugëzgjidhje problemeve që janë në kompetencën e tyre.

Metodat e punës, të drejtimin e të organizimit nuk janë të dhëna një herë e përgjithmonë e të paprekshme. Jeta shkon përpara, shoqëria jonë socialiste zhvillohet pa pushim, kushtet ndryshojnë. Ky zhvillim kërkon të jemi krijues e novatorë, të gjejmë forma të reja pune më të zhërvjellëta e të larmishme, t'i ripërtërijmë e t'i pasurojmë vazhdimisht ato, që t'u përgjigjen më mirë kërkesave të kohës.

Një punë më e kualifikuar dhe efektive kërkohet për zbrërthimin e direktivave të Partisë. Kjo është detyrë themelore e organizatave-bazë, e të gjithë komunistëve. Në direktivat e Partisë shprehet vija e saj, përcaktohen detyrat që u dalin komunistëve e masave për zgjidhjen e problemeve të ndryshme. Në punën për zbrërthimin e direktivave të Partisë është fituar një përvojë e mirë. Megjithatë duhen luftuar më me forcë shfaqjet e formalizmit e të shabllonizmit që vihen re akoma në disa organe e organizata-bazë partie. Disa herë ndodh që direktivat dhe vendimet e Partisë nuk shkojnë në bazë, te njerëzit, me po atë seriozitet e forcë që i shtron Komiteti Qendror ose komitetet e Partisë të rretheve. Ato transmetohen mekanikisht poshtë, pa mbajtur parasysh kushtet konkrete ku vepron organizata e Partisë, gjendjen dhe detyrat që ajo ka për të zgjidhur.

Të zbrërthesh direktivën e Partisë, do të thotë të sqarosh nevojën dhe rëndësinë e saj nga pikëpamja politike, ideologjike dhe ekonomike, të nxjerrësh detyrat që dalin për organizatat e Partisë, organizatat e masave, organet e pushtetit, të ekonomisë, të kulturës etj. në përshtatje me kushtet konkrete të çdo rrethi, zone, sektori e kolektivi, të përcaktosh rrugët dhe masat e nevojshme për realizimin e këtyre detyrave.

Rëndësi vendimtare ka hedhja e masave në aksione revolucionare për zbatimin e plotë e me krijimtari të direktivës. Këtu, në zjarrin e kësaj lufte, provohet edhe drejtësia e direktivës së Partisë, bëhen edhe plotësimet e korrigjimet e nevojshme të saj. Në aksion e nëpërmjet tij komunistët dhe masat forcojnë bindjet për direktivat e Partisë, edukohen e kaliten, shfaqin iniciativat e tyre revolucionare, realizojnë unitetin e fjalës me vepra, sigurojnë ritme të larta pune për kryerjen në kohë e me cilësi të detyrave. Aksioni shërben, gjithashtu, për të luftuar metodat burokratike e teknokratike, zvarritjet, rehatinë e vetëkënaqësinë, shërben për të gjallëruar kudo jetën, punën, njerëzit.

Puna e Partisë bëhet efektive kur organet dhe organizatat e Partisë mbajnë e ndiejnë përgjegjësi të plotë për zbatimin e vijës së Partisë, për plotësimin e detyrave të planit të shtetit. Pa ndjenjë përgjegjësie nuk ka luftë e përpjekje, nuk ka aksion revolucionar për zgjidhjen e problemeve. Detyrat përballohen duke luftuar e punuar me devotshmëri e shpirt sakrificë, duke i vënë shpatullat punës, duke kryer deri në një detyrat, me cilësi dhe efektivitet të lartë.

Është fakt se shumica dërrmuese e organeve dhe e organizatave të Partisë, e komunistëve dhe e kadrove punojnë me ndjenjë të lartë përgjegjësie. Por gjenden edhe organizata, komunistë e kadro që nuk luftojnë me këmbëngulje për kapërcimin e vështirësive e të pengesave dhe për zbatimin e detyrave. Shfaqjet e indiferentizmit e të justifikimit, rrumbullakosja e të metave dhe e dobësive nuk janë veçse mungesë e ndjenjës së përgjegjësisë.

Partia duhet të luftojë për të rritur ndjenjën e përgjegjësisë jo vetëm në radhët e veta, por edhe në organet e organizmat që ajo drejton, te të gjithë punonjësit e kadrot. Duke rritur ndjenjën e përgjegjësisë kolektive të çdo organi, organizate-bazë partie, të levave të tyre dhe të përgjegjësisë individuale të çdo komunisti e kadri, krijohet një garanci e madhe për zbatimin e detyrave në çdo kohë e në të gjitha fushat.

Ndjenja e përgjegjësisë forcohet kur rritet kërkesa e llogarisë ndaj cilitdo, kur ushtrohet kontrolli i rreptë për zbatimin e detyrave. Me gjithë përmirësimet që janë arritur në këtë drejtim, ka akoma shfaqje liberale e qëndrime sentimentale, frymë justifikimi, ka shfaqje nënvleftësimi për kontrollin dhe formalizëm e cektësi në ushtrimin e tij. Disa herë kontrolli dhe kërkesa e llogarisë janë të dobëta, sepse detyrat dhe vendimet janë të përgjithshme e, si rrjedhim, edhe të pakontrollueshme.

Çdo komunist dhe anëtar forumi, pavarësisht nga posti që mban dhe nga funksioni që kryen, duhet të japë dhe të kërkojë llogari deri në një për zbatimin e vijës dhe të direktivave të Partisë, të vendimeve të organizatës-bazë e të detyrave shtetërore. Kjo arrihet kur komunistët zhvillojnë me guxim e pa druajtje autokritikën, si dhe kritikën ndaj kujt do që nuk realizon detyrat, kur bëjnë një luftë të vendosur kundër frikës, hakmarrjes e indiferentizmit mikroborgjez. Qëndrimi autokritik ndaj të metave, guximi i komunistëve për të kritikuar e për të kërkuar llogari janë një shembull dhe burim i madh frymëzimi për të gjitha masat punonjëse.

Stalini na mëson se kontrolli

«... i organizuar mirë, është ai projektor që ndihmon për të ndriçuar gjendjen e punës së aparatit në çdo kohë dhe për të nxjerrë në shesh burokratët dhe formalistët»¹.

Këtë mësim duhet ta kemi kurdoherë parasysh e ta vëmë në jetë me konsekuencë. Detyra e organeve dhe e organizatave të Partisë është të gjallërojnë e të forcojnë kontrollin e Partisë dhe kontrollin shtetëror, kontrollin punëtor dhe atë të masave, t'i zhvillojnë ato në mënyrë të vazhdueshme e të ndërthurur me njëri-tjetrin. Kontrolli nga lart, ai paralel ose kontrolli nga poshtë të jenë medoemos më veprues, të shoqërohen me ndihmë konkrete, të hapin perspektivë, t'i mësojnë njerëzit si ta organizojnë punën, si të mobilizohen e të luftojnë me vështirësitë për realizimin e detyrave.

¹ J. V. Stalin. Vepra të zgjedhura, f. 418-419. Tiranë, 1979.

3. Të zbatojmë drejt kriteret e vendosura për shtimin e radhëve të Partisë

Partia jonë kurdoherë ka zbatuar me vendosmëri e në mënyrë revolucionare kriteret e drejta për shtimin e radhëve të saj. Këto e kanë forcuar e shëndoshur Partinë dhe kanë rritur efektivitetin e punës së saj.

Në këtë Kongres Partia vjen me radhë të shtuara, me komunistë luftëtarë të vendosur për çështjen e popullit, të revolucionit e të komunizmit, proletarë nga mendimi e nga veprimi. Tani në efektivin e saj militojnë 122 600 komunistë, nga të cilët afro 38 për qind janë punëtorë, 29,4 për qind kooperativistë dhe 32,6 për qind nëpunës. Gratë përfaqësojnë 30 për qind ose 2,5 për qind më shumë se në Kongresin e mëparshëm. Komunistët përfaqësojnë 4,5 për qind të popullsisë. Në vitet pas Kongresit të 7-të janë pranuar 24 363 kandidatë partie, nga të cilët 42,40 për qind punëtorë, 40,43 për qind kooperativistë dhe 17,17 për qind nëpunës. Shoqet zënë 40,70 për qind të tyre.

Shumica dërrmuese e të pranuarve, anëtarë e kandidatë partie, vijnë nga prodhimi, sidomos nga frontet më kryesore të tij. Ata janë nga punonjësit më të mirë, më të formuarit politikisht e ideologjikisht, me cilësi e virtyte të larta morale, me nivel të ngritur arsimor, luftëtarë pararojë, pjesëmarrës aktivë në ndërtimin e socializmit.

Komiteti Qendror, në bazë të përvojës dhe të situatës, mendon se është me vend që, edhe në të ardhmen, për shtimin e radhëve të Partisë, të zbatohen, përafërsisht, të njëjtat ritme e kriteret që janë ndjekur edhe në pesë vjetët e kaluar:

Të pranohen me përparësi aktivistë nga radhët e klasës punëtoare, sidomos nga ata që punojnë në degët kryesore të prodhimit, në industrinë e rëndë, nxjerrëse e përpunuese, në veprat e mëdha që ndërtohen.

Të punohet më mirë për të shpejtuar realizimin e pikësynimit të caktuar nga Kongresi i 7-të që komunistët kooperativistë, në perspektivë, të dalin në vendin e dytë, pas punëtorëve, në efektivin e Partisë.

Të pranohen nga nëpunësit dhe inteligjencia ata që kanë nivel të lartë ideopolitik e kulturor, teknik e shkencor dhe që punojnë në sektorët më të rëndësishëm të ndërtimit socialist e të mbrojtjes.

Të rritet më tej kujdesi dhe puna për shtimin e radhëve të Partisë me gra.

Zbatimi i këtyre orientimeve kërkon që organet dhe organizatat-bazë të Partisë të bëjnë një punë më të kualifikuar e më të menduar për shtimin e radhëve të Partisë. Të luftohen me vendosmëri shfaqjet formale e burokratike, çdo prirje për të qenë në rregull me shifrat e përqindjet.

Vendimtare në politikën e Partisë për shtimin e radhëve të saj ka qenë dhe mbetet cilësia e pranimeve. Kandidatët duhet të jenë të ngritur politikisht e ideologjikisht, të aftë e të zotë, të përparuar në mendime e veprime, me horizont të gjerë kulturor, arsimor e tekniko-profesional, të gëzojnë besimin e respektin e masës, të jenë me iniciativë e revolucionarë konsekuentë. Asnjë nuk duhet pranuar në Parti thjesht

pse është bir punëtori, fshatari ose komunisti, për meritat e nënës e të babait, por për meritat e veta personale, për cilësitë dhe aftësitë e tij. Këto cilësi e veti duhet të kaliten më tej nga organizatat-bazë të Partisë dhe nga vetë çdo komunist në luftën dhe veprimtarinë e përditshme.

Në formimin komunist të të pranuarve rishtas në Parti rol të madh luan stazhi i kandidatit. Përvoja e grumbulluar duhet të shërbejë që të rritet roli dhe përgjegjësia e organizatave-bazë për edukimin e vazhdueshëm ideopolitik të kandidatëve dhe për kalitjen e tyre revolucionare. Të luftohen shfaqjet që vihen re në disa raste, kur stazhi i kandidatit nënvleftësohet ose kur nuk zbatohen me rreptësi rregullat e vendosura për kryerjen e tij.

4. Të përsosim punën e Partisë me kuadrin

Në gjithë veprimtarinë e saj 40-vjeçare Partia i ka kushtuar kurdoherë një kujdes të veçantë punës me kuadrin dhe ka ndjekur në këtë çështje me rëndësi jetike një politikë të drejtë e me perspektiva të qarta. Gjatë këtyre vjetëve ajo ka përgatitur një armatë të tërë kuadrosh të të gjitha specialiteteve, për të gjitha fushat e sektorët e jetës, që shquhen për cilësitë e virtytet e larta morale, për pjekurinë politike e ideologjike, për besnikërinë e devotshmërinë ndaj çështjes së popullit e të socializmit, për aftësitë e zotësitë e tyre në kryerjen e detyrave.

Ashtu si në të gjitha fushat e tjera, edhe në punën me kuadrin Partia ka politikën e vet, ka përcaktuar orientime, kriteret e norma të qarta marksiste-leniniste. Politika e kuadrin është monopol i Partisë, ajo përpunohet nga Komiteti Qendror i saj dhe zbatohet kudo nën udhëheqjen e Partisë. Kjo është një çështje parimore që duhet kuptuar drejt e nga të gjithë. Por, lidhur me këtë problem, Komiteti Qendror i Partisë ka kritikuar disa kuptime të ngushta e ka korrigjuar disa praktika të gabuara që ishin vënë re në punën me kuadrin. Monopoli i Partisë në politikën e kuadrin nuk do të thotë që problemet e kuadrin të trajtohen vetëm nga komitetet e Partisë. Konfondimi i këtyre çështjeve nuk mund të mos çojë, ashtu siç kishte çuar, në një përqendrim të madh të punës me kuadrin në organet dhe organizatat e Partisë. Partia jep orientimet, cakton kriteret, vendos normat për përgatitjen, edukimin, zgjedhjen dhe vendosjen e kuadrove, por këto zbatohen jo vetëm dhe drejtpërdrejt nga komitetet e Partisë, por edhe nga të gjitha levat e saj, nga organet e pushtetit, të ekonomisë, të ushtrisë e të organizatave të masave. Edhe në punën me kuadrin secilit organ Partia i ka dhënë kompetenca dhe i ka vënë detyra të përcaktuara, të cilat duhen zbatuar me përgjegjësi, me partishmëri e me përpikëri. Kjo nuk i ul aspak rolin dhe përgjegjësinë e organeve dhe të organizatave të Partisë, përkundrazi, i forcon ato. Ashtu siç udhëheq e kontrollon punën në çdo sektor, po kështu Partia udhëheq e kontrollon edhe zbatimin e politikës së saj në punën me kuadrin.

Vëmendje e kujdes të madh duhet të tregojë Partia për t'i përdorur drejt kuadrot, për të shfrytëzuar më mirë aftësitë e tyre intelektuale e krijuese dhe për t'i vënë ato plotësisht në shërbim të prodhimit, të edukimit e të mbrojtjes. Kuadrot e specialistët e ndryshëm të ngarkohen me detyra e të vendosen në funksione që përputhen me profilin, specia-

litetin e përvojën e tyre, duke mbajtur kurdoherë parasysh cilësitë morale-politike dhe aftësitë profesionale. Sidomos në shkollat e larta, në institucionet kërkimore-shkencore, projektuese e krijuese të zgjidhen e të vendosen, aq sa është e domosdoshme e pa dobësuar punën në bazë e prodhimit, specialistë nga më të mirët, më të talentuarit, më të zotët dhe që kanë dhënë prova.

Në ngritjen e kuadrove të mbahen mirë parasysh kërkesat e kohës. Në të gjitha funksionet, si në organet e zgjedhura, ashtu edhe në ato që emërohen, të ngrihen kuadro të aftë, që t'u dalin zot punëve e t'i drejtojnë ato me kompetencë. Ndryshe u hapet rruga burokratizmit, rutinës, mediokritetit. Edhe ata specialistë që ngrihen në përgjegjësi në funksione të ndryshme të Partisë, të pushtetit, të ekonomisë e të sektorëve të tjerë, duhet të mbeten kurdoherë krijues dhe të mos shndërrohen në administratorë të thjeshtë, në kuptimin e ngushtë të fjalës.

Një punë të veçantë ka bërë Partia për ngritjen e kuadrove nga radhët e njerëzve që punojnë drejtpërdrejt në prodhim, si edhe nga radhët e grave. Në organet e zgjedhura të Partisë, të pushtetit dhe të organizatave të masave vendin e parë e zënë njerëzit që punojnë në prodhim. Në kuadrot e emëruar ata me origjinë e prejardhje punëtore zënë 33 për qind. Ndër kuadrot me arsim të lartë e të mesëm 44 për qind e tyre janë gra e të reja. Për të zbatuar drejt orientimet e dhëna nga Kongresi i 7-të i Partisë, Komiteti Qendror ka tërhequr vëmendjen e organeve e të organizatave të Partisë që, krahas luftës kundër konservatorizmit, sektarizmit e teknokratizmit, të luftojnë edhe kundër zbatimit formal të këtyre orientimeve sa për të ruajtur mekanikisht disa përpjesëtime orientuese në dëm të cilësisë. Edhe në të ardhmen ne do të ngremë në përgjegjësi punëtorë dhe gra, sepse ky është një orientim i drejtë, por do t'i ngremë këta jo vetëm se janë të tillë, por sepse e meritojnë. Tani ne kemi me qindra e mijëra njerëz të zotë, të aftë e me përvojë nga radhët e klasës punëtore, të fshatarësisë kooperativiste e të grave, që i kanë të gjitha kushtet të marrin përsipër detyra më të mëdha. Në punë e sipër dhe me ndihmën e shoqeve e të shokëve më të vjetër e më me përvojë ata do të rriten e do të bëhen kuadro të kualifikuar, ashtu siç janë bërë shumë prej tyre.

Me këtë masë të madhe njerëzish të mësuar që kemi duhet hedhur poshtë si krejt pa baza mendimi se nuk ka kuadro dhe as duhet lejuar që të paaftët të qëndrojnë në ato detyra që nuk i kryejnë dot ose të kufizohemi vetëm te disa njerëz e të bëhen lëvizje pa kriter, siç ndodh disa herë. Ashtu si deri sot, edhe në të ardhmen, Partia duhet të ecë me guxim në ngritjen e kuadrove të rinj. Në numrin e përgjithshëm të kuadrove 38 për qind janë të moshave deri 30 vjeç; rreth 34 për qind janë 31 deri 40 vjeç dhe 28 për qind janë mbi 41 vjeç. Kjo tregon se rritja dhe përtëritja e kuadrove ecin në rrugë normale. Megjithatë duhen luftuar ato shfaqje të konservatorizmit që ende vihen re dhe që pengojnë ngritjen e kuadrove të rinj në vende me përgjegjësi. T'u besohet më shumë kuadrove të rinj, të zgjedhur e të emëruar, dhe ata me siguri do ta ngrenë edhe më lart punën dhe veprën e Partisë. Besimi të rinjtë duhet shoqëruar edhe me ndihmën për ta, por edhe vetë këta nga ana e tyre duhet të rritin përpjekjet, të punojnë, të mësojnë e të krijojnë

në. Partia dhe populli gëzohen e krenohen kur shikojnë se si njerëzit e rinj që ka edukuar Partia, drejtojnë e punojnë me zotësi në sektorë të ndryshëm të jetës së vendit.

Partia punon që jeta aktive e kuadrove të jetë sa më e gjatë. Megjithatë jeta e njeriut ka ligjet e saj. Ka kuadro që duhet të dalin në pension, ka të tjerë që fizikisht nuk i përballojnë dot detyrat, ashtu siç ka edhe nga ata që për fajin e tyre, nuk kanë ecur me kërkesat e kohës. Prandaj është absolutisht e domosdoshme që çdo kuadër të mendojë e të punojë seriozisht, me pasion e përgjegjësi për të përgatitur zëvendësit e tij, të cilët Partia t'i përdorë ku e kur t'i duhen.

Një detyrë e dorës së parë në punën e Partisë me kuadrot është formimi dhe kalitja e tyre si revolucionarë konsekuentë. Këtë detyrë Partia jonë e ka pasur kurdoherë në qendër të vëmendjes së saj. Ajo ka zhvilluar një veprimtari të gjithanshme edukative dhe ka marrë masa për t'i vënë kuadrot në kushte të atilla, që ata të militojnë kurdoherë për vijën e Partisë e të jenë shërbëtorë besnikë të popullit. Kjo ka qenë një ndër garancitë që çështja e revolucionit dhe e socializmit në Shqipëri ka ecur gjithnjë përpara.

Për të ecur me siguri në këtë rrugë të drejtë edhe në të ardhmen, kuadrot duhet të armatosen vazhdimisht me ideologjinë e Partisë, të zbatojnë vijën e saj dhe ligjet e shtetit, të marrin pjesë aktive në luftën e klasave dhe të mbajnë lidhje të ngushta me masat. Vetëm kështu luftohen me sukses shfaqjet e burokratizmit e të liberalizmit, të intelektualizmit e të teknokratizmit, forcohet botëkuptimi dhe karakteri komunist i kuadrove.

Vendi ka nevojë për kuadro me horizont të gjerë kulturor, me njohuri të thella shkencore, për kuadro që dinë të përdorin me efektivitet mendimin e përparuar, rezultatet e shkencës, që njohin ligjet e zhvillimit të ekonomisë, që dinë të planifikojnë saktë e të zbatojnë drejt, të punojnë me llogari. Është detyrë e të gjithëve, të zgjedhur e të emëruar, që të ngrihen në nivelin e kërkesave të kohës dhe të funksioneve që u janë besuar.

Për këtë do të na duhet ta përmirësojmë akoma më tej e ta vëmë në baza me shkencore punën për përgatitjen, kualifikimin e specializimin e kuadrove. Kjo përgatitje duhet bërë shkencërisht dhe e planifikuar me rigorozitet në bazë të nevojave të tanishme e të ardhshme. Detyra të mëdha kanë në këtë drejtim shkollat tona, veçse duhet pasur parasysh që kualifikimi e specializimi nuk bëhen vetëm në shkolla, por edhe në jetë e në punë. Në praktikën e përditshme njerëzit duhet të mësohen të ecin me llogari, të jenë metodikë e këmbëngulës në punë, prodhues të zotë e krijues me imagjinatë.

5. Të forcojmë më tej sistemin politik të diktaturës së proletariatit

Pas Kongresit të 7-të, me miratimin e Kushtetutës së re dhe të kodeve e ligjeve të tjera që burojnë prej saj, është forcuar më tej drejtimi, organizimi dhe veprimtaria e tërë sistemit të diktaturës së proletari-

riatit, të vetë Partisë, të shtetit, të forcave të armatosura, të organizatave të masave etj.

Punën me levat e saj Partia e ka trajtuar gjithnjë si një domosdoshmëri absolute për të realizuar qëllimin dhe programin e saj. Sa më të mëdha e më të rëndësishme janë detyrat që kryen Partia, aq më shumë rritet kujdesi dhe puna e saj me organet e pushtetit dhe me organizatat e masave. Por, me gjithë sukseset e arritura, në disa organizata, komitete partie e komunistë të veçantë nuk ka një kuptim të plotë e të saktë për rolin e Partisë në sistemin e diktaturës së proletariatit. Ka organe dhe organizata partie që nuk sigurojnë gjithnjë një udhëheqje konkrete e të kualifikuar të organeve të pushtetit e të organizatave të masave, ka paralelizëm, spostime e zëvendësime të roleve, ka komunistë që nuk militojnë aktivisht në organizatat e masave, ashtu siç ka edhe shfaqje të formalizmit në punën me masat. Këto janë të meta që dobësojnë forcën dhe efektivitetin e punës së Partisë.

Dihet se sistemi i diktaturës së proletariatit përfshin një kompleks të tërë organeve dhe organizmash, me funksione, kompetenca e përgjegjësi të ndryshme, të ndërtuara në bazë të centralizmit demokratik e që funksionojnë nën udhëheqjen e Partisë. Problemi shtrohet që gjithë ky sistem të forcohet në mënyrë të vazhdueshme e të veprojë në mënyrë të sinkronizuar, duke kryer secili me përpikëri detyrat që i takojnë e, të gjithë së bashku, qëllimin dhe programin e Partisë.

Këtë sistem të organizuar Partia e udhëheq në tërë piramidën, nga baza në qendër, me politikën dhe ideologjinë e saj, me veprimtarinë e organizatave dhe organeve të Partisë e të çdo komunisti. Anëtarët e Partisë dhe kuadrot e saj, të zgjedhur e të emëruar në funksione të ndryshme të Partisë, të pushtetit, të ushtrisë, të ekonomisë, të organizatave të masave etj., i kuptojnë përgjegjësitë që u ngarkohen si një ndarje pune që bën Partia ndërmjet anëtarëve e kuadrove të saj.

Të gjitha levat e Partisë, edhe pse kanë organet e tyre drejtuese, udhëhiqen nga Partia jo vetëm në përgjithësi, por edhe nga çdo organ e organizatë-bazë partie. Dobësimi sadopak i rolit udhëheqës të Partisë në çdo hallkë, do të ishte me pasoja të këqija. Pikërisht këtë përpigjen të arrijnë borgjezja dhe revizionistët modernë, të cilët, në orvatjet e tyre për të minuar sistemin e diktaturës së proletariatit, synojnë t'i shkëputin levat nga udhëheqja e Partisë, t'i shndërrojnë ato në organizata të pavarura, t'i vënë përbri e kundër Partisë.

Udhëheqja e Partisë në sistemin e diktaturës së proletariatit nuk e kufizon dhe nuk e cunon aspak veprimtarinë e organeve të pushtetit ose të organizatave të masave. Përkundrazi, Partia punon e lufton që të rriten roli dhe përgjegjësia e tyre, të zhvillohet iniciativa, të forcohen ato politikisht e organizativisht, të aftësohen për t'i kryer sa më mirë detyrat e tyre. Për këtë qëllim Partia ka kritikuar e kritikon si të huaja e të dëmshme ato praktika kur ndonjë organ ose organizatë partie përpigjet të vendosë mbi levat e Partisë një tutelë burokratike, t'u diktojë e t'u imponojë atyre çdo gjë, të ndrydhë e të mbytë vetëveprimin e tyre.

Si forca udhëheqëse e shtetit dhe e shoqërisë, Partia e ka për detyrë të bashkërendojë punën e të gjitha organeve të pushtetit e të organizatave të masave. Edhe vetë këto të fundit, krahas kryerjes së funksioneve e të

detyrave të tyre, duhet të forcojnë bashkëpunimin me njëra-tjetrën si një kusht i domosdoshëm për suksesin e veprimtarisë së tyre. Natyrisht, çdo organ e organizatë ka profilin dhe specifikën e punës së vet, por këto veçori nuk duhen absolutizuar, sepse të gjithë punojnë e luftojnë për një qëllim. Duke bashkëpunuar, ato nuk dublojnë e nuk zëvendësojnë njëra-tjetrën, as vihen në varësi të njëra-tjetrës, sepse të gjitha udhëhiqen nga Partia dhe secila në linjën e vet punon e lufton për zbatimin e detyrave që shtron ajo.

Një kujdes të veçantë tregon Partia për forcimin e vazhdueshëm të organeve të pushtetit shtetëror dhe të administratës shtetërore, nga qendra në bazë. Pushteti popullor është fitorja më e madhe dhe arma më e fuqishme e klasës punëtore dhe e masave punonjëse për ndërtimin e socializmit dhe mbrojtjen e atdheut. Prandaj këtë pushtet e ruajmë si sytë e ballit dhe e forcojmë vazhdimisht në luftë me rreziqet që i kanosen, me liberalizmin e burokratizmin.

Kujdesi i Partisë për forcimin dhe rritjen e rolit të organeve të pushtetit, e veçanërisht të këshillave popullorë, ka qenë dhe duhet të jetë i vazhdueshëm. Partia ka luftuar çdo shfaqje të formalizmit në veprimtarinë e këshillave dhe ka kërkuar që të zbatohen me përpikëri të drejtat dhe kompetencat e tyre, të cilat nuk duhet lejuar kurrë që t'u merren nga organet ekzekutive. Respektimi me rreptësi i normave të Kushtetutës për organet e pushtetit shtetëror dhe për raportet ndërmjet tyre dhe organeve ekzekutive urdhërdhënëse ka të bëjë me ruajtjen e karakterit demokratik të pushtetit tonë, që i ka rrënjët në popull dhe që i përket popullit.

Organet e pushtetit shtetëror të ne e kryejnë veprimtarinë e tyre në lidhje të ngushtë me masat punonjëse. Në këto lidhje të ngushta me popullin qëndron forca e pathyeshme e pushtetit tonë popullor, prandaj t'i ruajmë, t'i forcojmë e t'i përsosim ato vazhdimisht. Duke ecur si gjithnjë me konsekuencë në këtë rrugë, do të rritet edhe vetë roli i masave, pjesëmarrja e tyre në punët e shtetit, do të zgjerohet demokracia jonë socialiste, pa të cilën nuk mund të kuptohet e të forcohet diktatura e proletariatit.

Gjithë veprimtaria e shtetit tonë mbështetet në Kushtetutën e në ligjet që burojnë prej saj, në të cilat shprehet në formë të sintetizuar përmbytja e vijës dhe e politikës së Partisë. Partia nuk i ka lejuar e nuk do t'i lejojë shfaqjet e arbitraritetit dhe të shkeljes së ligjeve që do të cenonin interesat e shoqërisë ose të shtetasve të veçantë, prandaj ka ngulur këmbë vazhdimisht që ligjet e shtetit të njihen mirë e të zbatohen me përpikëri nga të gjitha organet shtetërore e punonjësit e tyre. Njëpërmjet një pune të gjerë propagandistike këto ligje u duhen bërë të njohura gjithnjë e më mirë edhe masave punonjëse, që ato të dinë të kryejnë detyrat e të mbrojnë të drejtat e tyre, të luftojnë kundër çdo shtrembërimi të ligjit nga çdo anë që të vijë. Njohja dhe zbatimi i ligjeve është një kusht vendimtar që veprimtaria e organeve shtetërore dhe e masave të popullit të zhvillohet në rrugë të drejtë dhe të ketë suksese. Kjo ndihmon që të forcohet kudo disiplina, rregulli e ndërgjegjja socialiste dhe t'i pritët rruga shumë të këqijave.

Partia punon që organet e zgjedhura të pushtetit, që nga këshillat

popullorë të fshatrave, të rretheve e deri në Kuvendin Popullor, komisionet e ndryshme pranë tyre dhe organet ekzekutive, të ndjekin frontalisht detyrat e të ushtrojnë kompetencat që u përkasin në të gjitha fushat e jetës: politike, ekonomike, social-kulturore, arsimore, shkencore etj. Ajo punon që të shmangen shfaqjet e njëanshmërisë që vihen re në disa organe të pushtetit në rrethe, të cilat merren kryesisht me problemet ekonomike dhe tregojnë pak kujdes për fushat e tjera të veprimtarisë shtetërore. Partia ka kritikuar gjithashtu praktikën e disa këshillave popullorë të fshatrave të bashkuara, të cilët, duke u nisur nga fakti se me problemet e drejtimit e të zhvillimit të ekonomisë merren kryesisht e kooperativave bujqësore, nuk i kanë ndjekur ato, nuk kanë ushtruar kontroll dhe nuk kanë kërkuar llogari për kryerjen e detyrave të planit të shtetit në ekonomi.

Detyrat e mëdha që kemi përpara kërkojnë që të përsoset më tej metoda dhe stili i të gjitha organeve shtetërore, organizimi dhe drejtimi i punëve nga ana e tyre. Kjo përsosje nuk duhet kuptuar në mënyrë të thjeshtë e burokratike, sikur mund të arrihet duke shtuar organikat. Përkundrazi, organizimi dhe drejtimi i punëve përmirësohen e përsosen duke luftuar shfaqjet e burokratizmit, sidomos në konceptet, metodat e format e vjetruara të punës, që në mjaft raste nuk u përgjigjen stadi të zhvillimit e kompleksitetit të problemeve që i dalin vendit.

Në organet e pushtetit dhe të administratës shtetërore, në qendër e në bazë, duhet bërë një luftë më këmbëngulëse nga organizatat e Partisë, kuadrot e punonjësit e tyre kundër çdo mungese të ndjenjës së përgjegjësisë, zvarritjeve të ndryshme, rendjes pas çikërrimave të ditës, mungesës së iniciativës e të vetëveprimit, shfaqjeve të servilizmit, konformizmit ose të prepotencës, qëndrimeve të ngushta sektoriale e lokale, koncepteve e praktikave artizanale etj. Që kjo luftë të ketë sukses, duhet bërë edhe me edukim, por edhe me organizim, disiplinë e kontroll të rreptë.

Gjatë periudhës midis dy kongreseve, Komiteti Qendror i Partisë dhe Këshilli i Mbrojtjes kanë marrë masa të rëndësishme për forcimin e mëtejshëm të aftësisë mbrojtëse të vendit. Partia dhe pushteti, kuadrot ushtarakë, aktivë e rezervistë, kanë zhvilluar një punë të madhe në ushtri dhe kanë luftuar me sukses për zhdukjen e pasojave të veprimtarisë armiqësore të Beqir Ballukut me shokë. Kjo ka bërë që të ngrihet në një shkallë më të lartë organizimi, stërvitja, edukimi dhe gatishmëria luftarake e forcave tona të armatosura.

Mbrojtjen e atdheut Partia jonë asnjëherë nuk e ka mbështetur në ndihmën e jashtme ose në koniunkturat e ndryshme ndërkombëtare, por kryesisht në faktorin e brendshëm, në forcën, në patriotizmin, në trimërinë e popullit tonë, si dhe në përgatitjen e gjithanshme e në gatishmërinë e përhershme luftarake të të gjithë vendit për mbrojtjen. Direktiva e Partisë «Mbrojtja e Atdheut është detyrë mbi detyrat» po bëhet gjithnjë e më shumë një realitet i madh te ne. Nga kuptimi i plotë e i drejtë i kësaj direktive dhe nga lufta konkrete për zbatimin e saj varet shumë rritja e aftësisë mbrojtëse të vendit.

Partia kërkon që edhe në të ardhmen Ushtria Popullore, të gjitha strukturat e saj, si forca kryesore për mbrojtjen e atdheut, të fuqizo-

het, të modernizohet e të revolucionarizohet vazhdimisht. Për këtë është e nevojshme të rriten përpjekjet e organizatave të Partisë, të komunistëve dhe të gjithë efektivave për përgatitjen e lartë politiko-luftarake, për përvetësimin e zbatimin krijues të kërkesave të Artit tonë Ushtarak mbi Luftën Popullore, për zotërimin e përsosur të të gjitha llojeve të armëve e të teknikës luftarake, për forcimin e rregullit e të disiplinës ushtarake mbi bazën e rregulloreve përkatëse.

Te ne ushtri e popull janë një e të pandarë, Forcimit të këtij uniteti e të këtyre lidhjeve i shërben edhe ngritja e shkollave të lira ushtarake sipas mësimëve të Leninit të madh. Konsolidimi i tyre po e bën përgatitjen ushtarake pjesë të pandarë të jetës e të veprimtarisë së çdo punonjësi.

Mbrojtja e atdheut forcohet dhe bëhet e pathyeshme kur detyrat në fushën politike, ideologjike, ekonomike e ushtarake kuptohen e zbatohen të lidhura ngushtë e të pandara nga njëra-tjetra. Një kuptim dhe zbatim i tillë i detyrave do ta konsolidojë më tej frontin tonë të brendshëm në të gjitha drejtimet, do ta bëjë atë edhe më të aftë për të përballuar me sukses çdo situatë, një mur të hekurt ku do të thyente kokën çdo agresor që do të guxonte të ngrinte dorën kundër Republikës Popullore Socialiste të Shqipërisë.

Në luftën kundër armiqeve të jashtëm e të brendshëm për mbrojtjen e pushtetit popullor dhe të fitoreve të ndërtimit socialist një kontribut veçanërisht të madh e të rëndësishëm kanë dhënë e japin organet e punëve të brendshme, Sigurimi i Shtetit, Policia Popullore dhe Forcat e Kufirit. Të udhëhequra e të edukuara nga Partia, këto organe të dashura të popullit, besnike ndaj interesave të tij, i kanë plotësuar kurdoherë me ndërgjegje e përgjegjësi të lartë detyrat e tyre.

Nga organizatat e Partisë në organet e punëve të brendshme kërkohet që të zgjerojnë e të përmirësojnë punën për edukimin politik, ideologjik, kulturor e profesional të efektivave, të mprehin më shumë vigjilencën revolucionare, të forcojnë disiplinën dhe gatishmërinë luftarake. Kuadrot dhe efektivat e sistemit të Ministrisë së Punëve të Brendshme të shtojnë përpjekjet për të njohur gjithnjë e më mirë format, taktikat dhe metodat që përdor armiku, për t'u aftësuar vazhdimisht në artin e punës së tyre e për të zbuluar, parandaluar e goditur me forcë e në kohën e duhur çdo veprimtari armiqësore e keqbërëse.

Njohja gjithnjë e më mirë, në thellësi e gjerësi, e vijës së Partisë, e politikës dhe e normave të saj, e ligjeve të shtetit dhe zbatimimi me një disiplinë të lartë i tyre, janë kushte të domosdoshme për të rritur veprimtarinë e këtyre organeve, për të forcuar më tej frymën klasore, partishmërinë dhe objektivitetin në ushtrimin e funksioneve.

Forcimi i vazhdueshëm i udhëheqjes së Partisë, mbështetja e fuqishme te populli, janë garanci për të ruajtur e forcuar më tej karakterin popullor të organeve të punëve të brendshme, për të mbrojtur me vigjilencë interesat e atdheut e të socializmit.

Organet gjyqësore e të prokurorisë kanë lajuar një rol të rëndësishëm në forcimin e rendit tonë socialist, në mbrojtjen e në zbatimin e ligjshmërisë socialiste, në luftën parandaluese kundër veprim-

tarisë keqbërëse e në zbatimin e një politike të drejtë penale, sipas mësimëve të Partisë. Legjislacioni ynë ka karakter të theksuar klasor, politik, ideologjik, edukativ dhe administrativ. Ky karakter i legjislacionit tonë duhet mbajtur mirë parasysh edhe në të ardhmen në punën për njohjen, popullarizimin, interpretimin dhe zbatimin e ligjeve. Asnjë çështje që bie në kundërshtim me ligjet dhe që është në juridiksionin e këtyre organeve nuk duhet të kalojë pa u hetuar e gjykuar me pjekuri, drejtësi, partishmëri e kompetencë të lartë. Një punë e veçantë dhe më e kualifikuar duhet bërë për edukimin dhe aktivizimin e ndihmësgjyqtarëve dhe prokurorëve popullorë, që përbëjnë një forcë të madhe për mbrojtjen dhe zbatimin e ligjeve.

Partia jonë, si një parti e vërtetë marksiste-leniniste, ka vlerësuar gjithnjë drejt organizatat e masave, të cilat kanë luajtur e luajnë një rol me rëndësi të veçantë për edukimin dhe mobilizimin e punonjësve për realizimin e programit të Partisë. Si leva të saj, organizatat shoqërore jo vetëm orientimet e përgjithshme, por edhe veprimtarinë e përditshme të tyre e bazojnë në politikën e ideologjinë, në vendimet dhe direktivat e Partisë. Specifikat e punës së tyre janë të lidhura kryesisht me ato kërkesa të veçanta që ka Partia ndaj shtresave të popullsisë që përfshihen në këto organizata, me format dhe metodat e punës që duhen përdorur nga secila prej tyre për realizimin e detyrave.

Bashkimet Profesionale kanë një rol të veçantë në edukimin dhe në mobilizimin e klasës punëtore e të punonjësve të tjerë. Nën udhëheqjen e Partisë, ato i kanë kryer me sukses detyrat e tyre me shumë përgjegjësi.

Partia u ka ngarkuar Bashkimeve Profesionale detyra të mëdha për edukimin ideopolitik e tekniko-profesional të klasës punëtore për ta bërë atë të aftë të kryejë me sukses jo vetëm detyrat në fushën e prodhimit, por në të gjitha fushat e tjera të jetës së vendit, të marrë pjesë aktivisht në drejtimin e punëve shtetërore e shoqërore, të ushtrojë kudo e mbi këdo kontrollin e saj të klasës në fuqi. Për këtë është e nevojshme që Bashkimet Profesionale të përmirësojnë punën e tyre edukative, ta bëjnë atë konkrete e të lidhur ngushtë me jetën, me problemet që shqetësojnë kategoritë e ndryshme të punëtorëve, siç janë punëtorët e rinj, ata me banim në fshat, punonjësit e shërbimeve e të ndërmarrjeve bujqësore etj. duke rrënjësuar kudo tiparet e klasës punëtore; të luftojnë kundër rutinës, globalizmit e formalizmit në punën edukative dhe të përdorin forma pune të gjalla, të shkathëta e të larmishme, që t'u përgjigjen nivelit, interesave e kërkesave të klasës, situatave dhe detyrave të reja.

Klasa punëtore, si klasa udhëheqëse e shoqërisë socialiste, do të mbajë si kurdoherë edhe në këtë pesëvjeçar një peshë të madhe. Detyrat që shtrohen kërkojnë nga ajo që të punojë me hov e emulacion të madh, me ndjenjë të lartë përgjegjësie e me disiplinë të fortë proletare, me rendiment, cilësi e frymë kursimi. Është detyrë e Bashkimeve Profesionale që ta bëjnë klasën punëtore plotësisht të ndërgjegjshme për këto detyra dhe ta mobilizojnë atë për zbatimin e tyre, të nxitin e të përkrahin iniciativat, aksionet dhe mendimin krijues të klasës, të zhvillojnë kudo sedrën revolucionare për arritjen dhe tejkalimin e objektivave të planit të shtetit.

Punëtori duhet të njohë mirë ligjet e shtetit të tij, sidomos ato ligje që e mësojnë atë si ta kryejë detyrën e tij në rregull, që plani të realizohet në të gjithë treguesit, si ta mbrojë e ta administrojë pronën e përbashkët socialiste, si të forcojë rregullin dhe disiplinën në punë etj. Këto ligje punëtori duhet t'i mësojë tok me zanatin. Këtu Bashkimet Profesionale kanë një fushë të gjerë veprimi, ashtu siç duhet të punojnë e të luftojnë që të zbatohen me rreptësi edhe ligjet e shtetit që mbrojnë të drejtat e punëtorëve e të mos pajtohen me asnjë shkelje të tyre nga kushdo qoftë. Detyrat dhe të drejtat te ne janë në unitet dhe të pandara.

Në ndërtimin e Shqipërisë së re socialiste rinia ka qenë kurdoherë në ballë të punës e të luftës, ndihmëse luftarake e Partisë. Është një kënaqësi e madhe për të gjithë kur shikojmë se në vendin tonë brezi i ri rritet i gëzuar, i mësuar, i ngritur politikisht e ideologjikisht, i fortë fizikisht e me moral të lartë. Megjithatë, kujdesi i Partisë, i shtetit, i shoqërisë, i shkollës dhe i familjes për brezin e ri duhet të jetë i madh dhe i vazhdueshëm, sepse rinia është e ardhmja e vendit, shpresa e popullit dhe e socializmit. Partia dhe vetë organizata e Bashkimit të Rinisë, duhet të punojnë përshtur që të rritet gjithnjë e më shumë interesimi i rinisë për të gjitha problemet e vendit, për ato politike e ideologjike, të ekonomisë e të mbrojtjes, të arsimit e të kulturës, të shkencës e të teknikës, me qëllim që ajo, si forca më e gjallë e popullit, të marrë pjesë aktive në ndërtimin socialist dhe të futet në jetë gjithnjë e më e përgatitur.

Rinia është fidanishte e pashtershme jo vetëm për përtëritjen e radhëve të Partisë e të kuadrove, por edhe për arsye se ajo do të zëvendësojë brezat, do të mbushë radhët e klasës punëtore, të kooperativistëve e të inteligjencias, do ta çojë përpara veprën e pavdekshme të Partisë e të popullit tonë. Që kjo fidanishte të nxjerrë gjithnjë fidanë të shëndoshë, Partia kërkon nga anëtarët e saj, nga organizata e rinisë dhe nga kuadrot që janë ngarkuar të punojnë në këtë organizatë, që të përmirësojnë punën për edukimin politik, ideologjik, kulturor e profesional të të rinjve e të rejave të vendit tonë, për të mbajtur gjallë e për të zhvilluar traditat patriotike e revolucionare të popullit, për të kultivuar e nxitur shpirtin praktik e krijues, për t'i kalitur ata në kudhrën e madhe të ndërtimit socialist, të luftës klasore e të aksioneve revolucionare.

Partia ka besim se rinia jonë, ashtu si kurdoherë, do të mësojë me pasion në shkollë e në jetë, do të përvetësojë shkencën dhe teknikën, do të punojë me entuziazmin që e karakterizon në të gjitha frontet, në të katër anët e Shqipërisë, do të mësojë e do të stërvitet për të mbrojtur atdheun, do të luftojë me këmbëngulje për të përvetësuar ideologjinë fitimtare të Partisë.

Detyrat që shtrohen përpara brezit të ri, kërkojnë të forcohet e të gjallërohet vetë organizata e rinisë, të ngrihet në një nivel më të lartë veprimtaria e saj edukuese, organizuese e mobilizuese, të luftohen shfaqjet e liberalizmit, të sektarizmit e të formalizmit, të bëhet një punë në formë sa më të larmishme e interesante që t'u përgjigjet nivelit e kërkesave në rritje të të rinjve e të rejave, duke shfrytëzuar më mirë

të gjitha kushtet dhe mjetet që Partia dhe shteti kanë krijuar për edukimin, argëtimin dhe kalitjen e rinisë.

Partia ka luftuar e do të luftojë me konsekuencë për zbatimin e programit të saj për emancipimin e plotë të gruas shqiptare, pa të cilën nuk mund të kuptohet socializmi dhe nuk mund të ecë përpara ndërtimi i tij. Në jetën e gruas shqiptare janë bërë ndryshime kolosale, por edhe mjaft probleme që mbeten për t'u zgjidhur, sidomos në fushën e realizimit të barazisë së plotë të gruas me burrin në jetën shoqërore e familjare, në nivelin arsimor, kulturor e tekniko-profesional.

Gratë e vendit tonë kanë dhënë një kontribut me vlerë për realizimin e detyrave që shtroi Kongresi i 7-të i Partisë. Ato dhe organizata e tyre, Bashkimi i Grave të Shqipërisë, duhet të luftojnë që të mbarohet lart e të zhvillohet më tej fryma e emancipimit në vetë masën e grave dhe në tërë shoqërinë, që roli i gruas si ndërtuese aktive e socializmit, si mbrojtëse sypatrembur e atdheut, si nënë e kujdesshme dhe edukatore e brezit të ri të rritet vazhdimisht. Vëmendje të veçantë të tregojë organizata e gruas për forcimin e familjes e të kompleksit të marrëdhënieve familjare, për problemet e nënës e të fëmijës, të mënyrës së jetesës etj., duke luftuar me forcë kundër të gjitha shfaqjeve të huaja e zakoneve prapanike që ende vazhdojnë të manifestohen në raste e forma të ndryshme dhe që cenojnë dinjitetin e personalitetin e gruas.

Fronti Demokratik i Shqipërisë ka bërë një punë të madhe për forcimin e unitetit të popullit rreth Partisë, për edukimin patriotik e mobilizimin e punonjësve për plotësimin e detyrave të planit të shtetit, sidomos në fshat. Edhe në të ardhmen kjo organizatë masive, me tradita dhe autoritet, të luftojë që uniteti politik, ideologjik e moral i popullit të çelikeset vazhdimisht, që të rritet roli aktiv i masave në ndërtimin dhe mbrojtjen e socializmit, në qeverisjen e vendit, në forcimin e kontrollit shoqëror dhe në zhvillimin e demokracisë socialiste. Veteranët e luftës e të punës, pensionistët që shtohen nga viti në vit, janë një forcë tjetër e madhe, për të cilën Partia dhe shteti ynë kanë treguar e tregojnë një kujdes të veçantë. Ata gëzojnë respektin e tërë shoqërisë për luftën e punën që kanë bërë dhe për kontributin e çmuar që kanë dhënë. Por shumë prej tyre kanë ende forca dhe energji që mund e duhet t'i vënë në punë të dobishme shoqërore, sidomos për edukimin e brezit të ri me traditat e pasura të luftës e të punës heroike të Partisë e të popullit, si edhe për ruajtjen, zhvillimin dhe përjetësimin e këtyre traditave.

III

DETYRAT E PARTISË PËR EDUKIMIN KOMUNIST TË PUNONJËSVE

Edukimi i gjithanshëm i njeriut të ri ka qenë dhe mbetet çështje themelore e veprimtarisë së Partisë për të çuar kurdoherë përpara ndërtimin e shoqërisë socialiste. Ky edukim është bërë në front të gjerë, i li-

dhur ngushtë me detyrat e çdo etape të zhvillimit, me problemet që ka nxjerrë jeta dhe me situatat konkrete. Kjo ka siguruar e siguron karakterin aktiv, forcën e madhe mobilizuese e transformuese të punës edukative të Partisë dhe të levave të saj.

Kushtet në të cilat ne punojmë e luftojmë për ndërtimin dhe mbrojtjen e socializmit, si edhe detyrat që shtrojmë në këtë Kongres për zhvillimin ekonomik-shoqëror të vendit, kërkojnë që puna edukative e Partisë të ngrihet në një nivel më të lartë, të përqendrohet më mirë në disa probleme kryesore aktuale e të perspektivës, për të krijuar te njerëzit bindje të thella marksiste-leniniste, për t'i bërë ata të aftë nga ana profesionale, për t'i pajisur me kulturë të gjerë dhe me virtyte të pastra morale.

I. Edukimi komunist i punonjësve - bazë e sukseseve tonë

Shqipëria është vendi ku socializmi ndërtohet me sukses dhe qëndron në binarët e shëndoshë të marksizëm-leninizmit, ku zhvillimi i ekonomisë dhe i kulturës, organizimi dhe drejtimi i Partisë dhe i shtetit, formimi dhe kalitja e njeriut të ri bëhen mbi bazën e parimeve të socializmit shkencor. Rruga nëpër të cilën ka kaluar vendi ynë, nuk ka qenë e lehtë. Partisë dhe popullit u është dashur të përballojnë vështirësi të shumta, të çajnë në rrugë të njohura e të panjohura, në shtigje të reja e të pashkelura.

Besnikëria e pafund e Partisë sonë ndaj doktrinës së pavdekshme të Marksit, Engelsit, Leninit dhe Stalinit, aftësia e saj për ta zbatuar atë në mënyrë krijuese, në përshtatje me kushtet e vendit e në rrethana të ndërlikuara ndërkombëtare, vendosmëria për të mbrojtur pastërtinë e parimeve të saj nga sulmet e shtrembërimet e armiqve të shumtë, të brendshëm e të jashtëm, kanë qenë dhe mbeten baza e bazave të të gjitha sukseseve dhe fitoreve të popullit tonë.

Gjithë preokupimi i Partisë ka qenë që çdo hap në rrugën e revolucionit dhe në ndërtimin e socializmit të bëhej i menduar mirë, që themelet e shoqërisë së re socialiste të ishin të tilla që të siguronin zhvillimin e pandërprerë të saj drejt progresit dhe t'u bënin ballë dallgëve e furtunave të rrethimit armiqësor imperialisto-revizionist. Kjo është arsyeja që revolucionit dhe ndërtimi i socializmit në vendin tonë nuk kanë njohur zigzage dhe kthime prapa, por kanë ecur kurdoherë përpara dhe kanë shënuar gjithnjë fitore.

Shembulli i Shqipërisë është një përvojë e re në historinë e diktaturës së proletarietit dhe përbën një kontribut me vlerë në teorinë e praktikën e socializmit dhe të marksizëm-leninizmit.

Zhvillimin e vendit tonë në rrugën e socializmit komunistët, kuadrot, punonjësit, veçanërisht brezi i ri, duhet ta njohin mirë, ta kenë sa më të qartë nga jemi nisur e ç'rrugë kemi bërë, ç'vështirësi janë kapërcyer, ç'vijë ka ndjekur e ka zbatuar Partia, cilat janë themelet e kësaj shoqërie që është ndërtuar me gjakun, mundin dhe djersën e popullit tonë heroik.

Duke e njohur këtë rrugë të lavdishme e përvojë të pasur, njerëzit tanë do të kenë një shikim më të gjerë për shoqërinë socialiste, për stadin e sotëm e të ardhmen e saj dhe do të punojnë me ndërgjegje më të lartë e bindje të patundur për t'i çimentuar gjithnjë e më shumë fitoret e socializmit, për t'i çuar ato kurdoherë përpara. Partia duhet ta shikojë këtë si një çështje kapitale, sepse, sa më të forta të jenë themelet e të sotmes, aq më e siguruar do të jetë e ardhmja socialiste e komuniste e vendit tonë.

Forcimi i bindjeve për socializmin, për vitalitetin dhe epërsitë e tij merr një rëndësi të veçantë në kushtet e sotme, kur socializmi është minuar në shumë vende dhe kur imperialistët, borgjezia e revizionistët kanë ndërmarrë një fushatë të tërbuar kundër socializmit për të zhvlehtësuar idealet revolucionare, për të mbjellë farën e dyshimit e të pasigurisë në të ardhmen socialiste të njerëzimit. Tehu i gjithë kësaj lufte jo rastësisht është drejtuar kundër doktrinës sonë fitimtare, marksizëm-leninizmit, pa të cilën nuk ka e nuk mund të ketë socializëm të vërtetë.

Gjithashtu, duhet të kemi kurdoherë parasysh se kushtet në të cilat ndërtohet socializmi në Shqipëri janë tepër komplekse. Partia, shteti, populli ynë luftojnë ballë për ballë dhe vetëm për vetëm kundër një force kolosale armike, kundër botës kapitaliste e revizioniste që na rrethon. Njerëzit tanë kurrë nuk duhet t'i nënvlehtësojnë e t'i harrojnë rreziqet që i kërcënohen shoqërisë sonë socialiste nga presioni i madh e i gjithanshëm politik, ekonomik, ideologjik e ushtarak i kësaj bote.

Detyra jonë historike, kombëtare e ndërkombëtare, është të jemi të gjithë në këmbë, vigjilentë e të gatshëm për të përballuar çdo situatë, për të mbrojtur fitoret e arritura e për të çuar përpara revolucionin dhe ndërtimin tonë socialist. Diversionit të rrezikshëm të armiqve të socializmit t'i kundërvëmë vendosmërinë dhe guximin tonë, unitetin e çeliktë të Partisë e të popullit, punën e palodhur për zhvillimin dhe fuqizimin e ekonomisë e të mbrojtjes së vendit. Mbi të gjitha, për të mbrojtur socializmin e për ta çuar atë me siguri dhe gjithnjë përpara, është e domosdoshme të forcohen vazhdimisht bindjet e shëndosha e të thella për socializmin, si rendi shoqëror më i lartë, të cilit, në mënyrë të pashmangshme, i përket e ardhmja.

Njerëzit tanë duke jetuar e punuar në një shoqëri socialiste edukohen me normat e parimet e saj, të cilat mishërohen në marrëdhëniet ekonomike e shoqërore, në organizimin e drejtimin e shtetit e të tërë jetës së vendit, në legjisllacionin e në mënyrën e jetesës, në sistemin e arsimit e të kulturës etj. Vetë realiteti socialist, si dhe pjesëmarrja e drejtpërdrejtë e njerëzve në veprën e ndërtimit socialist të vendit, i edukon dhe i ndihmon ata t'i kuptojnë e t'i përvetësojnë parimet bazë të marksizëm-leninizmit e të socializmit.

Por bindjet dhe ndërgjegjja socialiste që krijohen në praktikën e jetës, janë të pamjaftueshme për t'u orientuar drejt në çdo situatë, për të kuptuar thellë politikën e Partisë, për të vepruar kurdoherë me pikësynime të qarta. Ato edhe mund të lëkunden përballë vështrësive të ndryshme të ndërtimit socialist ose përballë presionit të madh

të botës kapitalisto-revizioniste, po qe se nuk mbështeten në një bazë të fortë teorike. Bindjet e thella të qëndrueshme i krijon vetëm marksizëm-leninizmi, që është baza teorike e socializmit shkencor dhe e edukimit komunist të punonjësve. Ato i rrenjos në masat Partia me punën e saj edukative.

Partia jonë ka bërë dhe bën një punë të madhe për edukimin marksist-leninist të komunistëve e të masave. Këtij qëllimi i shërbejnë Shkolla e Partisë, kurset e ndryshme dhe format e edukimit në Parti e në organizatat e masave, botimet, shtypi dhe të gjitha mjetet e tjera të propagandës. Marksizëm-leninizmi mësohet në mënyrë sistematike në shkollat e kategorive të ndryshme të arsimit shtetëror. Në dispozicion të komunistëve, kuadrove e punonjësve janë vënë veprat e Marksit, të Engelsit, të Leninit e të Stalinit, si edhe dokumente e materiale të shumta të Partisë sonë.

Detyra që shtrohet tani, është që gjithë kjo punë të bëhet me një nivel më të lartë, më e kualifikuar, me qëllim që të përvetësohen sa më mirë e sa më thellë parimet e marksizëm-leninizmit dhe mësimet e Partisë sonë. Kryesorja është që njerëzit tanë të armatosen si duhet ideologjikisht me botëkuptimin dhe metodologjinë marksiste, të formohen si duhet nga pikëpamja teorike, që të qëndrojnë e të veprojnë në çdo kohë e në çdo rrethanë, në mënyrë të vetëdijshme, si revolucionarë konsekuentë, si luftëtarë të vendosur për çështjen e socializmit e të komunizmit dhe jo t'u mësohen atyre thjesht vetëm disa teza e konkluzione marksiste.

Partisë dhe popullit tonë u duhet të ecin gjithnjë përpara, të zgjidhin probleme të reja. Përpunimi teorik dhe zgjidhja praktike e këtyre problemeve kërkon që të zhvillohet vazhdimisht mendimi krijues, duke u mbështetur në parimet bazë dhe në metodologjinë marksiste, si dhe në përgjithësimin e përvojës së fituar. Për këtë arsye është e nevojshme që në shkolla e në sistemin e edukimit marksist-leninist të komunistëve e të masave, në tërë propagandën e Partisë marksizëm-leninizmi të studiohet, të propagandohet e të përvetësohet si një doktrinë e gjallë e krijuese, si një shkencë që zhvillohet e pasurohet vazhdimisht. Kudo të zhvillohet fryma kritike e revolucionare, të gjallërohen debatet e diskutimet e frytshme, të luftohet çdo shfaqje e ngurtësisë dhe e dogmatizmit, t'i hapet rrugë e gjerë mendimit të përparuar e të partishëm, gjithçka t'i nënshtrohet analizës së thellë, logjikës së shëndoshë marksiste.

Ngritja teorike është një kusht i domosdoshëm për të luftuar shfaqjet e empirizmit dhe të praktikizmit. Fakt është se ka komunistë e kuadro që pak bëjnë përpjekje për përvetësimin e teorisë, që problemet e detyrat që shtrohen dhe direktivat e orientimet që jepen, i kuptojnë ngushtë, i shohin në mënyrë të thjeshtësuar dhe nuk thellohen në përmbajtjen e tyre ideopolitike, në aspektin e tyre teorik. Në këtë çështje mbetet gjithnjë aktuale ajo që thoshte Stalini se

«... sa më të lartë të jenë niveli politik dhe vetëdija marksiste-leniniste e kuadrove të çdo sektori të punës së shtetit dhe të Partisë, aq më e mirë dhe më frytdhënëse është vetë puna,

aq më të efektshme janë rezultatet e punës, dhe anasjelltas, sa më të ulët që të jenë niveli politik dhe vetëdija marksiste-leniniste e kuadrove, aq më të mundshme janë gabimet dhe dështimet në punë, aq më tepër ka mundësi që vetë këta kuadro të bien poshtë dhe të shndërrohen në prakticien që merren me vogëlisma, aq më tepër ka mundësi që ata të degjenerohen»¹.

Mangësitë në formimin e përgjithshëm teorik çojnë në mënyrë të pashmangshme edhe në konceptime e veprime subjektive e voluntariste, që bien në kundërshtim me kërkesat e ligjeve objektive, cenojnë drejtimin shkencor të punëve, frenojnë e deformojnë proceset e zhvillimit ekonomik-shoqëror, dëmtojnë edhe vetë edukimin e njerëzve. Me shfaqje të tilla ndeshemi në mjaft raste, por sidomos në planifikimin, organizimin dhe drejtimin e ekonomisë ato janë më të dukshme e më të dëmshme.

Shoqëria socialiste vërtet është një shoqëri që ndërtohet në mënyrë të ndërgjegjshme, por kjo bëhet jo sipas vullnetit e dëshirave subjektive të njerëzve. Edhe në socializëm zhvillimi kryhet sipas ligjesh që kanë karakter objektiv. Veçoria e socializmit qëndron në njohjen dhe përdorimin e ndërgjegjshëm të këtyre ligjeve në përputhje me pikësynimet e Partisë e të shtetit socialist. Këtu qëndron edhe një nga epërsitë e mëdha të rendit socialist, që siguron një zhvillim harmonik e me ritme të larta të ekonomisë e të kulturës në dobi të masave punonjëse.

Këtej del detyra që njohja e ligjeve ekonomike objektive të socializmit, të cilat qëndrojnë në themel të politikës ekonomike të Partisë, të jetë në qendër të vëmendjes së punës edukative të Partisë, të shtetit, të organizatave të masave, të të gjitha mjeteve të propagandës. Duke njohur thellë ligjet objektive e duke vepruar në përputhje me kërkesat e tyre, mund të mënjanohen shfaqjet e subjektivizmit, të shfrytëzohen epërsitë e mëdha të rendit socialist, të vihet mbi baza shkencore planifikimi e drejtimi i ekonomisë dhe vetë edukimi i njerëzve.

Është e njohur se njeriu, me ndërgjegjen, aftësitë dhe përvojën e tij, është faktori vendimtar në çdo punë, në realizimin e çdo detyre. Kjo është edhe arsyeja pse Partia i jep rëndësi të dorës së parë punës me njerëzit për edukimin, kalitjen, aftësimin e tyre të vazhdueshëm. Por veprimtaria e njerëzve ka sukses dhe mund të arrijë objektivat e caktuar, kur, përveç punës edukative, ajo mbështetet si duhet me masa ekonomike, organizative dhe administrative. Janë shfaqje të subjektivizmit ato raste kur problemet trajtohen në mënyrë të njëanshme, kur shkaqet e të metave dhe të dobësive kërkohen vetëm në punën ideopolitike ose në metodën e stilit e drejtimit, kur mendohet se gjendja mund të ndryshojë e të përmirësohet me fjalë e me mbledhje, pa veprime e masa konkrete.

Në ngritjen e nivelit të propagandës së Partisë, të të gjithë punës për edukimin e masave në frymën e socializmit, një rol i madh u

¹ J. V. Stalin. Vepra të zgjedhura, f. 509-510. Tiranë, 1979.

takon shkencave shoqërore. Vetëm mbi bazën e studimeve e të përgjithshmeve shkencore të përvojës së Partisë e të masave, si dhe të problemeve që nxjerr jeta mund të bëhet një punë bindëse e thellë dhe e argumentuar me njerëzit.

Shkencat tona shoqërore kanë bërë hapa përpara dhe janë zhvilluar në rrugë të drejtë. Me punimet e botimet e tyre ato kanë dhënë kontribute të çmuara në fushën e studimit të historisë së popullit e të kulturës së tij, të përvojës së Luftës Nacionalçlirimtare e të transformimeve socialiste, të jetës politike, ekonomike e shoqërore të vendit. Një punë me vlerë të madhe ka bërë Instituti i Studimeve Marksiste-Leniniste pranë Komitetit Qendror për përpunimin e Historisë së Partisë, për botimin e materialeve dhe të dokumenteve të shumta të Partisë, për studimin e problemeve të ndryshme të revolucionit e të ndërtimit socialist.

U takon institucioneve shkencore, katedrave të shkollave të larta, si edhe gjithë kuadrove të shkencave shoqërore që jë ngrënë në një shkallë të re punën e tyre, të thellohen më shumë në çështjet themelore të përvojës dhe të perspektivës së zhvillimit të vendit tonë, t'i përpunojnë ato me nivel të lartë teorik e shkencor dhe të militojnë më aktivisht në luftën që bën Partia për edukimin e njeriut të ri.

Një çështje themelore e botëkuptimit komunist, e teorisë dhe e praktikës revolucionare është kuptimi i drejtë i rolit vendimtar të masave në ndërtimin e shoqërisë socialiste. Partia jonë nuk ka lejuar asnjë devijim nga ky parim dhe në këtë qëndron një ndër shkaqet e thella që në Shqipëri socializmi është ndërtuar në rrugë të drejtë dhe zhvillohet me sukses.

Pjesëmarrja aktive e masave në qeverisjen e vendit, në tërë jetën shoqërore përbën, siç e ka vërtetuar edhe përvoja e vendit tonë, një kusht të domosdoshëm e vendimtar për ruajtjen dhe forcimin e pushtetit popullor, për të çuar përpara pa ndërprerje revolucionin socialist, për të siguruar një mbrojtje të fortë e të pamposhtur të atdheut.

Roli vendimtar gjithnjë në rritje i masave popullore në shoqërinë tonë socialiste është shprehja më e thellë dhe drejtimi themelor i zhvillimit të demokracisë socialiste. Nga kjo pikëpamje, demokracia socialiste është jo vetëm një arritje historike e masave të popullit, e fituar në luftë e në revolucion, por njëkohësisht një nevojë, një kusht i domosdoshëm, një ligj i brendshëm i zhvillimit të shoqërisë socialiste, një forcë e madhe lëvizëse, që e çon atë përpara.

Socializmi i ka çliruar njerëzit tanë nga çdo formë e shfrytëzimit të njeriut nga njeriu. Një fitore e madhe historike është çlirimi i ndërgjegjes së punonjësve nga prangat shpirtërore të shoqërive shfrytëzuese, emancipimi i gruas, që është bërë pjesëtare e barabartë me burrin në jetën tonë shoqërore. Njerëzit tanë gëzojnë të drejta e liri demokratike të mëdha, siç janë e drejta për punë, për arsim, për të zgjedhur e për t'u zgjedhur në funksione shtetërore e shoqërore, liria e fjalës, e shtypit etj., të cilat në vendin tonë janë një realitet i shpallur jo vetëm me ligj, por edhe i zbatuar në praktikën e përditshme. Gjithë jeta e vendit tonë, organizimi e drejtimi i shtetit, i ekonomisë, i arsimit e i kulturës,

i mbrojtjes, është ndërtuar në mënyrë të tillë që siguron e kërkon pjesëmarrjen aktive të masave punonjëse.

Rreziqet që i vijnë socializmit nga shkëputja e organeve të pushtetit dhe e kuadrove nga masat, nga burokratizimi i aparateve etj., Partia i ka bërë të qarta me kohë. Ajo ka theksuar se lufta kundër shfaqjeve dhe shtrembërimeve të tilla duhet të bëhet vazhdimisht, pa lënë që ato të grumbullohen e të trashen. Por në praktikë ndeshen shfaqje të njëanshmërisë e të formalizmit në kuptimin e zbatimit e demokracisë së masave e të marrëdhënieve të kuadrove me masat. Ka raste që administratat dalin mbi organet e zgjedhura, që disa kuadro nuk mbajnë kontakte të ngushta me njerëzit ose konsultohen formalisht me ta. Ndoth që nuk llogariten e nuk vlerësohen si duhet asambltetë e kooperativave bujqësore dhe organizatat e tjera të masave, që nuk respektohen kurdoherë normat e vendosura të dhënies llogari përpara masave etj. jo vetëm nga të zgjedhurit, por edhe nga kuadrot e emëruar.

Është detyrë e propagandës së Partisë që të shpjegojë e të argumentojë thellë se roli i masave nuk është një çështje abstrakte, se ai realizohet nëpërmjet veprimtarisë së përditshme të kolektivit, të Bashkimeve Profesionale, të organizatës së rinisë, të Frontit e të gruas, të këshillit popullor e të të gjitha organeve të zgjedhura. Propaganda e Partisë duhet të arrijë në mënyrë të veçantë që kuadrot ta kuptojnë politikisht e ideologjikisht nevojën e lidhjes së drejtpërdrejtë me masat, me punëtorët, me kooperativistët, me rininë, me gratë, me të gjitha shtresat e popullit. Ata duhet të këshillohen gjerësisht me njerëzit, të marrin mendimet e tyre, të shtrojnë para masave problemet që preokupojnë Partinë e shtetin dhe të gjejnë bashkë me to zgjidhjet më racionale.

Kur Partia shtron me forcë që të dëgjohet më shumë zëri i specialistëve, që të mbështetet dhe të përkrahet më mirë mendimi i tyre i kualifikuar për ta vënë prodhimin mbi baza shkencore, kjo nuk duhet të çojë në asnjë mënyrë në nënvleftësimin e mendimit të përparuar të masave dhe të përvojës së tyre të pasur revolucionare. Revolucionin teknik-shkencor të mund të zhvillohet me sukses vetëm kur potenciali intelektual e shkencor i kuadrove dhe i specialistëve të lidhet ngushtë e të shkrihet me luftën e përvojën e gjithanshme të masave.

Në zbatimin e vijës së masave duhet mënjëanuar çdo thjeshtëzim e trajtim formal i saj. Është e palejueshme që, në emër gjoja të zbatimit të vijës së masave, të mbyten njerëzit me mbledhje pa bukë e për gjëra fare të vogla. Mbledhjet ku nuk zgjidhen problemet që shqetësojnë, ku nuk arrihet në konkluzione e masa konkrete për ndryshimin e gjendjes, nuk kanë asnjë vlerë. Nuk duhet lejuar, gjithashtu, që vija e masave të përdoret si një perde pas së cilës të fshihen mungesa e përgjegjësisë, të metat në organizimin e drejtimin e punëve, moszbatimi i kompetencave, i ligjeve e i rregullave të vendosura.

Objekt i një kujdesi të vazhdueshëm të Partisë dhe të organizatave të masave duhet të jetë gjallërimi e aktivizimi i kontrollit të masave nga poshtë, duke përfshirë edhe grupet e kontrollit të drejtpërdrejtë punëtor e fshatar, të cilat duhet të përqendrohen më mirë sidomos në kontrollin mbi administrimin e pronës socialiste, mbi veprimtarinë e administra-

tave, si edhe në fushën e shërbimeve për popullin e të plotësismit të nevojave të tij.

Rëndësi të veçantë ka të kuptohet drejt se kontrolli i masave nga poshtë nuk duhet kufizuar e nuk duhet reduktuar vetëm në një formë të tij, në atë të grupeve të kontrollit punëtor e fshatar; ai duhet ushtruar shumë më gjerë e në format më të ndryshme, duke ngritur në këmbë masat e gjera të punonjësve, duke i edukuar ato me idenë se ato vetë janë zotërit e vendit, që duhet të thonë për çdo gjë e për këdo fjalën e tyre. Në të njëjtën kohë, Partia ka theksuar se grupet e kontrollit punëtor e fshatar nuk mund e nuk duhet të zëvendësojnë kontrollin e organizatave të Partisë, të organeve shtetërore ose të organizatave të masave.

Demokracia socialiste dhe roli i masave është e nevojshme jo vetëm të kuptohen e të zbatohen mirë, por edhe të studiohen më thellë për t'u përsosur vazhdimisht. Qëllimi është që procesi i ndërtimit të socializmit të mos shndërrohet kurrë në një proces burokratiko-administrativ, por të jetë kurdoherë vepër e gjallë e krijuese e masave të gjera punonjëse, nën udhëheqjen e Partisë.

Edukimi i njeriut të ri është një ndër fitoret më të mëdha të socializmit dhe një ndër garancitë themelore për zhvillimin e pandërprerë të tij. Detyrat historike që shtrohen përpara Partisë e popullit tonë për ndërtimin socialist të vendit dhe për të përballuar me sukses rrethimin dhe presionin e botës kapitalisto-revizioniste kërkojnë njerëz të formuar e të kalitur si revolucionarë etikë marksiste-leniniste, njerëz që të jenë në lartë me botëkuptim dhe etikë marksiste-leniniste, njerëz që të jenë në gjendje t'i bëjnë ballë presionit të ideologjive të klasave shfrytëzuese. Kjo kërkon të thellohet më tej lufta ideologjike kundër çdo mbeturine e shfaqjeje të huaj në ndërgjegjen e njerëzve tanë.

Një problem i madh ideologjik ka qenë dhe mbetet lufta kundër mentaliteteve e psikologjisë mikroborgjeze, që ka rrënjë të thella në vendin tonë. Është e vërtetë se transformimet e mëdha social-ekonomike që janë bërë, si dhe puna e gjithanshme e Partisë për edukimin komunist të punonjësve i kanë dhënë goditje të forta dhe e kanë tronditur nga themelet psikologjinë mikroborgjeze. Por, megjithëse sfera e veprimit të saj është ngushtuar shumë, në shtresa të ndryshme të popullsisë ndeshemi ende me mentalitete, qëndrime e veprime mikroborgjeze. Konceptet e prirjet mikroborgjeze janë një e keqe e madhe sepse ato jo vetëm pengojnë edukimin komunist të njerëzve, jo vetëm frenojnë pjesëmarrjen e tyre aktive në ndërtimin socialist të vendit, por bëhen shkak për gjithfarëlloj lëkundjesh, shërbejnë si bazë për përhapjen e ideologjisë borgjeze dhe për minimin e vetë rendit socialist.

Psikologjia mikroborgjeze shfaqet në forma të ndryshme e në shumë fusha. Më të theksuara mbeturinat e saj shfaqen në qëndrimin ndaj punës e pronës, që zë edhe vendin kryesor e vendimtar në veprimtarinë e njerëzve.

Punonjësit tanë, në fshat e në qytet, i karakterizojnë një ndërgjegje e lartë në qëndrimin ndaj punës e pronës socialiste. Ky është një tipar dallues i njeriut tonë të ri, është një realitet që spikat kudo. Por socializmi, si fazë e parë e shoqërisë komuniste që del nga rendi shfrytëzues

kapitalist, ka kushtet dhe veçoritë e veta të zhvillimit, të cilat lënë gjurmët e tyre edhe në qëndrimin ndaj punës e pronës. Socializmi, thoshte Lenini,

«... nuk mund të jetë plotësisht i pjekur nga pikëpamja ekonomike, nuk mund të jetë fare i lirë nga traditat ose gjurmët e kapitalizmit»¹.

Nga ana tjetër, ka rëndësi të mbahet parasysh edhe futja në prodhimin shoqëror e në sektorë të tjerë e masave të mëdha të rinjve, të cilët, me gjithë gatishmërinë dhe entuziazmin që kanë për të punuar e krijuar në emër të socializmit, janë ende të paformuar me shprehitë e punës dhe të pakalitur me vështirësitë e jetës.

Këta faktorë, si dhe dobësitë në punën drejtuese, organizuese dhe edukuese të organizatave të Partisë dhe të atyre të masave, të organeve të pushtetit dhe të ekonomisë bëjnë që të vihen re qëndrime të huaja ndaj punës dhe pronës socialiste.

Në një kohë që kemi shumë shembuj të përparuar dhe arritje pozitive, nuk janë të pakta rastet e thyerjes së disiplinës në punë, të mungesave të paarsyeshme, të punës me rendiment të ulët e me cilësi të dobët, të mosshfrytëzimit të plotë të aftësive prodhuese, të dëmtimeve dhe të shpërdorimeve të pronës së përbashkët, të pakujdesive në administrimin dhe ruajtjen e saj.

Këto janë arsyet që Partia ngul këmbë për domosdoshmërinë e ngritjes së nivelit e të efektivitetit të punës propagandistike dhe ideologjike, me qëllim që të forcohet dhe të ngrihet në një shkallë më të lartë ndërgjegjja socialiste e punëtorëve, e kooperativistëve, e kuadrove në qëndrimin e tyre ndaj punës e pronës. Ky ka qenë dhe duhet të jetë një ndër frontet më të rëndësishme të punës së Partisë, të organeve shtetërore e të organizatave të masave, në mënyrë të veçantë të punës së Bashkimeve Profesionale.

Masat që kanë marrë Partia dhe shteti për përsosjen e marrëdhënieve socialiste në prodhim, për kufizimin e mëtejshëm të oborrit kooperativist, për përmirësimin e sistemit të pagave, të legjislacionit, të planifikimit e të drejtimit të ekonomisë etj., kanë krijuar mundësi e kushte të reja për të ndërmarrë një punë më të gjerë e më të thellë edukative me masat punonjëse, për të rrënjosur në to koncepte e qëndrime të drejta për punën dhe pronën, për të krijuar kudo një atmosferë optimizmi revolucionar e mobilizimi në punë.

Komunistët, kuadrot, punonjësit të bëhen të ndërgjegjshëm se je-tojmë në situata të reja, të brendshme e të jashtme, të cilat shtojnë edhe detyra e kërkesa të reja. Para nesh shtrihet me tërë forcën mobilizimi i gjithë punonjësve për të plotësuar deri në një detyrat e planit. Situatat që kalojmë dhe objektivat e mëdhenj të planit pesëvjeçar kërkojnë një ritëm e angazhim të ri në punë, një ndjenjë më të lartë përgjegjësie dhe një këmbëngulje më të madhe, kërkojnë të ecim me hap më të shpejtë, me hapin që kërkon koha.

1 V. I. Lenin. Veprat, vëll. 25, f. 559.

Puna edukative e Partisë duhet të rrënjosë bindje të thella se puna e prona socialiste janë dy shtylla të mëdha në të cilat mbështetet zhvillimi i ekonomisë, i tërë jetës së vendit, e tashmja dhe e ardhmja e tij. Në këtë fushë duhet bërë një luftë frontale dhe e organizuar kundër shfaqjeve negative, kundër çdo koncepti e qëndrimi mikroborgjez e liberal, për të forcuar kudo frymën e organizimit, të rregullit e të disiplinës.

Detyrat për forcimin e ndërgjegjes dhe të psikologjisë socialiste kërkojnë që t'i kushtohet një vëmendje më e madhe njohjes së interesave të ndryshme që ekzistojnë e veprojnë në shoqërinë tonë dhe ruajtjes së raporteve të drejta midis tyre. Engelsi theksonte se marrëdhëniet ekonomike të çdo shoqërie paraqiten para së gjithash si interesa. Prandaj edhe zbatimi i kërkesave të ligjeve ekonomike, edhe forcimi i qëndrimit socialist ndaj punës e pronës nuk mund të kuptohen e të realizohen jashtë interesave të ndryshme dhe, para së gjithash, jashtë interesave ekonomike.

Vënia e interesit të përgjithshëm mbi interesat e grupit dhe ata vetjakë, e interesave të perspektivës mbi ata të castit, e interesave themelore të shtetit mbi ata dikasteriale e lokale, ka përshkuar tejndanë veprimtarinë e Partisë e të shtetit tonë për ndërtimin dhe mbrojtjen e socializmit. Kjo ka qenë dhe mbetet garanci për të ecur kurdoherë në rrugë të drejtë marksiste-leniniste, për të mos lejuar shmangie nga teoria dhe praktika e ndërtimit të socializmit.

Por interesi vetjak në mjaft raste tërheq akoma shumë nga vetja dhe kjo shprehet në prirjet për të marrë nga shoqëria më shumë sesa i jepet asaj, për të rendur pas sasisë në dëm të cilësisë etj.

Nuk ka dyshim se ekzistenca e dallimeve të ndryshme, siç janë ato ndërmjet fshatit e qytetit, dallimet në të ardhurat ndërmjet pjesëtarëve të shoqërisë, si dhe mospërputhjet që lindin midis kërkesave në rritje të masave punonjëse dhe mundësive reale për plotësimin e tyre, ndikojnë në mbajtjen gjallë të fenomeneve të tilla. Por këta faktorë nuk mund të përligjin shfaqjet e ndryshme të vënies së interesit vetjak mbi interesin e përgjithshëm. Në shoqërinë tonë socialiste janë të gjitha mundësitë për t'i kufizuar gjithnjë e më shumë fenomenet e huaja nëpërmjet forcimit të edukimit të masave, zhvillimit të prodhimit dhe përsosjes së marrëdhënieve ekonomike, zbatimit me rreptësi të ligjeve të shtetit.

Kjo është e lidhur, para së gjithash, me faktin që në socializëm interesi i përgjithshëm nuk është në kundërshtim me interesat vetjakë të punonjësve. Kur ne flasim për përparësi të interesit të përgjithshëm, kjo nuk do të thotë aspak injorim i interesave vetjakë. Në socializëm interesi i përgjithshëm nuk realizohet si qëllim në vetvete, por për t'i shërbyer plotësimit të nevojave të ligjshme të punonjësve, mirëqenies së popullit, forcimit të aftësisë mbrojtëse të atdheut. Vija e Partisë zbatohet drejt e me konsekuencë kur ndjekja e problemeve ekonomike dhe kujdesi për interesin e përgjithshëm nuk shpëputen asnjëherë nga shqetësimi për njeriun, nga kujdesi për të plotësuar kërkesat materiale e shpirtërore të tij.

Një problem i madh jo vetëm ekonomik, por edhe ideologjik e shoqëror, është harmonizimi i drejtë i interesave të pronës kooperativiste

me interesin e përgjithshëm të shoqërisë. Partia duhet të luftojë si prirjet që vihen re në disa raste për t'u mbyllur në kuadrin e interesave të grupit dhe për t'i parë ata të shkëputur nga interesat e gjithë shoqërisë, ashtu edhe prirjet që, në emër gjoja të interesit të përgjithshëm, cenojnë interesat e kooperativës.

Ky problem ka të bëjë me marrëdhëniet midis shtetit dhe kooperativave bujqësore, por ai lidhet edhe me procesin e shndërrimit të pronës së grupit në pronë të të gjithë popullit. Prona kooperativiste është e një tipi me pronën shtetërore, të dyja janë socialiste, por megjithatë prona e grupit është një shkallë më e ulët e shoqërizimit të pronës. Nëpërmjet një pune edukative të gjerë e të menduar mirë Partia duhet t'ia bëjë të qartë fshatarësisë kooperativiste karakterin kalimtar të pronës së grupit, si edhe rrugët e shndërrimit të saj në pronë të të gjithë popullit. Procesi i shndërrimit të pronës së grupit në pronë të të gjithë shoqërisë të ne ka filluar dhe në të ardhmen ritmet e tij do të shpejtohen. Por në këtë rrugë duhet ecur gradualisht, në përputhje me krijimin e kushteve objektive e subjektive dhe duke mbajtur parasysh e duke respektuar edhe interesat e pronës së grupit.

Propaganda e Partisë duhet të trajtojë më gjerë dhe më thellë karakterin unik të ekonomisë sonë dhe problemet që e forcojnë më tej këtë karakter. Në këtë kuadër është e nevojshme të bëhet një luftë e vendosur kundër tërheqjes pas interesave të ngushtë dikasteriale, lokale e të ndërmarrjeve. Pengesat që i sillen specializimit, përqendrimit e kooperimit të prodhimit, si dhe rastet e planifikimit me rezerva të prodhimit, të rendimentit e të uljes së kostos, ose kërkesat e fryra për investime, fuqi punëtore etj., janë shfaqje të interesave të ngushtë, që frenojnë zhvillimin e ekonomisë dhe cenojnë interesat e përgjithshëm të shtetit e të shoqërisë.

Në kushtet kur të ne sunduese është bërë e reja, dukuritë e psikologjisë mikroborgjeze, mbeturinat e së kaluarës, stonojnë gjithnjë e më shumë dhe përbëjnë një pengesë serioze në rrugën tonë socialiste.

Veçori e këtyre mbeturinave është se ato janë tepër rezistente, vazhdojnë të ekzistojnë edhe pse kushtet që i kanë lindur, kanë ndryshuar rrënjësisht; ato marrin trajta «të reja», kamuflohen pas normave socialiste dhe ringjallen atje ku gjejnë terren të përshtatshëm. Veçanërisht duhet të tërheqin vëmendjen disa zakone e praktika të vjetruara, të cilat, me gjithë goditjet e forta që u janë dhënë, shfaqen akoma në mënyrën e jetesës, në marrëdhëniet familjare, në qëndrimet ndaj gruas etj. Partia dhe levat e saj duhet të punojnë që të forcohen e të konsolidohen parimet e konceptet socialiste, ideologjia e morali proletar, që të mbahet kurdoherë e ndezur fryma e aksioneve dhe e lëvizjeve të mëdha ideologjike të masave, të cilat kanë në themel luftën për çrrënjosjen e çdo mbeturine të vjetër dhe për afirmimin e normave e të zakoneve të reja socialiste. Kjo luftë duhet të zhvillohet me urtësi e zgjuarsis, me qëllim që normat e konceptet e reja të bëhen të pranueshme për ndërgjegjen e të gjithëve.

Për këtë është e nevojshme të njihet thellë psikologjia e masave, të bëhet një punë edukative e kualifikuar dhe e diferencuar sipas shtresave e krahinave, sipas llojit e vendit të punës, kolektivave e sektorëve,

moshave, seksit e deri në njerëz të veçantë. Gjendja shpirtërore e masave njihet mirë jo në mënyrë empirike, por në bazë të studimeve të thelluara e sistematike, duke e analizuar problemin në shumanshmërinë e tij, në gjendjen aktuale e në dinamikën e zhvillimit dhe duke i marrë në tërësinë e tyre faktorët e ndryshëm që ndikojnë në formimin e ndërgjegjes e të psikologjisë së masave, siç janë kushtet materiale, traditat e zakonet e vjetra, zhvillimi i arsimit e i kulturës, bota e jashtme kapitalisto-revizioniste etj.

Në luftën tonë në frontin ideologjik të mos harrojmë për asnjë çast se mbeturinat e së kaluarës pleksen me ndikimet degjeneruese të rrethimit imperialisto-revizionist, të cilat, megjithëse reklamohen si «moderne», «përparimtare», janë në thelb po aq, në mos më shumë, të vjetra e tepër të rrezikshme.

Kundër vendit tonë zhvillohet një agresion i gjerë ideologjik, që synon të denigrojë realitetin e Shqipërisë socialiste dhe të çoroditë mendjet e njerëzve. Partia dhe levat e saj duhet të bëhen barriera të fuqishme e të pakapërcyeshme kundër këtij agresioni dhe ndikimeve të tij mbi njerëzit tanë. Ato duhet të farkëtojnë unitetin ideologjik të popullit, të ngrënë vigjilencën dhe luftën e tij kundër liberalizmit e të gjitha shfaqjeve të huaja, që të mos lejohen të çara, situata qetësie e euforie, që komunistët, kuadrot e gjithë punonjësit t'u përmbahen kurdoherë parimeve e normave socialiste, ideologjisë e moralit proletar.

Lufta kundër mbeturinave dhe shfaqjeve të ideologjive të huaja, të vjetra e të reja, për edukimin komunist të punonjësve përbën frontin më të gjerë e më kompleks të luftës së klasave që zhvillohet në vendin tonë. Kjo luftë merr një rëndësi e mprehtësi të veçantë në kushtet e sotme, kur vendi ynë ecën përpara në ndërtimin e socializmit duke u mbështetur tërësisht në forcat e veta, kur në arenën ndërkombëtare lufta midis socializmit e kapitalizmit, marksizëm-leninizmit dhe revizionizmit është ashpërsuar së tepërmi dhe kur rrethimi imperialisto-revizionist dhe presioni i tij mbi vendin tonë janë bërë më të egër.

Partia duhet të punojë pa u lodhur që komunistët, populli dhe brezat e rinj të edukohen vazhdimisht me frymën e diktaturës së proletariatit dhe të luftës së klasave, që të jenë kurdoherë vigjilentë e të gatshëm për të mbrojtur socializmin nga çdo armik e rrezik, të luftojnë në ndërgjegjen e tyre, në radhët e Partisë e të popullit kundër gjithçkaje që bie ndesh me frymën dhe parimet e socializmit.

Të zhvillosh drejt luftën e klasave, do të thotë të zbatosh drejt vijën marksiste-leniniste të Partisë, të pranosh me vetëdije e bindje të thellë parimet e socializmit, të punosh e të luftosh kurdoherë për të mirën e popullit e të atdheut, të ruash e të mbrosh socializmin. Kjo do të thotë, gjithashtu, që ta zhvillosh atë pa lejuar devijime nga e djathta ose nga e majta, oportuniste ose sektare, të cilat janë njëlluj të rrezikshme dhe me pasoja të rënda për Partinë, për unitetin e popullit, për shoqërinë socialiste.

Vetëm duke e zhvilluar drejt dhe pa devijime luftën e klasave, me pjesëmarrjen e gjerë të masave punonjëse, të udhëhequra nga Partia, e sotmja do të ndërtohet kurdoherë drejt, do të qëndrojë mbi themele

të shëndosha dhe e ardhmja e atdheut dhe e socializmit do të jetë e siguruar.

Në shërbim të edukimit të komunistëve, të kuadrove dhe të masave Partia ka krijuar një sistem të tërë të mjeteve të komunikimit masiv, siç janë shtypi, botimet, radiotelevizioni, filmi etj. Roli i tyre është i madh, prandaj ato duhet të ngrenë vazhdimisht nivelin e punës së tyre, në përmbajtje e në formë, për t'iu përgjigjur gjithnjë e më mirë kërkesave në rritje të masave punonjëse.

2. Socializmi kërkon njerëz me kulturë të gjerë e dije shkencore

Te ne është bërë një revolucion i vërtetë në nivelin kulturor e profesional të masave punonjëse. Në një vend ku para Çlirimit rreth 90 për qind e popullsisë ishte analfabete, sot më shumë se 67 për qind e punëtorëve kanë arsim 8-vjeçar e të mesëm dhe 32 për qind e tyre kanë kualifikim profesional të mesëm e të lartë; në fshat 52,3 për qind e kooperativistëve janë me arsim 8-vjeçar e të mesëm. Ne kemi tani rreth 47 500 kuadro me arsim të lartë dhe rreth 131 500 me arsim të mesëm e profesional. Megjithëkëtë ngritja e nivelit arsimor, kulturor e tekniko-profesional të punonjësve, si pjesë e pandarë e edukimit komunist, mbetet një nga drejtimet e rëndësishme të veprimtarisë së Partisë dhe të shtetit.

Zhvillimi intensiv i ekonomisë e i kulturës, futja gjithnjë e më gjerë e teknikës dhe e teknologjisë së përparuar, detyrat që shtrohen për rendiment e cilësi më të lartë, për rentabilitet dhe efektivitet më të madh në prodhim, përgjithësisht perspektivat e zhvillimit të vendit në të ardhmen kërkojnë ngritjen e mëtejshme të nivelit arsimor e kulturor, zotërimin e shkencës dhe të teknikës nga njerëzit tanë.

Detyra e Partisë është që të krijojë te të gjithë një kuptim të drejtë për nevojën që ka shoqëria jonë për njerëz të ditur, me horizont të gjerë kulturor, me përgatitje të lartë profesionale, teknike e shkencore, të edukojë te punonjësit ndjenjën e ekzigjencës së lartë ndaj vetes. Kuadrat e punonjësimit tanë duhet t'i karakterizojë ndjenja e së resë përparimtare, fryma novatore, pasioni dhe vullneti për të studiuar dhe mësuar vazhdimisht.

Vatra kryesore e përvetësimit të kulturës, të dijeve dhe të shkencës është shkolla jonë e re. Gjatë 15 vjetëve të fundit është ndërmarrë dhe po përballohet me sukses aksioni i madh për revolucionarizimin e mëtejshëm të shkollës sonë socialiste. Tashmë janë stabilizuar të gjitha strukturat e reja themelore të këtij procesi. Një punë e gjerë me vlerë është bërë për përpilimin dhe vënien në jetë të programeve të reja mësimore e sidomos për hartimin e teksteve shkollore të të gjitha kategorive.

Përprojekta të mëdha janë bërë për forcimin e përmbajtjes ideologjike e shkencore të shkollës sonë në të tre komponentët e saj, për ndërtimin më racional të mënyrave të transmetimit të dijeve, për të nxitur qëndrimin aktiv e krijues të nxënësve ndaj mësimit etj. Të gjitha këto kanë

bërë që nga shkolla jonë të dalin kontingjente të tëra nxënësish e studentësh me formim më të mirë e më të gjithanshëm, më të brumosur ideologjikisht dhe më të aftë profesionalisht.

Suksese të mëdha janë arritur edhe në masivizimin e të gjitha hallkave të sistemit tonë arsimor. Në tërësi mund të konsiderohen të zgjidhura ose të vëna përfundimisht në rrugën e zgjidhjes shumica dërrmuese e nevojave urgjente të zhvillimit sasior të arsimit. Ne kemi tani një sistem arsimor të aftë për të përballuar kërkesat e sotme dhe të perspektivës në të gjitha fushat.

Tani ka ardhur koha që, pa lënë mënjanë kujdesin e vazhdueshëm për masivizimin e mëtejshëm të arsimit në tërësi e veçanërisht të disa hallkave të tij, të gjitha forcat e frontit tonë arsimor e pedagogjik të përqendrohen në mënyrë më serioze e më të kualifikuar në ngritjen e cilësisë së punës së shkollës. Kjo nevojë diktohet jo vetëm nga zhvillimet e brendshme specifike të arsimit, të shkollës e të pedagogjisë, por, në radhë të parë, nga zhvillimet e përgjithshme, ekonomike, shoqërore, shkencore e teknike të të gjithë jetës së vendit.

Shkolla jonë duhet të pajisë brezin e ri me dije të nivelit bashkëkohor. Në kohën tonë sistemi i dijeve ripërtërihet vazhdimisht e në përpjesëtime të mëdha. Një zhvillim me ritme shumë të shpejta kanë marrë matematika, fizika, kimia, biologjia etj., që përbëjnë themelin teorik të disiplinave të aplikuara të teknikës e të teknologjisë. Është shkurtuar së tepërmi koha që ndan një zbulim shkencor nga përdorimi i tij në veprimtarinë prodhuese. Prandaj është bërë shumë i mprehtë problemi i pasqyrimin më të shpejtë të arritjeve të reja në programet shkollore. Për t'i hapur vend informacionit të ri e të domosdoshëm shkencor, duhet bërë jo një shtim mekanik i vëllimit të njohurive, por ndryshime të aparatit konceptual dhe risistemime të këtij informacioni në struktura më kompakte dhe më universale, që e rritin mjaft peshën e tij specifike dhe e zgjerojnë në mënyrë të ndjeshme fushën e zbatimeve.

Para shkollës sonë, në të gjitha nivelet e saj, qëndron detyra e mënjanimin të njëfarë tradicionalizmi në parashtrimin e disiplinave shkencore bazë, të cilit tanimë i ka kaluar koha. Kjo është një detyrë serioze që nuk duhet të zgjidhet kurrsesi me shartime dhe arnime të së resë mbi të vjetrën, por mbi bazën e një konceptimi tërësor e unik, që të shtrihet në të gjitha vitet e shkollimit, sidomos në hallkat masive të sistemit tonë arsimor. Studimet për këto probleme duhen bërë me kujdes e të menduara mirë, me qëllim që të bëhet me kohë përgatitja për ndryshimet eventuale, që të shmangët qdo element improvizimi në vendimet që do të merren për to, që të përpunohen më imtësisht procedimet didaktike në përputhje me kriteret tona ideologjike, shkencore, pedagogjike.

Organet kompetente të studiojnë me përgjegjësi ngarkesën mësimore të nxënësve e të studentëve, sepse realisht ka mbingarkesë, e cila shkon në dëm të formimit të tyre. Burimet e saj janë koordinimi jo i mirë i ngarkesave të pjesshme të lëndëve të planit mësimor, prirja që shkolla të monopolizojë e të dublojë edhe dhënien e informacionit që sot merret nëpër kanale të tjera, kërkesat e papërligjura për të përvetësuar koncepte e ide jashtë fuqive perceptuese të moshës etj. Në mënyrë të veçantë të tregohet kujdes i posaçëm për përpunimin në nivele të ndry-

shme trajtimit të disiplinave me karakter të mirëfilltë ideologjik, sepse vërehet një shtjellim pak a shumë i njësuar dhe pa shkallëzimet e nevojshme sipas grup-moshave shkollore.

Ngritjes së gjithanshme të cilësisë e të rendimentit të punës mësimore-educative të shkollës i shërben më mirë edhe forcimi i mëtejshëm i lidhjes së mësimi me jetën, me praktikën, me punën prodhuese jo vetëm në prizmin e edukimit e të kalitjes së brezit të ri, ku ne kemi arritje të konsiderueshme, por edhe në prizmin e integritit të arsimit e të shkencës me prodhimin e sotëm modern, të vënies së tyre edhe më mirë në shërbim të zgjerimit e të thellimit të revolucionit tekniko-shkencor. Duhet mbajtur gjithmonë parasysh se rinia e sotme që merr një arsim gjithnjë e më solid, është, e në të ardhmen do të jetë edhe më shumë, një forcë para-rojë në realizimin e këtij revolucion.

Forcimi i gjithanshëm cilësor, ngritja e nivelit shkencor, e rendimentit dhe e efikasitetit të të gjithë procesit mësimor-educativ kërkon të bëhen përpjekje më të mëdha për përmirësimin rrënjësor të metodave të mësimdhënies, në mënyrë që të rritet përvetësimi aktiv i dijeve dhe qëndrueshmëria e tyre, të nxitet mendimi krijues dhe të edukohen shprehitë e punës së pavarur të nxënësit e studentët qysh në bankat e shkollës. Në këtë kuadër është e nevojshme të merren masa konkrete për të fuqizuar bazën materiale laboratorike të shkollës.

Prodhimi ynë, që ka tani një shtrirje shumë të gjerë aktiviteteve, do të pasurohet në të ardhmen edhe me aktivitete të reja. Një ndër shtyllat e tij është arma e madhe e teknikëve të mesëm dhe e punëtorëve të kualifikuar. Prandaj rëndësi e veçantë u duhet kushtuar shkollave të mesme profesionale me shkëputje dhe pa shkëputje nga puna, të cilat përbëjnë 80 për qind të arsimit të mesëm të vendit. Këto shkolla, sidomos ato pa shkëputje nga puna e me profil bujqësor, duhet të konsolidohen plotësisht. Përpara tyre shtrohet detyra që rritjen e formimit teorik të nxënësve të mos e shohin vetëm si një synim që i lejon këta të fundit të ndjekin më lehtë shkollën e lartë, por ta harmonizojnë e ta vënë më mirë në funksion të aftësisë profesionale në fushën përkatëse. Hallka që duhet kapur, është formimi i aftësive praktike dhe i intuitës teknike mbi bazën e një horizonti më të gjerë teorik.

Një kujdes i madh i duhet kushtuar përgatitjes së specialistëve të lartë. Ata të jenë të aftë të përballojnë me kompetencë të plotë detyrat e tyre dhe në të njëjtën kohë të jenë të pajisur me imagjinatë shkencore, pa të cilën nuk mund ta gojnë përpara revolucionin tekniko-shkencor në sektorin ku punojnë. Puna e rëndomtë duhet të zërë dhe do të zërë një pjesë gjithnjë e më të vogël të kohës, ndërsa veprimtaria e mirëfilltë studimore, novatore, shkencore të shndërrohet në një preokupim themelor të specialistit të lartë.

Është detyrë e Universitetit dhe e shkollave të tjera të larta që këto cilësi t'i kultivojnë të studentët, duke vënë në lëvizje tërë potencialin intelektual të tyre, duke insistuar më fort në aspektin krijues të procesit mësimor-educativ. Për të realizuar këtë, pedagogët e shkollave të larta duhet të futen thellë në veprimtarinë kërkimore, sepse vetëm një kërkues e ndjek me interes disiplinën që jep dhe është në gjendje ta zbulojë atë para auditorit me pasion të vërtetë.

Zgjerimi i punës shkencore në shkollën e lartë dhe trajtimi nëpërmjet saj jo i temave të vogla, por i problemeve të mëdha të ekonomisë, të prodhimit, të mbrojtjes, të kulturës bëhet i domosdoshëm edhe për zgjerimin e intensifikimin e kualifikimit shkencor pasuniversitar. Kualifikimi i kuadrove dhe i specialistëve të lartë është një çështje për të cilën është e interesuar tërë shoqëria. Ajo ka nevojë që kuadrot të rritin vazhdimisht dijet e tyre, të njohin të rejat e shkencës dhe të teknikës, të mësojnë e të kualifikohen në forma individuale, por dhe të organizuara e të kontrolluara. Ndërtimi i kësaj hallke të re të sistemit arsimor kërkon një punë të madhe e me përgjegjësi nga shkolla e lartë, nga Ministria e Arsimit, si dhe një ndihmë të gjithanshme e shumë të interesuar nga të gjitha dikasteret e tjera.

Arsimi ynë po kalon një proces konsolidimi të arritjeve të mëdha të revolucionarizimit të tij. Për ne mbetet detyrë e përhershme përsosja e vazhdueshme e tërë kompleksit të madh të masave që përbëjnë thelbin e revolucionarizimit të mëtejshëm të shkollës. Verifikimin e tyre e bën praktika revolucionare, e cila na mëson të korrigjojmë pasaktësitë, të zhdukim të metat, të plotësojmë zbrazëtitë. Shumë gjëra janë ndrequr në dinamikën e përparimit të shkollës sonë. Por zhvillimi i jetës së vendit dhe i vetë arsimit nxjerrin probleme të reja, të cilat duhen studiuar me kujdes në tërë kompleksitetin e tyre dhe pastaj të merren masat e nevojshme e të përshtatshme për t'i zgjidhur.

Një rol vendimtar në realizimin e gjithë këtyre detyrave që shtrohen përpara shkollës, kanë arsimtarët e pedagogët. Ata duhet të punojnë më shumë për ngritjen e tyre ideopolitike e profesionale, për zgjerimin e horizontit të përgjithshëm shkencor e kulturor, për të rritur mjeshtërinë pedagogjike. Të luftohet çdo formalizëm në vlerësimin e punës së tyre, të luftohet fryma e liberalizmit dhe e të kënaqurit me pak. Duhet të jetë e qartë për të gjithë se shkolla kërkon mund e djersë, kërkon pasion e vullnet, ndërgjegje e disiplinë të lartë.

Në forcimin e punës së shkollës një peshë të madhe ka opinioni i shëndoshë shoqëror, i cili mund të ndihmojë shumë në veprimtarinë e përditshme të shkollës. Rëndësi të posaçme ka kultivimi i rinia e shkollave i motiveve të shëndosha të të mësuarit mbi bazën e idealeve revolucionare.

Përmirësimi i gjithanshëm i punës në arsimin popullor dikton edhe nevojën për përsosjen e për revolucionarizimin e mëtejshëm të metodës e të stilit të punës drejtuese të të gjitha organeve arsimore që nga drejtoritë e shkollave e deri në Ministrinë e Arsimit e të Kulturës. Kjo kërkon ngritjen e nivelit shkencor të punës drejtuese, zgjidhjen mbi baza më të kualifikuara shkencore të problemeve komplekse të zhvillimit të mëtejshëm të arsimit popullor e të revolucionarizimit të mëtejshëm të shkollës.

Nga ana e tyre, edhe ministrinë e institucionet e tjera duhet të merren më mirë me përgatitjen e kuadrove e të specialistëve të mesëm dhe të lartë, të përcaktojnë drejt kërkesat për numrin dhe profilet e tyre, të angazhohen seriozisht në hartimin e planeve, të programeve e të teksteve të shkollës, të kujdesen për organizimin më të mirë të punës prodhuese e të stazhit në punë të nxënësve e të studentëve.

Gjatë pesëvjeçarit të gjashtë artet dhe kultura jonë socialiste morën një zhvillim të mëtejshëm dhe u ngrit në një shkallë më të lartë roli i tyre në të gjithë punën që bën Partia për edukimin komunist të masave punonjëse. Përparime të dukshme u shënuan në forcimin e përmbajtjes dhe në rritjen e cilësisë së veprimtarisë kulturore e artistike. Karakteristika dalluese kryesore e tërë kësaj veprimtarie është partishmëria proletare dhe militantizmi revolucionar. Në këtë mënyrë ajo ndikoi edhe më shumë për forcimin botëkuptimor të njeriut tonë të ri, për edukimin e tij me shije proletare dhe me normat e mënyrës socialiste të jetesës.

Janë krijuar vepra të denja me vlera ideoartistike në letërsi, në artet figurative, në muzikë e kinematografi. Në themel të tyre kanë qenë kurdoherë parimet bazë të realizmit socialist. Është një meritë e veçantë e krijuesve tanë, të cilët kanë luftuar që krahas përmbajtjes socialiste të theksojnë me forcë origjinalitetin kombëtar dhe frymën popullore në veprat e tyre, duke u mbështetur fort në traditat tona më të shëndosha letrare e artistike, duke i pasuruar ato me kërkime e gjetje të reja novatore dhe duke luftuar kundër çdo qëndrimi konservator e liberal, kundër çdo presioni të kulturës së degjeneruar borgjeze e revizioniste.

Letërsia dhe artet tona kanë arritur suksese të rëndësishme edhe në afirmimin e tyre përpara publikut ndërkombëtar. Librat, filmat, ansamblet tona të këngëve e të valleve, si dhe ekspozitat e arteve figurative, gjithmonë e më tepër kanë tërhequr vëmendjen dhe janë çmuar nga njerëzit përparimtarë, të cilët kanë gjetur në to, krahas ideve të përparuara, një frymë të shëndoshë realiste, demokratike e humaniste në kundërshtim me frymën dekadente dhe reaksionare të artit të sotëm borgjez e revizionist.

Vendi ynë është shndërruar në një shkollë të madhe, ku të gjithë njerëzit mësojnë e punojnë, zbukurojnë dhe begatojnë atdheun. Kjo ka bërë që ata të jenë gjithnjë e më shumë në një raport aktiv me kulturën. Njerëzit tanë marrin pjesë gjallërisht në krijimin e vlerave të kulturës materiale e shpirtërore dhe në përdorimin e tyre të vazhdueshëm. Këtu qëndron një nga epërsitë e sistemit tonë socialist ndaj atij kapitalist.

Jeta jonë socialiste u jep kulturës, letërsisë dhe arteve tona më shumë gjallëri, më shumë dinamizëm e freski, i pasuron ato në përmbajtje dhe në formë. Lidhja me jetën e gjallë është i vetmi mjet dhe e vetmja mënyrë për të zbuluar e afirmuar virtytet dhe cilësitë e larta moralopolitike të njerëzve të punës, arritjet dhe veprimtarinë e tyre krijuese. Vetëm kështu vlerat kulturore kthehen në burim frymëzimi e mobilizimi të masave për realizimin e detyrave në fushën e ndërtimit e të mbrojtjes së vendit, krijojnë atmosferën e entuziazmit revolucionar për kapërcimin e vështirësive dhe për arritjen e fitoreve të reja.

Një detyrë e rëndësishme e gjithë krijuesve tanë të letërsisë, të kinematografisë, të arteve figurative, të muzikës etj. është të trajtojnë dhe të pasqyrojnë gjerësisht në veprat e tyre problemet e mëdha të kohës, proceset e zhvillimit dhe dukuritë e reja të jetës. Në artet dhe në letërsi duhet të shtjellohen dhe të propagandohen ato motive të fuqishme, ai heroizëm masiv dhe ata heronj që udhëheqin me shembullin e tyre në jetë, në punë, në shkencë, në shkollë e kudo. Është kërkesë e kohës zgjerimi i gamës së temave të letërsisë dhe të arteve, përfshirja në to për-

herë e më tepër e gjerësisë dhe e larmisë së jetës, në mënyrë që dalngadalë të kompletohet prej shkrimtarëve dhe artistëve tanë tabloja e madhe e epokës socialiste në Shqipëri. Krijimi i kësaj dëshmie artistike mbetet një detyrë bazë e letërsisë dhe e arteve tona.

Temat e nxjerra nga historia dhe nga periudhat e kaluara janë dhe do të jenë përherë të vlefshme e të domosdoshme për edukimin e njerëzve tanë me dashurinë për atdheun, për traditat e kulturën kombëtare, për të njohur më mirë luftërat e popullit tonë për liri, pavarësi e përparim. Por zhvillimi i letërsisë dhe i arteve nuk mund të kuptohet pa vërshimin sa më të gjerë të jetës dhe të aktualitetit në romanet, poemat, filmat dhe në veprat muzikore e figurative. Duke u mbështetur fort në realitetin ku jetojmë, duke e pasqyruar gjerësisht atë, letërsia dhe artet do të jenë në gjendje që edhe të kaluarën ta pasqyrojnë më mirë, më drejt dhe me nivel më të lartë ideoartistik.

Lufta për forcimin e karakterit dhe të origjinalitetit kombëtar të artit tonë, duhet të shoqërohet përherë me forcimin e frymës socialiste, që i jep tonin gjithë jetës sonë. Afirmimi i asaj që është socialiste, është një kërkesë objektive për konsolidimin e artit të realizmit socialist. Në pasqyrimin e realitetit socialist edhe karakteri kombëtar fiton tipare të reja cilësore, zhvillohet e ngrihet në një shkallë të re më të lartë.

Partia ka theksuar se mbështetja e arteve tona në artin popullor është një faktor i rëndësishëm për shëndoshjen dhe ruajtjen e frymës popullore e kombëtare të krijimtarisë së kultivuar. Por duhet të ruhet gjithmonë një raport i drejtë në marrëdhëniet midis artit të kultivuar dhe atij popullor, të mos abuzohet me dhënien e përparësisë njërit ndaj tjetrit, sepse ashtu siç është e dëmshme shkëputja e artit të kultivuar nga ai popullor, po ashtu është e dëmshme edhe vënia e barazisë midis tyre dhe kërkimi i artit të kultivuar në një imitim të thjeshtë të artit popullor.

Pasqyrimi i realitetit socialist dhe trajtimi më i gjerë i kësaj teme, i problemeve tipike dhe themelore të shoqërisë sonë janë të lidhura ngushtë me rritjen e cilësisë. Përmbajtjes së shëndoshë, tematikës revolucionare duhet t'u përgjigjet një formë dhe një nivel i lartë realizimi artistik. Nuk mjafton të kapësh temën e ditës, të shkruash për heroin pozitiv, për realitetin socialist etj. Vetëm kjo, pa mjeshtërinë artistike, nuk mund të të emocionojë, të të edukojë dhe të të frymëzojë për të sotmen e për të ardhmen. Rritja e cilësisë në artet është një kërkesë që vjen nga rritja e nivelit kulturor dhe e shijeve estetike të masave të gjera punonjëse, nga kushtet e sotme të zhvillimit të shoqërisë sonë.

Detyrat e mëdha që shtrohen për zhvillimin e letërsisë dhe të arteve rritin kërkesat për formimin e vazhdueshëm botëkuptimor e kulturor të forcave krijuese, sidomos të talenteve të reja. Shkrimtarët dhe artistët krijojnë një art me vlera të larta kur njohin thellë jetën e popullit, historinë dhe psikologjinë e tij, kur përveçtojnë marksizëm-leninizmin dhe mësimet e Partisë, kur jetojnë intensivisht me problemet e kohës. Në këtë drejtim roli i Lidhjes së Shkrimtarëve dhe të Artistëve është i madh. Ajo duhet të mbetet kurdoherë një qendër frymëzimi dhe edukimi për forcat krijuese. Objekt kryesor i kujdesit të saj të jetë krijimtaria e shkrimtarëve dhe e artistëve, rritja e përmbajtjes dhe e cilësisë së veprave të tyre.

Edhe institucionet e tjera kulturore e artistike, Radiotelevizioni, shtëpitë dhe institucionet botuese, teatrot dhe Kinostudioja kanë për detyrë të forcojnë kontrollin dhe të rritin kërkesat për cilësi, me qëllim që t'i japin popullit krijimtarinë më të mirë. Ato duhet të luftojnë për të mënjanuar pasqyrimin e cekët, pa forcë dhe pa mendim të thellë të realitetit, shfaqjet e skematizmit, të uniformitetit dhe të kuptimit të thjeshtësuar të dukurive dhe të problemeve të jetës së sotme.

Detyrat e institucioneve kulturore-artistike janë të shumta dhe të gjithanshme. Në punën e tyre për ngritjen e kulturës së masave ato duhet t'i kushtojnë një kujdes të veçantë edhe përhapjes më të gjerë të dijeve dhe të njohurive të ndryshme, organizimit më të mirë të informacionit tekniko-shkencor, zgjerimit të propagandës së prodhimit e të përvojës së përparuar, duke siguruar një bashkëveprim më të gjerë me organizatat e masave, me specialistët e kuadrot, me punonjësit pararojë të prodhimit. Krahas librit politik dhe atij artistik, më shumë kujdes t'u kushtohet botimit të librave teknikë e shkencorë, të manualeve dhe të enciklopedive, që mund të shfrytëzohen gjerësisht nga specialistët e ndryshëm, si dhe botimeve shkencore popullore për përdorim masiv.

Një vend i vërtetë socialist duhet të dallohet gjithnjë e më shumë edhe nga niveli i lartë kulturor i njerëzve, edhe nga bota e pasur shpirtërore e tyre, edhe nga shijet e shëndosha estetike, edhe nga mënyra e jetesës. Formimi i koncepteve të drejta për mënyrën socialiste të jetesës është një detyrë e rëndësishme e punës arsimore, kulturore e edukative që zhvillohet në vendin tonë.

E rëndësishme është të kuptohet gjerë e thellë se kultura e jetesës ka të bëjë me njeriun gjatë gjithë jetës së tij. Ajo ka të bëjë me mënyrën e të ushqyerit, të higjienës e të veshjes, me mjediset e banesës e të prodhimit. Kultura, letërsia e bashkë me to ambientet e prodhimit e të shërbimit publik ndikojnë drejtpërdrejt në formimin e shijeve të masave. Ato rritin interesimin e tyre për të bukurën në punë, në jetë e në natyrë, forcojnë luftën si kundër shijeve borgjeze e revizioniste, ashtu edhe kundër atyre vulgare.

Detyra të reja të rëndësishme dalin sidomos për përhapjen e kulturës në fshat. Ngritja e mëtejshme e nivelit kulturor të fshatarësisë ndikon drejtpërdrejt në përparimin e gjithanshëm të vetë fshatit, në ngushtimin e dallimeve midis tij dhe qytetit. Për përhapjen e kulturës në fshat përveç shtrirjes, forcimit dhe shfrytëzimit më me efektivitet të rrjetit të institucioneve kulturore dhe përmirësimit të përbërjes së kuadrit të tyre, një rol të rëndësishëm luan ndihma e qytetit, aktivizimi i inteligjencias dhe kujdesi i organizatave të masave. Veçanërisht shkollat në fshat duhet të shndërrohen në vatra të vërteta për përhapjen e kulturës masive, të traditave patriotike-revolucionare, për gjallërimin e jetës artistike, për edukimin dhe përgatitjen e talenteve të reja.

Zhvillimi dhe përparimi i kulturës është zhvillim dhe përparim i kombit. Ndërmjet tyre ka një lidhje të ngushtë dialektike. Engelsi ka thënë se historia tregon që çdo hap i ri përpara në rrugën e kulturës ka qenë një hap drejt lirisë. Kjo ka rëndësi të kuptohet thellë nga organet e Partisë dhe të pushtetit në bazë, nga gjithë punonjësit e fron-

tit të kulturës. Sa më i lartë të jetë kuptimi për rëndësinë e punës kulturore, aq më shumë do të lidhen ata me problemet e kësaj veprimtarie. Organizimi i ndihmës dhe i kontrollit nga organet e Partisë e të pushtetit duhet të forcohet, në radhë të parë, për problemet e drejtimin dhe të planifikimit, të përmbajtjes, të efektivitetit dhe të vlerave edukative që sjell veprimtaria kulturore e artistike.

Në sukseset e mëdha që ka arritur populli ynë në ndërtimin socialist të vendit, një kontribut të veçantë ka dhënë edhe shkencën jonë e re. Kjo është shtrirë në fusha të reja të palëvuara më parë, ka ngritur nivelin e studimeve dhe tani është në gjendje të marrë përsipër detyra më të vështira e të zgjidhë probleme më të mëdha, t'u përgjigjet më mirë kërkesave që shtron para saj zhvillimi i ekonomisë dhe i kulturës.

Njerëzit tanë të shkencës e të teknikës sot studiojnë, projektojnë dhe zbatojnë tërësisht me forcat e veta të gjitha veprat për të cilat ka nevojë ekonomia dhe mbrojtja, siç janë veprat hidroenergjetike, hekurudhat, pusët e shpimeve të thella, fabrikat e pasurimit të mineraleve dhe shumë objekte të tjera të rëndësishme industriale. Janë zbuluar dhe vënë në shfrytëzim pasuri të mëdha të nëntokës, të cilat tani përbëjnë bazën themelore për zhvillimin e industrisë e të tërë ekonomisë së vendit. Hapa të mirë janë bërë për zgjidhjen e problemeve të shumta teknike e teknologjike të prodhimit. Nga pjesët e ndërrimit tani është kaluar në prodhimin e makinerive të plota. Në fushën e bujqësisë studimet dhe eksperimentimet janë bërë faktorë të rëndësishëm për rritjen e rendimenteve dhe për përmirësimin e racave. Realizime me vlerë ka pasur edhe në shkencat shoqërore, historike, gjuhësore, ekonomike, politike etj.

Por stadi i arritur i zhvillimit të vendit dhe detyrat e mëdha që kemi përpara, shtrojnë si një nevojë të ngutshme zhvillimin e shkencës, vlerësimin e saj të drejtë dhe zbatimin e arritjeve të saj në prodhim. Kjo nevojë bëhet edhe më imperative në kushtet e sotme të zhvillimit të vendit vetëm me forcat tona, kur ekonomia dhe gjithë sektorët e veprimtarisë shoqërore janë futur në rrugën intensive dhe kur kudo kërkohet punë me cilësi, rendiment dhe efektivitet të lartë.

Këto ishin arsyet që Partia në një Plenum të posaçëm vitin e kaluar analizoi gjithë veprimtarinë shkencore në vendin tonë, duke nxjerrë konkluzione dhe duke përcaktuar detyra të veçanta jo vetëm për punonjësit e shkencës, por për gjithë organizatat e komitetet e Partisë, organet shtetërore e ekonomike të vendit. Detyrat që shtroi dhe orientimet që dha Plenumi i 8-të i Komitetit Qendror përbëjnë një program të madh pune për sot e për të ardhmen. Tani tërë puna duhet përqendruar në luftën këmbëngulëse për vënien në jetë të këtij programi.

Objektivi kryesor i gjithë punës studimore shkencore është që të mbështesë si duhet pesëvjeçarin e shtatë për të siguruar realizimin e plotë të tij. Krahas kësaj, detyrë dhe objektiv me rëndësi i shkencës sonë është që qysh tani të fillojë nga kryerja e studimeve për pesëvjeçarin e ardhshëm. Shkenca, që të jetë shkencë, që ta luajë me të vërtetë rolin e saj dhe të kryejë funksionin e vet, duhet t'i paraprijë prodhimit, të tregojë qysh më përpara perspektivën e zhvillimit të ekonomisë e të kulturës. Vetëm mbi këtë bazë ajo mund të ndihmojë si planifikimin, ashtu edhe prodhimin.

Duke pasur mirë parasysh detyrat aktuale e të perspektivës, kujdes i madh i duhet kushtuar përvetësimit të arritjeve bashkëkohore dhe lëvrimin të atyre shkencave të cilat zbatohen në fusha me rëndësi jetike për ne, që kushtëzojnë përparimin e vendit me ritme të shpejta dhe fuqizojnë pavarësinë e plotë të tij.

Forcat dhe mjetet kryesore duhet të përqendrohen në studimin e pasurive tona natyrore e në radhë të parë në kërkimin dhe zbulimin e mineraleve të dobishme. Shkenca jonë duhet të gjejë rrugët më të mira për të shtuar burimet energjetike dhe për përdorimin racional të tyre, për një shfrytëzim sa më kompleks dhe integral të të gjithë përbërësve të dobishëm të lëndëve të para, për kosto sa më të ulët dhe cilësi sa më të lartë të prodhimit.

Objektiv i rëndësishëm i punës shkencore duhet të jetë zgjerimi i studimeve në fushën e konstruksioneve mekanike dhe të përsosjes së teknologjive të prodhimit e të mekanizimit të proceseve të punës, në fushën e projektimit dhe të ndërtimit të veprave të ndryshme industriale, hidroteknike e civile etj.

Me rëndësi të veçantë janë studimet në lëmin e bujqësisë, sidomos ato që kanë të bëjnë me ruajtjen, shtimin dhe përmirësimin e tokës, me rritjen e aftësive gjenetike të farërave e të racave, me përmirësimin e agroteknikës, me mbrojtjen e bimëve e të kafshëve.

Për kushtet e vendit tonë ne duhet të ngulim këmbë në aplikim. Në këtë fushë të përqendrohet, në radhë të parë, puna kërkimore-shkencore. Këtu të angazhohen edhe forcat kryesore shkencore-teknike. Kjo nuk do të thotë që të lihen mënjanë shkencat fundamentale, të cilat përbëjnë themelin teorik të shkencave të aplikuara e të teknikës moderne. Detyra që shtrohet është të njihen e të përvetësohen rezultatet dhe metodat e përparuar të këtyre shkencave për t'i vënë sa më mirë në shërbim të prodhimit dhe për të siguruar një përgatitje të shëndoshë teorike të specialistëve tanë.

Në të gjitha fushat e shkencës, por sidomos në ato të aplikuara duhet të ngremë cilësinë e punës studimore shkencore dhe efektivitetin e saj. Çdo studim që kryhet të jetë i plotë, fazat e ndryshme të tij të përbëjnë një tërësi të vetme, duke filluar nga studimi i përgjithshëm, eksperimentimi, projektimi dhe deri në zbatim. Studimet teknike e teknologjike duhet të shoqërohen edhe me studime ekonomiko-financiare, me qëllim që të evidentohet leverdia ekonomike dhe efektiviteti i shpenzimeve.

Thellimi i revolucionit tekniko-shkencor në të gjitha fushat ka vënë në lëvizje masa të mëdha njerëzish, ka nxitur një interesim të vërtetë për të përvetësuar më thellë dijet shkencore e për të eksperimentuar. Mbi të gjitha ai ka forcuar besimin e kuadrove e të punonjësve tanë në aftësitë dhe në mendimin e tyre krijues. Tani janë krijuar mundësitë që, krahas rritjes sasiore e cilësore të racionalizimeve e novacioneve, të kalohet gradualisht në një front më të gjerë përmirësimesh e transformimesh më të mëdha, që të sjellin ndryshime më rrënjësore në dobi të prodhimit, të pajimit teknik, të konceptimeve teknologjike apo formave organizative jo vetëm në reparte e fabrika të veçanta, por edhe në degë të tëra. Për këtë duhet të rritet më tej roli aktiv

dhe efektiviteti i shkencës, e cila të zhvillohet jo vetëm në institucionet kërkimore-shkencore, por të zhvillohet e të zbatohet gjerësisht në terrenin konkret, në uzina, kombinat, në fusha, kudo ku prodhohen të mira materiale.

Përparimi i shkencës kushtëzohet shumë nga planifikimi më i saktë e më largpamës i saj në përputhje me nevojat e vendit në të gjitha hallkat e punës kërkimore-shkencore, nga organizimi dhe bashkërendimi i mirë i veprimtarisë së institucioneve të ndryshme, nga ngritja e një baze materialo-laboratorike të përshtatshme dhe të mundshme për vendin tonë, nga përgatitja, kualifikimi i vazhdueshëm dhe angazhimi me efektivitet të lartë i specialistëve të fushave të ndryshme.

Akademia e Shkencave mbetet qendra më e madhe e më e rëndësishme e kërkimeve shkencore në vendin tonë. Partia i ka vënë asaj detyrën që, krahas konsolidimit të institucioneve të saj shkencore ekzistuese, të zgjerojë veprimtarinë e saj edhe në fusha të tjera, sidomos në ato natyrore e teknike, që i shërbejnë më drejtpërdrejt zgjidhjes së problemeve të mëdha të prodhimit.

Krijimi i Komitetit të Shkencës dhe Teknikës këtë vit është një masë e rëndësishme që mori Partia për drejtimin dhe organizimin më të mirë të punës studimore-shkencore. Është detyrë e tij që të bashkërendojë më mirë gjithë veprimtarinë shkencore të vendit dhe të ndihmojë për vënien në zbatim të rezultateve të saj.

Një kujdes e interesim më të madh për zhvillimin e shkencës duhet të tregojnë të gjitha organet shtetërore nga baza deri në qendër. Veprimtarinë shkencore këto duhet ta konsiderojnë si pjesë përbërëse të pandarë të punës së tyre, për planifikimin, organizimin, drejtimin e ekonomisë, të kulturës e të gjithë jetës së vendit.

Zhvillimi dhe përparimi i shkencës ndihmohet kur jetohet më afër veprimtarisë shkencore dhe njerëzve që merren me të, kur tërhiqet mendimi i specialistëve dhe përkrahjet e reja, kur luftohen pengesat dhe zvarritjet burokratike që vihen re disa herë në kryerjen e studimeve dhe sidomos në vënien e tyre në jetë.

Objekt themelor i punës së organizatave të Partisë duhet të jetë kujdesi për zbatimin e politikës së Partisë në fushën e shkencës, që veprimtaria kërkimore e studimore të përqendrohet në problemet e mëdha aktuale e të perspektivës, që kuadrot shkencorë të armatosen me botëkuptimin marksist-leninist e me mësimet e Partisë.

IV

GJENDJA NDËRKOMBËTARE DHE POLITIKA E JASHTMË E RPSSH

Partia e Punës e Shqipërisë ka ndjekur dhe ndjek me vëmendje zhvillimin e situatave ndërkombëtare dhe ngjarjet që ndodhin në botë. Ajo i ka analizuar ato në mënyrë objektive e realiste, e bazuar si gjithnjë në parimet marksiste-leniniste, dhe ka nxjerrë konkluzione përkatëse. Në gjithë këtë punë Partia është nisur nga fakti se proceset e

sotme botërore, në këtë ose në atë masë, ushtrojnë ndikimin e tyre edhe mbi vendin tonë. Ne i ndjekim dhe i analizojmë me një interesim të veçantë situatat ndërkombëtare për të mos u zënë kurrë në befasi, për të qenë gjithmonë të përgatitur që të përballojmë me sukses çdo rrezik që mund të na vijë nga jashtë, për të ndërtuar me sukses socializmin. Nga ana tjetër, kjo përbën një kusht edhe për të zbatuar drejt e në mënyrë efektive detyrën tonë internacionaliste në përkrahje të luftës së popujve për liri e pavarësi kombëtare, për demokraci e përparim shoqëror, për të kontribuar në forcimin e paqes e të sigurisë ndërkombëtare.

Porë në tërësi, gjendja e sotme ndërkombëtare është e turbullt, e ndërlikuar dhe mjaft e nderë. Forca të mëdha politike e shoqërore qëndrojnë kundër njëra-tjetrës: nga njëra anë imperializmi, kapitalizmi dhe reaksioni, bartës të shtypjes, të shfrytëzimit e të luftës, dhe, nga ana tjetër, popujt, revolucionarët e demokratët, që luftojnë për çlirimin kombëtar e shoqëror, për emancipimin e njerëzimit. Ky konfrontim i gjerë, i thellë dhe i gjithanshëm, që është pasqyrim i ndeshjeve të ashpra klasore dhe që ka përfshirë tërë kontinentet pa përjashtim, ka acaruar më tej të gjitha kontradiktat dhe krizën e rëndë që ka mbuluar botën e sotme kapitaliste. Çdo gjë tregon se situata e sotme në botë është e mbarsur me luftë të përgjithshme dhe me luftëra lokale, siç është e mbarsur me luftëra çlirimtare e me revolucion. Zhvillimi i ngjarjeve do të tregojë nëse imperializmi do të mund ta çojë botën në një katastrofë të re, apo popujt do ta ndalojnë luftën dhe do ta shpëtojnë njerëzimin.

Në këtë situatë lufta e popujve dhe revolucioni qëndrojnë në rëndin e ditës jo vetëm si aspiratë dhe detyrë imediate për çlirimin nga shtypja kapitaliste e zgjedha imperialiste, por edhe si domosdoshmëri historike për shkatërrimin e planeve luftënxitëse të imperializmit dhe për mënjanimin e një lufte të re të përgjithshme.

Imperializmi ka qenë dhe mbetet burimi i të gjitha agresioneve e luftërave grabitqare, shkaku i të gjitha fatkeqësive e mjerimeve që kanë ekzistuar dhe ekzistojnë në botë. Popujt e kanë paguar me gjakun dhe jetën e tyre etjen e pangopur të imperialistëve për pushtime e shfrytëzim, për sundim botëror. Këtë karakter të pandryshueshëm të imperializmit, të natyrës e të qëllimeve të tij e dëshmon edhe lufta që zhvillohet sot midis superfuqive imperialiste dhe fuqive të mëdha kapitaliste për tregje dhe zona influence.

Imperializmi amerikan dhe socialimperializmi sovjetik janë në ndeshje me njëri-tjetrin, janë në garë e në lëvizje për të kryer agresione e për të pushtuar vende të tjera. Në shumë rajone të botës lufta midis dy superfuqive imperialiste, Shteteve të Bashkuara të Amerikës dhe Bashkimit Sovjetik, pa përjashtuar edhe Kinën imperialiste dhe fuqitë e tjera kapitaliste, ka marrë përmasa të reja e të mëdha. Secila nga këto fuqi përpiqet të arrijë epërsi ekonomike, politike, ushtarake mbi tjetrën, të zërë pozita strategjike të reja. Megjithëse zjarri i luftës botërore akoma nuk është ndezur, zjarret lokale që kanë shpërthyer dhe vatrën e rrezikshme që tashmë janë krijuar mund të kthehen në një zjarr të madh të luftës botërore imperialiste. Lindja e Mesme e përsëri Indo-

kina dëshmojnë fare qartë për këtë. Ky rivalitet, kjo politikë e superfuqive, i ndërlikon më tej situatat dhe bën që tërë raportet botërore të jenë të ndera dhe me pasoja të rrezikshme.

Sigurisht, kur konstatojmë se rivaliteti midis superfuqive dhe acarimi i kontradiktave midis tyre përbën burimin kryesor të konflikteve të sotme ndërkombëtare dhe të rrezikut të luftës, nuk mund të mos vëmë re edhe përpjekjet e tyre për të rënë në kompromise, ujdira e deri në aleanca të përkohshme. Tendencës për ndeshje e konflikte midis imperialistëve i është përgjigjur gjithnjë edhe përpjekja për t'u marrë vesh në kurriz të popujve.

Por midis shteteve imperialiste nuk mund të ekzistojë kurrë atmosfera e besimit reciprok. Për shkakt të natyrës së tyre agresive ata do të veprojnë hapur dhe fshehur kundër njëri-tjetrit. Kjo është dialektika e marrëdhënieve midis imperialistëve.

Deri më sot superfuqitë janë përpjekur për ruajtjen e njëfarë ekuilibri ndërmjet tyre, për respektimin e zonave reciproke të influencës, për të ecur me një hap në garën e armatimeve. Ata kanë bërë përpjekje për mënjanimin e një lufte të drejtpërdrejtë ndërmjet tyre, por tani, si rezultat i krizës dhe i zhvillimit të pabarabartë, ky ekuilibër ka tendencë të prishet.

Ekspansioni i tyre nuk gjen më hapësira boshe ku të mund të shtrihet. Çdo hap i mëtejshëm ndesh në interesat e tjetrit me rrezikun e një reagimi që nuk mund të parashikohet. Këtë lindin disbalancimet, këtë lindin rreziqet për konfrontime të armatosura, që mund ta çojnë njerëzimin në një luftë të përgjithshme imperialiste.

Dikur u bë e mundur të nënshkruhej traktati për mospërhapjen e armëve atomike, që u siguronte Shteteve të Bashkuara të Amerikës dhe Bashkimit Sovjetik monopolin e këtyre armëve, bile të nënshkruhej edhe SALT-i, që vendoste ekuilibrin e dy superfuqive në këto armë. Tani të dy palët janë rrëmbyer nga ethet e armatimit të papërmbajtur, që ua kanë marrë mendjen dhe ua kanë humbur logjikën. Megalomania dhe arroganca e superfuqive, që mendojnë se mund të bëjnë ligjin në botë pa u ndëshkuar, është përzier me frikën ndaj njëra-tjetrës dhe me tmerrin që u kall revolucionin.

Interesat e superfuqive e të popujve nuk përputhen e nuk takohen në asnjë kohë dhe në asnjë rast. Që të jetojë imperializmi popujt duhet të jenë të skllavëruar, që të çlirohen popujt duhet të shkatërrohet imperializmi.

Është shumë e rrezikshme dhe duhet luftuar deri në fund ajo politikë e klasave reaksionare që, për të ruajtur pushtetin e vet e për të mashtruar masat, mbështeten te njëri ose te tjetri shtet imperialist, duke e paraqitur njërin të mirë e tjetrin të keq, njërin përkrahës të popujve e tjetrin armik të tyre, njërin mbrojtës të paqes e tjetrin nxitës të luftës. Superfuqitë, secila më vete dhe të gjitha së bashku, janë armiqtë më të egër të lirisë e të pavarësisë së popujve, mbrojtësit e garantët e regjimeve reaksionare, përkrahësit e zgjedhës së huaj kombëtare dhe të grindjeve e të konflikteve ndërmjet kombeve. Politika e tyre përbën rrezikun e drejtpërdrejtë për ta hedhur njerëzimin në një luftë të tretë botërore.

Prandaj, si në të kaluarën, ashtu edhe tani, lufta e të gjitha forcave revolucionare, përparimtare e demokratike për demaskimin e shkatërrimin e planeve grabitqare e skllavëruese të superfuqive imperialiste është një domosdoshmëri historike, është një kusht e detyrë për mbrojtjen e lirisë e të sovranitetit të popujve, për fitoren e revolucionit, për mënjanimin e luftës dhe sigurimin e paqes.

Në një mënyrë ose në një tjetër, në këtë ose në atë formë të gjithë popujt ndeshen me ndërhyrjen dhe kërcënohen nga politika agresive e imperializmit amerikan, që përfaqëson fuqinë më të madhe kapitaliste të kohës sonë dhe mburojën kryesore të sistemit borgjezo-imperialist. Që nga mbarimi i Luftës së Dytë Botërore, kur ai doli në krye të fuqive imperialiste dhe u bë pretendenti kryesor për sundimin botëror e deri më sot, imperializmi amerikan ka bërë të derdhet si lumë gjaku i popujve që ai ka sulmuar drejtpërdrejt ose nëpërmjet veglave të tij të bindura. Në çdo proces kundërrivolucionar që ka ndodhur në botë, në çdo puç fashist e përmbysje të demokracisë, në çdo sulm kundër revolucionit e socializmit ka qenë kurdoherë e pranishme dora e imperializmit amerikan. Është ky imperializëm që ndërhyrjen në punët e brendshme të vendeve të tjera, arbitraritetin dhe diktatin i ka bërë një praktikë të zakonshme në jetën ndërkombëtare, që agresionin e kërcënimit për agresion i ka shndërruar në një politikë bazë, në një veprimtari të përhershme të tij.

Kapitali amerikan është grabitësi më i madh dhe më i pangopur i pasurive e i djersës së popujve që ka njohur ndonjëherë historia. Shoqëritë kapitaliste amerikane, që kanë shtrirë kthetrat e tyre në tërë globin, shkelin në mënyrën më barbare sovranitetin e kombeve dhe bëjnë ligjin në shumë vende. Bashkë me eksportimin e kapitaleve imperializmi amerikan ka eksportuar edhe mënyrën e tij të jetesës, korrupsionin e degjenerimin, frymën e kozmopolitizmit dekadent dhe të nënshtrimit servil ndaj të huajve.

Imperializmi amerikan e ka mbushur globin me baza ushtarake, të cilat janë pikat mbështetëse kryesore të luftës e të agresionit. Ai ndjek politikën e forcimit të blloqeve ekzistuese dhe ngritjen e blloqeve të reja ushtarake, nëpërmjet të cilave siguron sundimin amerikan mbi partnerët e tij, kërcënon të mbytet me hekur e me zjarr revolucionin dhe luftën e popujve, mbron me forcë sistemin e shtypjes e të dhunës kapitaliste.

Aktualisht imperializmi amerikan ka filluar të zbatojë një vijë më të ashpër, më agresive e më aventuriste në politikën e tij të jashtme. Ai po mbështetet gjithnjë e më shumë në forcën ushtarake. Për këtë dëshmon qartë politika e re e Reganit.

Imperializmi amerikan kërkon tani që tërë reaksioni e forcat kundërrivolucionare botërore të bashkohen në një kryqëzatë të vetme e nën egidën amerikane kundër revolucionit, socializmit, lirisë, pavarësisë e sovranitetit të popujve, kundër të drejtave demokratike të njerëzve. Duke i konsideruar si «zona të interesave amerikane» gati të gjitha zonat ku nxirren nafta dhe lëndët e para kryesore, të gjitha rrugët detare të oqeanëve, të gjitha pikat strategjike të globit dhe duke shpallur zyrtarisht se do të ndërhyjë me armë për t'i mbrojtur këto «interesa»,

imperializmi amerikan del hapur me një program konkret për shtrirjen e pushtetit të tij politik e ushtarak në të gjithë botën. Krijimi i «korpunit të ndërhyrjes së shpejtë», të kësaj armate të madhe agresive, të gatshme për të ndërhyrë kudo që do ta nisë Pentagoni për të vendosur me hekur e me zjarr sundimin e Shteteve të Bashkuara, është një provë e pakundërshtueshme e këtij kursi.

Kjo vijë shprehet edhe në «doktrinën» e re të Uashingtonit, të nisur nga Karteri e të zhvilluar më tej nga Regani, se gjoja paqja në botë dhe siguri i popujve mund të arrihen me anë të rritjes së fuqisë dhe të epërsisë amerikane». Në të vërtetë kjo «doktrinë» e nxit dhe e afron më tepër luftën e përgjithshme imperialiste. Grumbullimi i pashembullt i armëve të ndryshme, që nga ato klasike e deri te bombat atomike prej qindra megatonësh, nxitja e frymës militariste, mobilizimi total për të arritur me çdo kusht epërsinë ushtarake mbi rivalin sovjetik po krijojnë në qarqet udhëheqëse amerikane konceptin se lufta është jo vetëm e pashmangshme, por edhe e domosdoshme.

Të gjitha këto tregojnë se bota do të ndeshet me një intensifikim të politikës agresive të imperializmit amerikan, me një shtim të ndërhyrjeve të tij në punët e brendshme të vendeve të tjera, sidomos të përdorimit të forcave të tij ushtarake.

Në këto kushte çdo lëshim e tërheqje përpara imperializmit amerikan, çdo iluzion se politika e tij mund të ndryshojë për të mirë përmban në vetvete rreziqe të mëdha për lirinë, pavarësinë dhe sovranitetin e popujve.

Politika hegjemoniste e ekspansioniste për vendosjen e sundimit botëror, kursi aventurist i përgatitjes dhe i nxitjes së luftës karakterizon sot edhe socialimperializmin sovjetik, strategjia globale e të cilit, e sidomos mënyrat e zbatimit të saj, janë bërë, gjithashtu, më agresive.

Duke filluar me pushtimin e Çekoslovakisë e gradualisht, politika e Bashkimit Sovjetik ka ardhur duke marrë një karakter të theksuar militarist, që shprehet në përdorimin e forcës ushtarake për realizimin e qëllimeve të veta ekspansioniste. Ndërhyrjet ushtarake pasuan njëra-tjetrën. Pas Çekoslovakisë erdhën Angola, Jemeni, Etiopia, Eritrea, ku sovjetikët ndërhyrën nëpërmjet të tretëve. Më së fundi erdhi Afganistani. Afganistani shënon fillimin e marshimit të madh të socialimperializmit drejt Jugut, ku gjenden burimet më të mëdha energjetike të botës, nyjet më të rëndësishme strategjike, fushat ku ndeshen e përplasen rivalitetet më të mprehta imperialiste.

Politika e Bashkimit Sovjetik ka marrë po ato tipare agresive, ekspansioniste, luftënxitëse si ajo e Shteteve të Bashkuara të Amerikës. Kjo duket qartë në objektivat e njëjtë që kanë zgjedhur dhe në rrugët paralele në të cilat ecin. Bashkimi Sovjetik po kërkon baza ushtarake në vendet e huaja, po krijon aleanca politiko-ushtarake me vende të tjera, për t'i pasur si pika mbështetëse të zgjerimit të sundimit të tij mbi popujt dhe të ndeshjes me imperializmin amerikan. Po ashtu ai nuk qëndron prapa as në garën e armatimeve. Sovjetikët disponojnë tashmë një arsenal të madh ushtarak, të cilin po e rritin dhe po e perfeksionojnë vazhdimisht në përgatitjet që bëjnë për shpërthimin e luftës. Ekonomia

sovjetike e militarizuar është vënë në shërbim të realizimit të planeve pushtuese të kësaj superfuqie të re imperialiste.

Të gjitha këto kanë bërë që Bashkimi Sovjetik të demaskohet në sytë e popujve si një fuqi e egër imperialiste, që kërcënon e rrezikon hapur lirinë dhe pavarësinë e tyre.

Megjithëkëtë, në njerëz e në disa forca politike në vende të ndryshme, ekzistojnë akoma iluzione ndaj Bashkimit Sovjetik, ekziston një përfytyrim i gabuar për rendin e tij dhe një mirëbesim naiv ndaj politikës së tij. Kjo vjen jo vetëm nga fakti se Bashkimi Sovjetik spekulon shumë me të kaluarën e tij socialiste dhe se politikën e rivalitetit me Shtetet e Bashkuara të Amerikës e shet si politikë antiimperialiste, por edhe për mjaft arsye të tjera. Kryesorja ndër to është se ekspansioni sovjetik kryhet përgjithësisht nëpërmjet depërtimit në lëvizjet antiimperialiste e çlirimtare, nëpërmjet instrumentalizimit dhe shfrytëzimit të tyre në dobi të vet. Faktet kanë treguar se viktima të këtij ekspansioni janë bërë jo vetëm ata që kanë besuar në «ndihmën internacionaliste» të Bashkimit Sovjetik, por edhe ata që kanë besuar se mund të mbështetesh te «ndihma» sovjetike e aleanca me të për të kundërshtuar ose për t'u çliruar nga imperializmi amerikan e nga imperializmat e tjerë.

Në mënyrë të veçantë duhet demaskuar demagogjia pacifiste e Bashkimit Sovjetik, parullat hrushoviane të «bashkekzistencës paqësore», propaganda mashtruese revizioniste, e cila përpigjet të bindë popujt se evitimi i luftës dhe sigurimi i paqes, bile edhe pavarësia kombëtare e transformimet shoqërore qëndrojnë tek e ashtuqajtura detantë midis superfuqive. Popujt nuk janë për rritjen e tensionit, për acarimin e konflikteve, për përdorimin e forcës në zgjidhjen e problemeve ndërkombëtare. Por e ashtuqajtura detantë, që predikojnë revizionistët sovjetikë, nuk ka të bëjë aspak me garantimin e paqes e të sigurisë ndërkombëtare, që kërcënohen pikërisht nga dy superfuqitë imperialiste.

Detanta, e trumbetuar nga revizionistët sovjetikë e të tjerë, nuk është gjë tjetër veçse teoria e vjetër imperialiste e ekuilibrit dhe e harmonisë midis fuqive të mëdha. Teoritë e «detantës», të «ekuilibrit» ose të «bipolarizmit», që janë të njëjta në përmbajtje, me gjithë ndonjë nuancë në formë, synojnë të garantojnë zonat reciproke të influencës, të ngrenë në ligj ndërkombëtar diktatin e superfuqive në punët botërore, nënshtrimin e plotë e të pakushtëzuar të vendeve të tjera ndaj dy super të mëdhenjve, braktisjen e interesave dhe të sovranitetit të tyre kombëtar.

Politika imperialisto-revizioniste e luftës, e shtypjes dhe e shfrytëzimit ka ndeshur në rezistencën e madhe të proletariatit dhe të popujve të botës. Popujt i kuptojnë intrigat, manovrat, strategjinë, taktikat e superfuqive të egra, Shteteve të Bashkuara të Amerikës dhe Bashkimit Sovjetik revizionist dhe nuk rrinë duarlidhur.

Bota sot është dëshmitare se lufta e klasës punëtore dhe e popujve të shtypur e të shfrytëzuar nga kapitali botëror e imperializmi ka marrë përpjesëtime të gjera dhe forma të larmishme, të papara ndonjëherë. Klasa punëtore dhe të gjithë të shfrytëzuarit, në një mënyrë ose në një tjetër, me më pak ose me më shumë intensitet, luftojnë kundër të

gjitha forcave sunduese kapitaliste, vendase ose ndërkombëtare, që i shfrytëzojnë, i varfërojnë dhe i shtypin ekonomikisht e moralisht.

Në të gjitha vendet kapitaliste është zgjeruar rezistenca e klasës punëtore ndaj sulmeve të borgjezisë dhe lufta e saj për mbrojtjen e nivelit të jetesës dhe të të drejtave demokratike. Grevat, demonstratat e manifestimet jo vetëm janë shpeshuar, por pjesëmarrja e punëtorëve në to ka arritur shifra të panjohura më parë. Me miliona janë punëtorët grevistë në SHBA, në Angli, në RFGJ, në Itali, në Francë, në Spanjë e gjetkë. Këto greva e manifestime po marrin një karakter gjithnjë e më shumë luftarak. Këtë e vërteton edhe fakti që në mjaft vende të Evropës e të Amerikës aparatet borgjeze të dhunës janë detyruar të përdorin armët dhe të përleshën me punëtorët, përveç marrjes së masave të tjera kufizuese e shtypëse. Janë shtuar rastet kur punëtorët nuk u binden sindikatave borgjeze dhe dalin në rrugë kundër dëshirës dhe urdhrave të bosëve sindikalistë.

Lufta e punëtorëve në periudhën e tanishme është drejtuar sidomos kundër pasojave të krizës ekonomike, barrën e së cilës borgjezia kërkon t'ia hedhë klasës punëtore. Kundër kësaj padrejtësie e grabitjeje të re janë ngritur masat punonjëse, të cilat kërkojnë që kjo barrë të mos bjerë mbi to, por mbi padronët. Ato luftojnë për ruajtjen e vendeve të punës dhe të nivelit të pagave reale, kundër inflacionit dhe shtrenjtësimit të jetesës, për shtimin e fondeve të destinuar për shëndetësinë, arsimin, asistencën sociale etj.

Në këtë ndeshje të përditshme ndërmjet klasës punëtore dhe borgjezisë zbulohet e demaskohet edhe demagogjia sociale e politike e kapitalizmit, oportunizmi dhe veprimtaria sabotuese e socialdemokracisë, e revizionizmit dhe e sindikatave të drejtuara prej tyre. Ky zemërim dhe kjo revoltë, që po godet në forma dhe me intensitet të ndryshëm borgjezinë kapitaliste e revizioniste, është një goditje e drejtpërdrejtë dhe e fuqishme edhe kundër forcave të errëta të luftës, që kërkojnë shkatërrimin e njerëzimit.

Klasa punëtore në vendet kapitaliste e revizioniste sot mbahet e mbërthyer nga shumë zinxhirë që shteti borgjez dhe partitë e ndryshme i kanë hedhur asaj përsipër. Por kjo gjendje nuk mund të vazhdojë përjetë. Acarimi i kontradiktave midis punës e kapitalit, përgjithësisht shtypja kapitaliste e imperialiste e shpejtojnë rritjen e ndërgjegjes politike e klasore të proletariatit dhe e bëjnë atë të ndërgjegjshëm se shpëtimi nga shtypja e shfrytëzimi mund të arrihen vetëm me luftë klasore, vetëm me revolucion.

Krahas rritjes dhe zgjerimit të luftës së klasës punëtore, aktualisht vihet re një zgjim i përgjithshëm i popujve të shtypur, një forcim i ndjenjave kombëtare dhe një dëshirë më e madhe për të qenë të lirë, të pavarur e sovranë. Lëvizjet çlirimtare të popujve janë rritur në gjerësi e cilësi, është forcuar karakteri i tyre antiimperialist, antisocialimperialist dhe antineokolonialist.

Një grusht i rëndë për imperializmin ishte lufta e popullit iranian, i cili u ngrit në revolucion dhe fshiu me fshesë të hekurt shahun e regjimin e tij mesjetar, flaku jashtë padronët e tij amerikanë. Shtetet e Bashkuara të Amerikës pësuan në Iran një disfatë të madhe politike,

të cilën nuk janë në gjendje ta riparojnë jo vetëm me rrugë diplomatike e me shantazhe ekonomike, por as edhe me ndërhyrje ushtarake, siç tentuan dhe dështuan në Tabas. Në Iran imperializmi amerikan humbi një burim nafte nga më të rëndësishmit, humbi fitime kolosale, humbi besimin si protektor i pathyeshëm tek «aleatët» arabë të Gjirit Persik. U lëkund kompromisi egjiptiano-izraelit i Kemp Dejvidit, lindën mosmarrëveshje të hapëta dhe të nënujshme me partnerët e NATO-s.

Përmasa më të mëdha dhe një intensitet më të fuqishëm ka marrë lufta e popujve arabë kundër pushtuesve izraelitë dhe padronëve të tyre ameriankë. Në qendër të kësaj lufte qëndron populli heroik palestinez, i cili në kushte jashtëzakonisht të vështira po zhvillon prej dhjetëra vjetësh një betejë titanike për të rifituar atdheun e tij të mohuar, për të siguruar të drejtat e tij, që të jetojë i lirë e i pavarur në tokën e vet amtare. Me trimëri e guxim lufton populli i Afganistanit kundër social-imperialistëve sovjetikë e shërbëtorëve të tyre vendas për të rifituar pavarësinë e vet kombëtare.

Popujt e Amerikës Latine po ndeshen e po gjakosen me diktaturat fashiste që mbahen në fuqi me ndihmën e drejtpërdrejtë të imperializmit amerikan. Lëvizja revolucionare e çlirimtare atje po rritet e po thellohet dhe në mjaft raste arrin të mposhtë armiqtë e të dalë fitimtare. Dëshmi më e afërt janë fitorja e revolucionit në Nikaragua, që përmbysi një nga regjimet më reaksionare, siç ishte ai i Somozës, shpërthimi i revolucionit në Salvador etj. Në «oborrin e prapmë» të Shteteve të Bashkuara tani po fryjnë furtuna të mëdha, të cilat nuk mund të ndalen as me armë e as me dollarë.

Edhe kontinenti afrikan nuk është i qetë. Njëri pas tjetrit, në sajë të një lufte të gjatë e këmbëngulëse, shumica dërrmuese e vendeve afrikane fituan pavarësinë shtetërore. Edhe popullsia zezake e Zimbabves, nëpërmjet luftës së armatosur, mundi të fitojë të drejtat e saj, që ia mohonte një pakicë reaksionare kolonialistësh të vjetër. Por akoma mbetet pa u çliruar Namibia dhe populli i Afrikës së Jugut, i cili vazhdon të jetojë në segregacion dhe pa asnjë të drejtë. Popujt e Afrikës as janë pajtuar e as mund të pajtohen me racizmin. Ekzistenca e tij fyen e indinjton tërë popujt afrikanë.

Luftërat nacionalçlirimtare të popujve, gjaku i popujve që luftojnë për lirinë dhe pavarësinë e tyre, pasqyrojnë urrejtjen dhe zemërimin kundër shfrytëzimit kapitalist e zgjedhës imperialiste. Ato vërtetojnë tezat e Leninit për imperializmin si kapitalizëm në kalbëzim, si prag i revolucioneve proletare. Ato vërtetojnë se imperializmi shkon drejt greminës, se ai nuk është më në gjendje të ndalë vrullin revolucionar të popujve që guxojnë të ngrihen kundër tij dhe që nuk kanë frikë nga presionet, kërcënimet e ndërhyrjet imperialiste, qofshin këto edhe me armë.

Acarimi i gjendjes ndërkombëtare dhe rritja e rrezikut të luftës bënë edhe më të mprehta për shkak të krizës së rëndë ekonomike, politike, tanishme ekonomike është shprehja më e qartë dhe më konkrete e thellimit të krizës së përgjithshme të kapitalizmit. Në krahasim me atë të viteve 30-të, që përfshiu sidomos Shtetet e Bashkuara të Amerikës dhe vendet e mëdha të zhvilluara, kriza e sotme ka futur në vorbullën e

saj të tëra vendet kapitaliste, pa përjashtim, të zhvilluara ose të pazhvilluara qofshin. Këtë shtrirje e këtë thellësi asaj ia kanë dhënë disa faktorë të rinj të zhvillimit të sistemit kapitalist pas Luftës së Dytë Botërore, siç janë: rritja e mëtejshme e koncentrimit dhe e ndërkombëtarizimit të kapitalit, vendosja e sundimit gati të plotë të dollarit në sistemin financiar botëror, zgjerimi i veprimtarisë së shoqërive shumëkombëshe dhe pesha gjithnjë në rritje e tyre në prodhimin botëror, rritja tej gdo kufiri e shpenzimeve improduktive, sidomos për armatimet.

Në lindjen dhe zhvillimin e krizës së sotme kanë ndikuar, bile në një masë të madhe e vendimtare, luftërat klasore e çlirimtare, dobësimi i përgjithshëm i pozitave të imperializmit, që erdhi si rezultat i shkatërrimit të sistemit kolonial dhe i daljes në dritë të dhjetëra e dhjetëra shteteve të reja, të cilat në këtë ose në atë shkallë luftojnë për arritjen e pavarësisë së plotë politike dhe ekonomike.

Si të gjitha krizat e tjera, kjo e sotmja është krizë e superprodhimit, është pjellë dhe një fenomen i pashmangshëm i sistemit kapitalist. Kjo krizë, ndryshe nga të tjerat, po vazhdon për një kohë të gjatë dhe nuk po duken shenja të daljes prej saj.

Ekonomia kapitaliste vazhdon të ndodhet në stanjacion, në disa vende ka rënie të mëtejshme ose ndonjë rritje pa rëndësi. Eksportet në shkallë botërore, për shkak të ngushtimit të tregjeve, janë në rënie. Kapacitetet prodhuese në vendet e mëdha të industrializuara shfrytëzohen gjithnjë e më pak. Papunësia në këto vende ka arritur në 25 milionë veta. Inflacioni ngrihet vazhdimisht.

Si çdo krizë tjetër, por më tepër kjo e tanishme provoi se sistemi borgjez, pavarësisht nga format e jashtme që mund të marrë gjatë zhvillimit të tij, nuk mund të sigurojë një rritje të harmonishme të ekonomisë, nuk mund të sigurojë punë e bukë për të gjithë punonjësit, nuk mund të evitojë katastrofat ekonomike dhe shkatërrimin e forcave prodhuese e të pasurisë kombëtare të krijuara me djersën dhe gjakun e punonjësve.

Kriza e sotme është kriza dhe dështimi i kapitalizmit shtetëror monopolist. Mekanizmi i rregullimit shtetëror monopolist të ekonomisë jo vetëm u tregua i paaftë për të mënjeluar krizat, por u shndërrua edhe në një faktor tjetër të shtimit të vështirësive ekonomike. U vërtetua kështu se ndërhyrjet e shtetit monopolist dhe programimi kapitalist nuk janë në gjendje të zhdukin konkurrencën, të sigurojnë zënieën e plotë me punë të popullsisë dhe të mënjanojnë pengesat për riprodhimin e zgjeruar shoqëror.

Me krizën e tanishme mori një goditje të rëndë modeli i shoqërisë kapitaliste të «konsumit». Bashkë me të falimentuan edhe teoritë ekonomike të kapitalizmit të sotëm, të përhapura e të zbatuara në të gjitha vendet e mëdha kapitaliste e nga të cilat u frymëzuan edhe një numër vendesh revizioniste për reformat e tyre ekonomike.

Kriza e tanishme tregoi qartë kalbëzimin jo vetëm të sistemit kapitalist të formës klasike, por edhe të kapitalizmit të formës që sundon në Bashkimin Sovjetik, të kapitalizmit monopolist shtetëror dhe të superstrukturave të tij. As kjo formë kapitaliste sundimi e shfrytëzimi të punonjësve nuk i mënjanoi dot tronditjet në ekonomi, rregullimin e

forcave prodhuese, rënien e prodhimit, uljen e nivelit të jetesës së masave punonjëse, zgjerimin e plagëve që krijon shoqëria borgjeze.

Në qoftë se do të bënim një karakterizim të përgjithshëm të ekonomisë së sotme kapitaliste e revizioniste botërore, do të thoshim se ajo gjendet në një amulli që degradon gjithnjë e më shumë raportet e brendshme shoqërore dhe marrëdhëniet midis shteteve. Ajo që duket më shumë është intensifikimi i një sulmi të përgjithshëm ndaj nivelit të jetesës së punonjësve dhe të drejtave të tyre. Pothuajse në të gjitha vendet po shkurtohen në mënyrë drastike shpenzimet për shëndetësinë, arsimin, ndihmat për fëmijët, pensionet etj.

Krahas keqësimit të gjendjes ekonomike të punonjësve, në pjesën më të madhe të vendeve kapitaliste po rriten kërkesat për qeveri «të fortë», me qëllim që t'i imponojnë popullsisë masat antipunëtore dhe të përmbajnë hovin e luftës klasore në rritje. Në disa vende kryhen puçe ushtarake, ka terrorizëm dhe anarkizëm, të organizuar nga qeveritë borgjeze kapitaliste në fuqi, ka kontrabandë kolosale, vjedhje të organizuara në shkallë kombëtare dhe ndërkombëtare, ka një zhvillim të pakufishëm e të llahtarshëm të korrupsionit politik, moral e fizik. Fasizmi po troket në portat e mjaft vendeve.

Në të gjitha drejtimet e në të gjitha aspektet kriza e sotme provoi se analiza e Marksit për kapitalin dhe konkluzionet e Leninit për imperializmin mbeten jo vetëm të drejta, por edhe bazë themelore shkencore për të kuptuar proceset e sotme shoqërore të botës kapitaliste dhe tendencat e zhvillimit të tyre.

Kriza ekonomike dhe kursi agresiv i superfuqive kanë ashpërsuar të gjitha kontradiktat midis fuqive imperialiste, kanë goditur rëndë blloqet dhe aleancat e tyre. Marrëdhëniet ekonomike, politike dhe ushtarake në grupimet e ndryshme imperialiste e revizioniste janë tronditur. Pjesëtarët e grupimeve perëndimore e lindore po përpiqen të shfrytëzojnë të çara të ndryshme dhe të gjejnë arsye për të mos iu përmbajtur angazhimeve, traktateve e marrëveshjeve që ekzistojnë midis tyre. Konfliktet e rivaliteteve të vjetra u janë shtuar të reja. Kjo duket më hapur sidomos në bllokun perëndimor.

Politika amerikane e kërbaçit të madh kundër popujve shoqërohet edhe me një shtrëngim të fortë të vidhave ndaj partnerëve dhe klientëve të tij. Imperializmi amerikan kërkon nga Evropa, nga Japonia e nga Kina jo vetëm bashkëpunim në të gjitha fushat, por edhe nënshtrim të plotë. Ai përpiqet t'u diktojë aleatëve të tij të NATO-s që të rritin buxhetet ushtarake, të pranojnë vendosjen në territoret e tyre të raketave të reja amerikane «Pershing» e «Kruiz», të mos dalin me një politikë më vete, të mos flirtojnë me Bashkimin Sovjetik ose me arabët. Por situata e sotme në botë dhe gjendja e vetë Shteteve të Bashkuara të Amerikës nuk është më ajo e kohës së Trumanit dhe të planit Marshall.

Sot raporti i fuqisë politike dhe ekonomike të Shteteve të Bashkuara, në krahasim me atë të Evropës Perëndimore, vjen duke rënë. Konkurrenca nga ana e Tregut të Përbashkët dhe e Japonisë është bërë shumë e fuqishme dhe mjaft kërcënuese. Në qoftë se më 1950 prodhimi industrial i Shteteve të Bashkuara të Amerikës ishte baras

me 2/3 e atij botëror, sot është 1/3 e tij. Në qoftë se në atë kohë SHBA dispononin 50 për qind të rezervave monetare botërore, sot kanë vetëm 7 për qind të tyre. Liderhipi i imperializmit amerikan është dobësuar shumë dhe pranohet me vështirësi.

Pjesëtarët evropianë të NATO-s tani e kanë organizuar dhe kanë forcuar potencialin ekonomik brenda dhe jashtë vendeve të tyre, kanë fuqizuar arsenalin e vet ushtarak dhe kanë krijuar organizmin e tyre reaksionar, Tregun e Përbashkët Evropian. Tendenca e tij është të kundërshtojë sa të jetë e mundur diktatin amerikan, të frenojë ekspansionin në tregjet e vendeve anëtare të tij, të konkurrojë tregun amerikan dhe të zgjerojë tregjet e veta. Çdonjëri prej shteteve të mëdha të Evropës Perëndimore ka filluar në shkallë të gjerë të rikrijojë e të forcojë zonat e veta të influencës.

Strategjia e monopoleve evropiane synon shndërrimin e Evropës në fillim në një superfuqi ekonomike, pastaj politike dhe më vonë edhe ushtarake. Por këto janë edhe fushat ku ajo do të ndeshet e do të përleshet me superfuqitë e me fuqitë e tjera imperialiste.

Për Shtetet e Bashkuara të Amerikës një gur shumë i favorshëm në tabelën e shahut të gjendjes aktuale është Kina dhe tok me të edhe Japonia. Vërtet Kina është partnerë më e dobët se «Evropa e Bashkuar», por ajo ka më tepër nevojë për Amerikën dhe është në një armiqësi të madhe me Bashkimin Sovjetik. Për këtë arsye imperializmi amerikan ka vendosur t'i japë Kinës armatime të shumta, duke përfshirë edhe ato ofensive. Në të njëjtën kohë ai bën presion mbi Japoninë që kjo të rritë buxhetin ushtarak, ushtrinë dhe armatimet e saj.

Tanimë në Lindjen e Largme ka marrë formë një aleancë e re imperialiste ndërmjet Shteteve të Bashkuara, Japonisë dhe Kinës, që përbën një rrezik tjetër për shpërthimin e luftërave lokale e të luftës së përgjithshme. Përveç imperializmit amerikan, i cili hapësirat e gjera të Oqeanit Paqësor i ka konsideruar si zona të padiskutueshme të influencës së vet, me pretendime hegjemoniste tani ka dalë edhe Japonia, superfuqi ekonomike dhe me dëshira të reja perandorake. Synime të tilla në këtë zonë ka edhe Kina, që ëndërron të bëhet sundimtare e vetme e Azisë dhe e Oqeanisë. Shtetet e Bashkuara të Amerikës nga ana e tyre përpiqen që tendencat e Kinës e të Japonisë për ekspansion t'i drejtojnë nga Bashkimi Sovjetik.

Për të përballuar dhe për t'iu kundërvënë frontit amerikano-kino-japonez në Azi, Bashkimi Sovjetik përpiqet të futet në Afrikë, në Lindjen e Mesme, në Pakistan, në Indokinë e mundësisht edhe në Indi, ndërsa në Evropë ai kërkon të mbajë një «detantë» me Tregun e Përbashkët dhe ndjek një politikë për çarjen e fronteve. Me fjalë të tjera ai bën të gjitha përpjekjet që të dobësojë rrethimin e vet, të përçajë bllokun luftarak që përgatitet e zhvillohet në të dy krahët e tij, në Evropë e në Azi, të sigurojë pozita dominuese strategjike për një luftë eventuale. Por edhe Evropa, për të cilën Bashkimi Sovjetik përbën një kërcënim të madh, nuk do që të rrezikohet. Ajo është e gatshme të vërrë të tjerët, sidomos frontin kino-japonez, që të ndeshet me Bashkimin Sovjetik dhe të nxjerrë për të gështenjat nga zjarri.

Për më tepër ajo ka edhe problemet e saj të brendshme, që ia lidhin shpesh duart e këmbët. «Evropa e Bashkuar» në vetvete nuk është e bashkuar. Problemeve të shumta të saj dhe kontradiktave që e brejnë Tregun e Përbashkët parlamentari i Strasburgut nuk u jep dot zgjidhje. Grindjet, rivalitetet, interesat e kundërta të çdo shteti, po shtohen aq tepër sa që vënë në rrezik vetë ekzistencën e këtij Tregu.

Kontradiktat e mosmarrëveshjet janë ashpërsuar shumë edhe brenda së ashtuquajturës bashkësi socialiste. Në situatat e vështira në të cilat ndodhet për vete Bashkimi Sovjetik, ai nuk është në gjendje të plotësojë kërkesat e vendeve aleate për një zhvillim normal të ekonomive të tyre. Këto vende, që janë kthyer prej vitesh në shtojca të ekonomisë sovjetike, janë të detyruara t'u nënshtrihen uljeve e ngritjeve, kapriçeve të saj.

Fërkime e grindje ka edhe për shkak të tendencës së vendeve satelite për t'u afruar e për të bashkëpunuar me Perëndimin. Bashkimi Sovjetik përpiqet ta pengojë këtë afrim dhe t'i mbajë vendet e Evropës Lindore të lidhura me zinxhirë pas vetes së vet. Për këtë qëllim ai përpiqet me të gjitha mënyrat të forcojë Traktatin e Varshavës, KNER-in, organizmat e tjerë të integritit ekonomik e politik, të fuqizojë garnizonet e tij ushtarake në këto vende etj. Kur nuk ia arrin me të mirë, ai vepron me anën e tankeve, siç bëri më 1968 në Çekoslovakia.

Për gjendjen e rëndë në «bashkësinë socialiste» dhe për kontradiktat e thella që e brejnë atë dëshmojnë më së miri ngjarjet e kohëve të fundit në Poloni, që e kanë çuar këtë vend në buzën e katastrofës ekonomike dhe në tronditje të mëdha shoqërore e politike. Këto janë pasojë e vijës së ndjekur nga partia revizioniste polake për rivendosjen e kapitalizmit, e nënshtrimit të gjithanshëm të vendit ndaj Bashkimit Sovjetik, e hapjes së dyerve për kapitalet perëndimore, janë pasojë e borxheve të mëdha të Polonisë, që kapin shumë kolosale prej 27 miliardë dollarësh. Këtu e kanë burimin edhe revoltat e klasës punëtore dhe të punonjësve polakë.

Revolta e punëtorëve në Poloni vërtetoi dy çështje kapitale e me rëndësi parimore. Ajo tregoi se forca e klasës punëtore është në gjendje të shkatërrojë një pushtet reaksionar, qoftë ky revizionist ose kapitalist.

Nga ana tjetër ajo dëshmoi se faktori subjektiv, forca politike që udhëheq klasën punëtore, luan një rol vendimtar. Në rastin e «Solidarnostit» klasa punëtore manipulohet dhe drejtohet nga kisha katolike dhe reaksioni polak e botëror, të cilët luftojnë për të vendosur, nëpërmjet një rruge plot me rreziqe e të papritura tragjike, një regjim tjetër revizionist — kapitalist. Në të kundërtën, në rast se faktori subjektiv do të ishte një parti e vërtetë komuniste marksiste-leniniste, klasa punëtore polake do të kryente një revolucion proletar dhe do të vendoste diktaturën e proletariatit.

Rruga e shpëtimit të klasës punëtore dhe të popullit të Polonisë, si dhe të të gjitha vendeve të tjera revizioniste nga shfrytëzimi kapitalist dhe nga shtypja e huaj nuk është as pajtimi me regjimin revizionist në fuqi dhe me skllavërinë e socialimperializmit sovjetik, as ba-

shkimi me kapitalin dhe me reaksionin perëndimor. Lufta e hapur dhe e vendosur e masave popullore, nën udhëheqjen e klasës punëtore, me një parti të vërtetë marksiste-leniniste në krye, është rruga e vetme për të siguruar edhe zhvillimin e ekonomisë, edhe lirinë e pavarësinë e vendit, edhe rivendosjen e socializmit.

Acarimi i kontradiktave ndërmjet fuqive imperialiste si dhe me partnerët e tyre në blloqet ushtarake dhe ekonomike çon gjithnjë e më shumë në tensione e konflikte të reja, në luftëra me karakter lokal e të përgjithshëm për rindarjen e tregjeve, të burimeve të lëndëve të para e të zonave të influencës. Ky është një ligj i zhvillimit të kapitalizmit.

Por kontradiktat dhe konfliktet ndër imperialiste shkaktojnë edhe dobësimin e sistemit imperialist në tërësi e në hallka të veçanta të tij. U takon forcave të ndërgjegjshme revolucionare që situatat e krijuara nga këto kontradikta të dinë t'i shfrytëzojnë për të mobilizuar masat, për t'i bërë të ndërgjegjshme dhe për t'i hedhur në luftë e në revolucion.

Aktualisht në një krizë të rëndë ka hyrë edhe sistemi neokolonialist i krijuar nga imperializmi pas Luftës së Dytë Botërore. Për të ruajtur sundimin e tyre politik dhe ekonomik, për të siguruar shfrytëzimin maksimal të pasurive të vendeve ish-koloniale, për të frenuar rritjen e lëvizjes liridashëse e çlirimtare të popujve imperialistët janë përpoqur të gjejnë e të përdorin forma të reja shtypjeje e skllavërimi, gjithnjë më mashtruese e më të sofistikuar.

Nëpërmjet sistemit të kreative, huave, ndihmave e fondeve të ndryshme ata i kanë kthyer këto vende në borxhlinj të përhershëm dhe të varur nga mëshira e kreditorëve, që për paratë e dhëna u kërkojnë jo vetëm tapitë, por edhe shpirtin. Bashkë me kreditë e ndihmat kanë hedhur rrënjë shoqëritë shumëkombëshe, që janë bërë jo vetëm koncesionarë monopolistë të shfrytëzimit të minierave, të naftës, të energjisë elektrike, të tregtisë me shumicë, të komunikacionit etj., por edhe qendra politike me të cilat lidhen grupet e ndryshme të pushtetit në vend. Bankat e mëdha me emra tërheqës, si Banka Botërore, Fondi Monetar Ndërkombëtar, Fondi Evropian i Zhvillimit etj., janë shndërruar në shtabe të neokolonializmit ndërkombëtar për sundimin dhe shfrytëzimin e vendeve të reja. Janë këto qendra financiare e politike që, së bashku me shoqëritë shumëkombëshe, organizojnë e nxitin grushtet e shtetit, rrëzojnë qeveritë dhe vënë të tjera, shkaktajnë edhe luftëra lokale kur e kërkon interesi i kapitalit të madh. Këto konflikte janë kthyer në një biznes të madh për shitjen e armëve dhe në një poligon të gjallë provash.

Por, krahas këtij shfrytëzimi të egër e të gjithanshëm, në strukturat ekonomike e shoqërore të vendeve ish-koloniale kanë ndodhur edhe disa ndryshime, të cilat janë rezultat i investimeve, i futjes së teknikës e të teknologjisë së re, i zgjerimit të komunikacionit e të ndërlikjes etj., që imperialistët u detyruan të bëjnë për të grabitur më shumë e më shpejt pasuritë e mbitokës e të nëntokës. Kjo ka sjellë edhe krijimin e shtresave të reja shoqërore vendase, si të borgjezisë kombëtare, të punëtorëve të kategorive të ndryshme dhe të një inteligjencie të re

të domosdoshme për të punuar në sektorët ekonomikë, politikë, administrativë.

Zhvillimi u hapi sytë shumë njerëzve të këtyre shtresave, sidomos të inteligjencies së re, të cilët nuk pajtohen më me format dhe metodat që përdoren për shtypjen dhe për shfrytëzimin e popujve të tyre.

Ndërgjegjja kombëtare e revolucionare është rritur kudo. Kjo duket qartë edhe në zgjerimin e lëvizjes së vendeve e të forcave të ndryshme, që luftojnë për vendosjen e sovranitetit kombëtar mbi pasuritë e veta, për rivlerësimin e lëndëve të para e energjetike, për shkëmbime të barabarta e me përfitim reciprok në tregtinë ndërkombëtare, për ndryshimin e sistemit monetar ndërkombëtar të vendosur nga imperalizmi, për kufizimin dhe mënjanimin e pushtetit ekonomik monopolist të shoqërive shumëkombëshe etj. Kjo lëvizje ka thëlluar krizën aktuale ekonomike, veçanërisht krizën energjetike e të lëndëve të para, që ka përfshirë botën kapitaliste e revizioniste.

Fuqitë e mëdha kapitaliste, me naftën që u kanë grabitur popujve të tjerë dhe me blerjet e lëndëve të para me çmime të lira, kanë ngritur perandoritë e tyre industriale. Harxhimi parazituar dhe i pakontrolluar i burimeve energjetike e i lëndëve të para botërore ka krijuar gjendjen e sotme kritike në këtë sektor themelor të zhvillimit të ekonomisë së çdo vendi.

Energji dhe lëndë të para ka, por ato nuk gjenden më me çmime të lira. Fuqitë e mëdha imperialiste e kapitaliste tani nuk janë në gjendje të sundojnë plotësisht mbi burimet e lëndëve të para dhe të diktojnë çmimet e tyre. Pësonin për çmime të ulëta të naftës e të lëndëve të para i kundërvihet rezistenca e vendeve prodhuese, që janë zgjuar dhe mbrojnë interesat e tyre, që kërkojnë të zhvillohen, të bëjnë investime në industri, në bujqësi e në sektorë të tjerë të ekonomisë kombëtare.

Rezistenca dhe lufta e popujve të sunduar nga neokolonializmi për mbrojtjen e të drejtave të tyre, të pasurive dhe të sovranitetit kombëtar është një proces i pandalshëm, i cili do të rritet e do të zhvillohet më tej në të ardhmen.

Këtë rrezik imperializmi dhe sistemi i tij i shtypjes e i shfrytëzimit neokolonialist po e ndien thellë, prandaj bën të gjitha përpjekjet, ku me demagogji e mashtrim e ku me forcë, për ta shtypur këtë lëvizje, për t'i topitur tehun e saj përparimtar e revolucionar, për ta devijuar e për ta futur në rrugë pa krye. Nga ana tjetër, për të mashtruar popujt e vendeve të shtypura e të varura dhe për të mbajtur gjallë me çdo kusht sistemin e kalbur neokolonialist, mbrojtësit e tij përpiqen të krijojnë në opinionin e përgjithshëm botëror përshtypjen se këto vende janë plotësisht të lira e sovraane, se kanë të drejtë të thonë fjalën e tyre «të pavarur» në organizatat e ndryshme ndërkombëtare, bile edhe të mos jenë në një mendje e të kundërshtojnë superfuqitë.

Imperializmi stimuloi dhe nxiti krijimin e lëvizjeve e të teorive të ndryshme që e krijojnë këtë përshtypje. E tillë është edhe lëvizja e «të paangazhuarve». Baza e saj ka qenë predikimi i mosmarrjes pjesë në blloqe politike e ushtarake dhe i mbrojtjes së interesave të

vendeve të pazhvilluara ekonomikisht nga politika e superfuqive. Por tani, kur rivaliteti midis superfuqive është shtuar, kur kriza i ka ngushtuar fushat e manovrimit, duket qartë se një pjesë e madhe e vendeve «të paangazhuara» po bashkohen me njërin ose me tjetrën superfuqi. Bashkë me përçarjen e lëvizjes e me konfliktet e shumta midis vendeve të ndryshme të ashtuquajtura të paangazhuara, kanë edhe teoritë demagogjike të sajura me shumë zor nga liderët e ndryshëm që kanë dashur të bëhen udhëheqës dhe ideologë të kësaj lëvizjeje, sidomos ata jugosllavë. Tani ajo ka mbetur një lëvizje e papërcaktuar, fluide dhe e ndryshueshme, që ndizet e shuhet sipas koniunkturave që krijohen dhe interesave të superfuqive.

Në një kohë doli si një teori në mbrojtje të neokolonializmit dhe veçanërisht të sundimit amerikan në botë edhe teoria kineze e «tri botëve». Por ajo u shkri si krija në ujë. Karta e saj u dogj shumë shpejt. Partia jonë e demaskoi dhe e goditi këtë teori reaksionare e kundërvolucionare.

Vitet e fundit po bëhet një propagandë e madhe rreth atij që e quajnë «rend i ri ekonomik ndërkombëtar», i cili duhet të zgjidhë morinë e madhe të problemeve që proekupojnë sot vendet e pazhvilluara ekonomikisht, siç janë ato të industrializimit, të ushqimit, të transformimit të strukturave të prodhimit etj. Rreth këtij «rendi të ri» janë krijuar edhe teori të ndryshme, janë paraqitur skema e projekte të tëra, janë ndërmarrë aksione konkrete, siç janë i ashtuquajtur dialogu Veri-Jug, konferenca e të 77-ve, mbledhjet e jashtëzakonshme të Asamblesë së Përgjithshme të Kombeve të Bashkuara etj.

Por vitet shkojnë dhe asgjë nuk realizohet, sepse imperialistët e neokolonialistët nuk heqin dorë nga privilegjet e pozitave të tyre dominuese. Ato që mbeten janë rezolutat pa bukë të mbledhjeve të ndryshme ndërkombëtare dhe vendimet për të bërë mbledhje të reja.

Që duhet të ndryshojnë marrëdhëniet ekonomike ndërkombëtare, kjo është e domosdoshme. Kjo është dëshirë dhe kërkesë e popujve, të cilët luftojnë për t'u shkëputur nga vargonjtë e neokolonializmit. Por në ç'rrugë mund të realizohen këto? Revizionistët dhe oportunistët e tjerë pretendojnë se kjo mund të arrihet me anë të propagandës, me anë të edukimit të kapitalistëve, me anë të bisedimeve. Mendimi se mund të arrihet një rend i ri ekonomik ndërkombëtar me predikime moralizuese jo vetëm që është jashtë çdo realiteti e mundësie, por ai është edhe një mashtrim keqdashës. Rruga e drejtë është lufta e popujve për mbrojtjen deri në fund të të drejtave të tyre, kundërshtimi i vendosur ndaj grabitjes neokolonialiste. marrja në dorë dhe administrimi sovran i pasurive kombëtare. Vetëm kështu vendet e pazhvilluara mund t'u imponojnë fuqive të mëdha imperialiste e kapitaliste kërkesat e tyre të drejta për shkëmbime të barabarta në fushën ekonomike, për bashkëpunim me përfitim reciprok etj.

Fuqitë e mëdha imperialiste dhe të tjerat më pak të mëdha mendojnë, veprojnë dhe teorizojnë se janë ato që kanë në dorë fatet e popujve e të njerëzimit, dhe mbi këtë bazë kërkojnë t'i nënshtrojnë popujt. Këto fuqi agresive e nënvleftësojnë forcën e popujve. Atyre u

është errësuar pamja dhe nuk duan të shohin se çdo hap i popujve përpara, drejt kundërshtimit të shtypjes e të skllavërimit të dyfishtë, të jashtëm dhe të brendshëm, është një çarje që do të zgjerohet në murin e burgut kapitalist e imperialist.

Imperializmi amerikan dhe socialimperializmi sovjetik bëjnë përpjekje të mëdha për t'u dukur si dy superfuqi të pamposhtshme. Ata vërtet kanë një potencial të madh ushtarak dhe ekonomik, influencojnë dhe ndërhyjnë në punët e brendshme të popujve dhe të shteteve të tjera, por, të kesh armë, të kesh dollarë ose rubla, nuk do të thotë se ke një fuqi të pamposhtshme. Superfuqitë imperialiste duhet të konsiderohen ashtu siç janë realisht, pa i nënvleftësuar, por edhe pa i mbivlerësuar. Ato janë të fuqishme e të egra, por janë edhe në kalbëzim, janë të krimbura, të degjeneruara dhe bazat e tyre janë të tronditura.

Kapitali botëror bën përpjekje të mëdha që të shpëtojë nga kriza, nga luftërat çlirimtare të popujve, nga revolucioni, nga kjo darë e tmerrshme, që e ka mbërthyer për fyti dhe po e mbyt. Por shpëtimi është i pamundur, sepse është vetë sistemi kapitalist që krijon krizat e tij politike, ekonomike, ideologjike, që i ushqen dhe i thellon ato deri në shkallën më të lartë. Për të dalë nga kaosi që krijon kapitalizmi, për të shpëtuar njëherë e mirë nga shtypja e shfrytëzimi kapitalist, nga zgjedha e huaj neokolonialiste e sundimi i reaksionit nuk ka rrugë tjetër përveç revolucionit, përmbyesjes së imperializmit e të kapitalizmit.

Lufta e popujve, lufta e proletariatit kundër armiqve të tyre, do të ecë përpara. Ajo është një proces objektiv historik, të cilin s'ka forcë që ta ndalojë.

Situatat komplekse e të vështira që janë krijuar e krijohen në botë, shtrojnë përpara Partisë dhe shtetit tonë socialist detyrën që të mbajnë kurdoherë lart vigjilencën revolucionare dhe të marrin masa për forcimin e gjithanshëm të ekonomisë e të mbrojtjes, të unitetit të popullit e të ndërgjegjes politike të njerëzve. Këto situata kërkojnë, gjithashtu, që politika jonë e jashtme të jetë aktive, që t'u shërbejë gjithnjë e më mirë mbrojtjes së interesave të atdheut e të fitoreve të socializmit, përparimit të çështjes së revolucionit, të çlirimit të popujve e të paqes në botë, përkrahjes së të gjitha atyre proceseve që ndihmojnë në emancipimin dhe progresin e shoqërisë së sotme njerëzore.

Politika jonë e jashtme, si politike e një shteti socialist, e një shoqërie pa klasa shfrytëzuese e me të vërtetë të lirë, është një politikë revolucionare e internacionaliste. Ajo është e çliruar edhe nga shenja më e vogël e nacionalizmit të ngushtë borgjez, e shovinizmit, e ekskluzivitetit nacional ose e nënvleftësimit të popujve të tjerë. Populli shqiptar ka respekt për çdo popull dhe u do të mirën të gjithë popujve.

Republika Popullore Socialiste e Shqipërisë i përmbahet fort parimit se çdo popull ka të drejtë ta zgjedhë vetë rrugën e tij të zhvillimit dhe të vendosë vetë e në mënyrë sovranë për fatet e tij.

Shqipëria socialiste, si një vend krejtësisht i lirë, atë çka men-

don e thotë hapur, pa asnjë druajtje dhe me sinqeritet të plotë. Ajo zbaton një politikë të jashtme sovranë, mbasi nuk kushtëzohet nga paktet politike, nga traktatet ushtarake ose nga organizatat e mbyllura ekonomike. Zhvillimin ekonomik e politik, mbrojtjen e saj, të ardhmen e saj ajo nuk e mbështet në kreditë, në huat, në ndihmat e shteteve të tjera, por në forcat e veta.

Kjo ka bërë dhe bën që zëri i Shqipërisë të jetë një zë i lirë, realist e objektiv në një botë ku varësia e nënshtimi i shumë shteteve ndaj fuqive të mëdha imperialiste kufizon e shtrembëron çdo mendim e veprim të pavarur.

Gjatë periudhës që nga Kongresi i 7-të i Partisë, shteti ynë, duke u bazuar në parimet e njohura të barazisë, të respektimit të sovranitetit, të mosndërrhyrjes në punët e brendshme dhe të leverdisë reciproke, ka zgjeruar marrëdhëniet e tij diplomatike, tregtare e kulturore me një numër gjithnjë e më të madh shtetesh dhe ka rritur vazhdimisht shkëmbimet me ta në fusha të ndryshme. Sot Republika Popullore Socialiste e Shqipërisë mban marrëdhënie diplomatike me 95 shtete, nga 74 me të cilat mbante marrëdhënie në kohën e Kongresit të 7-të të Partisë.

Politika e Partisë dhe e shtetit tonë socialist ka qenë dhe do të jetë kurdoherë për forcimin e vazhdueshëm të marrëdhënieve të sinqerta, të miqësisë e të bashkëpunimit me gjithë popujt liridashës e paqedashës, me të gjithë ata që luftojnë kundër politikës agresive e hegjemoniste të imperialistëve. Ajo është për zhvillimin e një bashkëpunimi të sinqertë me të gjitha ato vende që janë dashamirë e që mbajnë qëndrim korrekt ndaj saj.

Partia dhe vendi ynë janë kundër të gjitha praktikave imperialiste e neokolonialiste të pabarazisë, të diskriminimit dhe të diktatit të shtetit të madh në marrëdhëniet ndërkombëtare. Ne jemi për atë që marrëdhëniet midis shteteve, të mëdha ose të vogla qofshin, të jenë të lira nga çdo lloj presioni e diktati ekonomik, politik e ushtarak dhe t'u shërbejnë zhvillimit ekonomik, kulturor e shoqëror të tyre, forcimit të miqësisë midis popujve e shteteve sovranë, si edhe interesave të ruajtjes e të forcimit të paqes në botë.

Shteti ynë socialist ka qenë dhe është për zhvillimin normal e të lirë të tregtisë ndërkombëtare mbi bazën e barazisë e të përfitimit reciprok. Vendi ynë është për shkëmbime tregtare të balancuara, pa diskriminime e masa kufizuese, prandaj ai është shprehur kundër raporteve të pabarabarta në shkëmbimet tregtare, kundër manipulimit të çmimeve dhe në përgjithësi kundër makinacioneve dhe orvatjeve të kujtdoqoftë që synon t'i shfrytëzojë marrëdhëniet tregtare si mjet presioni, për t'i diktuar vullnetin dhe pikëpamjet e veta politike shtetit tjetër.

Shkëmbimet tregtare ne nuk i konfundojmë me marrjen e ndihmave e të kredive. Këto janë dy gjëra të ndara dhe s'kanë lidhje ndërmjet tyre.

Mënyra se si e kuptojmë dhe e zhvillojmë ne tregtinë e jashtme, i lë dorë të lirë shtetit shqiptar të veprojë e të vendosë vetë, të thotë

fjalën e tij ashtu siç e mendon, të ndërtojë vendin me forcat e veta ashtu siç dëshiron.

Vendi ynë ka përfunduar një varg marrëveshjesh kulturore me shumë vende dhe bën shkëmbime të rregullta në fushën e artit, të kulturës, të shkencës, të sportit etj. Këto shkëmbime kanë shërbyer për të njohur reciprokisht popujt tanë me arritjet dhe përparimin e njëri-tjetrit. Populli ynë vlerëson dhe shfrytëzon gjithçka të mirë e përparimtare që kanë popujt e tjerë. Eksperienca dhe kultura përparimtare janë thesar i mbarë njerëzimit. Në të njëjtën kohë ne bëjmë përpjekje që edhe popujt e tjerë të njihen me vlerat e kulturës sonë, që është sa e lashtë, aq edhe përparimtare.

Është politika e brendshme dhe e jashtme parimore dhe e pavarur e Partisë dhe e shtetit tonë socialist, është qëndrimi i tyre i drejtë në çështjet ndërkombëtare, është lufta e tyre në anën e popujve e kundër imperializmit që e kanë forcuar pozitën ndërkombëtare të Shqipërisë, që kanë rritur prestigjin e saj.

Fjala dhe vepra e Shqipërisë dëgjohej e priten me respekt nga popujt dhe punonjësit e vendeve të ndryshme, sepse ato përputhen me interesat dhe me aspiratat e tyre. Prandaj këtë politikë e çmojnë dhe e miratojnë popujt dhe opinionin përparimtar në botë, e ndjekin me interes dhe e simpatizojnë vende e shtete me sisteme të ndryshme shoqërore, kurse e sulmojnë reaksioni e revizionistët modernë sovjetikë, jugosllavë etj.

Një kujdes të veçantë, siç është e natyrshme dhe e kuptueshme, Partia dhe Qeveria jonë u kanë kushtuar marrëdhëniet me vendet fqinje e në një kuadër më të gjerë me vendet evropiane. Qëndrimet tona ndaj tyre janë të njohura dhe ato nuk ndryshojnë. Politika e jashtme e Shqipërisë në çdo kohë e në çdo situatë ka synuar të kontribuojë me sa mundet në forcimin e paqes e të sigurisë ndërkombëtare në kontinentin tonë, në forcimin e bashkëpunimit midis popujve të tij. Ne e kemi thënë dhe e themi se pjesëmarrja e shumicës së vendeve të Evropës në blloqet politike e ushtarake të superfuqive përbën fatkeqësinë e saj. Këtu e kanë burimin ndarjet e përçarjet në Evropë, tensionet e ballafaqimet e shpeshta midis vendeve të ndryshme të këtij kontinenti.

Është një politikë tepër e rrezikshme, një mashtrim ajo që kërkon t'i bindë popujt evropianë se duke u futur nën ombrellat atomike të superfuqive gjoja garantohet liria, pavarësia kombëtare dhe paqja e përgjithshme. Kjo politikë nuk i siguron këto, por i sakrifikon. Fakt është se në emër të një sigurie të nesërme është sakrifikuar siguria e sotme, është cunguar sovraniteti, është kufizuar liria e veprimit dhe e qëndrimeve të pavarura të mjaft shteteve të Lindjes e të Perëndimit në arenën ndërkombëtare.

Si garanci për pavarësinë, sovranitetin dhe sigurimin e paqes vendeve evropiane u jepet Deklarata e Helsinkit. Ne e kemi shprehur qartë qëndrimin tonë ndaj Konferencës së Helsinkit dhe të ashtuquajturit sigurim evropian. Shqipëria socialiste nuk mori pjesë në të dhe e denoncoi si një farsë të kurditur nga dy superfuqitë me qëllim

që të siguronin e të forconin zonat respektive të influencës në Evropë, të ligjësonin e të përjetësonin sundimin e tyre në këtë kontinent. Ngjarjet që kanë ndodhur në Evropë dhe rreth saj, që nga konferenca e Helsinkit e deri më sot, e kanë vërtetuar dhe justifikuar plotësisht qëndrimin e Shqipërisë. Koha tregoi se të ashtuquajturat «frymë e Helsinkit», «bashkëpunim paqësor», «qarkullim i lirë i njerëzve dhe i ideve» etj. nuk ishin gjë tjetër veçse parulla boshe për të mashtruar popujt evropianë, për të ngjallur tek ata iluzionin se gjoja lufta po largohet, se ruajtja e statukuosë imperialiste në Evropë është shpëtimi i tyre.

Pikëpamja jonë është se vetëm kundërshtimi i vendosur i imperializmit amerikan e i socialimperializmit sovjetik, likuidimi i blloqeve ushtarake dhe largimi i armëve atomike e i trupave të huaja mund të sigurojnë paqen në Evropë.

Problemet e Ballkanit janë po ato që preokupojnë Evropën në tërësi, por këtu, për shkak të pozitës strategjike që ka ky gadishull dhe të grindjeve të vjetra, konfliktet janë më të mprehta dhe rreziqet më të mëdha.

Situata bëhet më e komplikuar edhe nga fakti se superfuqitë, të nisura nga interesat e tyre hegjemoniste dhe nga dëshira për ta shndërruar Ballkanin në një «fugë të përhershme baruti», përpichen të ngjallin pasionet dhe ndjenjat shoviniste, t'i kundërvënë popujt e vendet e Ballkanit njërin kundër tjetrit, të pengojnë zhvillimin normal e në drejtimin pozitiv të marrëdhëniet ndërmjet tyre, të minojnë forcimin e miqësisë midis popujve fqinjë.

Rreziqet në Ballkan shtohen sidomos edhe nga pjesëmarrja e disa vendeve në blloqet ushtarake e ekonomike të superfuqive, nga ekzistenca e bazave të huaja ushtarake, nga lejimi i hyrjeve dhe i qëndrimit në portet e në ujërat territoriale të flotave amerikane e sovjetike etj.

Zhvillime të tilla krijojnë tensione dhe përmbajnë rreziqe për popujt ballkanikë. Ato në çdo drejtim e në çdo aspekt shkojnë kundër përpjekjeve dhe dëshirave të singerta të popujve të Ballkanit për vendosjen e besimit, të mirëkuptimit dhe të një bashkëpunimi të vërtetë midis vendeve të gadishullit tonë.

Republika Popullore Socialiste e Shqipërisë i përmbahet pikëpamjes se aktualisht aspiratave të vërteta të popujve të Ballkanit, paqes e stabilitetit në këtë zonë mund t'u shërbehet më mirë duke mos i lejuar superfuqitë imperialiste të ndërhyjnë në punët e brendshme të vendeve të rajonit tonë dhe duke bërë hapa konkretë e konstruktivë për zhvillimin pozitiv të marrëdhëniet mbi bazën e politikës së fqinjësisë së mirë. Situata në Ballkan do të përmirësohet shumë në qoftë se vendet ballkanike do të angazhoheshin zyrtarisht për të mos u lejuar superfuqive që nga territori i tyre të kërcënohet e të rrezikohet vendi tjetër fqinj. Shqipëria socialiste, ashtu si në të kaluarën, edhe në të ardhmen do t'i përmbahet me konsekuencë kësaj politike dhe do të bëjë çdo përpjekje që në marrëdhëniet e saj me shtetet fqinje të zotërojë respektin reciprok dhe mirëkuptimi i vërtetë.

Nga këto parime e nga këto qëllime Shqipëria është udhëhequr edhe në marrëdhëniet me Jugosllavinë. Ajo ka qenë e predispozuar dhe ka bërë tërë përpjekjet për zhvillimin normal e korrekt të marrëdhënive të fqinjësisë së mirë, siç janë ato në lëmin e tregtisë, të transportit, të shkëmbimeve kulturore e në fusha të tjera me interes reciprok.

Në marrëdhëniet tona me Jugosllavinë ne jemi nisur e nisemi nga fakti se popujt tanë jetojnë prej shekujsh njëri pranë tjetrit, se fatet historike shpesh kanë qënë të përbashkëta, se kur pushtuesit e huaj kanë sulmuar njërin nuk e kanë kursyer as tjetrin. Këto na kanë bërë e na bëjnë që me Jugosllavinë, pavarësisht nga kontradiktat ideologjike e politike që kanë ekzistuar dhe ekzistojnë ndërmjet dy vendeve e që tashmë janë të njohura botërisht, pavarësisht nga polemika ideologjike që është zhvilluar e zhvillohet nga të dy palët, të kërkojmë gjithnjë të rrojmë në paqe e në fqinjësi të mirë, pa ndërhyrë në punët e brendshme të njëri-tjetrit dhe duke respektuar të drejtat e secilit.

Politika e Shqipërisë socialiste ndaj Jugosllavisë ka qenë kurdoherë konstante, e pandryshuar në bazat dhe në parimet e saj. Në qoftë se në marrëdhëniet shqiptaro-jugosllave ka pasur ulje e ngritje, përmirësime e acarime, kjo ka ndodhur jo për fajin tonë, por për fajin e qarqeve drejtuese jugosllave. Edhe keqësimi i tanishëm në marrëdhëniet midis RPS të Shqipërisë dhe RSF të Jugosllavisë është pasojë e veprimeve shoviniste të autoriteteve të Beogradit ndaj popullsisë së Kosovës dhe e nxitjes nga ana e tyre të një fushate të re armiqësore kundër vendit tonë.

Për sa i përket Republikës Popullore Socialiste të Shqipërisë qëndrimet dhe sjellja e jugosllavëve ndaj saj nuk do ta lëkundin atë nga parimet, nuk do ta bëjnë të ndryshojë rrugë. Ajo dëshiron që marrëdhëniet shtetërore në fusha të ndryshme ndërmjet dy vendeve të zhvillohen normalisht. Por kjo do të varet nga qëndrimi i Jugosllavisë ndaj Shqipërisë socialiste dhe nga trajtimi që do t'u bëhet shqiptarëve të Kosovës e të viseve të tjera në Jugosllavi.

Problemi i shqiptarëve që jetojnë në tokat e tyre në Jugosllavi nuk është problem i një «minoriteti», i andhur apo i vendosur diku në një zonë «vakuum» si emigracion ekonomik, as i shkaktuar nga dyndja e Perandorisë Osmane dhe as nga rritja e natyrshme demografike e shqiptarëve që i shqetëson Maltusët e rinj serbomëdhenj. Shqiptarët në Jugosllavi përbëjnë një etni, një popull të formuar në shekuj, që ka historinë, gjuhën, kulturën e vet, një popull autokton, të cilin, siç dihet, e copëtuan dhe e shkëputën nga mëmëdheu i vet fuqitë e mëdha imperialiste dhe ia aneksuan Jugosllavisë. Këtë askush nuk mund ta fshehtë. Çdo interpretim tjetër është arbitrar, është një falsifikim i rëndë e i dëmshëm i historisë.

Mëmëdheun e etnisë shqiptare populli shqiptar nuk ua la as pushtuesve fashistë, as kurrkujt tjetër që ta përcaktonte. Shqiptarët kanë luftuar pa pushim e në shekuj kundër armiqve të egër e shumë më të mëdhenj në numër për të mbrojtur identitetin kombëtar dhe

vetë ekzistencën e tyre. Në të gjitha këto luftëra, si në humbje dhe në fitore, në vitet e gjata të robërisë, në tërë historinë e tij, populli shqiptar nuk i humbi asnjëherë vetëqenien dhe vetëdijen e tij kombëtare, kompaktësinë dhe unitetin e tij. Në çdo rrethanë ai i ka manjfestuar ato me një vitalitet të jashtëzakonshëm e shembullor.

Perandoritë dhe fuqitë e mëdha nuk e zhdukën dot etninë kompakte të shqiptarëve, as nuk mundën ta asimilonin, t'i ndërrojnë kulturën, gjuhën, doket dhe zakonet. Këtë e vërtetoi vetë ekzistenca e popullit shqiptar. Historia tregon se, pa asnjë përkrahje nga fuqi të huaja, të cilat i ka pasur kurdoherë kundër, ai ka luftuar me sukses për lirinë e kombit dhe për kompaktësinë e tij, për mbrojtjen e pavarësisë si shtet sovran, të kulturës së tij dhe të të drejtave të veta të natyrshme e të ligjshme. Kurdoherë vetëm lufta dhe gjaku i tij i derdhur kanë bërë që të arrihej fitorja.

Në Luftën e Dytë Botërore populli shqiptar dhe popujt e Jugosllavisë luftuan së toku e në aleancë të ngushtë armësh kundër pushtuesve fashistë italianë e gjermanë. Edhe shqiptarët që jetonin në Jugosllavi luftuan me heroizëm tok me ne dhe me të gjithë popujt e Jugosllavisë kundër të njëjtëve armiq. Jo vetëm luftuan së toku, por Ushtria jonë Nacionalçlirimtare u shkoi në ndihmë partizanëve jugosllavë e vëllezërve kosovarë dhe në tokat e tyre derdhi gjakun e bijve e të bijave të popullit shqiptar. Ne vepruam siç na mësonte Partia Komuniste e Shqipërisë, me ndërgjegje e me frymë të lartë internacionaliste. Ne mendonim se kështu do të fitohej liria nga popujt e të dy vendeve tona, do të zhdukej robëria dhe do të ndreqeshin gabimet tragjike të historisë së kaluar. Ne besonim se pas fitores çdo gjë do të zgjidhej në rrugën marksiste-leniniste. Garanci për këtë ishin partitë komuniste që udhëhiqnin Luftën Nacionalçlirimtare në të dy vendet. Por bindja jonë të «komunizmi dhe internacionalizmi» i udhëheqësve jugosllavë, besimi të fjalët e tyre nuk u vërtetuan. Në fakt, udhëheqja e Partisë Komuniste të Jugosllavisë nuk e shikoi kurrë drejt e në rrugë marksiste-leniniste çështjen e së ardhmes së shqiptarëve në Jugosllavi, prandaj edhe do ta zgjidhte, siç e zgjidhi, gabim e shtrembër, në rrugë nacionaliste e shoviniste, plotësisht antimarksiste.

Zgjidhja e gabuar e kësaj çështjeje të madhe e parimore filloi që në mbledhjen e dytë të Këshillit Antifashist Nacionalçlirimtar të Jugosllavisë, mbajtur në Jajce në nëntor të vitit 1943, ku viset shqiptare në Jugosllavi u përdorën si një mjet për të rregulluar përmasat tokësore e të popullsisë së republikave të Federatës, veçanërisht të Serbisë, të Maqedonisë dhe të Malit të Zi. E ardhmja e shqiptarëve të Jugosllavisë u vendos a priori nga lart, pa aprovimin dhe vetëvendosjen e popullit shqiptar të Kosovës dhe të viseve të tjera shqiptare në Jugosllavi dhe pa as më të voglin konsultim me aleatën e popujve të Jugosllavisë, e interesuar drejtpërsëdrejti në këtë çështje, Shqipërinë popullore. Udhëheqja e Partisë Komuniste të Jugosllavisë, në kundërshtim me «politikën e barazisë nacionale» të shpallur në mbledhjen e dytë të AVNOJ-it, shkeli pa të drejtë vullnetin e shqiptarëve

në Jugosllavi, të shprehur në mbledhjen themelvënëse të Konferencës së Parë të Këshillit Nacionalçlirimtar për Kosovën dhe Metohinë, mbajtur në Bujan më 31 dhjetor 1943 deri më 2 janar 1944, që ishte në përputhje të plotë me të drejtën e «vetëvendosjes deri në shkëputje» të popujve që përbënin Jugosllavinë dhe që ishte përcaktuar në dokumentet themelore të Partisë Komuniste e të Lëvizjes Nacionalçlirimtare Jugosllave.

Për sa i përket konsultimit me Shqipërinë popullore për zgjidhjen e këtij problemi historik udhëheqja jugosllave e quante a priori të panevojshëm. Ajo ishte kundër një konsultimi të tillë, pse e dinte që një diskutim parimor, marksist-leninist e miqësor ndërmjet udhëheqjeve të të dy vendeve tona, duke marrë parasysh edhe vullnetin e lirë të shqiptarëve që banonin në trojet e tyre në Jugosllavi, do të çonte në një zgjidhje të drejtë dhe jo shovinisto-arbitrare e nacionaliste, si ajo që ndërmori udhëheqja jugosllave.

Pas luftës, në vitin 1946, një delegacion i vendit tonë, që kryesoja unë, bëri vizitën e parë zyrtare në Jugosllavi. Në bisedimet që u zhvilluan me këtë rast me Titon, ky kërkoi të dinte se ç'mendoja unë për zgjidhjen e çështjes së Kosovës dhe të viseve të tjera shqiptare në Jugosllavi. Unë i shpreha mendimin e palës shqiptare se Kosova dhe viset e tjera të banuara nga shqiptarët i përkasin Shqipërisë dhe duhet t'i kthehen kësaj. Shqiptarët luftuan që të ketë një Shqipëri të lirë e sovranë, së cilës tani duhet t'i bashkohen edhe viset shqiptare të Jugosllavisë. Presidenti Tito u përgjigj: «Jam dakord me pikëpamjen tuaj, por tash për tash nuk mund ta bëjmë dot këtë gjë, sepse serbët nuk do të na kuptojnë». Ky premtim zyrtar i Titos për këtë problem të madh e parimor nuk u shoqërua me asnjë veprim të mtejshëm nga ana e jugosllavëve. Çdo gjë ishte mashtrim nga ana e tyre.

Në zgjidhjen e gabuar në Jajce, në copëtimin e tokave shqiptare dhe në mohimin e shprehjes së vullnetit të lirë të shqiptarëve qëndron gabimi themelor, me karakter nacionalist e shovinist, i udhëheqjes jugosllave, që u pasua nga gabime të tjera po aq të rënda në lidhje me të drejtat e ligjshme e të natyrshme të shqiptarëve, të cilët akuzohen tani nga serbomëdhenjtë si «shovinistë», «nacionalistë» e «irredentistë». Në këtë zgjidhje shumë të gabuar dhe antileniniste të çështjes nacionale në Jugosllavi dhe sidomos të entitetit shqiptar prej afro 2 milionë banorësh, gati sa gjithë popullsia e Republikës Popullore Socialiste të Shqipërisë, e kanë burimin ngjarjet e kohëve të fundit në Kosovë dhe në viset e tjera shqiptare në Jugosllavi.

Shovinizmi serb, malazez e ai maqedonas që në fillim ndoqi ndaj shqiptarëve një politikë nacionaliste të egër, shtypëse e diskriminuese në të gjitha drejtimet, në arsim, në kulturë, në ekonomi etj.

Edhe në periudhën kur ndërmjet vendit tonë e Jugosllavisë dhe të dy partive kishte marrëdhënie të mira problemi i shqiptarëve në Jugosllavi ishte një «gjyle hekuri» në këmbët e jugosllavëve. Kërkesat e pakënaqësive të shqiptarëve as nuk shqyrtoheshin, as nuk

zgjidheshin politikisht në rrugën e mirëkuptimit, por me dhunë, me masa të egra administrative. Shqiptarët akuzoheshin për nacionalizëm dhe kjo bëhej për të fshehur shovinizmin dhe nacionalizmin serb. Asgjë nuk mund t'i mbulojë e t'i justifikojë raprezaljet e përgjakshme kundër shqiptarëve më 1945, më 1968 e përsëri më 1981, diskriminimin e tyre, lënien në varfëri, shtypjen nacionale, mohimet e dallimet e mëdha në fushën e arsimit dhe të kulturës. Rënia në fatkeqësi e grupit serbomadh të Rankoviçit, në vitin 1966, e më vonë e grupit tjetër serbomadh të Nikeziçit shënojnë periudhën e demagogjisë politike të titistëve ndaj Kosovës dhe kosovarëve. Nevoja për balancimin e forcave të ndryshme brenda Federatës çoi në njëfarë rishikimi formal të statusit të Kosovës, e cila nga krahinë e thjeshtë e Serbisë, u emërtua krahinë «autonome» e saj.

Me dashje ose pa dashje të serbëve, kjo situatë e re u dha mundësi shqiptarëve në Jugosllavi, dhe sidomos kosovarëve, të zgjeroheshin arsimin, të ngrinin Universitetin e Prishtinës, të zhvillonin kulturën, të mësonin historinë e popullit të tyre, të vendosnin kontakte dhe marrëdhënie arsimore-kulturore dhe ekonomike me Shqipërinë, në bazë të ligjeve të Federatës dhe të marrëveshjeve zyrtare midis RPSSH dhe RFSJ. Por baza ekonomike e Krahinës Autonome Socialiste të Kosovës mbeti përsëri shumë e dobët, u la pas dore. Pasuritë e saj përsëri u shfrytëzuan pa skrupull nga republikat e tjera të Federatës, sidomos nga Serbia. Të gjitha «zgjidhjet» që u paraqitën me bujë të madhe gjatë kësaj periudhe ishin të shpëlarë, koniunkturalë e të dobishme për Beogradin dhe Shkupin. Sipas rastit, pa u thënë haptazi, ato konsideroheshin ose si «lëshime oportuniste të Titos», siç ndodhte me serbët, ose si «fitore të arritura në sajë të Titos», siç trumbetoheshin nga udhëheqës shqiptarë të Krahinës Autonome Socialiste të Kosovës. Ndërsa masat e shqiptarëve nuk patën shumë iluzione, pasi ajo çka u jepej ishte një gjë fare e vogël përpara të drejtave të mëdha që u ishin mohuar e rrëmbyer.

Ngjarjet që kanë ndodhur pas vdekjes së Titos kanë treguar se sa gabim e në ç'rrugë antimarksiste ishte zgjidhur çështja nacionale në Jugosllavi dhe veçanërisht çështja e shqiptarëve. Kërkesave të tyre të ligjshme brenda Kushtetutës iu dha një grusht i rëndë dhe i përgjakshëm nga ana e udhëheqjes shoviniste serbe dhe e të gjithë udhëheqjes jugosllave pas demonstratave që u bënë në Kosovë në mars e prill të këtij viti. Tani, më shumë se kurdoherë tjetër, mbi kosovarët dhe mbi gjithë shqiptarët në Jugosllavi, përveç gjendjes ekonomike të mjeruar rëndon edhe shtypja e egër nacionale. Mbi ta është vendosur ligji i terrorit, është derdhur policia dhe ushtria serbe, burgjet janë mbushur plot me të rinj e të reja. Masat që janë marrë e po merren shkojnë jo vetëm drejt zhdukjes së çdo të drejte të ligjshme e të atyre pak përfitimeve që u dukën në zhvillimin e arsimit e të kulturës, por edhe drejt shkombëtarizimit të shqiptarëve në Jugosllavi. Dhe kjo bëhet nga ata që pretendojnë se respektojnë dokumentet e Konferencës së Helsinkit mbi liritë e të drejtat e njeriut. Opinioni botëror duhet të mos qëndrojë indiferent, por të alarmohet për këtë gjendje dramatike të popullsisë shqiptare në Jugosllavi.

Ç'kërkuan, në fund të fundit, shqiptarët në demonstratat masive që u zhvilluan në qytete e fshatra të ndryshme në Kosovë?

Shqiptarët në Jugosllavi më se një herë, me demonstrata paqësore dhe pa demonstrata, kanë kërkuar që gjendja e tyre kushtese, ekonomike dhe social-kulturore të ndreqej, të vihej në rrugë të drejtë brenda ligjeve të Federatës, ata kërkuar të kenë statusin e Republikës brenda RFSJ. Ata nuk kërkuar as shkëputjen nga Federata, as bashkimin me Shqipërinë. Por kërkesave të drejta e të ligjshme të studentëve, punëtorëve, fshatarëve e intelektualëve kosovarë as ua vuri veshin kush. Jo vetëm kaq, por ata, si edhe herë të tjera kur kanë paraqitur kërkesa të tilla të ligjshme e të drejta, u cilësuan si nacionalistë, u presekutuan dhe u mbytën në gjak.

Por a mund të zgjidhen kështu këto probleme në kohën tonë? Kurrsesi. Është e pamundur të mbahet në varfëri e në mjerim një popull, toka e të cilët është e begatë dhe grabitet nga të tjerët. Është e pamundur të mbash nën frikën e tankeve e të bajonetave një popull trim si shqiptarët. Është e pamundur ta shtrembërosh ose ta zhdukësh historinë dhe kulturën e tij të lashtë. Është e pamundur t'ia zhdukësh ndjenjën patriotike dhe dashurinë për mëmëdheun.

Po të ecet në rrugën që ka zgjedhur dhe po ndjek udhëheqja e sotme jugosllave kundërshtimet e shqiptarëve do të vazhdojnë, do të rriten dhe do të acarohen akoma më shumë. Vetëm një zgjidhje e menduar mirë e qështrjes nacionale, pa pasione nga të dy palët, një zgjidhje që të pranohet e të aprovohet nga populli i Kosovës, e likuidon këtë situatë shumë të ndërlikuar, të cilën e kanë krijuar jo kosovarët, por shovinizmi serbomadhi. Kosovarët dhanë zgjidhjen më të drejtë e më të përshtatshme në këto situata të vështira për Jugosllavinë dhe për veten e tyre. Kërkesa për t'i njohur Kosovës statusin e Republikës brenda Federatës është një kërkesë e drejtë, ajo nuk e cënon ekzistencën e Federatës. Krerët serbë e jugosllavë, në vend që të arsyetonin, dërguan tanket, gjakosën popullin dhe tash po zhvillojnë në shkallë të gjerë të famshmin diferencim, domethënë hetimin policor: kush ishte pro e kush kundër demonstratave. Kjo mënyrë veprimi, më parë me terror, pastaj gjoja me «diferencim», do të thotë të përpqesh të frikësosh masat që nuk frikësohen, të zhdukësh patriotizmin që nuk zhduket, të kesh iluzionin se ke qetësuar gjendjen, por ke ngjallur mërinë dhe zemërimin, të mendosh se ke sjellë «njerëz të besuar» në pushtet, të cilin e ke spastruar nga «nacionalistët» etj., por ke hedhur të gjithë popullin në rezistencë të heshtur, që nesër më me forcë do ta ngrëjë zërin kundër mizorive që po i bëhen. Këtë situatë s'duan ta kuptojnë udhëheqësit jugosllavë.

Pse ne i themi hapur këto të vërteta dhe kërkojmë që problemi i Kosovës dhe i gjithë shqiptarëve në Jugosllavi, i zgjidhur gabim, të ristudiohet me gjakftohtësi dhe të mos shkohet në dhunë e në terror, pse kërkojmë t'u jepet fund persekutimeve dhe të lirohen nga burgjet djemtë e vajzat kosovare, RPSSH e akuzojnë se ndërhyr në punët e brendshme të Jugosllavisë, bile atë e akuzojnë se nxiti turbullirat në Kosovë e gjetkë! Dhe si i nxiti ajo këto turbullira? Njëpër-

mjet marrëdhënieve arsimore e kulturore zyrtare. Shkohet deri atje sa të thuhet se RPSSH bën kauzë të përbashkët me reaksionin politik shqiptar në mërgim, të cilin ne e kemi luftuar dhe e luftojmë me të gjitha forcat tona.

Asnjëherë Republika Popullore Socialiste e Shqipërisë nuk ka ndërhyrë në punët e brendshme të Jugosllavisë. E kundërta ka ndodhur. Revizionistët jugosllavë komplotuan për likuidimin e udhëheqjes së Partisë Komuniste të Shqipërisë dhe për inkuadrimin e Shqipërisë në Federatën jugosllave si republikë e shtatë e saj, duke menduar që me këtë zgjidhnin një herë e mirë dhe në rrugë aneksioniste e imperialiste problemin e gjithë kombit shqiptar. Por këto komplete as u realizuan, as do të realizohen ndonjëherë. Shqipëria s'është e s'do të bëhet kurrë një mjet rregullimi për të qetësuar konfliktet e kontraktat midis klaneve jugosllave. Ajo ka zot popullin e saj, një popull plot vitalitet, trim dhe atdhedashës, që s'ka frikë nga askush.

Shqipëria nuk ka bërë ndonjëherë rivendikime tokësore ndaj Jugosllavisë, asnjë kërkesë për rektifikim kufijsh nuk gjen në dokumentet e saj. Por, duke mbajtur këtë qëndrim, ne s'kemi mohuar dhe as do të mohojmë kurrë faktin se në Jugosllavi rron një pjesë e madhe e kombit dhe e popullit shqiptar. Ne kemi mbrojtur dhe do të mbrojmë edhe në të ardhmen, me të gjitha forcat e në rrugë marksiste-leniniste, të drejtat e ligjshme të vëllezërve tanë shqiptarë matanë kufirit, dhe kjo nuk është ndërhyrje në punët e brendshme të Jugosllavisë. Kjo është e drejta jonë e pamohueshme.

Qështja e Kosovës është një tragjedi. Autoritetet jugosllave duhet të pushojnë terrorin dhe persekutimet ndaj shqiptarëve, të likuidojnë shtypjen nacionale dhe t'u njohin atyre të gjitha të drejtat që u takojnë. Për zgjidhjen me drejtësi të problemeve ata duhet të bisedojnë qetësisht, me gjakftohtësi dhe në barazi me popullsinë shqiptare në Jugosllavi.

Republika Popullore Socialiste e Shqipërisë i ka kushtuar një kujdes të veçantë forcimit të marrëdhënieve miqësore me Greqinë Vitet e fundit këto marrëdhënie kanë marrë një zhvillim të mëtejshëm në të gjitha fushat. Shkëmbimet tregtare janë zgjeruar dhe po zhvillohen me sukses në dobi të të dy palëve. Bashkëpunimi në fushën e kulturës, vajtja e ardhja e grupeve artistike, vizitat reciproke të njerëzve të artit, arsimit e të shkencës kanë ndihmuar që popujt tanë të njihen edhe më mirë me arritjet dhe përparimet e njëri-tjetrit. Atë i kanë shërbyer forcimit të miqësisë së lashtë e tradicionale që lidh dy vendet tona. E bindur se marrëdhëniet e miqësisë e të mirëkuptimit midis Shqipërisë e Greqisë u përgjigjen plotësisht interesave dhe aspiratave të përbashkëta të popujve tanë, RPS e Shqipërisë edhe në të ardhmen do të bëjë të gjitha përpjekjet për zgjerimin dhe zhvillimin e tyre.

Konstatojmë me kënaqësi se edhe qeveria greke e populli grek janë të predispozuar dhe dëshirojnë që marrëdhëniet midis dy vendeve tona të ecin përpara mbi bazën e miqësisë e të fqinjësisë së mirë. Ndjentat e popullit shqiptar e të popullit grek puqen në shumë drej-

time, ata i duan të mirën dhe gëzohen për përparimet e njëri-tjetrit, duke u nisur nga parimi se secili është zot në shtëpinë e tij e në punën e vet. Miqësia midis popullit shqiptar e popullit grek është një miqësi e qëndrueshme, ajo do të forcohet e do të lulëzojë vazhdimisht për të mirën e popujve tanë, të paqes dhe të sigurisë në Ballkan. Orvatjet e kujtdo qoftë për të futur pyka në këtë miqësi do të dështojnë. Ne kemi bindjen se tani janë krijuar kushtet dhe mundësitë që, me përpjekje të përbashkëta, të mënjanohet çdo pengesë dhe t'i hapet rrugë e gjerë zhvillimit të marrëdhënieve të frytshme e me përfitim reciprok ndërmjet dy vendeve tona mike.

Me Italinë ne jemi të gatshëm të punojmë për zhvillimin e mëtejshëm të marrëdhënieve normale në përputhje me aspiratat dhe interesat e të dy popujve tanë fqinjë. Në fusha të ndryshme, siç janë ato të tregtisë, të transportit, të shkëmbimeve kulturore etj., ndërmjet Shqipërisë e Italisë kanë ekzistuar lidhje të shumta. Popujt tanë kanë dëshiruar gjithnjë të rojnë në paqe e në miqësi me njëri-tjetrin. Megjithëse rrugët e historisë, disa herë, i kanë ndarë e armiqësuar, ata janë përpjekur të afrohen, të bashkëpunojnë dhe të forcojnë atmosferën e besimit dhe të mirëkuptimit reciprok.

Mundësitë për përparimin e mëtejshëm të marrëdhënieve shqiptaro-italiane ekzistojnë. Dëshira jonë është që të ecet në rrugë të mbarë, por kjo varet edhe nga predispozicioni dhe interesimi i palës italiane për të bashkëpunuar me Shqipërinë në një frymë të re, në miqësi e barazi të plotë.

Marrëdhëniet e vendit tonë me Republikën e Turqisë janë zhvilluar e po zhvillohen gjithnjë e më tepër në frymën e miqësisë dhe të bashkëpunimit. Dashamirësia dhe respekti në rritje midis dy popujve dhe vendeve tona krijojnë një bazë të mirë për zgjerimin dhe forcimin e tyre të mëtejshëm në të ardhmen.

Populli shqiptar dhe populli turk gjatë historisë së tyre kanë pasur lidhje miqësore e afinitet me njëri-tjetrin. Populli turk, me një histori dhe kulturë të lashtë, ka pasur respekt të madh për trimat e Shqipërisë, për dijetarët, filozofët, burrat e shtetit, arkitektët, shkrimtarët dhe poetët shqiptarë ose me origjinë shqiptare, të cilët kanë dhënë kontributin e tyre në përpjekjet përparimtare të popullit turk.

Populli shqiptar ka një admirim dhe respekt të veçantë për Mustafa Qemal Ataturkun, këtë personalitet e burrë shteti të shquar, i cili me kurajë të madhe i frymëzuar nga mendimi demokratik përparimtar, e çliroi Turqinë dhe popullin e saj trim nga kompleksi robëruar ndaj popujve të tjerë i perandorisë së sulltanëve, konsolidoi unitetin dhe pavarësinë e vërtetë të kombit turk, e futi Turqinë në rrugën e demokracisë e të progresit.

Populli shqiptar ka njohur ndjenjat e dashamirësisë së Qemal Ataturkut për Shqipërinë, i cili iu kundërvu mbretit Zog, tiran i popullit shqiptar.

Miqësia e singertë e popullit turk ndaj popullit shqiptar dhe fry-

mëzimi i lartë i Ataturkut duket aq qartë në strehimin vëllazëror të qindra mijëra vëllazërve tanë kosovarë, që u dëbuan nga tokat e tyre në Jugosllavi. Ne e falënderojmë popullin vëlla turk për këtë dhe për miqësinë e tij ndaj popullit shqiptar, miqësi që është reciproke.

Në marrëdhëniet miqësore të vendit tonë me Republikën Franceze janë shënuar hapa të rinj pozitivë. Ne vlerësojmë përpjekjet e dashamirëve gjithnjë e më të shumtë të Shqipërisë në Francë për forcimin e miqësisë midis dy popujve tanë. Edhe populli shqiptar ushqen ndjenja miqësore dhe ka respekt për popullin e talentuar francez, për traditat revolucionare dhe përparimet e tij.

Ashtu si edhe në të kaluarën ne dëshirojmë sinqerisht që marrëdhëniet e shtetit tonë me Austrinë, Suedinë, Finlandën, Norvegjinë, Danimarkën, Zvicrën, Belgjikën, Holandën, Portugalinë të zhvillohen e të zgjerohen akoma më tej në drejtimin pozitiv e miqësor që kanë marrë vitet e fundit.

Qeveritë angleze të pasluftës së Dytë Botërore ndaj Shqipërisë së re kanë mbajtur qëndrime armiqësore dhe antidemokratike. Përveç kësaj, ato rrëmbyen arin shqiptar, të grabitur nga hitlerianët, dhe akoma sot e shfrytëzojnë në interesin e tyre, duke mos ia kthyer asaj që i përket, Shqipërisë socialiste.

A mund të flitet në këto rrethana për marrëdhënie diplomatike ndërmjet Republikës Popullore Socialiste të Shqipërisë dhe Anglisë? Qeveria angleze duhet t'i kthejë menjëherë arin Shqipërisë bashkë me interesat që i përkasin nga shfrytëzimi arbitrar i tij. Shqipëria socialiste, askush të mos dyshojë, do të mbrojë interesat e saj dhe do të luftojë kundër padrejtësive që i janë bërë dhe që po i bëhen.

Ndërmjet Republikës Popullore Socialiste të Shqipërisë dhe Republikës Federale të Gjermanisë nuk ekzistojnë pengesa të pakapërcyeshme për vendosjen e marrëdhënieve diplomatike. Ne besojmë se, me një mirëkuptim nga ana e të dy palëve për disa çështje të mbetura pezull që nga Lufta e Dytë Botërore, kjo gjendje mund të rregullohet.

Me vendet e Evropës Lindore janë të njohura mosmarrëveshjet e thella parimore, ideologjike e politike, të Partisë e të shtetit tonë. Pa hequr dorë nga lufta kundër revizionizmit modern, ne jemi për zhvillimin normal të marrëdhënieve me Rumaninë, Çekoslovakinë, Poloninë, Republikën Demokratike Gjermane, Bullgarinë e Hungarinë, për shkëmbime tregtare mbi bazën e barazisë dhe të leverdisë reciproke.

Me popujt vëllazër arabë popullin shqiptar e lidh një miqësi e singertë dhe e lashtë. Ne kemi mbështetur e do të mbështetim deri në fund dhe energjikisht luftën e drejtë të popujve arabë për çlirimin e territoreve të pushtuara nga agresorët sionistë izraelitë dhe rivendosjen e të gjitha të drejtave të ligjshme të popullit martir palestinez. Te Republika Popullore Socialiste e Shqipërisë dhe te populli shqiptar, populli heroik palestinez dhe përfaqësuesja e tij e ligjshme, Organizata për Çlirimin e Palestinës, kanë pasur e do të kenë vazhdimisht miq të singertë dhe mbrojtës të vendosur të çështjes së tyre të drejtë kombëtare.

Ne konstatojmë me kënaqësi të veçantë zhvillimin miqësor të marrëdhënieve të vendit tonë me Algjerinë, me Sirinë, Irakun, Libinë, Libanin, Tunizinë, Egjiptin dhe vende të tjera arabe. Ne dëshirojmë që këto marrëdhënie të gjejnë një konkretizim dhe zhvillim të mëtejshëm. Gjithashtu Republika Popullore Socialiste e Shqipërisë është për marrëdhënie miqësore me Republikën Islamike të Iranit dhe nuk do t'i kursejë përpjekjet për zhvillimin e forcimin e tyre.

Populli shqiptar dhe qeveria e tij kanë përshëndetur e përkrahur luftën e drejtë të popujve afrikanë për të shkukur nga rrënjët kolonializmin dhe racizmin nga kontinenti i Afrikës dhe kanë mbështetur përpjekjet e popujve e të vendeve liridashëse afrikane për t'i bërë ballë politikës dhe veprimtarisë agresive, neokolonialiste e grabitqare të imperializmit. Me Tanzaninë, me Gvinën, Malin, Zambian, Zimbabven dhe me shtete të tjera mike të Afrikës, Republika Popullore Socialiste e Shqipërisë mban marrëdhënie miqësore dhe është për zhvillimin e tyre të mëtejshëm.

Vendi ynë ka marrëdhënie të mira edhe me një numër vendesh të Azisë. Me Republikën Socialiste të Vietnamit, me Laosin, me Republikën Demokratike Popullore të Koresë marrëdhëniet tona zhvillohen në rrugë miqësore dhe shprehim dëshirën tonë që në të ardhmen ato të forcohen më tej.

Për sa i përket Kamboxhias, Partia dhe shteti ynë kanë dënuar veprimet gjakatare të klikës së Pol Potit, vegël e socialimperialistëve kinezë. Ne i urojmë popullit kamboxhian të kapërcejë sa më parë vështirësitë me të cilat ndeshet dhe në liri të plotë e pa asnjë «kujdes-tari» të vendosë vetë për fatin dhe të ardhmen e tij.

Tashmë është botërisht e njohur se midis vendit tonë dhe Kinës, përveç marrëdhënieve formale diplomatike, nuk ekziston asnjë marrëdhënie tjetër konkrete. Kjo gjendje është krijuar jo për fajin tonë. Ajo është pasojë e politikës dhe e veprimtarisë armiqësore antishqiptare të udhëheqjes kineze.

Vendosja e marrëdhënieve diplomatike me Japoninë krijon kushte dhe hap rrugën edhe për zhvillimin e tregtisë midis dy vendeve.

Republika Popullore Socialiste e Shqipërisë ka marrëdhënie normale me Meksikën, Perunë, Argjentinën, Panamanë dhe me vende të tjera të Amerikës Latine. Ajo është e gatshme të vendosë marrëdhënie të tilla edhe me shtete të tjera të këtij kontinenti që janë për një afrim miqësor dhe për shkëmbime tregtare e kulturore me vendin tonë.

Me Shtetet e Bashkuara të Amerikës dhe me Bashkimin Sovjetik, që janë armiqtë më të egër të lirisë e të pavarësisë së popujve, të paqes e të sigurisë në botë, vendi ynë nuk mban e nuk do të mbajë asnjë marrëdhënie. Ashtu si edhe në të kaluarën, ne do të vazhdojmë kurdoherë me vendosmëri luftën për demaskimin e politikës dhe të veprimtarisë së tyre agresive e hegjemoniste.

Republika Popullore Socialiste e Shqipërisë edhe në të ardhmen do të punojë për zhvillimin në drejtim pozitiv të marrëdhënieve ndërkombëtare. Në këtë frymë ajo nuk do të kursejë përpjekjet që edhe në Organizatën e Kombeve të Bashkuara dhe në organizata të tjera ndër-

kombëtare të japë kontributin e saj për mbrojtjen e interesave dhe të aspiratave të popujve.

Politika e jashtme parimore e ndjekur nga Partia dhe vendi ynë shpreh aspiratat e popullit shqiptar dhe gëzon përkrahjen e mbështetjen e tij të plotë e të pakufishme. Partia edhe në të ardhmen do të luftojë për zbatimin me konsekuencë e me vendosmëri të kësaj politike që i siguron popullit lirinë, pavarësinë dhe sovranitetin kombëtar.

V

**LUFTA KUNDËR REVIZIONIZMIT
DHE LËVIZJA REVOLUCIONARE E ÇLIRIMTARE
NË ETAPËN E SOTME**

Në periudhën që na ndan nga Kongresi i 7-të, Partia jonë, duke i qëndruar si kurdoherë besnike marksizëm-leninizmit e internacionalizmit proletar, ka vazhduar pa ndërprerje luftën kundër revizionizmit modern. Është thelluar kritika ideologjike e politike kundër revizionizmit hrushovian, kinez, atij jugosllav e evropianoperëndimor, janë evidentuar në mënyrë më të plotë kushtet historike e social-ekonomike të lindjes e të përhapjes së këtyre rrymave, është analizuar më gjerë procesi i degjenerimit të atyre partive komuniste që u futën në rrugën e revizionizmit, gabimet e lëshimet e tyre në strategji e në taktikë. Në dritën e fakteve, nga e kaluara dhe nga e sotmja është argumentuar lidhja e revizionizmit modern me strategjinë që adoptoi imperializmi pas Luftës së Dytë Botërore për shkatërrimin e socializmit dhe shtypjen e revolucionit e të lëvizjes çlirimtare të popujve.

Këto analiza e konkluzione i kanë shërbyer Partisë për të njohur më mirë rreziqet që kërcënojnë socializmin e diktaturën e proletariatit në vendin tonë nga revizionizmi dhe për të marrë masat më efektive e më të përshtatshme për t'i shmangur këto rreziqe. Ato i kanë shërbyer gjithashtu edukimit të komunistëve e të masave, ngritjes teorike dhe kalitjes së ndërgjegjes së tyre revolucionare. Njohja më e thellë e strategjisë dhe e taktikave të imperializmit e të revizionizmit e ka bërë edhe më efektive luftën tonë për mbrojtjen e çështjes së proletariatit e të popujve.

Drejtesia e rrugës që zgjodhi që në fillim Partia jonë për t'iu kundërvënë revizionizmit dhe për ta luftuar atë deri në fund, është vërtetuar e po vërtetohet çdo ditë e më tepër nga degjenerimi politik dhe kriza e thellë ideologjike e revizionizmit modern, nga gjendja e rëndë ekonomike dhe qorrsoakaku ku janë futur partitë revizioniste dhe vendet ku ato janë në fuqi.

Kur Partia jonë filloi luftën kundër revizionizmit hrushovian, partitë komuniste që u bashkuan me Hrushovin paraqiteshin pak a shu më si një bllok i tërë, me një vijë të vetme, që ishte ajo e Kongresit të 20-të të Partisë Komuniste të Bashkimit Sovjetik. Por sot, pas 20

vjetësh, ato janë përçarë e ndarë në rryma e fraksione të shumta, ndodhen në luftë e në përlëshje me njëra-tjetrën, i ka mbytur nacionalizmi borgjez dhe oportunizmi socialdemokrat. Këto parti ish-komuniste ose janë shndërruar në parti të mirëfillta të borgjezisë së re sunduese në vendet ku janë në fuqi revizionistët, ose janë kthyer në pjesë përbërëse të strukturave të shtetit borgjez, siç ka ndodhur në vendet e vjetra kapitaliste. Kriza e revizionizmit modern është shprehje e drejtpërdrejtë e krizës së kapitalizmit dhe të ideologjisë borgjeze në përgjithësi.

Tradhtia revizioniste, restaurimi i kapitalizmit në një varg vendesh ish-socialiste kanë krijuar një konfuzion të madh rreth problemit të socializmit, i cili është në qendër të luftës ideologjike që zhvillohet sot në botë. Çështja është se shoqërinë kapitaliste të rivendosur në vendet e tyre revizionistët e paraqesin si një shoqëri të kulluar socialiste, si një «socializëm real» «të zhvilluar» e bile «shumë të zhvilluar». Ky konfuzion shtohet edhe më tepër ngaqë për socializmin flasin edhe shumë parti e forca të ndryshme politike, të cilat janë larg socializmit shkenor, si dhe nga përpjekjet që bën borgjezia e propaganda e saj për të deformuar idealet e vërteta socialiste, për të larguar masat nga lufta për triumfin e tyre.

Qartësia për këtë çështje, vënia e një kufiri të prerë ndërmjet socializmit të vërtetë e pseudosocializmit është me rëndësi kapitale për zhvillimin me sukses të luftës së klasës punëtore e të masave punonjëse. Pa pasur një përfytyrim të qartë për shoqërinë socialiste, pa iu përmbytur parimeve dhe ligjeve të përgjithshme të saj, revolucioni mbetet në mes të rrugës. Revolucioni edhe mund të kryhet, por kur mungon perspektiva e vërtetë socialiste, ai mund të devijojë dhe lufta e sakrificat e bëra për triumfin e tij të shkojnë dëm.

Korrenti i parë i revizionizmit në pushtet, që i vuri vetes për detyrë të minonte socializmin, ishte revizionizmi jugosllav, që lindi në një moment kyç të luftës midis socializmit e imperializmit.

Revizionizmi jugosllav i ka rrënjët të thella. Ai nuk u shfaq në vitin 1948 dhe nuk erdhi, si reaktion kundër «stalinizmit» e as si rrjedhim i veprimeve të Informbyrosë. Ai është rrjedhim i botëkuptimeve borgjeze që kanë ekzistuar edhe më parë në Partinë Komuniste të Jugosllavisë e që nuk u zhdukën gjatë luftës nacionalçlirimtare.

Jugosllavia e re nuk mund të ndërtohej pa një orientim të qartë e pa një pjekuri politike të bazuar në teorinë shkencore të socializmit. Këta vepër të madhe mund ta kryente vetëm një parti komuniste e fortë dhe me parime të shëndosha marksiste-leniniste. Vërtet ekzistonte një parti komuniste në Jugosllavi, por ajo nuk i kishte plotësisht këto tipare, as i fitoi gjatë kohës së luftës. Përkundrazi, edhe ato që kishte, i humbi pas luftës, kur nga rrethanat ishte e thirrur të ndërtonte Jugosllavinë e re në rrugën socialiste.

Po të dëgjosh vetëlavdërimet e titistëve dhe të borgjezisë jugosllave, mund të besosh se një parti e tillë ka ekzistuar dhe ekziston. Në këtë gjykim euforik, ashtu si edhe të tjerët, ramë edhe ne, komunistët shqipëtarë, veçanërisht gjatë kohës së luftës dhe në vitet e para të pasqirimit.

Ky gjykim kishte logjikën e vet, lidhej me luftën heroike të popujve të Jugosllavisë, që udhëhiqej nga Partia Komuniste.

Pas çlirimit të Jugosllavisë, si në teori, si në qëndrimet politike, ashtu edhe në ndërtimin e socializmit u dukën shmangie të mëdha nga parimet bazë të marksizëm-leninizmit. Gjithashtu në marrëdhëniet me vendet socialiste, veçanërisht me Shqipërinë, nga ana e Partisë Komuniste të Jugosllavisë u vunë re devijime të rënda, një arrogancë e një mendjemadhësi e huaj për një parti komuniste.

Ishte e qartë se kjo rrugë do të përfundonte në çarje, siç ndodhi, jo për fajin e Byrosë Informative, as të Stalinit dhe as të «stalinizmit», si kurse duan ta cilësojnë marksizëm-leninizmin revizionistët jugosllavë dhe miqtë e tyre. Konflikti me Informbyronë ishte rezultat i kontradiktave ndërmjet pikëpamjeve liberale-oportuniste të udhëheqjes jugosllave dhe pikëpamjeve marksiste-leniniste mbi ndërtimin e shtetit dhe të shoqërisë socialiste. Kundërshtimit të teorisë marksiste-leniniste Titoja dhe shokët e tij i dhanë ngjyrën e kundërshtimit ndaj Stalinit në fillim dhe ndaj sistemit socialist sovjetik më vonë.

Kthesa e titistëve duhej të bëhej dhe u bë. Ata morën kursin drejt kapitalizmit, duke adoptuar dhe duke i hyrë një ndërtimi «të ri» ekonomik-shoqëror dhe një forme të re qeverisjeje shtetërore, të përshtatshme me kursin antisocialist, siç ishte sistemi i «vetadministrimit punëtor». Në fakt ky nuk ishte një sistem i ri. Ai nuk ishte as socialist dhe as krijim jugosllav. Prejardhjen e vet e kishte nga prudonizmi, nga anarkizmi i Bakuninit dhe i Kropotkinit, aq shumë të demaskuar nga Marksi në kohën e vet, më vonë nga Lenini, pastaj edhe nga Stalini.

Kthesës jugosllave drejt kapitalizmit iu bë një reklamë e shfrenuar, një hosanë e papërshtatshme dhe «Barabait» një lavdë e madhe. Deviacioni jugosllav u trumbetua si një «periudhë e re», si një «brazdë e re», e çarë nga Titoja për ndërtimin e një «socializmi specifik», «human». Kjo kthesë u mbështet dhe u financua nga imperializmi dhe kapitalizmi botëror. U fry megalomania panjugosllave dhe Jugosllavia u paraqit si «kampione dhe shembull për popujt e botës në luftën e tyre çlirimtare».

I gjithë «sistemi vetadministrues» në formë dhe në emërtimet e strukturës e të superstrukturës, duhej të tregohet se ishte «marksist». Por në të vërtetë ai ishte krejt në kundërshtim me Marksian dhe me teorinë e praktikën e leninizmit.

Goditja e parë iu dha pushtetit të demokracisë popullore, që ishte një formë e diktaturës së proletarietit dhe që në Jugosllavi nuk e cilësuan kurrë si të tillë. Këtë revizionistët jugosllavë e justifikuan duke pretenduar se pushteti i këshillave popullore, që u vendos gjatë luftës dhe jetoi deri në vitin 1948, nuk mund të ruhej më si i tillë me të gjitha prerogativat e tij. Ai duhej zëvendësuar me «këshillat e punëtorëve», pse, sipas tyre, i pari ishte gjoja etatist-burokratik, që lind «burokracinë dhe shtresën e borgjezisë së re», kurse «këshillat e punëtorëve» ishin një pushtet më i afërt me teorinë e Marksit. Nëpërmjet tyre gjoja «janë vetë punëtorët që drejtojnë dhe qeverisin drejtpërdrejt» pa

ndërmjetësinë e shtetit që, sipas logjikës së udhëheqjes jugosllave, duhet të rezultojë se nuk është i tyre. Shteti aktual jugosllav mbetet, pra, vetëm një «garant» që ky «sistem i ri» të mos preket, të mos shkoqet dhe për këtë Federata mban në duart e veta ushtrinë, UDB-në, politikën e jashtme dhe asgjë tjetër.

Pra, «sistemi i vetadministrimit» e decentralizoi, e liberalizoi dhe e minoi pushtetin e diktaturës së proletarietit. Shteti ishte i «proletarëve» dhe u bë i «punëtorëve», ishte «i dalë nga lufta, i dalë nga baza», ndërsa «sistemi i ri», që e kërkonte gjoja zhvillimi «dialektik», u vendos nga lart, nga Titoja e Kardeli.

Roli udhëheqës i partisë në këtë sistem duhej të likuidohej dhe në fakt ai u venit. Partisë iu la vetëm njëfarë roli i shpëlarë edukues, pa asnjë zë në gjithë kapitullin. Në pamje partia nuk u zhduk, por në realitet u bë e paqenë. Atë e quajtën «Lidhja e Komunistëve», që nga emri t'ia afronin sa më shumë apelacionit të Marksit, për ta larguar në fakt sa më shumë nga roli që Marksit dhe Lenini i përcaktojnë partisë komuniste.

Titistët e paraqesin çështjen sikur Jugosllavia me «vetadministrimin» ka hyrë në një etapë zhvillimi që e afrojnë me shoqërinë komuniste. Duke u nisur nga kjo, ata pretendojnë se shteti po shkon drejt shuarjes dhe partia nuk mund të ketë më atë rol e ato funksione që kishte në periudhën e kalimit nga kapitalizmi në socializëm.

Jo vetëm kaq, por «vetadministrimi», sipas tyre, ka zhdukur, gjithashtu, luftën e klasave brenda në parti, brenda në Jugosllavi dhe jashtë saj. Në të vërtetë Titoja, Kardeli dhe njerëzit që i pasonin, ia ndërruan drejtimin luftës së klasave. Ata e zhvilluan dhe e zhvillojnë atë për të mbrojtur sistemin e tyre «vetadministrues» kundër «inforbyroistëve», «stalinistëve», «dogmatikëve» etj. Në të vërtetë këtu është fjala për luftën e elementëve kapitalistë kundër njerëzve revolucionarë, të sistemit kapitalist kundër sistemit socialist, të ideologjisë borgjeze kundër marksizëm-leninizmit.

Teoricienët jugosllavë bëjnë spekulime të mëdha lidhur me pronën mbi mjetet e prodhimit. Sipas tyre, prona e shoqërizuar mbi mjetet e prodhimit që ekziston në sistemin «vetadministrues», përbën formën më të lartë të pronës socialiste, ndërsa prona shtetërore formën më të ulët të saj. Kjo e fundit, pretendojnë ata, mund të përcaktohet si një lloj kapitalizmi shtetëror nga ku lind një kastë e re burokratike, që në fakt disponon në mënyrë kolektive të drejtën mbi pronën. Pra prona shtetërore edhe në socializëm, konkludojnë ata, nuk e zhduk tjetërsimin e punëtorit që bëhet nga kapitali. Raporti kapitalist fitime-rroga e punëtorit zëvendësohet me raportin akumulacion shtetëror-rroga e punëtorit. Me fjalë të tjera, sipas tyre, në të dy sistemet shoqërore punëtori mbetet kurdoherë rrogëtar.

Kjo është një tezë e njohur trockiste, e demaskuar dhe e hedhur poshtë prej kohësh. Në shoqërinë e vërtetë socialiste, ku prona e përbashkët drejtohet nga shteti i diktaturës së proletarietit me pjesëmarrjen e gjerë, të organizuar dhe efektive të klasës punëtore e të masave të tjera punonjëse, sipas parimit të centralizmit demokratik, dhe

ku në shpërndarjen e produktit shoqëror nuk lejohen diferencime të mëdha që çojnë në krijimin e shtresave të privilegjuara, punëtori nuk është rrogëtar, ai nuk shfrytëzohet. Provë për këtë është realiteti i Shoqërisë socialiste, ku klasa punëtore është klasë në fuqi, që, nën udhëheqjen e Partisë së saj marksiste-leniniste drejton ekonominë dhe tërë jetën e vendit në interes të saj dhe të mbarë popullit.

«Vetadministrimi» jugosllav, i cili gjoja vë në qendër punëtorin, vetëm në teori ka emrin punëtor; në praktikë ai është antipunëtor, është antisocialist. Ky sistem, pavarësisht nga zhurma që bëjnë titistët, nuk e lejon klasën punëtore as të drejtojë, as të administrojë.

Në Jugosllavi çdo ndërmarrje «vetadministruese» është një organizatë e mbyllur në aktivitetin e saj ekonomik, ndërsa politika e administrimit është në duart e grupit udhëheqës të saj, i cili, njëlloj si në çdo vend tjetër kapitalist, manipulon fondet e akumulimit, vendos për investimet, rrogat, çmimet dhe shpërndarjen e prodhimit. Pretendohet se i gjithë ky veprim ekonomik-politik aprovohet nga punëtorët nëpërmjet të deleguarve të tyre. Por ky është një mashtrim e një bluf i madh. Këta të ashtuquajtur të deleguar të punëtorëve bëjnë kauzë të përbashkët me kastën e burokratëve dhe të teknokratëve në fuqi në punë të klasës punëtore e të masave të tjera punonjëse. Janë administratorët profesionistë ata që bëjnë ligjin dhe përcaktojnë politikën në organizatën «vetadministruese» që nga baza deri lart në republikë. Roli drejtues, administrativ, ekonomik-shoqëror dhe politik i punëtorëve, i klasës së tyre është reduktuar në minimum, për të mos thënë është zhdukur fare.

Duke nxitur partikularizmin e lokalizmin, nga ai republikan në atë krahinor e deri në komunë, «sistemi vetadministrues», ka likuiduar unitetin e klasës punëtore, i ka vënë punëtorët në luftë me njëri-tjetrin, si individë, duke ushqyer egoizmin, dhe si kolektiv, duke ushqyer konkurrencën ndërmjet ndërmarrjeve. Mbi këtë bazë është minuar edhe aleanca e klasës punëtore me fshatarësinë, e cila gjithashtu është e copëtuar në ekonomi të vogla private dhe shfrytëzohet nga borgjezia e re në fuqi. E gjithë kjo ka krijuar autarkinë në ekonomi, anarkinë në prodhim, në shpërndarjen e fitimeve dhe të investimeve; në treg, në çmimet ajo ka çuar në inflacion e në papunësi të madhe.

Qenia e klasës punëtore në udhëheqjen e sistemit «vetadministrues punëtor» në Jugosllavi, është një iluzion i rremë, një utopi. Në këtë sistem klasa punëtore nuk është në drejtim, nuk është heqemone. Diktatura e proletarietit është likuiduar, udhëheqja e klasës punëtore, partia komuniste, ose siç quhet në këtë vend Lidhja e Komunistëve, nuk drejton as pushtetin, as ekonominë, as kulturën, as jetën shoqërore.

Në këtë sistem rrënuje të përgjithshme dikush tjetër i ka marrë pozitën dominuese e drejtuese politike. Kjo është kasta e re e burokratëve politikë dhe e teknokratëve, e dalë nga shtresa e inteligjencisë së borgjezuar dhe e aristokracisë punëtore. Ajo është larg çdo morali proletar dhe mbi të nuk ushtrohet asnjë kontroll politik.

Kjo shtresë e re burokratike vetëtrumbetohet si armike e burokracisë etatiste, kurse ajo është një burokraci akoma më e rrezikshme, që

lulëzon e forcohet në një sistem ekonomik të decentralizuar, i cili ruan dhe zhvillon pronën private.

«Vetadministrimi punëtor», që ka në themel të tij ideologjinë e anarkosindikalizmit, ka pjellë nacionalizmin republikan, që ka hartuar deri edhe ligje e rregullore të veçanta për të mbrojtur interesat e veta të ngushta. Monopoli ekonomik i republikave, që përbëhet nga monopoli i ndërmarrjeve dhe i trusteve të tyre, është kthyer në fakt në një fuqi politike dhe në një nacionalizëm republikan, që shfaqet jo vetëm në çdo republikë, por në çdo krahinë, në çdo komunë, në çdo ndërmarrje. Cilido, si individ, si grup, si republikë, përpiqet si e si të pasurohet më shumë dhe më shpejt në kurriz të tjetrit.

Nacionalizmi borgjez është shtruar pajdash në Jugosllavi dhe parulla «bashkim-vëllazërimi», që ishte e drejtë gjatë luftës nacionalçlirimtare, kur luftohej kundër pushtuesve dhe reaksionit të vendit për një shoqëri të re të bazuar në marksizëm-leninizmin, në sistemin aktual jugosllav, i cili përçan e shpërndan çdo gjë, ka mbetur një parullë boshe e pa asnjë efekt. «Bashkim-vëllazërimi» i popujve, i kombeve dhe i kombësive, i republikave dhe i krahinave mund të realizohet vetëm në një sistem të vërtetë socialist, që udhëhiqet nga ideologjia marksiste-leniniste.

Bashkimi federativ jugosllav nuk u krijua mbi baza marksiste-leniniste, prandaj, pa asnjë dyshim, do të lindnin, siç lindën, antagonizmat nacionalë. Vetë sistemi i bart këto kontradikta, ushqen separatizmin e kombeve dhe të kombësive, të republikave dhe të krahinave.

Edhe kreditë e shumta të kapitalizmit botëror vepruan në këtë drejtim. Përdorimi i tyre për të kënaqur gustot dhe kapriçot borgjeze e megalomane të kastës në fuqi, shpërndarja e pabarabartë dhe pa kritere të shëndosha midis republikave të ndryshme, krijoi disnivele ekonomike dhe shoqërore në republikat e në krahinat, çka i thellon më tej antagonizmat nacionalë.

Sistemi i «vetadministrimit» nuk do të kishte pasur jetë të gjatë po të mos e kishin ndihmuar dy faktorë: antisovjetizmi i udhëheqjes jugosllave, që nuk ishte tjetër veçse antimarksizmi e antileninizmi i saj, me të cilin ajo siguroi përkrahjen politike të tërë reaksionit botëror dhe mbështetja ekonomike me anë kredish të mëdha e të gjithanshme nga vendet kapitaliste. Por, megjithëkëtë, këta dy faktorë nuk mundën ta shpëtonin këtë sistem antisocialist. Përkundrazi, ata e dobësuan më tej atë dhe e shtynë drejt falimentimit ekonomik dhe politik.

Fajin për dështimin e këtij sistemi dhe për të gjitha të këqijat që lindën prej tij, Kardeli me Titon ia hidhnin «mosperfeksionimit» sa duhet të vetë sistemit, ndërgjegjes së punonjësve «që nuk ishte ngritur akoma sa duhet», ekzistencës së burokracisë etj. Ata e panë falimentimin e sistemit të tyre antisocialist, por nuk mundën të tërhiqeshin dot prapa. Prandaj janë paliative edhe të gjitha masat që mori Titoja, që kur ishte gjallë, për drejtimin e Federatës e të republikave pas vdekjes së tij. Bashkë me Titon e Kardelin u zhdruk edhe euforia për sistemin «vetadministrues». Pasardhësit e Titos ndodhen në një konfuzion e çoroditje të madhe dhe nuk dinë nga të kapen për të dalë nga si-

tuatat e vështira në të cilat gjendet vendi i tyre. Tash Jugosllavia titiste ka hyrë në një krizë të rëndë e të përgjithshme të strukturave e të superstrukturave të saj, në një krizë ekonomike e politiko-morale.

Revizionizmi sovjetik ka qenë dhe mbetet rryma më e rrezikshme e revizionizmit modern. Ai ruan më shumë se çdo variant tjetër revizionist maskat socialiste e frazeologjinë leniniste për të mbuluar realitetin e sotëm kapitalist në Bashkimin Sovjetik dhe politikën e tij të jashtme imperialiste e agresive. Ai është një revizionizëm që ka marrë pushtetin në një shtet i cili përfaqëson një fuqi të madhe dhe që ka mjete e mundësi të shumta të ushtrisë ndikimin e tij në botë, të veprave në shumë drejtime e në përpjesëtime të mëdha.

Ashtu si korrentet e tjera revizioniste, edhe revizionizmi hrushovian ka procesin e tij të lindjes e të zhvillimit, derisa arriti në formën e sotme të një revizionizmi të plotë, që deformat të gjitha çështjet e teorisë marksiste e të praktikës socialiste. Si një fenomen shoqëror, edhe revizionizmi hrushovian ka rrënjët e shkaqet e tij ideologjike, shoqërore e historike.

Partia e Punës e Shqipërisë u ka bërë një analizë të thellë marksiste këtyre shkaqeve. Nga kjo analizë ajo ka nxjerrë konkluzione dhe ka marrë një varg masash për t'i mbyllur shtigjet lindjes së një fenomeni të tillë regresiv në vendin tonë. Por në këtë problem ne duhet të thellohemi vazhdimisht, me qëllim që revizionizmi kurrë të mos kalojë në Shqipëri.

Grupi i Hrushovit qysh në fillim i vuri vetes si qëllim kryesor të likuidonte diktaturën e proletarietit, të minonte bazat e shoqërisë socialiste, ta fuste Bashkimin Sovjetik në rrugën kapitaliste dhe ta kthente atë në një superfuqi imperialiste. Tani të gjithë e shohim këtë transformim të madh kundërrivolucionar që ka ndodhur në Bashkimin Sovjetik. Vetëm borgjezia dhe imperializmi e reklamojnë atë si vend komunist. Duke e paraqitur Bashkimin e sotëm Sovjetik kapitalist si vend socialist, ata duan të diskreditojnë marksizëm-leninizmin dhe socializmin e vërtetë.

Revizionizmi hrushovian është ideologjia dhe politika e kapitalizmit shtetëror që sundon në tërë jetën e vendit. Kthimi në kapitalizëm i Bashkimit Sovjetik nuk mund të mos kishte veçoritë e veta dhe rendi kapitalist këtu nuk mund të mos merrte forma të posaçme. Këto veçori e forma përcaktohen nga fakti se atje kapitalizmi u rivendos si rezultat i përmbysjes së socializmit, si një proces regresiv, ndryshe nga kapitalizmi i tipit klasik që vjen pas përmbysjes së rendit feudal, si një proces progresiv.

Veçoria themelore e këtij lloji kapitalizmi është se këtu ruhen shumë forma socialiste të pronës, të organizimit e të drejtimit, por përmbajtja e tyre ka ndryshuar rrënjësisht. Mjetet e prodhimit sot në Bashkimin Sovjetik janë në fakt pronë kapitaliste, shtetërore ose kolektive, sepse përdoren në interes të klasës së re borgjeze që është në fuqi, sepse është pikërisht kjo klasë që përveçson punën e punëtorëve e të fshatarëve.

Ligjet, traditat dhe praktikat e vjetra u zëvendësuan me të reja, që i lënë burokracisë shtetërore e asaj të partisë dorë të lirë për të

shprehur e zbatuar pa pengesë vullnetin e vet. Kompetencat e reja që u morën nga ajo në bazë të reformave ekonomike, u përdorën për të siguruar e zgjeruar të ardhurat e privilegjet e kastave të ndryshme drejtuese, për të ruajtur pushtetin e për t'u mbrojtur nga pakënaqësitë e revoltat e klasës punëtore dhe të masave punonjëse.

Vërtet mbeti prona shtetërore dhe fabrikat nuk iu shpërndanë privatëve, kolkozet mbetën ekonomi kolektive të përbashkëta dhe bankat nuk iu dhanë aksionistëve, por ajo që ndryshoi ishte shpërndarja e produktit shoqëror, destinacioni i tij.

Ndonëse thuhet se zbatohet parimi i shpërblimit sipas punës, në realitet grupet e ndryshme të borgjezisë së re përvetësojnë mbivlerën e krijuar nga punëtorët e fshatarët. Gjithë kjo grabitje paraqitet si një lloj stimulimi material, gjoja për nxitjen e veprimtarisë prodhuese, të punës shkencore e të krijimtarisë artistike etj. Në të vërtetë ky është një shfrytëzim tipik kapitalist.

Për t'i hapur rrugën rivendosjes së kapitalizmit, revizionistët hrushovianë goditën tezat themelore të teorisë marksiste-leniniste mbi prodhimin e mallrave dhe veprimin e ligjit të vlerës në socializëm. Në teori dhe në praktikë ata identifikuan prodhimin socialist të mallit me prodhimin kapitalist. Mbi këtë bazë ata reformuan gjithë mekanizmin ekonomik. Gradualisht ndërmarrjet ekonomike, por edhe mjaft institucione kaluan në një pavarësi më të madhe nga plani shtetëror. Drejtuesve të ndërmarrjeve e të institucioneve të ndryshme u janë dhënë të drejta e fuqi të mëdha për të drejtuar dhe manipuluar prodhimin dhe shpërndarjen, për të marrë në punë dhe për të pushuar nga puna, për të ndarë fitimet etj. U kufizua financimi i centralizuar shtetëror për ndërmarrjet ekzistuese dhe u zgjerua gradualisht përdorimi i vetëfinancimit dhe i kreditit.

Revizionistët sovjetikë pretendojnë se ekonomia e tyre drejtohet e zhvillohet në bazë të planeve që hartohen gjoja sipas parimit të centralizmit demokratik. Mirëpo plani shtetëror, ashtu siç e konceptojnë në teori dhe siç e zbatojnë ata në praktikë, nuk është dhe nuk mund të jetë në asnjë mënyrë një plan i një ekonomie të vërtetë socialiste. Në Bashkimin Sovjetik bashkëjetojnë centralizmi burokratik i tipit monopolist me liberalizmin ekonomik të gjerë në bazë. Jepet imazhi i një drejtimi të planifikuar të ekonomisë, ndërsa në praktikë kanë fushë të lirë veprimi ligjet dhe kategoritë ekonomike të mënyrës kapitaliste të prodhimit.

Konsumi parazitar ka marrë përpjesëtime të papara. Raporti i shpërblimit midis punëtorëve e administratorëve burokratë e teknokratë të prodhimit, në bazë të pagës nominale arrin mbi 1 me 10, kurse së bashku me të ardhurat nga ndarja e fitimeve, nga shpërblimet e shumëllojshme, nga privilegjet e panumërta e të tjera, këto raporte distancohen me shifra akoma më të mëdha. Këto diferencat në paga dhe në mënyrën e jetesës zor se dallohen nga ato që ekzistojnë ndërmjet administratorëve borgjezë dhe punëtorëve në vendet e Perëndimit.

Në kushtet kur paga për vlerën e fuqisë punëtore në masën 35 deri 40 për qind formohet në mënyrë të decentralizuar nga shpërndarja e

fitimeve, kur normat e punës nuk janë unike dhe zbatohen, gjithashtu, në mënyrë të decentralizuar, kur stimuli material në favor të borgjezisë së re ka përparësi absolute dhe kur inflacioni, sidomos për shkak të militarizimit të ekonomisë, që gëlltit 1/3 e të ardhurave kombëtare, rritet vazhdimisht, shoqëria në thelb e ka humbur kontrollin e vërtetë mbi masën e punës e të konsumit, të cilët janë dy çelësa kryesorë për një ekonomi socialiste.

Këto dhe një varg masash të tjera me karakter kapitalist, që u trumbetuan si zhvillim krijues i teorisë dhe i praktikës ekonomike marksiste-leniniste, kishin si synim dhe guan në shkallmimin e bazave të ekonomisë socialiste.

Pasojat e këtij kursi duken në jetën e përditshme të popullit sovjetik. Në treg ka mungesa të artikujve të dorës së parë, është rritur inflacioni, papunësia, fluktacioni i fuqisë punëtore, vihet re ngritja e shpallur dhe e pushpallur e çmimeve të mallrave të ndryshme. Është zgjeruar sektori privat i ekonomisë, i janë hapur dyert kapitalit të huaj monopolist, lulëzojnë tregu i zi, spekulimet, shpërdorimet, rryshfetet e mashtrimet.

Realiteti i sotëm sovjetik tregon se procesi nuk shkon drejt «zhdukjes së dallimeve klasore» dhe «krijimit të një uniteti të ri social», siç propagandojnë revizionistët hrushovianë-brezhnjevanë, por drejt një diferencimi të thellë shoqëror ndërmjet klasës së re borgjeze, të përbërë nga shtresa e burokratëve dhe e teknokratëve, dhe masave të gjera punonjëse, të cilat ndodhen në pozitë e një force thjesht prodhuese. Hendeku midis tyre vjen vazhdimisht duke u thelluar sa më shumë rritet shkalla e shfrytëzimit të punonjësve dhe sa më shumë shtohen përfitimet e borgjezisë. Kjo gjendje ka krijuar edhe një ideologji e politike të tërë, që justifikon e mbron këtë sistem të ri të shfrytëzimit kapitalist.

Pushteti i sovjetëve nuk është më i sovjetëve, i punëtorëve dhe i fshatarëve. Ai është shkëputur prej tyre dhe është bërë si një forcë më vete dhe e huaj për ta. Edhe formalisht revizionistët hrushovianë e kanë shpallur të likuiduar diktaturën e proletariatit. Shtetin e kanë quajtur të të gjithë popullit për të fshehur realitetin se ai nuk është më i popullit, por një diktaturë e borgjezisë së re sovjetike. Karakteri kapitalist i tij duket qartë nga tërë politika e brendshme dhe e jashtme që ai ndjek, politikë që u shërben interesave të klasës borgjeze në fuqi. Shteti sovjetik, që ka në duart e tij mjetet kryesore të prodhimit dhe drejton tërë ekonominë, është shndërruar në një përfaqësues e mbrojtës të interesave të klasës sunduese.

Revizionistët sovjetikë, për të ruajtur maskat e tyre socialiste dhe «për të vërtetuar» se Bashkimi Sovjetik është një vend socialist, thonë se atje ka vetëm një parti, se kjo është një parti komuniste dhe se roli i saj udhëheqës është sanksionuar me kushtetutë. Fakti që ka vetëm një parti drejtuese dhe që pushteti i saj i pandarë njihet me ligj nuk e bën që ajo të jetë komuniste. Ka shumë vende borgjeze ku ka një parti të vetme sunduese. Karakterin e një partie politike nuk e përcakton pozita e saj në shtet. Karakteri i një partie përcaktohet, në radhë të

parë, nga fakti se cilës klasë i përket dhe kujt i shërben, nga ç'ideologji udhëhiqet e ç'politikë ndjek.

Partia Komuniste e Bashkimit Sovjetik aktualisht është përfaqësuesja e drejtpërdrejtë e klasës borgjeze në fuqi, ushtron pushtetin në emër të saj, i shërben zhvillimit dhe forcimit të rendit kapitalist të restauruar. Ajo vetëm emrin ka komuniste. Mbajtja e emrit komunist dhe përdorimi nga ana e saj i disa frazave marksiste e parullave socialiste kanë një karakter hipokrit e thjesht demagogjik. Kjo bën pjesë në atë propagandë mashtruese që kërkon t'i mbajë masat në errësirë dhe t'i bëjë të besojnë se jetojnë në socializëm dhe jo në një shoqëri kapitaliste, shtypëse e shfrytëzuese. Për traditë, për maskim, ose thjesht për inerci, shumë partive u kanë mbetur apelacionet «demokratike», «popullore», «socialiste» etj. në një kohë kur ato janë tipike borgjeze e reaksionare.

Politika revizioniste e kapitaliste që zbatohet në Bashkimin Sovjetik, ka ngjallur demonët e vjetër të perandorisë cariste, siç janë shtypja nacionale, antisemitizmi, racizmi sllav, misticizmi fetar ortodoks, kulti i kastave ushtarake, aristokratizmi i inteligjencies, çinovnizmi burokratik etj. Teoritë e revizionistëve sovjetikë mbi krijimin gjoja të një «bashkësie të re historike», të «popullit unik sovjetik» janë shpikur pikërisht për të fshehur këtë realitet plot kontradikta të thella sociale, klasore e nacionale.

Ajo që dominon sot në Bashkimin Sovjetik është forca e ushtrisë sovjetike. Militarizimi i sforcuar i jetës së vendit, barra e rëndë e shpenzimeve ushtarake, që kanë arritur shifra astronomike dhe po e tronditin gjithnjë e më shumë ekonominë sovjetike, deformatojnë zhvillimin e saj, varfërojnë popullin.

Rivendosja e kapitalizmit brenda vendit nuk mund të mos çonte edhe në një përmbysje të madhe në sferën e marrëdhënieve ndërkombëtare e të politikës së jashtme të partisë komuniste e të shtetit sovjetik. Revizionizmi hrushovian u shndërrua gradualisht në ideologji e politikë të superfuqisë së re imperialiste, që justifikon e mbron ekspansionin, agresionin e luftërat për vendosjen e sundimit botëror. Pjellë e kësaj ideologjie e politike janë teoritë famëkeqe të «sovrانيتit të kufizuar», të «ndarjes ndërkombëtare të punës», të «integritimit ekonomik, politik e ushtarak» të vendeve të së ashtuquajturës bashkësi socialiste, të cilat u kanë lidhur këtyre vendeve duar e këmbë, i kanë shndërruar në shtete vasale. Këto marrëdhënie Brezhnjevji në Kongresin e 26-të të PK të BS i quajti «marrëdhënie midis popujve», për të fshirë kështu çdo identitet kombëtar e shtetëror.

Për të realizuar objektivat e tij ekspansionistë e neokolonialistë, socialimperializmi sovjetik ka krijuar një teori, sipas së cilës asnjë vend nuk mund të çlirohet e të mbrohet nga imperializmi dhe të zhvillohet në mënyrë të pavarur pa ndihmën e tutelën sovjetike. Ai spekulon me parullën e «ndihmës internacionaliste» për të ndërmarrë agresione e për të grabitur pasuritë e vendeve të tjera.

Gjithë politika e jashtme ekspansioniste, hegjemoniste e agresive e Bashkimit Sovjetik socialimperialist është një provë dhe një dëshmi

tjetër se rendi sovjetik është një rend kapitalist, sepse vetëm një rend i tillë mund të ndjekë një politikë të tillë në arenën ndërkombëtare. Siç ka thënë Lenini, politika e jashtme është vazhdim i politikës së brendshme dhe të dyja së bashku janë shprehje e koncentruar e marrëdhënieve ekonomike që ekzistojnë në një vend. Maskat socialiste e komuniste që përpigën ende të ruajnë revizionistët sovjetikë, po u grisen çdo ditë përballë realitetit të tyre kapitalist e politikës socialimperialiste që ata ndjekin.

Sa do të vazhdojë të zërë vend mashtrimi i madh i popullit sovjetik se gjoja rron në socializëm, sa do të vazhdojë klasa punëtore sovjetike të jetojë me iluzione, varet nga shumë faktorë, të brendshëm e të jashtëm. Kuptimplote për situatat që i presin vendet ku sundon revizionizmi hrushovian janë ngjarjet e Polonisë. Fakt është se këtu shpërtheu konflikti klasor midis punonjësve dhe klasës borgjeze në fuqi të përfaqësuar nga partia revizioniste. Pavarësisht se si u manipulua nga forcat e djathta, në thelb revolta e klasës punëtore polake tregon se ajo u bë e ndërgjegjshme për pozitën e saj si klasë e shtypur dhe e shfrytëzuar, se pushteti ekzistues në Poloni i përket një klase antagonist me të, se socializmi është tradhtuar. Kush do të vijë pas Polonisë? Proceset e diferencimit klasor ziejnë në të tëra vendet revizioniste. Konfliktet klasore po rriten me shpejtësi. Nga këto nuk bën përjashtim as Bashkimi Sovjetik, megjithëse në pamjen e jashtme duket si më i qëndrueshmi ndërmjet tyre. Plagët që ka hapur restaurimi i kapitalizmit, mund të shërohen vetëm me përmbysjen e revizionizmit dhe me rivendosjen e socializmit.

Partia jonë ka zhvilluar një luftë të madhe, të hapur e parimore kundër revizionizmit kinez, ideologjisë, politikës, qëndrimeve dhe veprimeve të Partisë Komuniste të Kinës. Revizionizmi kinez është një korrent oportunist në lëvizjen komuniste botërore dhe maocedunideja, baza e tij, është një ideologji me tipare arkaike, një amalgamë teorish të vjetra kineze të Konfucit e të Mencit dhe teorish të reja të perifrazuara, pa një lidhje organike e strukturore, të lyera me një frazeologji marksiste. Maocedunideja përfaqëson një ideologji hegjemoniste të sundimit botëror, të bazuar në një bagazh teoremash dhe mendimesh heterogjene, kontradiktore dhe pragmatiste. Në ujërat e kësaj ideologjie lundronte barka kineze sa djathtas e majtas, me një drejtim të çoroditur, kur Kina filloi ndërtimin e shtetit të ri kinez të dalë nga lufta çlirimtare. Këtëj vinin ato lëkundje të Kinës dhe ai karakter i papërcaktuar i sistemit politik dhe ekonomik të saj.

Teoria që udhëhiqte Kinën e re nuk ishte marksizëm-leninizmi. Penelatat marksiste të fasadës të linin përshtypjen e rreme se ekzistonin disa tipare të socializmit shkencor. Ato pengonin që të dalloheshin qartë deviacionet e vazhdueshme.

Kur në Kinë theksohej roli i diktaturës së proletarietit, nën të fshihej dhe zhvillohej diktatura e grupeve rivale dhe e personaliteteve. Kur theksohej roli udhëheqës i partisë, nën të fshihej një organizim kaotik dhe një udhëheqje e paqenë e saj. Kur flitej për hegjemoninë e klasës punëtore, roli udhëheqës në fakt i lihej fshatarësisë, sepse ishte ideologjia e saj mikroborgjeze që sundonte në Kinë. Kur flitej për ndry-

shimin e strukturave klasore, në thelb asgjë nuk lëvizte nga vendi.

Ekonomia kineze ecte duke çaluar rëndë pa orientime dhe perspektiva të qarta, pavarësisht nga ekzistenca e njëfarë plani që as për së largu nuk kishte tiparet shkencore dhe ca më pak të një plani të bazuar në një sistem të centralizuar. Bile ai nuk kishte as tiparet e një plani të decentralizuar. Ekonomia kineze ecte për inerci.

Në këtë organizim dhe në këtë ideologji pa shtyllë kurrizore dominonte ideja e hegjemonizmit të shtetit të madh kinez, që «ishte thirrur nga historia» të përfaqësonte modelin e ri të shoqërisë socialiste, të përfaqësonte «marksizëm-leninizmin e kohërave të reja», që ishte maocedunideja.

Duhej të dallonim në këtë zhvillim të Kinës se nën petkun e «revolucionit» fshihej kundërrevolucionit, se nën petkun e maocedunidesë fshihej antimarksizmi, fshihej një rrymë e revizionizmit modern që kërkonte forma e struktura politike, ideologjike, organizative dhe shtetërore të përshtatshme për «kontinentin kinez» dhe për aspiratat e tij kapitaliste e imperialiste.

«Antiimperializmi», «antisovjetizmi», «anti amerikanizmi» i Kinës së Mao Ce Dunit, që altonoheshin ndërmjet tyre, ishin koniunkturalë. Ata nuk ishin bindje ideologjike, nuk ishin qëndrime parimore, por manovra për balancimin e pushteteve të fuqishme në botë, një lojë me fuqitë politiko-ushtarake imperialiste për fuqizimin e Kinës në skakierën botërore.

Me këto botëkuptime, me këto qëndrime eklektike e oportuniste, si në planin e brendshëm të Kinës, ashtu edhe në atë të jashtëm, u zhvillua «Revolucioni Kulturor Proletar» i hunvebinëve dhe po zhvillohet aktualisht «revolucionit» revanshist i pleqve reaksionarë e i të gjitha mbeturinave të Kinës së vjetër. Mbi këto baza u hartua teoria e pafat e «tri botëve» dhe e «aleancave të këtyre tri botëve», u bënë kthesat e forta kineze në politikën ndërkombëtare me rrjedhje shumë të rrezikshme për paqen botërore.

Iu desh Partisë sonë një kohë pak a shumë e gjatë që të dallonte këtë rrugë antimarksiste të Partisë Komuniste të Kinës dhe të shtetit kinez, me të cilët ne kishim marrëdhënie të mira miqësore. Për Partinë tonë kishte rëndësi të madhe thelbi teoriko-politik i kësaj miqësie, kishte rëndësi çështja e luftës për ruajtjen e pastërtisë së marksizëm-leninizmit, çështja e socializmit dhe e revolucionit.

Në fillim ne bëmë një luftë parimore me debate, si në mes shokësh, por gradualisht ajo u ashpërsua për arsye të qëndrimeve antimarksiste të Kinës. Kjo ishte një luftë pa lëshime nga ana e Partisë së Punës të Shqipërisë, por edhe një luftë e pabarabartë dhe e vështirë. Po të mos bëhej kjo luftë, do të rrezikohej ndërtimi i socializmit në Shqipëri.

Rëndësia e luftës së Partisë së Punës të Shqipërisë qëndronte në atë se ajo rrëzoi dy mite: atë të Kinës, si vend ku ndërtohej socializmi dhe atë të maocedunidesë, si marksizëm-leninizmi i kohës sonë. Në këtë luftë, për të mbrojtur parimet, Partia jonë mori parasysh çdo vështirësi ekonomike që mund t'i krijohej vendit.

Maocedunideja, e propaganduar si «zhvillimi i mëtejshëm shkencor i marksizëm-leninizmit», mund të influenconte, siç influencoi, në

lëvizjen komuniste ndërkombëtare dhe veçanërisht në disa parti marksiste-leniniste. Këto parti, për shumë rrethana, duke mos mundur dot t'i bënin një analizë të thellë kësaj rryme ideologjike revizioniste, mendonin se te Kina e madhe dhe te Mao Ce Duni kishin prijësit e revolucionit proletar, ndihmësit e vendosur në luftën kundër imperializmit amerikan e socialimperializmit sovjetik, mbrojtësit e natyrshëm të luftërave të drejta nacionalçlirimtare të popujve.

Duhej të bëhej, pra, një luftë parimore dhe e vendosur për të zhgënjyer të gënjerit. Këtë luftë e ndërmori Partia e Punës e Shqipërisë. Ky është një fakt i jetuar dhe i vërtetuar si në kohën kur rronte vetë Mao Ce Duni, ashtu edhe pas vdekjes së tij. Nga kjo luftë Shqipëria socialiste nuk u izolua në botë, siç pretendojnë revizionistët jugosllavë. E kundërta ngjau, Partia e Punës e Shqipërisë dhe Republika Popullore Socialiste e Shqipërisë i forcuan akoma më shumë pozitrat e brendshme dhe ato ndërkombëtare.

Në këtë luftë për mbrojtjen e marksizëm-leninizmit, të revolucionit dhe për kundërshtimin e ideologjisë pseudomarksiste të maocedunidesë luftuan me mençuri, me vendosmëri revolucionare dhe dhanë një kontribut të vlefshëm edhe parti të tjera motra marksiste-leniniste.

Demaskimi i Kinës si vend josocialist dhe i maocedunidesë si një teori antimarksiste zhduku një iluzion të rrezikshëm në lëvizjen marksiste-leniniste ndërkombëtare, ashtu siç ngjau dhe me revizionizmin sovjetik, jugosllav dhe me rrymat e tjera reaksionare revizioniste.

Çdo maskim, çdo falsifikim, çdo devijim nga teoria shkencore e marksizëm-leninizmit nuk mund ta ketë jetën të gjatë. Ai shpejt ose vonë demaskohet, pse bie në kundërshtim me idealet e klasës punëtore, të popujve që luftojnë për çlirim, për demokraci të vërtetë, për socializmin, për një shoqëri pa shfrytëzues dhe të shfrytëzuar.

Zhvillimet e sotme në Kinë, gjithë politika e brendshme dhe e jashtme e udhëheqjes kineze, vërtetojnë se analizat dhe konkluzionet e Partisë së Punës të Shqipërisë ishin plotësisht të sakta e të drejta. Udhëheqja kineze i la fushë të lirë zhvillimit të ekonomisë kapitaliste, i hapi dyert vërshimit të kapitaleve të huaja skllavëruese, u bashkua në një aleancë të ngushtë me imperializmin amerikan dhe me reaksionin më të zi ndërkombëtar. Kina doli hapur si një fuqi imperialiste agresive e me pretendime për hegjemoni në botë. Ajo është bërë një nga qendrat kryesore të kundërrevolucionit botëror, që lufton me të gjitha mjetet për të penguar çlirimin e popujve, për të mbytur revolucionin. Revizionizmi kinez ka dalë sot si një rrymë e hapët reaksionare, ai ka prerë çdo lidhje jo vetëm me lëvizjet revolucionare e çlirimtare, por edhe me çdo lëvizje demokratike e përparimtare. Në çdo rast ai mban anën e forcave më të errëta, më obskurantiste e fashiste në botë.

Rrënuja, çoroditjet, konfuzioni e përlëshjet që kanë ndodhur e po ndodhin në Kinë, janë pasojë e drejtpërdrejtë e maocedunidesë. Kritika që i bëjnë sot udhëheqësit kinezë Mao Ce Dunit, nuk ka të bëjë aspak me kritikën marksiste që i bëjmë ne. Ajo nuk lidhet me përmbajtjen e ideve të tij, të cilat udhëheqësit e sotëm kinezë i ruajnë dhe i zbatojnë

në praktikë. Kritika e tyre është shprehje e luftës për pushtet midis grupeve të ndryshme maoiste rivale. Mao Ce Dunin këto grupe nuk mund ta hedhin poshtë, pse në idetë e tij të gjithë gjejnë mbështetje e justifikim për veprimet e tyre. Proletariati dhe populli kinez, pa u glitur nga maocedunideja, nuk do ta gjejë dot rrugën e drejtë që çon në socializëm.

Partia e Punës e Shqipërisë edhe në të ardhmen do të vazhdojë me konsekuencë luftën parimore për demaskimin e plotë të revizionizmit kinez, për të vënë një kufi të qartë e të prerë midis marksizëm-leninizmit dhe ideve antimarksiste të Mao Ce Dunit. Pa denoncuar e hedhur poshtë maocedunidenë, pa luftuar e çrrënjosur çdo ndikim të saj në lëvizjen revolucionare nuk mund të flitet seriozisht për luftë kundër revizionizmit kinez dhe as kundër revizionizmit modern në tërësi, nuk mund të konsolidohet e të zhvillohet si duhet lëvizja marksiste-leniniste dhe të çohet përpara me sukses çështja e revolucionit.

Sa më shumë thellohen kontradiktat e kapitalizmit e të imperializmit dhe sa më shumë afrohet vala e revolucionit, aq më tepër zbulohet fytyra antimarksiste e kundërrevolucionare e korrentit tjetër revizionist, e eurokomunizmit.

Eurokomunizmi është produkt i degjenerimit të partive komuniste që u futën në rrugën e revizionizmit, i përçarjes që ndodhi në kampin revizionist, si rezultat i epërsisë që mori në gjirin e tij nacionalizmi borgjez.

Ai është ideologji e aristokracisë punëtore të ushqyer me thërrime nga fitimet e borgjezisë. Eurokomunizmi, që është ideologjia më e kulluar e reformizmit borgjez, luan rolin e «kolonës së pestë» në gjirin e lëvizjes punëtore.

Eurokomunistët, të cilët ishin ndër ithtarët më të zjarrtë të fushatës kundër Stalinit, për t'u kthyer gjoja te Lenini, tani janë bashkuar haptazi me tërë korin e borgjezisë e të socialdemokratëve për të sulmuar Leninin e leninizmin. Vetë termi «eurokomunizëm» është shprehje e largimit nga marksizëm-leninizmi, e mohimit të ligjeve të përgjithshme të revolucionit dhe të ndërtimit të shoqërisë socialiste. Eurokomunistët kanë nxjerrë nga varri e kanë rivënë në qarkullim teoritë e vjetra oportuniste të Lasalit e të Bernshtajnit, të Kautskit e të Internacionales së Dytë, të cilat i reklamojnë si fjalën e fundit të zhvillimit krijues të marksizmit në ditët tona. Sulmi frontal e i hapur nga pozitat antikomuniste kundër mësimëve themelore të marksizëm-leninizmit është përfundimi logjik i tërë revizionizmit modern, i të gjitha rrymave të tij.

Predikimet e eurokomunistëve për shtetin kapitalist mbiklasor, për demokracinë për të gjithë, për rrugën paqësore, parlamentare, demokratike për në socializëm, për reformat e strukturës në kuadrin e kushtetutës borgjeze etj. kanë vetëm një qëllim: sabotimin e revolucionit, mbrojtjen e përjetësimin e rendit kapitalist. Kur revizionistët italianë, francezë e spanjollë flasin për «kompromis historik», për «bllok historik të së majtës» etj. ose kur luftojnë për t'u futur në qeveritë borgjeze, këtë e bëjnë jo për t'ia rrëmbyer pushtetin borgjezisë, jo për të likuiduar rendin kapitalist, por për ta ruajtur atë nga revolucioni dhe për

të marrë përsipër ata vetë drejtimin e punëve të borgjezisë. Në këtë rol ata kërkojnë të zëvendësojnë socialdemokracinë e komprometuar e tanimë të diskredituar në sytë e masave si shërbëtore e hapur e borgjezisë.

Ndërsa zbukurojnë kapitalizmin, eurokomunistët shprehin një armiqësi të hapur për socializmin. Sipas tyre, deri më sot as ka ekzistuar dhe as ekziston ndonjë socializëm i vërtetë. Për ta «socializmi i vërtetë» është ai që kanë shpikur ata vetë, i ashtuquajtur «socializëm demokratik», «socializëm pluralist» ose «rruga e tretë».

«Socializmi» i përfytyruar nga eurokomunistët është një socializëm pa diktaturë të proletarietit, pa udhëheqje të pandarë të partisë komuniste, pa teori marksiste-leniniste. Në këtë socializëm pushteti do të jetë i të gjitha klasave, në udhëheqje do të vijnë parti të ndryshme sipas votave që do të marrin në zgjedhje, ideologjia marksiste do të bashkëtojë me të gjitha ideologjitë e tjera borgjeze, mikroborgjeze e fetare. Në socializmin e eurokomunistëve do të ekzistojnë forma të ndryshme të ekonomisë, prona e shoqëruar dhe iniciativa private, kapitalet imperialiste dhe shoqëritë shumëkombëshe.

Pra në këtë shoqëri të ashtuquajtur pluraliste do të pleksen e do të bashkëtojnë në paqe e harmoni të plotë, klasa, parti, ideologji, prona të ndryshme, elemente socialiste e kapitaliste në ekonomi e politikë, në bazë e superstrukturë, në tërë jetën e shoqërisë. Por një shoqëri e tillë e përzier kapitalisto-socialiste as ka ekzistuar as mund të ekzistojë ndonjëherë. Ajo mund të ekzistojë vetëm në imagjinatën e eurokomunistëve. Socializmi e kapitalizmi janë dy rende shoqërore që përjashtojnë njëri-tjetrin. Shoqëria e re e predikuar nga eurokomunistët nuk është gjë tjetër veçse shoqëria e sotme kapitaliste e lyer me bojë socialiste.

Dalja e eurokomunizmit u reklamua me shumë zhurmë nga borgjezia, e cila pati shpresë se ideologjia reformiste e tij do të errësonte ideologjinë revolucionare të marksizëm-leninizmit. Ajo shpresonte se eurokomunizmi do të merrte një përhapje të madhe dhe do të bëhej një flamur që do të bashkonte të gjithë revizionistët, të Perëndimit e të Lindjes. Por dështimi që i plotë. Në vetë partitë eurokomuniste u shtuan fraksionet e përçarjet; ndërmjet partive të ndryshme eurokomuniste filloi lufta për lidërship. Grindjet e ndarjet me partitë e tjera revizioniste u bënë edhe më të mëdha. Partia e Marshesë e braktisi kampin eurokomunist dhe po afrohet gjithnjë e më shumë me revizionistët sovjetikë. Partia Komuniste e Spanjës është ndarë në fraksione të ndryshme, në eurokomunistë ortodoksë e heretikë, në prosovjetikë e anti-sovjetikë. Kurse partia e Berlinguerit kalon një krizë të rëndë ideologjike e politike. Çka është më e rëndësishme, partitë eurokomuniste kanë humbur shumë nga ndikimi që kanë pasur në masat, gjë që vihet re edhe në disfatat që po pësojnë vazhdimisht në fushatat elektorale, të cilat i konsiderojnë si kalin e tyre të betejës.

Idetë e socializmit të vërtetë kanë qenë dhe mbeten një forcë e madhe frymëzuese, mobilizuese e organizuese e luftës revolucionare të masave.

Sot nuk ka nevojë të shpiken «socializma» të rinj, as të kopjohen të ashtuquajturit socializma të revizionistëve modernë, si ai sovjetik, jugosllav, kinez e të tjera, që vetëm emrin kanë socializëm.

Se çfarë është socializmi, ç'përfaqëson dhe ç'realizoi ai, si arrihet e si ndërtohet shoqëria socialiste, nuk është ndonjë gjë e panjohur. Ekziston një teori dhe një praktikë e socializmit shkencor. Këtë teori na e mësojnë Marks, Engelsi, Lenini e Stalini. Praktikën e tij e gjejmë në atë eksperiencë të pasur të ndërtimit të socializmit në Bashkimin Sovjetik në kohën e Leninit e të Stalinit, këtë e gjejmë sot edhe në Shqipëri, ku shoqëria e re ndërtohet sipas mësimeve të marksizëm-leninizmit.

Sigurisht, socializmi, siç ka thënë Lenini, do të marrë pamje të ndryshme dhe do të ketë veçoritë e veta në vende të ndryshme, që rrjedhin nga kushtet shoqërore-ekonomike, nga rruga në të cilën zhvillohet revolucioni, nga traditat, nga rrethanat ndërkombëtare etj. Por parimet bazë dhe ligjet e përgjithshme të socializmit mbeten të patundura dhe janë të domosdoshme për të gjitha vendet.

Marksistë-leninistët i studiojnë me kujdes proceset revolucionare në vendet e tyre, si edhe kushtet kombëtare e ndërkombëtare në të cilat ato zhvillohen. Ata nuk janë dogmatikë as në teori, as në praktikë. Për ta marksizëm-leninizmi, si një botëkuptim materialist dialektik, është një doktrinë e gjallë krijuese e në zhvillim të pandërprerë.

Marksistë-leninistët nuk janë konservatorë e fanatikë, siç i akuzojnë revizionistët e borgjezët. Përkundrazi, ata janë njerëzit më përparimtarë, luftëtarë të vendosur kundër çdo gjëje të vjetër e prapanike. Ata qëndrojnë fort në pozitë e së resë dhe luftojnë me të gjitha forcat për fitoren e saj. Konservatorë e reaksionarë janë revizionistët dhe gjithë oportunistët e tjerë, të cilët, si shërbëtorë të borgjezisë, mbrojnë një kauzë të humbur, mbrojnë një rend të vjetër shtypës e shfrytëzues. Është pikërisht kjo pozitë reaksionare ajo që e ka futur revizionizmin modern në një krizë të thellë.

Clirimi i ndërgjegjes së proletariatit e të popujve nga ndikimet frenuese të revizionizmit, përhapja e marksizëm-leninizmit, i cili tregon rrugën e vetme të drejtë të luftës e të fitores, është sot detyrë e dorës së parë për të çuar përpara procesin revolucionar në çdo vend e në shkallë botërore.

Kjo detyrë bëhet edhe më aktuale nga rritja e revoltës dhe e lëvizjeve të masave, nga zgjimi i ndërgjegjes klasore e kombëtare të popujve, nga fakti se bota ndodhet përpara tronditjeve të mëdha ekonomiko-shoqërore.

Përpjekjet e gjithë armiqve bëhen për t'i larguar masat nga revolucioni. Borgjezia, socialdemokracia, revizionistët modernë dhe oportunistët e çdo ngjyre bëjnë çmos për të mashtruar klasën punëtore dhe masat, për të mbjellë konfuzion ideologjik e përçarje, për të përhapur pesimizmin e fatalizmin, për të ngjallur në popull mosbesim të revolucioni e të socializmi, për të ngjallur psikozën se është e pamundur që kapitalizmi dhe imperializmi të thyhen e të munden. I vetmi problem për këta armiq është që kapitalizmin ta bëjnë «me një fytyrë më njerëzore», çka do të thotë që kapitalistët e mëdhenj të vazhdojnë të sun-

dojnë, por të lëshojnë disa thërime për popullin e varfër. Në këtë kor bashkohen ideologët borgjezë, apologetët e imperializmit sovjetik, predikuesit e teorisë së «tri botëve», të «mosangazhimit» dhe të dialogut Veri-Jug, teora i Romës dhe bosët e sindikatave.

Një presion i madh bëhet mbi klasën punëtore evropiane. Për shkak të sundimit të reformizmit lëvizja punëtore në Evropë nuk është rritur akoma në një lëvizje të vërtetë revolucionare. Ajo nuk ka fituar ndërgjegjen e plotë se për të ndryshuar gjendjen e saj duhet ndryshuar sistemi kapitalist, duhet vendosur shoqëria socialiste.

Por proletariati evropian nuk mund të vazhdojë t'u bindet përjetë krerëve sindikalistë dhe partive socialdemokrate e revizioniste, që llo-motitin se me anë të zhvillimit të strukturave borgjeze ekzistuese, të rrugës parlamentare, të reformave ose nëpërmjet «Evropës së Bashkuar» do të sigurohet një e ardhme më e mirë për masat punonjëse. Shtypja, dhuna, shfrytëzimi i egër, papunësia, drogat, degjenerimi, inflacioni, që kanë përfshirë vendet e Evropës, nuk do të mund të frenojnë revoltën e forcave të shëndosha të popujve evropianë kundër sundimit të kapitalit. «Evropa e Bashkuar» nuk është veçse një zgjidhje efemere, një politikë reaksionare kapitaliste, që shpejt ose vonë, do të gjendet përpara vështirësish të panumërta e të natyrave të ndryshme. Prandaj do të vijë një moment kur revolta e klasës punëtore të Evropës do të arrijë në atë pikë që do të kërkojë patjetër një zgjidhje revolucionare.

Në këto kushte rëndësi të dorës së parë ka që komunistët dhe jo-komunistët, njerëzit përparimtarë dhe gjithë masat e popullit të kuptojnë mirë se armiku i tyre i vërtetë është kapitalizmi, se ai duhet e mund të përmbysset me luftë revolucionare. Kështu do të zhduket pesimizmi, do të shtohet kuraja dhe besimi në fitoren. Këtë besim proletariatit dhe masave ua rrit e ua bën të pathyeshëm shkenca e Marksit dhe e Leninit.

Partia dhe proletariati që përgatiten për revolucion dhe për marrjen e pushtetit, përpiqen t'i analizojnë e t'i zotërojnë mirë situatat, të përcaktojnë shkencërisht karakterin dhe etapën e revolucionit në çdo rast konkret dhe, mbi këtë bazë, të përpunojnë strategjinë dhe taktikat e përshtatshme. Ata studiojnë me kujdesin më të madh rrymat e ndryshme revolucionare popullore që ndeshen me kapitalizmin dhe me partitë e tij, vlerësojnë drejtimit e tyre, raportin e forcave në situatën konkrete dhe, mbi këtë bazë, përcaktojnë dhe vënë në jetë të gjitha ato taktika të shkathëta që duhet të përdoren për të çuar në rrugë të drejtë e fitimtare masat popullore, për të kanalizuar mijëra përrenj në lumin e madh të revolucionit, ku do të mbytet borgjezia kapitaliste.

Partia dhe proletariati nuk shkojnë vetëm në revolucion. Në shoqërinë borgjeze ka edhe shtresa të tjera të shtypura që e urrejnë rendin kapitalist, ka forca përparimtare në fshatarësi, në rini, ka elementë të tjerë demokratë e liridashës që nuk e durojnë shfrytëzimin. Komunistët i afrojnë të gjitha këto forca e këta elementë, ndërtojnë me ta aleanca të përbashkëta për çështje të ndryshme e për objektiva të caktuar. Marksistë-leninistët nuk janë as sektarë, as liberalë, ata janë revolucionarë të patundur në parime, por elastikë në taktikat. Frontet që ndërtojnë partitë marksiste-leniniste me forcat e tjera përparimtare në ven-

det kapitaliste kundër borgjezisë, kundër fashizmit dhe imperializmit bëjnë pjesë në strategjinë e revolucionit. Në çdo aleancë e front partia ruan personalitetin e vet edhe kur ajo, për arsye objektive, nuk e drejton vetë atë.

Problemi kyç në vendet kapitaliste ka qenë dhe mbetet uniteti i proletariatit. Proletariatit borgjezia përpiket ta futë në një mengene të hekurt, të mos e lejojë të ecë në rrugën që i ka caktuar historia për përmbysjen e shfrytëzuesve, për rrëzimin e pushtetit të kapitalit. Një nga këto mengene janë sindikatat, të cilat, në shumicën e rasteve, i nënshtrohen borgjezisë. Komunistët punojnë jo vetëm të futen e të hedhin rrënjë të patundura në klasën punëtore, por edhe luftojnë që të realizojnë unitetin e saj. Sot, kur kriza ka hedhur në rrugë dhjetëra milionë punëtorë dhe miliona të tjerë ngrihen në greva e demonstrata për rivendikime ekonomike e politike, është më lehtë të organizohen e të bashkohen punëtorët në luftë kundër kapitalit.

Uniteti i klasës punëtore arrihet në luftë e në veprime revolucionare konkrete për realizimin e kërkesave ekonomike dhe politike të proletariatit. Për këtë qëllim marksistë-leninistët punojnë që sindikatat ekzistuese të shpëruhen nga sundimi i agjentëve të borgjezisë, të revizionistëve e të socialdemokratëve e të kthehen në instrumente lufte kundër rendit shfrytëzues. Krahas me këtë, sipas kushteve dhe nevojave, ata krijojnë edhe sindikata të reja revolucionare.

Rinia është gjithashtu një forcë e madhe, që aspirojnë dhe lufton për ndryshimin e shoqërisë së padrejtë kapitaliste, që e do të renë e përparimtarë. Këtë rrugë asaj ia çel vetëm marksizëm-leninizmi dhe revolucioni, vetëm këta i shpëtojnë masat e rinisë nga degjenerimi politik e shoqëror ku i çon borgjezia, u hapin perspektivën e një jete të re, të pastër e të lumtur, ku mund të shpërthejnë e të zhvillohen plotësisht energjitë e tyre të pashtershme në shërbim të shoqërisë e të përparimit. Lëvizja e rinisë merr forcë dhe mund të arrijë objektivat e vet kur shkrihet në lëvizjen revolucionare të klasës punëtore.

Procesi i sotëm revolucionar e ka bërë edhe më të mprehtë problemin e qëndrimit ndaj ushtrisë borgjeze, jo për ta konsideruar atë si forcën që do të bëjë revolucionin, por për ta shthurur e desintegruar atë, që të mos jetë në gjendje t'i kundërvihet revolucionit. Komunistët punojnë që masat e ushtarëve, të cilët janë bij të popullit, kur të shpërthejë revolucionin, të mos i binden kastës së oficerëve, por t'i kthejnë armët kundër forcave reaksionare në fuqi dhe të bashkohen me kryengritësit, ashtu siç ndodhi në Iran.

Revolucioni është detyrë kryesore e klasës punëtore. Por ai përgatitet në luftë për zgjidhjen e problemeve politike, ekonomike, shoqërore, kulturore që shqetësojnë çdo ditë masat punonjëse. Janë këto aksione, këto beteja të përditshme ato që rritin ndërgjegjen e klasës, që forcojnë organizimin e bashkimitin e saj, që e përgatitin dhe e çojnë atë në revolucion. Nëpërmjet këtyre betejave partia lidhet me masat e vitet në krye të tyre. Partitë e vërteta të klasës punëtore janë parti të aksioneve revolucionare.

Për të frikësuar masat dhe për të përgatitur ardhjen e fashizmit kapitali i madh po nxit edhe terrorizmin, i cili në shumë vende ka ma-

rrë përpjesëtime të gjera. Me anë të terrorizmit borgjezia kërkon, gjithashtu, të nullojë edhe lëvizjen e vërtetë revolucionare, të futë në rrugë të gabuar elementë të ndryshëm që revoltohen kundër shtypjes së saj. Ajo me qëllim identifikon luftën revolucionare me terrorizmin, për të krijuar në masat përshtypjen sikur edhe komunistët, patriotët e revolucionarët, që luftojnë kundër shtypjes kombëtare e shoqërore, janë terroristë e anarkistë, që vrasin e grabisin. Revolucionarët e vërtetë janë kundër terrorizmit e anarkizmit, në teori e në praktikë.

Klasa punëtore e masat punonjëse në vendet kapitaliste po ndeshen gjithnjë e më shumë edhe me problemin kombëtar, që aktualisht është bërë mjaft i mprehtë. Socialdemokracia dhe revizionistët e mohojnë ekzistencën e një problemi të tillë në vendet e zhvilluara kapitaliste, siç janë ato të Evropës Perëndimore, Japonia, Kanadaja etj. Ata nuk duan ta shohin faktin që gjithnjë e më shumë, si rezultat i sulmit të shoqërive shumëkombëshe, prapa të cilave qëndron imperializmi amerikan, zgjerimi i kompetencave mbinacionale të blloqeve ushtarake e të organizatave ekonomike ndërkombëtare, zgjerimi i bazave dhe vendosja e armëve amerikane në territoret e tyre kufizojnë edhe më tepër sovranitetin kombëtar, kufizojnë veprimin e pavarur politik të vendeve të tyre, i kthejnë gradualisht në shtete vasale.

Mbrojtjen e sovranitetit e të pavarësisë kombëtare, që borgjezia dhe krahu socialdemokrat e revizionist e kanë braktisur, duhet ta marrë në dorë klasa punëtore. Proletariati evropian e i vendeve të tjera nuk duhet të mashtrohet nga propaganda e Shteteve të Bashkuara, e Bashkimit Sovjetik ose e Kinës, që, secili për interesat e veta, tundin gogolin e rrezikut që i vjen lirisë e pavarësisë kombëtare nga superfuqia rivale. Me këtë propagandë ata kanë për qëllim ta grabitin lirinë e pavarësinë dhe të vendosin sundimin imperialist të kësaj ose të asaj superfuqie.

Momentet klasore e kombëtare përbëjnë një problem të madh edhe në vendet ku sundojnë revizionistët. Në mënyrë të veçantë në këto vende nuk mund të arrihet çlirimi shoqëror pa kundërshtuar e hedhur poshtë zgjedhën e socialimperializmit sovjetik, i cili ka vendosur këtu sundimin e tij të plotë ekonomik, politik e ushtarak.

Imperializmi amerikan dhe fuqitë e tjera kapitaliste perëndimore hiqen sikur janë përkrahëse të lëvizjes punëtore dhe nacionale në këto vende, sikur mbështetin aspiratat çlirimtare të popujve të këtyre vendeve. Kjo është demagogji dhe një lojë e rrezikshme që synon të mashtrtojë proletarët dhe masat punonjëse. Borgjezia imperialiste kërkon vetëm t'i shpërujë këto vende nga zona e ndikimit të socialimperializmit sovjetik dhe t'i futë në sferën e saj të sundimit.

Çështja e revolucionit proletar është e pandarë nga zhvillimi i lëvizjes çlirimtare të popujve. Një tipar i rëndësishëm i luftërave të sotme nacionalçlirimtare është se zgjimi politik për të fituar e për të mbrojtur lirinë dhe pavarësinë e plotë kombëtare po shoqërohet edhe me një zgjim shoqëror. Lëvizjet aktuale të popujve të shtypur po drejtohen gjithnjë e më shumë jo vetëm kundër imperializmit të huaj, por edhe kundër agjenturave të tij brenda vendit. Fakt është se popujt e vendeve të shtypura, me gjithë prapambetjen ekonomiko-shoqërore,

janë duke treguar një vitalitet të madh dhe po japin një kontribut të rëndësishëm në revolucionin demokratik antiimperialist, që i hap rrugën revolucionit proletar.

Vëmendje të posaçme meritojnë kryengritjet popullore me «frymëzim islamik», siç duan t'i përcaktojnë këto lëvizje borgjezia dhe revizionistët, me qëllim që t'u mohojnë karakterin e tyre antiimperialist e revolucionar. Është fakt se, në vendet myslimane ka lëvizje kryengritëse, por interpretimet që u bëjnë borgjezia dhe revizionistët janë keqdashëse dhe denigruese. Ato fshehin synime skllavëruese ndaj popujve.

Ne, marksistë-leninistët, e kemi thënë dhe e themi se feja është opium për popujt. Në asnjë rast nuk e ndërrojmë pikëpamjen tonë lidhur me këtë çështje. Edhe feja myslimane në përmbajtjen e saj nuk ndryshon nga të tjerat.

Masat e gjera të popujve myslimanë në vendet e ndryshme janë ngritur e po ngrihen në luftë jo për çështjen e fesë, por për çlirimin kombëtar e shoqëror. Besimi në fenë është relativ dhe nuk predominon mbi politikën. Njerëzit e këtyre vendeve e besojnë dhe e respektojnë islamin, por kur cenohen interesat jetike të popullit, liria dhe pavarësia e vendit, ata ngrihen në luftë kundër agresorit, qoftë ky edhe me të njëjtën fe. Nuk është frymëzimi fetar ai që i shkakton revoltat dhe zgjimin revolucionar të popujve, por janë kushtet politiko-shoqërore, janë shtypja e grabitja imperialiste, janë varfëria dhe vuajtjet që rëndojnë mbi ta.

Arabët dhe popujt e tjerë myslimanë janë luftëtarë trima e me kulturë të lartë. Kryengritjet e luftërat antiimperialiste, antikolonialiste dhe antifeudale të këtyre popujve tregojnë se ata janë përparimtarë e lirishtës. Po të mos ishin të tillë, ata nuk mund të ngriheshin në luftë për liri e pavarësi kombëtare, kundër shtypjes së dyfishtë, të brendshme dhe të jashtme.

Në rajonet e banuara nga popujt myslimanë imperialistët dhe socialimperialistët i kanë pozitën të vështira. Të vështira i kanë pozitën edhe kukullat e tyre. Gjendja në këto rajone flet për një situatë revolucionare, për një lëvizje të madhe shoqërore të këtyre popujve, pavarësisht se në pamjen e parë ato kanë karakter fetar e se i ndjekin njerëz besimtarë ose jobesimtarë.

Sot në mjaft vende ekzistojnë ose krijohen situata revolucionare, por jo kudo shtrohet si detyrë imediate revolucionin socialist. Në botë zhvillohen edhe lëvizje të tjera me karakter demokratik, antiimperialist, çlirimtar. Të gjitha këto janë pjesë përbërëse të procesit revolucionar botëror, janë luftëra të drejta, që dobësojnë frontin imperialist dhe kontribuojnë në shpejtimin e proceseve revolucionare, godasin dhe kalbëzojnë më tej sistemin kapitalist. Prandaj, siç na mëson Lenini, klasa punëtore si klasa më progresive dhe partia e saj komuniste, duhet t'i mbështetin, t'i përkrahin aktivisht këto luftëra dhe të vihen në drejtimin e tyre. Edhe në rast se në fillim ato nuk i kanë afirmuar pozitën e tyre udhëheqëse, përsëri duhet të qëndrojnë në ballë të luftës dhe të sakrificave, pse vetëm kështu mund të dalin në krye të lëvizjes dhe të sigurojnë objektivat e saj, vetëm kështu mund t'i hapet rruga

rritjes së revolucionit demokratik, popullor, antiimperialist në revolucionin socialist.

Në luftën e tyre për çlirimin kombëtar e shoqëror klasa punëtore dhe masat punonjëse ndeshen çdo ditë me dhunën e egër të imperializmit, të borgjezisë dhe të forcave të reaksionit. Në këto kushte ato janë të detyruara t'i përgjigjen dhunës reaksionare me dhunën revolucionare, format e së cilës janë e nuk mund të mos jenë të ndryshme, sipas kushteve të çdo vendi e situatave që zhvillohen. Në disa vende kjo dhunë ka marrë e mund të marrë edhe formën e kryengritjes së armatosur. Ndaj kësaj çështjeje marksistë-leninistët mbajnë një qëndrim tepër serioz. Ata luftojnë si kundër qëndrimeve nihiliste, ashtu edhe kundër aventurizmit mikroborgjez, demaskojnë e hedhin poshtë si predikimet maoiste mbi «rrethimin e qytetit nga fshati» etj., ashtu edhe teoritë pseudomarksiste që mohojnë rolin vendimtar të masave popullore në luftë dhe udhëheqjen e partive marksiste-leniniste.

Kohët për partitë tona marksiste-leniniste janë revolucionare. Partitë e reja marksiste-leniniste po rriten e kaliten në të gjithë botën, rritet roli dhe veprimtaria e tyre, lidhjet dhe ndikimi i tyre në klasën punëtore e në masat. Parti të reja janë krijuar në mjaft vende e zona të ndryshme. Ekzistojnë të gjitha kushtet që të krijohen edhe atje ku nuk ka parti të vërteta revolucionare të klasës punëtore. Kjo është një detyrë luftarake imperative e elementëve revolucionarë e më të ndërjegjshëm të proletarietit.

Gjendja objektive e favorshme nuk i errëson aspak problemet e mprehta dhe detyrat e mëdha që qëndrojnë përpara marksistë-leninistëve. Vërtet forcat tona janë në rritje të vazhdueshme dhe situatat zhvillohen në favor të revolucionit, por edhe reaksioni vepron. Borgjezia, socialdemokracia dhe revizionistët e ndryshëm, pavarësisht nga kontradiktat e tyre të thella e të papajtueshme, në një gjë bashkohen e veprojnë së toku: në luftën kundër marksizëm-leninizmit dhe revolucionit. Ata përpiqen të mbjellin mosbesim e frikë në masat e popullit për t'i larguar nga revolucionin e socializmin, të godasin e të dëmtojnë partitë marksiste-leniniste në vende të veçanta dhe lëvizjen komuniste revolucionare në tërësi.

Më përpara, kur maocedunideja ushtronte influencën e vet në mjaft parti, imperialistët dhe socialimperialistët ishin më të qetë, sepse e dinin që kjo rrymë revizioniste bënte punën e vet minuese në lëvizjen marksiste-leniniste. Tani që kjo rrymë u demaskua, armiqtë orvaten të mbjellin konfuzion duke përhapur lloj-lloj teorish pseudomarksiste, të përcajnë e të dobësojnë partitë me luftë fraksioniste, të manipulojnë në forma të ndryshme të hedhin në pozitë revizioniste elementë të dobët e të paformuar.

Por, tashmë, partitë marksiste-leniniste kanë një përvojë të madhe në luftën me rrymat e ndryshme antimarksiste dhe janë të armatosura më mirë kundër taktikave që përdorin borgjezia dhe revizionistët. Kjo përvojë i ndihmon ato të zhvillojnë më sukses luftën kundër armiqve, të rritin vigjilencën, të ngrenë vazhdimisht nivelin ideologjik e politik

të anëtarëve të partisë, t'i armatosin ata me teorinë marksiste-leniniste. Lufta revolucionare i ka mësuar partitë marksiste-leniniste të forcojnë lidhjet me masat, të futen në shtresat e ndryshme shoqërore dhe t'i organizojnë ato, të shfrytëzojnë e të kombinojnë drejt punën legale dhe ilegale në luftë me shfaqjet e legalizmit e të liberalizmit borgjez, si dhe me ato të sektarizmit të ngushtë e të punës së mbyllur.

Përballë veprimtarisë së koordinuar të imperialistëve dhe të revizionistëve kundër marksizëm-leninizmit dhe luftës revolucionare të proletariatit e të popujve, forcimi i mëtejshëm i unitetit të lëvizjes marksiste-leniniste është një nevojë e domosdoshme.

Forca e lëvizjes komuniste marksiste-leniniste ndërkombëtare qëndron në drejtësinë e ideve për të cilat lufton dhe në unitetin e saj. Partitë marksiste-leniniste në luftën e tyre udhëhiqen nga mësimet e klasikëve tanë të mëdhenj, shfrytëzojnë trashëgiminë e pasur dhe të gjithanshme të Kominternit, mbështeten në përvojën e luftës së tyre kundër tradhtisë revizioniste, mbajnë parasysh përvojën negative të partive që degjeneruan në revizionizëm. Gjithë këto mësimet e kjo përvojë janë një thesar shumë i madh ideologjik, politik, organizativ, teorik e praktik, për të kalitur e forcuar partitë dhe lëvizjen marksiste-leniniste në çdo drejtim.

Një kontribut me vlerë për forcimin e unitetit të lëvizjes marksiste-leniniste japin takimet dhe bisedimet ndërmjet partive motra. Kështu përfitohej nga përvoja e njëri-tjetrit, arrihet në vlerësime të përbashkëta të situatave e në unitet mendimi e veprimi. Përvoja e një partie nuk mund të zëvendësojë përvojën e shumë partive, përkundrazi, janë përvojat e të gjitha partive marksiste-leniniste që e bëjnë lëvizjen të pathyeshme.

Partia e Punës e Shqipërisë, duke u qëndruar besnike parimeve të internacionalizmit proletar, është përpjekur e do të përpiqet kurdoherë të japë kontributin e vet për forcimin e unitetit të lëvizjes marksiste-leniniste dhe të bashkëpunimit ndërmjet partive motra.

Partia jonë e Punës e ka për nder që, në luftën e madhe e historike për çështjen e marksizëm-leninizmit, të revolucionit e të socializmit, qëndron krah për krah me partitë e tjera marksiste-leniniste, që janë reparte të barabarta të lëvizjes revolucionare të klasës punëtoare. Komunistët shqiptarë dhe mbarë populli ynë çmojnë së tepërmi solidaritetin, dashurinë, dhe besimin që tregojnë ndaj Partisë së Punës dhe Shqipërisë socialiste partitë motra marksiste-leniniste, proletariati dhe popujt revolucionarë e liridashës. Këto janë një përkrahje dhe një inkurajim i fuqishëm për ne. Partia dhe populli ynë në çdo rrethanë e në çdo situatë do të luftojnë për t'i kryer me nder detyrat e tyre kombëtare e ndërkombëtare, për të ndërtuar me sukses socializmin në Shqipëri dhe për të mbrojtur me zjarr çështjen revolucionare të proletarëve e të popujve.

Të dashur shokë,

Sukseset që ka arritur populli ynë nën udhëheqjen e Partisë janë të mëdha, betejat e fituara janë madhështore. Ato dëshmojnë se populli

ynë ka fuqi të pashtershme, se ai është optimist e i vendosur të ndërmarë beteja të reja për ta bërë jetën e tij më të lumtur, për ta lartësuar akoma më shumë emrin e Atdheut të tij socialist, për të forcuar lirinë e pavarësinë, pushtetin popullor që lindi në flakët e revolucionit.

Është ky realitet i mrekullueshëm, është uniteti i pathyeshëm i popullit me Partinë, është pjekuria, guximi dhe vendosmëria e komunistëve që u japin siguri e garanci popullit e Partisë se objektivat që do të caktojë ky Kongres do të arrihen e do të tejkalohen.

Entuziazmi që kanë ngjallur Projektdirektivat e planit të shtatë pesëvjeçar, mobilizimi i masave punonjëse për realizimin e detyrave të këtij viti, rezultatet inkurajuese që po arrihen, e, mbi të gjitha, përkrahja unanime, e vendosur dhe e zjarrtë që njerëzit tanë i japin politikës së brendshme e të jashtme të Partisë, tregojnë se i gjithë vendi është i gatshëm dhe i mobilizuar për të ecur më besim e vendosmëri në rrugën ku na udhëheq Partia, për të arritur fitore të reja.

Këtë vrull revolucionar, këtë dashuri të pafund për Partinë tonë të lavdishme, këtë besim të patundur në të ardhmen le t'i kthejmë, të dashur shokë e shoqe, në një forcë të madhe lëvizëse për të realizuar detyrat në të gjitha fushat, për të kapërcyer të gjitha vështirësitë që do të na dalin, për t'i forcuar e konsoliduar më tej fitoret tona, bazat e pathyeshme të socializmit në Shqipëri.

Rroftë Kongresi i 8-të i Partisë!

Rroftë populli heroik, i talentuar e punëtor shqiptar!

Rroftë Partia e Punës e Shqipërisë, udhëheqësjja e urtë, trime dhe e sprovuar, organizatorja e të gjitha fitoreve tona në rrugën e ndritur të ndërtimit socialist!

Lavdi marksizëm-leninizmit!

Raporti i shokut Enver Hoxha u dëgjua me interesim të veçantë dhe me vëmendje të madhe. Ai u ndërpre shpesh herë nga duartrokitje, brohoritje e ovacione të zjarrta të të gjithë delegatëve. Shpesh në sallë buçitnin thirrjet «Rroftë Partia e Punës së Shqipërisë», «Rroftë shoku Enver Hoxha», «Parti — Enver jemi gati kurdoherë», «Lavdi Marksizëm-leninizmit», «Rroftë internacionalizmi proletar», «Rrofshin partitë marksiste-leniniste» etj. Delegatët ngriheshin në këmbë dhe brohorisnin për unitetin e çeliktë Parti-popull, për fitoret e Partisë e të popullit tonë, për proletariatin ndërkombëtar dhe për popujt që janë ngritur në revolucion e luftojnë me vendosmëri kundër superfuqive, — imperializmit amerikan, socialimperializmit sovjetik e atij kinez, kundër revizionizmit e reaksionit.